


বোঁঠাকুরানীর হাট।

উপন্যাস।



শ্রীরবীন্দ্রনাথ ঠাকুর।

প্রণীত।



কলিকাতা

আদি ব্রাহ্মসমাজ বস্ত্রে

শ্রীকালিদাস চক্রবর্তী দ্বারা

মুদ্রিত ও প্রকাশিত।



শ্রাব ১৮৭৪ শক।

214

উপসংহার ।

বিভা উদয়াদিত্যের সহিত কাশী চলিয়া গেল । সেই
খানে দান, ধ্যান, দেবসেবা ও তাহার ভ্রাতার সেবার
জীবন কাটাইতে লাগিল । রামমোহন যতদিন বাঁচিয়া
ছিল, তাহাদের সঙ্গে ছিল । সীতারামও সপরিবারে কাশীতে
আসিয়া উদয়াদিত্যের আশ্রয় গ্রহণ করিল ।

চন্দ্রদ্বীপের যে হাটের সম্মুখে বিভার নৌকা লাগিয়াছিল,
অব্যাপি সেই হাটের নাম রহিয়াছে—

“বৌ-ঠাকুরাণীর হাট ।”

সমাপ্ত ।

উপহার ।

শ্রীমতী সৌদামিনী দেবী
শ্রীচরণেবু ।

দিদি,

তোমার স্নেহের কোলে আমার স্নেহের ধন
করিব্ব অর্পণ ।

বিমল প্রশান্ত মুখে ফুটিবে স্নেহের হাস
দেখিবারে আশ ।

সুদূর প্রবাস হতে আজি বহু দিন পরে
আসিতেছ ঘরে,

হৃদয়ে দাঁড়ায়ে আছি উপহার ল'য়ে করে
সমর্পণ তরে ।

কাছে থাকি দূরে থাকি, দেখ আর নাই শোখ,
শুধু স্নেহ দাও ;

স্নেহ ক'রে ভাল থাক,' স্নেহ দিতে ভাল বাস'
কিছু নাহি চাও !

দূরে থেকে কাছে থাক,' আপনি হৃদয় তাহা
জানিবারে পায় !


স্বদূর প্রবাস হ'তে স্নেহের বাতাস এসে
লাগে যেন গায় !

এত আছে, এত দাঁও, কথাটি নাহিক কও,
—স্নেহ-পারাবার,—

প্রভাত শিশির সম নীরবে পরাণে মম
বরে স্নেহ ধার !

তব স্নেহ চারি পাশে কেবল নীরবে ভাসে
সৌরভের প্রায়,

নীরবে বিমল হাসি, উষার কিরণ রাশি,
প্রাণেরে আগায় !



বৌ-ঠাকুরাণীর হাট ।

প্রথম পরিচ্ছেদ ।

চন্দ্রদ্বীপের (আধুনিক বাথরগঞ্জ) রাজধানী মাধব-
পাশাতে আজ বিবম সমারোহ । পথে পথে আলোক-
বৃক্ষের শ্রেণী চলিয়াছে । লোকের অত্যন্ত ভিড় ; সকলেরই
দেহে লোহিত বস্ত্র, মুখে হাস্য, অত্যন্ত ব্যস্ত ভাব ।
চারিদিকে অসংখ্য ছোট ছোট নদী নালার উপরে দীপের
আলো ও সন্ধ্যাতারার ছায়া একত্রে নৃত্য করিতেছে ।
লোহিত পাল তুলিয়া, লোহিত নিশান উড়াইয়া, দীপ
মালায় সজ্জিত হইয়া নৌকা আনাগোনা করিতেছে ।
দ্বারে দ্বারে মঙ্গল-ঘট, আম্রশাখা, কদলী বৃক্ষ । রাজ-
পথে স্থানে স্থানে উচ্চ মাচার উপর নহবৎ বসিয়াছে ।
ছোট ছোট ছেলেরা পথে আজ অতি সংযত ভাবে চলি-
তেছে, পিতা মাতারা তাহাদিগকে যথাসাধ্য ভাল কাপড়

পরাইয়াছে, ও তাহার। আপনাদিগকে এক একটা মস্ত লোক মনে করিতেছে। গৃহদ্বারে দীপ জলিতেছে ও বাতায়নের ছিদ্রমধ্য দিয়া কুলবধূদের কৌতূহলপূর্ণ চোক জলিতেছে। চারিদিকে ফুলের মালা ঝুলিতেছে; হুল্লুর ধ্বনি উঠিতেছে; রাজকর্শ্চরীরা ছুটিতেছে; কোলাহলের দীমা নাই।

দীপালোকিত, মাল্যশোভিত, উৎসবময়, কোলাহলময়, আহুত অনাহুত অভ্যাগতে পরিপূর্ণ, রাজবাটির প্রাঙ্গণে রক্ত বস্ত্র-পরিহিত সৈন্য সকল শ্রেণীবদ্ধ হইয়া দণ্ডায়মান। সেনাপতি পটুগীজ ফর্গাণ্ডিজ অশ্বারোহণ করিয়া তোরণের সম্মুখে সৈন্যদিগকে পর্য্যবেক্ষণ করিতেছেন। তাঁহার উন্মুক্ত তলবারীতে চতুর্দিকস্থ দীপালোক ঠিকরিয়া পড়িতেছে। চন্দ্রদ্বীপের রাজ-কার্য্যে প্রবেশ করিয়া অবধি তিনি যুদ্ধের আশ্বাদ প্রাপ্ত হন নাই। মাঝে মাঝে এই-রূপ উৎসবের সময় সৈন্যসামন্ত অস্ত্র শস্ত্র লইয়া নাড়াচাড়া করিয়া, উল্লাস-সূচক তোপ ও অশ্বের হেঁচাপ্রতি শুনিয়া তাঁহার মনটা একটু স্তস্ত থাকে। বাকী সমস্ত বৎসরটা একজন অল্পবয়স্ক বাঙ্গালী রাজার সভায় বসিয়া, রাজার ভাঁড়ের ভাঁড়ামী শুনিয়া, হাই তুলিয়া কাটিয়া যায়।

আজ চন্দ্রদ্বীপের রাজা রামচন্দ্র রায়ের বিবাহ। কুলীন-শ্রেষ্ঠ বংশীধর মজুমদারের কন্যার সহিত সম্বন্ধ হইয়াছে। রাজধানীতেই বাস। রাত্রি দুই প্রহরের সময় বিবাহের লগ্ন।

রাজার বয়স একুশ বৎসর । ক্ষীণদেহ, গৌরবর্ণ, কমলীয় মূর্তি । আজ পট্টবস্ত্র পরিধান করিয়াছেন । শরীর চন্দনে চর্চিত । গলায় হীরার কণ্ঠী, হীরার হার । হাতে হীরার বালা । শরীর হীরামণিকে পূর্ণ ।

ক্রমে ক্রমে সন্ধ্যা অতীত হইতে লাগিল । আতশবাজি দেখিতে সমস্ত দেশের লোক বাজবাটির সম্মুখস্থ মাঠে সমবেত হইয়াছে । নিমজ্জিতগণ গৃহমধ্যে থাকিয়া নৃত্য, গীত দেখিতেছে শুনিতেছে । বিবাহের লগ্ন নিকটবর্তী হইল, অস্তঃপুর হইতে ভল্লুপনি উঠিল, বাদ্য সবলে বাজিয়া উঠিল । রাজার স্বর্ণমুক্তাখচিত চতুর্দোল প্রাঙ্গণে আসিয়া দাঁড়াইল । যাত্রার সময় আসিয়াছে । সহস্র সহস্র প্রজা রাজাকে দেখিবার জন্য ছ্যারের নিকটে একেবারে ঝুঁকিয়া পড়িল । দ্বাররক্ষকেরা পথ পরিষ্কার রাখিবার জন্য বিষম কোলাহল উত্থাপিত করিল ।

আলুথালু চুলে মলিন বদনে শীর্ণ স্নান এক রমণী বিষম ভিড়ের মধ্য দিয়া ঘোরতর আগ্রহের সহিত একেবারে ছ্যারের নিকটে গিয়া উপস্থিত হইল । এতক্ষণ সে কাহারো নিকট হইতে বাধা পায় নাই । তাহার অনিবার্য আগ্রহের ভাব দেখিয়া সকলেই সঙ্কুচিত হইয়া তাহাকে পথ ছাড়িয়া দিয়াছিল । সহসা একজন দ্বার-রক্ষক তাহার হাত ধরিল, সহসা তাহার চমক ভাঙ্গিল, তাহার চৈতন্য হইল । অসহায় ভাবে কৰুণ নেত্রে চারিদিকে একবার

চাহিয়া দেখিল। সহসা তাহার নিজের অবস্থা যেন মনে পড়িল। একেবারে লজ্জায় মরিয়া গেল। কোথায় যাইবে যেন ভাবিয়া পাইল না। ঘোমটা খুলিয়া গিয়াছিল, জানিতে পারে নাই, শশবাস্ত হইয়া ঘোমটা মাথায় তুলিয়া দিল। সহস্র লোক আছে, কিন্তু কেহ কি নাই তাহাকে দয়া করিবে? ফণাণ্ডিজ্ অদূরে দাঁড়াইয়া ছিল, সে দ্রুতপদে ছুটিয়া আসিয়া কহিল “কাপুরুষ বাঙ্গালি, স্ত্রীলোকের গায়ে হাত দিস্!” দ্বাররক্ষককে দুই হাতে ধরিয়া এমন বিষম নাড়া দিল যে, তাহাব মাথার খুলির মধ্যে কুম্ভুমি বাজিতে লাগিল ও তাহার শরীর-কাগাগার-স্থিত প্রাণ-পুরুষ দেহের দেয়ালে দুই দণ্ড ধরিয়া অনবরত মাথা-ঠোকাঠুকি করিতে লাগিল। রাজপরিবারের মল্ল বলীশ্রেষ্ঠ রামমোহন আগে আগে যাইতেছিল, সহসা ছুটিয়া ফিরিয়া আসিয়া দ্বারীদের প্রতি এমনি চোক পাকাইয়া দাঁড়াইল, যে তাহারা তৎক্ষণাৎ দ্বার ছাড়িয়া দিল, রমণী রাজবাটিতে প্রবেশ করিল। সঙ্গে সঙ্গে রামমোহন ও ফণাণ্ডিজ্ প্রবেশ করিল।

মালাচন্দন বিভূষিত রাজা তাঁহার কক্ষে বসিয়াছিলেন। নিকটে রমাই ভাঁড় বসিয়াছিল। তাঁহারা উভয়েই উষ্ণ-বার উদ্যোগ করিতেছিলেন। সহসা রমণী ছুটিয়া গিয়া রাজার পা জড়াইয়া ভূতলে পড়িল। রামমোহনের দুই চক্ষু জলে পূরিয়া আসিল, সে চক্ষু মুছিয়া ঘর হইতে

সরিয়া দাঁড়াইল । রাজা শশব্যস্ত হইয়া দাঁড়াইয়া জিজ্ঞাসা করিলেন, “কে তুই ? ভিখারিণী, ভিক্ষা চাহিতে আসিয়া-
ছিস্ !” রমণী নত মুখ তুলিয়া অশ্রুপূর্ণ নেত্রে রাজার
মুখের দিকে চাহিয়া কহিল—“আজ্ঞা না মহারাজ, আমি
আমার সর্বস্ব দান করিতে আসিয়াছি।”

দ্বিতীয় পরিচ্ছেদ ।

রাত্রি অনেক হইয়াছে । গ্রীষ্মকাল । বাতাস বন্ধ হইয়া
গিয়াছে । গাছের পাতাটিও নড়িতেছে না । যশোহরের
যুবরাজ, প্রতাপাদিত্যের জ্যেষ্ঠ পুত্র, উদয়াদিত্য তাঁহার
শয়ন-গৃহের বাতায়নে বসিয়া আছেন । তাঁহার পার্শ্বে
তাঁহার স্ত্রী সুরমা ।

সুরমা কহিলেন, “প্রিয়তম, সহ করিয়া থাক, ধৈর্য্য
ধরিয়া থাক । এক দিন সূখের দিন আসিবে।”

উদয়াদিত্য কহিলেন, “এককালে তাহাই মনে হইত
বটে, কিন্তু এখন সে ভুল ভাবিয়াছে । আমি ত আর কোন
সুখ চাই না, আমি চাই, আমি যাহা আছি তাহা না হই,

সে স্মৃথ কি এ জীবনে পাইব ? আমি চাই, বিধাতা যাহা করিয়াছেন, তাহা না যদি করিতেন। আমি চাই, আমি রাজপ্রাসাদে না যদি জন্মাইতাম, যুবরাজ না যদি হইতাম, যশোহর-অধিপতির ক্ষুদ্রতম তুচ্ছতম প্রজার প্রজা হইতাম, তাঁহার জ্যেষ্ঠ পুত্র, তাঁহার সিংহাসনের তাঁহার সমস্ত ধন মান যশ প্রভাব গৌরবের একমাত্র উত্তরাধিকারী না হইতাম ! কি ভপস্যা করিলে এ সমস্ত অতীত উণ্টাইয়া যাইতে পারে।”

স্মরমা অতি কাতর হইয়া যুবরাজের দক্ষিণ হস্ত দুই হাতে লইয়া চাপিয়া ধরিলেন, ও তাঁহার মুখের দিকে চাহিয়া ধীরে ধীরে দীর্ঘ নিশ্বাস ফেলিলেন। যুবরাজের ইচ্ছা পূরাইতে প্রাণ দিতে পারেন, কিন্তু প্রাণ দিলেও এ ইচ্ছা পূরাইতে পারিবেন না, এই দুঃখ !

যুবরাজ কহিলেন, “স্মরমা, রাজার ঘরে জন্মিয়াছি বলিয়াই স্মৃথী হইতে পারিলাম না। রাজার ঘরে সকলে বুঝি কেবল উত্তরাধিকারী হইয়া জন্মায়, সম্ভান হইয়া জন্মায় না। পিতা ছেলেবেলা হইতেই আমাকে প্রতি মুহূর্ত্তে পরখ করিয়া দেখিতেছেন, আমি তাঁহার উপার্জিত যশোমান বজায় রাখিতে পারিব কি না, বংশের মুগ উজ্জল করিতে পারিব কি না, রাজ্যের গুরুভার বহন করিতে পারিব কি না ! আমার প্রতি কার্য্য, প্রতি অঙ্গভঙ্গী তিনি পরীক্ষার চক্ষে দেখিয়া আসিতেছেন, স্নেহের

চক্ষে নহে। আত্মীয় বর্গ, মন্ত্রী, রাজসভাসদগণ, প্রজারা আমার প্রতি কণা প্রতি কাজ খুঁটিয়া খুঁটিয়া লইয়া আমার ভবিষ্যৎ গণনা করিয়া আসিতেছে। সকলেই ঘাড় নাড়িয়া কহিল—না, আমার দ্বারা এ বিপদের রাজ্য রক্ষা হইবে না। আমি নির্যোধ, আমি কিছুই বুঝিতে পারি না। সকলেই আমাকে অবহেলা করিতে লাগিল, পিতা আমাকে ঘৃণা করিতে লাগিলেন। আমার আশা একেবারে পরিত্যাগ করিলেন। একবার খোঁজও লইতেন না।”

স্রমার চথে জল আসিল। সে কহিল “আ—হা! কেমন করিয়া পারিত!” তাহার দুঃখ হইল, তাহার রাগ হইল, সে কহিল “তোমাকে যাহারা নির্যোধ মনে করিত তাহারাই সকলে নির্যোধ!”

উদয়াদিত্য দ্বিষৎ হাসিলেন, স্রমার চিবুক ধরিয়া তাহার রোষে আরক্তিম মুখ থানি নাড়িয়া দিলেন। মুহূর্ত্তের মধ্যে গভীর হইয়া কহিলেন।

“না স্রমা, সত্য সত্যই আমার রাজ্যশাসনের বুদ্ধি নাই। তাহার যথেষ্ট পরীক্ষা হইয়া গেছে। আমার যখন ষোল বৎসর বয়স, তখন মহারাজ কাজ শিখাইবার জন্য হোসেনখালী পরগণার ভার আমার হাতে সমর্পণ করেন। ছয় মাসের মধ্যেই বিষম বিশৃঙ্খলা ঘটিতে লাগিল। রাজনা কমিয়া গেল, প্রজারা আশীর্বাদ করিতে লাগিল, কন্মচারীরা আমার বিরুদ্ধে রাজার নিকটে অভিযোগ

করিতে লাগিল। রাজসভার সকলেরই মত হইল, যুবরাজ প্রজাদের যখন অত প্রিয়পাত্র হইয়া পড়িয়াছেন, তখনি বুঝা যাইতেছে উঁহার দ্বারা রাজ্য-শাসন কখনো ঘটিতে পারিবে না। সেই অবধি মহারাজ আমার পানে আর বড় একটা তাকাইতেন না। বলিতেন “ও কুলদ্বার ঠিক রায়গড়ের খুড়া বসন্তরায়ের মত হইবে, সেতার বাজাইয়া নাচিয়া বেড়াইবে ও রাজ্য অধঃপাতে দিবে।”

স্বরমা আবার কহিলেন, “প্রিয়তম, সহ্য করিয়া থাক, ধৈর্য্য ধরিয়া থাক। হাজার হউন, পিতা ত বটেন। আজ কাল রাজ্য-উপার্জন, রাজ্য-বুদ্ধির এক মাত্র দুর্শাশয় তাঁহার সমস্ত হৃদয় পূর্ণ রহিয়াছে, সেখানে স্নেহের ঠাঁই নাই। যতই তাঁহার আশা পূর্ণ হইতে থাকিবে, ততই তাঁহার স্নেহের রাজ্য বাড়িতে থাকিবে।” ✽

যুবরাজ কহিলেন “স্বরমা, তোমার বুদ্ধি তীক্ষ্ণ, দূরদর্শী, তোমার বুদ্ধির উপর আশ্রয় করিয়া আমার হৃদয় অনেক দিনের পরে মাথা তুলিতে পারিয়াছে। কিন্তু এইবারে তুমি ভুল বুঝিয়াছ। একত, আশার শেষ নাই; দ্বিতীয়তঃ, পিতার রাজ্যের সীমা যতই বাড়িতে থাকিবে, রাজ্য যতই লাভ করিতে থাকিবেন, ততই তাহা হারাইবার ভয় তাঁহার মনে বাড়িতে থাকিবে; রাজ-কার্য্য যতই গুরুতর হইয়া উঠিবে, ততই আমাকে তাহার অনুপস্থিত মনে করিবেন।”

স্বরমা ভুল বুঝে নাই, ভুল বিশ্বাস করিত মাত্র; বিশ্বাস

বুদ্ধিকেও লজ্জন করে । সে এক মনে আশা করিত, এই রূপই যেন হয় !

“চারিদিকে কোথাও বা কুপাদৃষ্টি কোথাও বা অবহেলা সহ করিতে না পারিয়া আমি মাঝে মাঝে পালাইয়া রায়-গড়ে দাদা মহাশয়ের কাছে যাইতাম । পিতা বড় একটা খোঁজ লইতেন না । আঃ, সে কি পরিবর্তন ! সেখানে গাছ পালা দেখিতে পাইতাম, গ্রামবাসীদের কুটীরে যাইতে পারিতাম, দিবানিশি রাজবেশ পরিয়া থাকিতে হইত না । তাহা ছাড়া, জান ত, যেখানে দাদা মহাশয় থাকেন, তাহার ত্রিসীমায় বিবাদ ভাবনা বা কঠোর গাভীর্ঘ্য তিষ্ঠিতে পারে না । গাহিয়া বাজাইয়া, আমোদ করিয়া চারিদিক পূর্ণ করিয়া রাখেন । চারিদিকে উল্লাস, সম্ভাব, শান্তি । সেই থানে গেলেই আমি ভুলিয়া যাইতাম যে, আমি যশোহরের যুবরাজ । সে কি আরামের ভুল ! অবশেষে আমার বয়স যখন ১৮ বৎসর, একদিন রায়গড়ে বসন্তের বাতাস বহিতেছিল, চারিদিকে সবুজ কুঞ্জবন, ও সেই বসন্তে আমি রুক্মিণীকে দেখিলাম ।”

স্মরমা বলিয়া উঠিল “ও কথা অনেক বার শুনিয়াছি !”
উদয়াদিত্য : “আর একবার শুন । মাঝে মাঝে এক একটা কথা প্রাণের মধ্যে দংশন করিতে থাকে, সে কথা ওলা যদি বাহির করিয়া না দিই, তবে আর বাঁচিব কি করিয়া ? সেই কথাটা তোমার কাছে এখনো বলিতে

লজ্জা করে, কষ্ট হয়, তাই বারবার করিয়া বলি, যে দিন আর লজ্জা করিবে না, কষ্ট হইবে না, সে দিন বুনিব আমার প্রায়শ্চিত্ত শেষ হইল, সে দিন আর বলিব না।”

সুরমা, “কিসের প্রায়শ্চিত্ত প্রিয়তম ? তুমি যদি পাপ করিয়া থাক ত সে পাপের দোষ, তোমার দোষ নহে। আমি কি তোমাকে জানি না ? অন্তর্ঘামী কি তোমার মন দেখিতে পান না ?”

উদয়াদিত্য বলিতে লাগিলেন, “কল্পিণীর বয়স আমার অপেক্ষা তিন বৎসরের বড়। সে একাকিনী বিধবা। দাদা মহাশয়ের অনুগ্রহে সে রাণগড়ে বাস করিতে পাইত। মনে নাই, সে আমাকে কি কোশলে প্রথমে আকর্ষণ করিয়া লইয়া গেল। তখন আমার মনের মধ্যে মধ্যাহ্নের কিরণ জ্বলিতেছিল। এত প্রথর আলো যে, কিছুই ভাল করিয়া দেখিতে পাইতেছিলাম না, চারিদিকে জগৎ জ্যোতির্ধর বাস্পে আবৃত। সমস্ত রক্ত যেন মাথায় উঠিতেছিল; কিছুই আশ্চর্য্য কিছুই অসম্ভব মনে হইত না; পথ, বিপথ, দিক্ বিদিক সমস্ত এক আকার ধারণ করিয়াছিল। ইহার পূর্বেও আমার এমন কখন হয় নাই, ইহার পরেও আমার এমন কখন হয় নাই। জগদীশ্বর জানেন, তাঁহার কি উদ্দেশ্য সাধন করিতে এই ক্ষুদ্র দুর্বল বুদ্ধিহীন হৃদয়ের বিরুদ্ধে এক দিনের জন্য সমস্ত জগৎকে যেন উত্তেজিত করিয়া দিয়াছিলেন; বিশ্বচরাচর যেন একতন্ত্র হইয়া আমার

এই ক্ষুদ্র হৃদয়টিকে মুহূর্তে বিপথে লইয়া গেল। মুহূর্তমাত্র—
আর অধিক নয়; সমস্ত বহির্জগৎকে মুহূর্তস্থায়ী এক নিদা-
ক্রণ আঘাত, আর মুহূর্তেব মধ্যে একটি ক্ষীণ হৃদয়ের মূল
বিদীর্ণ হইয়া গেল, বিছাৎবেগে সে ধূলিকে আলিঙ্গন করিয়া
পড়িল। তাহার পরে যখন উঠিল তখন ধূলিধূসরিত, স্নান;
সে ধূলি আর মুছিল না, সে মলিনতার চিহ্ন আর উঠিল না।
আমি কি করিয়াছিলাম, বিধাতা, যে পাপে এক মুহূর্তের
মধ্যে আমার জীবনের সমস্ত শুভকে কালী করিলে?
দিনকে রাত্রি করিলে? আমার হৃদয়ের পুষ্প-বনে মালতী
ও জুঁই ফলের মুগুণ্ডলিও যেন লঙ্ঘায় কালো হইয়া গেল।”

বলিতে বলিতে উদয়াদিত্যের গৌরবর্ণ মুখ রক্তবর্ণ হইয়া
উঠিল, আয়ত নেত্র অধিকতর বিস্ফারিত হইয়া উঠিল, মাথা
হইতে পা পর্যাস্ত একটি বিছাৎ শিখা কাঁপিয়া উঠিল। স্মরমা
হর্ষে, গর্ষে, কষ্টে কহিল “আমার মাথা খাও, ওকথা থাক্।”

উদয়াদিত্য। “ধীরে ধীরে যখন রক্ত শীতল হইয়া
গেল; জগৎকে মুখ হইতে যখন প্রথর আলোকময় আবরণ
উন্মুক্ত হইয়া গেল; সকলি যখন যথাযথ পরিমাণে দেখিতে
পাইলাম; যখন গাহ পালা, কুটার, বন, লোকজন চোখে
পড়িতে লাগিল; যখন জগৎকে উষ্ণ, ঘৃণিত-মস্তিষ্ক, রক্ত-
নয়ন মাতালের কুজ্জ্বলিকাময় ঘূর্ণ্যমান স্বপ্ন দৃশ্য বলিয়া মনে
না হইয়া প্রকৃত কার্য্যক্ষেত্র বলিয়া মনে হইল, তখন মনের
কি অবস্থা। কোথা হইতে কোথায় পতন! শত সহস্র

লক্ষ ক্রোশ পাতালের গহবরে, অন্ধ—অন্ধতর—অন্ধন্তম
 রজনীর মধ্যে একেবারে পলক না ফেলিতে পড়িয়া গেলাম।
 দাদা মহাশয় স্নেহভরে ডাকিয়া লইয়া গেলেন; তাঁহার
 কাছে মুখ দেখাইলাম কি করিয়া? কতবার তাঁহার কাছে
 সমস্ত কথা বলিয়া ফেলিবার উদ্যোগ করিয়াছিলাম;
 বলিলেও করুণ-হৃদয় তিনি আমাকে এক তিল স্থগা করিতেন
 না, তিনি আমাকে হৃদয়ের সহিত মার্জনা করিতেন, আমার
 শির আত্মাণ করিয়া আমাকে তাঁহার স্নেহের বলে বলীয়ান
 করিতেন, তাঁহার বিমল স্নেহের ধারায় আমাকেও বিমল
 করিয়া তুলিতেন। কিন্তু বিধবা কুস্ত্রিণীর কলঙ্ক পাছে
 প্রকাশ হইয়া পড়ে সেই অন্য কিছুতেই বলিতে পারিলাম
 না। কিন্তু সেই অবধি আমাকে রায়গড় ছাড়িতে হইল।
 দাদানহাশয় আমাকে না দেখিলে থাকিতে পারেন না;
 আমাকে ডাকিয়া পাঠাইতেন। আমার এমনি ভয় করিত
 যে, আমি কোন মতেই যাইতে পারিতাম না। তিনি স্বয়ং
 আমাকে ও ভগিনী বিভাকে দেখিতে আসিতেন। অভিমান
 নাই, কিছুই নাই। জিজ্ঞাসাও করিতেন না, কেন যাই
 নাই। আমাদের দেখিতেন, আমোদ উল্লাস করিতেন ও
 চলিয়া যাইতেন।”

উদয়াদিত্য ঈষৎ হাস্য করিয়া অভিশয় মুহু কোমল
 প্রেমে তাঁহার বড় বড় চোক দুটি প্রাবিত করিয়া সুরমার
 মুখের দিকে চাহিলেন। সুরমা বুঝিল, এইবার কি কথা

আসিতেছে। মুখ নত হইয়া আসিল ; ঈষৎ চঞ্চল হইয়া পড়িল। যুবরাজ দুই হস্তে তাহার দুই কপোল ধরিয়া নত মুখ ধানি তুলিয়া ধরিলেন ; অধিকতর নিকটে গিয়া বসিলেন ; মুখ ধানি নিজের স্কন্ধে ধীরে ধীরে রাখিলেন। কটিদেশ বামহস্তে বেঠন করিয়া ধরিলেন ; ও গভীর প্রশান্ত প্রেমে তাহার কপাল চুষন করিয়া বলিলেন—

“তার পর কি হইল, সুরমা, বল দেখি ? এই বুদ্ধিতে দীপ্যমান, স্নেহ প্রেমে কোমল, হাস্যে উজ্জ্বল ও প্রশান্ত ভাবে বিমল মুখধানি কোথা হইতে উদয় হইল ? আমার সে গভীর অন্ধকার ভাবিবে আশা ছিল কি ? তুমি আমার উষা, আমার আলো, আমার আশা, কি মায়ামন্ত্রে সে আঁধার দূর করিলে ?” যুবরাজ বারবার সুরমার মুখ চুষন করিলেন। সুরমা কিছুই কথা কহিল না, আনন্দে তাহার চোখ জলে পূরিয়া আসিল ; যুবরাজ কহিলেন,

“এতদিনের পরে আমি যথার্থ আশ্রয় পাইলাম। তোমার কাছে প্রথম শুনিলাম যে, আমি মির্কোদ নই, তাহাই বিশ্বাস করিলাম, তাহাই বুদ্ধিতে পারিলাম। তোমার কাছে শিখিলাম বুদ্ধি অন্ধকারময় ক্ষুদ্র গলির মত বাঁকাচোরা উঁচুনিচু নহে, রাজপথের ন্যায় সরল, সমতল, প্রশস্ত। পূর্বে আমি আপনাকে ঘৃণা করিতাম, আপনাকে অবহেলা করিতাম ; কোন কাজ করিতে সাহস করিতাম না। মন যদি বলিত, ইহাই ঠিক, আত্ম-সংশয়ী সংস্কার বলিত, উহা ঠিক না

হইতেও পারে। যে যেরূপ ব্যবহার করিত তাহাই সহিয়া থাকিতাম, নিজে কিছু ভাবিতে চেষ্টা করিতাম না। এত দিনের পরে আমার মনে হইল, আমি কিছু, আমি কেহ। এত দিন আমি অগোচর ছিলাম, তুমি আমাকে বাহির করিয়াছ, সুরমা, তুমি আমাকে আবিষ্কার করিয়াছ। এখন আমার মন যাহা ভাল বলে, তৎক্ষণাৎ তাহা আমি সাধন করিতে যাই। তোমার উপর আমার এমন বিশ্বাস আছে যে, তুমি যখন আমাকে বিশ্বাস কর, তখন আমিও আমাকে নির্ভয়ে বিশ্বাস করিতে পারি। ওই স্কুমার শরীরে এত বল কোথায় ছিল যাহাতে আমাকেও তুমি বলীয়ান করিয়া তুলিয়াছ? ”

পর্যন্ত-শিখর হইতে নূতন বর্ষার জল পাইয়া নদী যেমন ঈষৎ স্ফীত হইয়া উঠে, নবোদিত চন্দ্রের জ্যোৎস্না-হস্তের মৃদু আদর পাইলে সমুদ্র যেমন ঈষৎ উথলিয়া উঠে, সুরমা তেমনি ঈষৎ গর্কে উদ্বেলিত হইয়া নেত্র বিস্ফারিত করিয়া কহিল “আমার কিসের বল প্রভু? তুমি আমাকে ভালবাস’ তাহাই আমার বল। তুমি আমাকে এত বলীয়ান করিয়াছ যে, আজ তুমি যদি কোন মুহূর্ত্তে, আপনাকে শ্রান্ত দুর্বল মনে কর, তবে আমিও তোমাকে আশ্রয় দিতে পারি। সেত তোমারই বল!”

কি অপরিদ্রীম নির্ভরের ভাবে সুরমা স্বামীর বক্ষ বেষ্টন করিয়া ধরিল! কি সম্পূর্ণ আত্ম-বিসর্জী দৃষ্টিতে তাঁহার

মুখের দিকে চাহিয়া রহিল ! তাহার চোখ কহিল “আমার আর কিছুই নাই কেবল তুমি আছ, তাই আমার সব আছে !”

বাল্যকাল হইতে উদয়াদিত্য আত্মীয় স্বজনের উপেক্ষা সহিয়া আসিতেছেন, মাঝে মাঝে এক এক দিন নিস্তব্ধ গভীর রাত্রে স্রমার নিকট সেই শতবার কথিত পুরাণে জীবন কাহিনী থণ্ডে থণ্ডে সোপানে সোপানে আলোচনা করিতে তাঁহার বড় ভাল লাগে ।

উদয়াদিত্য কহিলেন, “এমন করিয়া আর কত দিন চলিবে স্রমা ? এদিকে রাজসভায় সভাসদগণ কেমন এক প্রকার কুপাদৃষ্টিতে আমার প্রতি চায়, ওদিকে অন্তঃ-পুরে মা তোমাকে লাঞ্ছনা করিতেছেন ; দাস দাসীরা পর্য্যন্ত তোমাকে তেমন মানে না । আমি কাহাকেও ভাল করিয়া কিছু বলিতে পারি না, চূপ করিয়া থাকি, সহ্য করিয়া যাই । তোমার তেজস্বী স্বভাব, কিন্তু তুমিও নীরবে সহিয়া যাও । যখন তোমাকে স্থখী করিতে পারিলাম না, আমা হইতে তোমাকে কেবল অপমান আর কষ্টই সহ্য করিতে হইল, তখন আমাদের এ বিবাহ না হইলেই ভাল ছিল !”

স্রমা,—“সে কি কথা নাথ ? এই সময়েইত স্রমাকে আবশ্যক । স্রমের সময় আমি তোমার কি করিতে পারিলাম ? স্রমের সময়ত স্রমা বিলাসের দ্রব্য, খেলিবার ক্রিয়া, সকল হুঃখ অতিক্রম করিয়া আমার মনে এই

সুখ জাগিতেছে যে, আমি তোমার কাজে লাগিতেছি, তোমার জন্য হুঃখ সহিতে যে অতুল আনন্দ আছে, সেই আনন্দ উপভোগ করিতেছি। কেবল হুঃখ এই, তোমার সমুদায় কষ্ট কেন আমি বহন করিতে পারিলাম না ?”

উদয়াদিত্য অনেক ক্ষণ কিছু না বলিয়া স্রমার মুখের দিকে গম্ভীর গম্ভীর প্রেমে চাহিয়া রহিলেন, যেন তাহার বিস্তৃত উদার অতলস্পর্শ মুখভাবের মধ্যে তাহার সমস্ত হৃদয়কে মগ্ন করিয়া দিলেন, কেবল সন্ধান করিয়া দেখিতে চান সে ভাবের সীমা কোথায় ?

উদয়াদিত্য কহিলেন, “দেখ স্রমা। পূর্বে আমি নিতান্ত দুর্বল ছিলাম, কোন কাজ করিতে পারিতাম না ; ইতস্ততঃ করিয়া, সংশয় করিয়া জীবন কাটাইয়া দিতাম। চারি দিক হইতে প্রজাদের রোদন শুনিতে পাইতাম ; পিতা অসহায়ের সর্বস্ব কাড়িয়া লইতেন, আমি নীরবে সকলি দেখিতাম ; তাহার মনে করিত, বশোহরের যুবরাজ নিশ্চয় তাহাদের উপকার করিতে পারেন ; কাঁদিয়া আমার কাছে আসিত, আমার পা জড়াইয়া ধরিত। তাহার জানিত না একটি দীনতম, হেয়তম প্রজা তাহাদের যে উপকার করিতে পারে, যুবরাজ তাহার অধিক কিছু করিতে পারে না। তাহাদের জন্য যে প্রাণপণ করিব এমন বল ছিল না, এমন সাহস ছিল না। ভয় হইত ; মনে হইত, পিতা যাহা করিতেছেন, তাহার বিরুদ্ধে ইন্দ্র যমও অগ্রসর হইতে পারেন না।

তাহা ছাড়া আমার মনে হইত, আমাব বুদ্ধি নাই, আমি কি বুঝিতে কি বুঝিয়াছি, কি করিতে কি করিব!—কিন্তু এখন আর তাহা হয় না। এখন আর চুপ করিয়া থাকিতে পারি না। সে দিন শুনা গেল, মহারাজ মন্ত্রণা করিয়াছেন, সহস্রা রাত্রিযোগে লোক পাঠাইয়া মাণিক-পুরের জমিদাবের জমী কাড়িয়া লইবেন ; সে এক ক্ষুদ্র ভূস্বামী ; এক ক্ষুদ্র জমিদারী ছাড়া তাহার আর কিছু নাই ; দুর্ব্বলের সর্ব্বস্ব যায় দেখিয়া আমি আর থাকিতে পারিলাম না, তৎক্ষণাৎ গিয়া তাহাকে সাবধান করিয়া দিলাম। তাহাব পূর্বে আর এক দিন মহারাজ স্থির করিয়াছিলেন, মতিগঞ্জের গৌরীচরণ ঘোষকে প্রাসাদে ডাকিয়া আনিবেন ও সেই অবসরে তাহার একমাত্র কন্যাকে কাড়িয়া আনিয়া প্রিয়পাত্র বুদ্ধ মহেশ পালিতের সহিত তাহার বিবাহ দিবেন। পূর্বে গৌরীচরণকে পিতা এই বিবাহে অনুরোধ করিয়াছিলেন সে সম্মত হয় নাই। আমি তৎক্ষণাৎ তাহাকে পত্র লিখিয়া পাঠাইলাম, সে ঘর বাড়ি উঠাইয়া পলাইয়া গেল। একরূপে প্রতিপদে পিতার ইচ্ছার বিরুদ্ধাচরণ করিয়া পিতার প্রতি কাজে বাধা দিয়া আমাকে চলিতে হইতেছে। পূর্বে জন্মে না জানি কি পাপ করিয়া-ছিলাম যে, এজন্মেও অদৃষ্ট আমাকে বলপূর্ব্বক পাপে প্রবৃত্ত করিতেছে। কিন্তু আমি কি করিব? আমি কিছু-ভেই থাকিতে পারি না। যাহা আমার অন্যায় বলিয়া

মনে হয়, যেমন করিয়া হউক, তাহার প্রতিকার না করিয়া আমি থাকিতে পারি না ; আমাকে কে যেন টানিয়া লইয়া যায় ! কিছু ভাবিতে অবসর দেয় না। কাজ সম্পন্ন করিয়া তোমার কাছে আসি, তখন আমার মনটা নানা তর্ক উঠাইতে থাকে, অবশেষে তোমার প্রশংসা শুনিলে, তোমার হর্ব-স্বচক হাদি দেখিলে আমি নিশ্চিন্ত হই, মন পরিত্যক্ত হইয়া যায়। জগদীশ্বর, আমাকে এমন অবস্থায় ফেলিলে কেন ? পিতা আমার প্রভু, আমায় গুরু, তাঁহাকে প্রণাম করি, তিনি আমাকে মার্জনা করুন, আমি তাঁহার বিরুদ্ধে কিছু করিতে চাই না। তিনি আমাকে সহস্র যত্ন দিয়া দিন, আমাকে যে জীবন দিয়াছেন সে জীবন কাড়িয়া লউন আমি একটি কথাও কহিব না। দেব, ইহা জানিও আমি পিতৃদ্বেষী নই, আমি অধর্মদ্রোহী। যদি অধর্মকে বাধা দিতে গিয়া পিতার বিরুদ্ধাচরণ করিয়া থাকি, তবে জগদীশ্বর, তুমি সে পাপের জন্ত দায়ী, কারণ, আমি নিজে কিছু করি নাই, তুমি আমাকে যেখানে লইয়া গিয়াছ সেই খানেই গিয়াছি, যে কাজে প্রবৃত্ত করাইয়াছ, তাহাই করিয়াছি এবং

দয়া হৃদীকেশ হৃদিস্থিতেন

যথা নিযুক্তোহস্মি তথা করোমি।”

বলিতে বলিতে ঘোড়হস্ত উদয়াদিভ্যের উর্দ্ধমুখী দুই চক্ষু দিয়া দর দর অশ্রুধারা বহিয়া যাইতে লাগিল। স্তরমা

ঈশ্বর সরিয়া গিয়া অবাঞ্ছিত হইয়া স্বামীর মুখের দিকে চাহিয়া রছিল; গর্কে তাহার প্রশস্ত হৃদয় বিস্ফারিত হইয়া গেল। মনে মনে কহিল, আমি বুঝি পূর্বজন্মে উমার স্ত্রী তপস্যা করিয়াছিলাম, তাই এ জন্মে মহাদেবের স্ত্রী স্বামী পাইয়াছি।

যুবরাজ ক্রিয়াক্ষণ চূপ করিয়া থাকিয়া কহিলেন, “আমি নিজের জন্ত তেমন ভাবি না। সকলি সহিয়া গিয়াছে। কিন্তু আমার জন্ত তুমি কেন অপমান সহ করিবে? তুমি যথার্থ স্ত্রীর মত আমার দুঃখের সময় সাহায্য দিয়াছ, শ্রান্তির সময় বিশ্রাম দিয়াছ, কিন্তু আমি স্বামীর মত তোমাকে অপমান হইতে লজ্জা হইতে রক্ষা করিতে পারিলাম না। তোমার পিতা শ্রীপুর-রাজ আমার পিতাকে প্রধান বলিয়া না মানাতে, আপনাকে যশোহরছত্রের অধীন বলিয়া স্বীকার না করাতে পিতা তোমার প্রতি অবহেলা দেখাইয়া নিজের প্রধানত্ব বজায় রাখিতে চান। তোমাকে কেহ অপমান করিলে তিনি কানেই আনেন না। তিনি মনে করেন, তোমাকে যে পুত্রবধূ করিয়াছেন, ইহাই তোমার পক্ষে যথেষ্ট। এক একবার মনে হয়, আর পারিয়া উঠি না, সমস্ত পরিত্যাগ করিয়া তোমাকে লইয়া চলিয়া যাই। এত দিনে হয় ত যাইতাম, তুমি কেবল আমাকে ধরিয়া রাখিয়াছ।”

• রাজি গভীর হইল। অনেকগুলি সন্ধ্যার তারা অন্ত

গেল, অনেকগুলি গভীর রাত্রে তাবা উদ্ভিত হইল। প্রাকার-তোরণস্থিত প্রহরীদের পদশব্দ দূর হইতে শুনা যাইতেছে। সমুদয় জগৎ স্তব্ধ। নগরের সমুদয় প্রদীপ নিবিয়া গিয়াছে; গৃহদ্বার রুদ্ধ; দৈবাৎ ছ একটা শৃগাল ছাড়া একটি জনপ্রাণীও নাই। উদয়াদিত্যের শয়ন কক্ষের দ্বার রুদ্ধ ছিল। সহসা বাহির হইতে কে ছুয়ারে আঘাত করিতে লাগিল। শশব্যস্ত যুবরাজ ছুয়ার খুলিয়া দিলেন। “কেন? বিভা? কি হইয়াছে? এত রাত্রে এখানে আনিয়াছ কেন?”

পাঠকেরা পূর্বেই অবগত হইয়াছেন বিভা উদয়াদিত্যের ভগিনী। বিভা কহিল—“এতক্ষণে বুঝি সর্বনাশ হইল!” সুরমা ও উদয়াদিত্য এক সঙ্গে জিজ্ঞাসা করিয়া উঠিলেন, “কেন কি হইয়াছে?” বিভা ভয়কম্পিত স্বরে চুপি চুপি কি কহিল। বলিতে বলিতে আর থাকিতে পারিল না, কাঁদিয়া উঠিল, কহিল—“দাদা কি হবে?” উদয়াদিত্য কহিলেন “আমি তবে চলিলাম।” বিভা বলিয়া উঠিল “না না তুমি যাইও না।”

উদয়াদিত্য। “কেন বিভা?”

বিভা “পিতা যদি জানিতে পারেন? তোমার উপরে যদি রাগ করেন?”

সুরমা কহিল, “ছিঃ বিভা; এ সময়ে কি তাহা ভাবিবার সময়?”

উদয়াদিত্য বস্ত্রাদি পরিয়া কটিবন্ধে তরবারী বাঁধিয়া প্রস্থানের উদ্যোগ করিলেন । বিভা তাঁহার হাত ধরিয়া কহিল “দাদা, তুমি যাইও না, তুমি লোক পাঠাইয়া দাও, আমার বড় ভয় করিতেছে ।”

উদয়াদিত্য কহিলেন—“বিভা, এখন বাধা দিস্নে; আর সময় নাই।” এই কথা বলিয়া তৎক্ষণাৎ বাহির হইয়া গেলেন ।

বিভা সুরমার হাত ধরিয়া কহিল “কি হবে ভাই ? বাবা যদি টের পান ?”

সুরমা কহিল “আর কি হবে ? স্নেহের বোধ করি আর কিছু অবশিষ্ট নাই । যেটুকু আছে সেটুকু গেলেও বড় একটা ক্ষতি হইবে না ।”

বিভা কহিল “না ভাই, আমার বড় ভয় করিতেছে । পিতা যদি কোন প্রকার হানি করেন । যদি দণ্ড দেন ?”

সুরমা দীর্ঘ নিশ্বাস ফেলিয়া কহিল—“আমার বিশ্বাস—সংসারে যাহার কেহই সহায় নাই, নারায়ণ তাহার অধিক সহায় । হে প্রভু, তোমার নামে কলঙ্ক না হয় যেন, এ বিশ্বাস আমার তাজ্জিও না !”

তৃতীয় পরিচ্ছেদ ।

মন্ত্রী কহিলেন “মহারাজ, কাজটা কি ভাল হইবে ?”

প্রতাপাদিত্য জিজ্ঞাসা করিলেন “কোন কাজটা ?”

মন্ত্রী কহিলেন “কাল বাহা আদেশ করিয়াছিলেন ।”

প্রতাপাদিত্য বিরক্ত হইয়া কহিলেন “কাল কি আদেশ করিয়াছিলাম ?”

মন্ত্রী কহিলেন “আপনার পিতৃব্য সম্বন্ধে ।”

প্রতাপাদিত্য আরো বিরক্ত হইয়া কহিলেন “আমার পিতৃব্য সম্বন্ধে কি ?”

মন্ত্রী কহিলেন “মহারাজ আদেশ করিয়াছিলেন, যখন বসন্তরায় যশোহবে আসিবার পথে সিমুলতলীর চাটিতে আশ্রয় লইবেন তখন—”

প্রতাপাদিত্য অকুণ্ঠিত করিয়া কহিলেন “তখন কি ? কথাটা শেষ করিয়াই ফেল !”

মন্ত্রী -- “তখন দুই জন পাঠান গিয়া—”

প্রতাপ—‘হাঁ ।’

মন্ত্রী “তাঁহাকে নিহত করিবে ।”

প্রতাপাদিত্য রুষ্ট হইয়া কহিলেন “মন্ত্রী হঠাৎ তুমি শিশু হইয়াছ না কি ? একটা কথা শুনিতে দশটা প্রশ্ন করিতে হয় কেন ? কথাটা মুখে আনিতে বুঝি সঙ্কোচ হইতেছে ।

এখন বোধ করি, তোমার রাজকাৰ্য্যে মনোযোগ দিবার বয়স গিয়াছে এখন পরকাল চিন্তার সময় আসিয়াছে । এত দিন অবসর প্রার্থনা কর নাই কেন ?”

মন্ত্রী—“মহারাজ আমার ভাবটা ভাল বুঝিতে পারেন নাই ।”

প্রতাপ—“বিলক্ষণ বুঝিতে পারিয়াছি । কিন্তু একটা কথা তোমাকে জিজ্ঞাসা করি, আমি যে কাজটা করিতে পারি, তুমি তাহা মুখে আনিতেও পার না ? তোমার বিবেচনা করা উচিত ছিল, আমি যখন এ কাজটা করিতে যাইতেছি, তখন অবশ্য তাহার গুরুতর কারণ আছে ; আমি অবশ্য ধৰ্ম্ম অধৰ্ম্ম সমস্তই ভাবিয়াছিলাম ।”

মন্ত্রী—“আজ্ঞা মহারাজ, আমি—”

প্রতাপ—“চুপ কর, আমার সমস্ত কথাটা শোন আগে । আমি যখন এ কাজটা—আমি যখন নিজের পিতৃব্যকে খুন করিতে উদ্যত হইয়াছি, তখন অবশ্য তোমার চেয়ে ঢের বেশী ভাবিয়াছি । এ কাজে অধৰ্ম্ম নাই । আমার ব্রত এই—এই যে স্বেচ্ছেরা আমাদের দেশে আসিয়া অনাচার আরম্ভ করিয়াছে, যাহাদের অত্যাচারে আমাদের দেশ হইতে সনাতন আৰ্য্য ধৰ্ম্ম লোপ পাইবার উপক্রম হইয়াছে, ক্ষত্রিয়েরা মোগলকে কন্যা দিতেছে, হিন্দুরা আচারভ্রষ্ট হইতেছে, এই স্বেচ্ছদের আমি দূর করিয়া দিব, আমাদের আৰ্য্য-ধৰ্ম্মকে রাহর গ্রাস হইতে মুক্ত করিব । এই ব্রত

সাধন করিতে অনেক বলের আবশ্যক। আমি চাই, সমস্ত বঙ্গদেশের রাজারা আমার অধীনে এক হই। যাহারা যবনের মিত্র, তাহাদের বিনাশ না করিলে ইহা সিদ্ধ হইবে না। পিতৃব্য বসন্তরায় আমার পূজ্যপাদ, কিন্তু যথার্থ কথা বলিতে পাপ নাই, তিনি আমাদের বংশের কলঙ্ক। তিনি আপনাকে স্নেহের দাস বলিয়া স্বীকার করিয়াছেন। এমন লোকের সহিত প্রতাপাদিত্য রায়ের কোন সম্পর্ক নাই। ক্ষত হইলে নিজের বাহকে কাটিয়া ফেলা যায়; আমার ইচ্ছা রায় বংশের ক্ষত, বঙ্গদেশের ক্ষত ঐ বসন্ত রায়কে কাটিয়া ফেলিয়া রায়বংশকে বাঁচাই, বঙ্গদেশকে বাঁচাই।”

মন্ত্রী কহিলেন “এ বিষয়ে মহারাজের সহিত আমার অন্য মত ছিল না।”

প্রতাপাদিত্য কহিলেন—“হাঁ ছিল। ঠিক কথা বল। এখনো আছে। দেখ মন্ত্রী, যতক্ষণ আমার মতের সহিত তোমার মত না মিলিবে, ততক্ষণ তাহা প্রকাশ করিও; সে সাহস যদি না থাকে তবে এ পদ তোমার নহে। সন্দেহ থাকে ত বলিও; আমাকে বুঝাইবার অবসর দিও। তুমি মনে করিতেছ নিজের পিতৃব্যকে হনন করা সকল সময়েই পাপ। ‘না’ বলিও না, ঠিক এই কথাই তোমার মনে জাগিতেছে। ইহার উত্তর আছে। পিতার অমুরোধে ডুগ নিজের মাতাকে বধ করিয়াছিলেন, ধর্ম্মের অমুরোধে আমি আমার পিতৃব্যকে বধ করিতে পারি না?”

এ বিষয়ে—অর্থাৎ ধর্ম অধর্ম বিষয়ে যথার্থই মন্ত্রী কোন মতামত ছিল না। মন্ত্রী যতদূর তলাইয়াছিলেন, রাজা ততদূর তলাইতে পাবেন নাই। মন্ত্রী বিলক্ষণ জানিতেন যে, উপস্থিত বিষয়ে তিনি যদি সন্দোচ দেখান, তাহা হইলে রাজা আপাততঃ কিছু কষ্ট হইবেন বটে, কিন্তু পরিণামে তাহার জন্য মনে মনে দলষ্ট হইবেন। একরূপ না করিলে মন্ত্রীর বিরুদ্ধে এককালে-না-এককালে রাজার সন্দেহ ও আশঙ্কা জন্মিতে পাবে।

মন্ত্রী কহিলেন “আমি বলিতেছিলাম কি, দিল্লীশ্বর এ সংবাদ শুনিয়া নিশ্চয়ই ক্রুষ্ট হইবেন।”

প্রতাপাদিত্য জলিয়া উঠিলেন “হাঁ হাঁ ক্রুষ্ট হইবেন ! ক্রুষ্ট হইবার অধিকার ত সকলেরই আছে। দিল্লীশ্বর ত আর আমার ঈশ্বর নহেন। তিনি কষ্ট হইলে থরথর করিয়া কাঁপিতে থাকিবে এমন জীব যোষ্ট আছে মানসিংহ আছে, বীরবল আছে, আমাদের বন্দরায় আছে আর সম্প্রতি দেখিতেছি ভূমিও আছে ; কিন্তু আরব্যৎ সকলকে মনে করিও না।”

মন্ত্রী হাসিয়া কহিলেন “আজ্ঞা, মহারাজ ফাকা রোষকে আমিও বড় একটা ডরাই না, কিন্তু তাহার সঙ্গে সঙ্গে ঢাল তলোয়ার যদি থাকে, তাহা হইলে ভাবিতে হয় বৈ কি ! দিল্লীশ্বরের রোষের অর্থ পঞ্চাশ সহস্র সৈন্য।”

প্রতাপাদিত্য ইহার একটা সজ্জত না দিতে পারিয়া

কহিলেন “দেখ মজ্জী, দিল্লীখরের ভয় দেখাইয়া আমাকে কোন কাজ হইতে নিরস্ত করিতে চেষ্টা করিও না, তাহাতে আমার নিতান্ত অপমান বোধ হয়। তোমার ছোট মেয়েটি যখন দুধ খাইতে আপত্তি করিবে তখন তাহাকে দিল্লীখরের ভয় দেখাইও, প্রতাপাদিত্যকে নহে।”

মজ্জী কহিলেন “প্রজারা জানিতে পারিলে কি বলিবে?”

প্রতাপ ‘জানিতে পারিলে ত?’

মজ্জী—‘এ কাজ অধিক দিন ছাপা রহিবে না।

আবার কোন সন্তর না পাইয়া প্রতাপাদিত্য বলিয়া উঠিলেন ‘মাথার উপরে দিল্লীখরের ভয় ও পদতলে প্রজাদের ভয়, এই দুই ভয়ের মধ্যে থাকিয়া যাহাকে কাজ করিতে হয়, সে দাসাছুদাসের রাজত্বের বিড়ম্বনা কেন?’

মজ্জী কহিলেন—‘এ সংবাদ রাষ্ট্র হইলে সমস্ত বঙ্গদেশ আপনাদের বিরোধী হইবে। যে উদ্দেশ্যে এই কাজ করিতে চান, তাহা সমূলে বিনাশ পাইবে। আপনাকে জাতিচ্যুত করিবে*ও বিবিধ নিগ্রহ সহিতে হইবে।’

প্রতাপ—‘দেখ, মজ্জী, আবার তোমাকে বলিতেছি, আমি যাহা করি তাহা বিশেষ ভাবিয়া করি। অতএব আমি কাজে প্রবৃত্ত হইলে মিছামিছি কতকগুলি ভয় দেখাইয়া আমাকে নিরস্ত করিতে চেষ্টা করিও না; আমি শিশু নহি। প্রতিপদে আমাকে বাধা দিবার জন্য, তোমাকে আমার নিজের শৃঙ্খল স্বরূপে রাখি নাই।’

মন্ত্রী চুপ করিয়া গেলেন । তাঁহার প্রতি রাজার হুইটি আদেশ ছিল । এক যতক্ষণ মতের অমিল হইবে ততক্ষণ প্রকাশ করিবে, দ্বিতীয়তঃ বিরুদ্ধ মত প্রকাশ করিয়া রাজাকে কোন কাজ হইতে নিরস্ত করিবার চেষ্টা করিবে না । মন্ত্রী আজ পর্য্যন্ত এই দুই আদেশের ভালরূপ সামঞ্জস্য করিতে পারেন নাই ।

মন্ত্রী কিয়ৎক্ষণ পরে আবার কহিলেন “মহারাজ, দিল্লী-ধর—” প্রতাপাদিত্য জলিয়া উঠিয়া কহিলেন,—“আবার দিল্লীধর ? মন্ত্রি, দিনের মধ্যে তুমি যতবার দিল্লীধরের নাম কর, ততবার যদি জগদীশ্বরের নাম করিতে, তাহা হইলে পরকালের কাজ গুছাইতে পারিতে । যতক্ষণে না আমার এই কাজটা শেষ হইবে, ততক্ষণ দিল্লীধরের নাম মুখে আনিও না । যখন আজ বিকালে এই কাজ সমাধার সংবাদ পাইব, তখন আসিয়া আমার কানের কাছে তুমি মনের সাপ মিটাইয়া দিল্লীধরের নাম জপিও ! ততক্ষণ একটু আত্মসংযম করিয়া থাক !”

মন্ত্রী আবার চুপ করিয়া গেলেন । দিল্লীধরের কথা বন্ধ করিয়া কহিলেন—“মহারাজ, যুবরাজ উদয়াদিত্য—”

রাজা কহিলেন—“দিল্লীধর গেল, প্রজারা গেল ; এখন অবশেষে সেই স্ত্রৈণ বালকটার কথা বলিয়া ভয় দেখাইবে না কি ?”

মন্ত্রী কহিলেন “মহারাজ, আপনি অত্যন্ত ভুল বুঝি-

তেছেন। আপনার কাজে বাধা দিবার অভিপ্রায় আমার মূলেই নাই।”

প্রতাপাদিত্য ঠাণ্ডা হইয়া কহিলেন “তবে কি বলিতে-
ছিলে বল!”

মন্ত্রী বলিলেন “কাল রাত্রে যুবরাজ সহসা অস্বারোহণ
করিয়া একাকী চলিয়া গিয়াছেন, এখনো ফিরিয়া আসেন
নাই।”

প্রতাপাদিত্য বিরক্ত হইয়া কহিলেন, “কোন দিকে
গেছেন?”

মন্ত্রী কহিলেন “পূর্বাভিমুখে।”

প্রতাপাদিত্য দাঁতে দাঁতে লাগাইয়া কহিলেন “হত-
ভাগা, মরণের পথে কবে যাইবে! কখন গিয়াছিল?”

মন্ত্রী “কাল প্রায় অর্দ্ধরাত্রের সময়।”

প্রতাপাদিত্য কহিলেন “শ্রীপুরের জমীদারের মেয়ে কি
এখানেই আছে?”

মন্ত্রী ‘আজ্ঞা হাঁ!’

প্রতাপাদিত্য “সে তাহার পিত্রালয়ে থাকিলেই ত ভাল
হয়।”

মন্ত্রী কোন উত্তর দিলেন না।

প্রতাপাদিত্য কহিলেন “উদয়াদিত্য কোন কালেই
রাজ্যের মত ছিল না। ছেলেবেলা হইতে প্রজাদের সঙ্গেই
তাহার মেশামেশি। আমার সন্তান যে এমন হইবে তাহা

কে জানিত ? সিংহশায়ককে কি, কি করিয়া সিংহ হইতে হয়, তাহা শিখাইতে হয় ? তবে কিনা, নরনাগাং মাতুল ক্রমঃ । বোধ করি সে তাহার মাতামহদের স্বভাব পাইয়াছে । তাহার উপরে আবার সম্প্রতি ত্রীপুরের ঘরে বিবাহ দিয়াছি ; সেই অবধি বালকটা একেবারে অধঃপাতে গিয়াছে । ঈশ্বর করুন, আমার কনিষ্ঠ পুত্রটি যেন উপযুক্ত হয়, আমি যাহা আরম্ভ করিয়াছি তাহা শেষ যদি না করিতে পারি তাহা হইলে মবিবার সময়ে ভাবনা না থাকিয়া যায় যেন ! সে কি তবে এখনো ফিরিয়া আসে নাই ? ”

মন্ত্রী—“না মহাবাজ ! ”

ভূমিতে পদাঘাত করিয়া প্রতাপাদিত্য কহিলেন “এক জন প্রহরী তাহার সঙ্গে কেন যায় নাই ? ”

মন্ত্রী “এক জন যাইতে প্রস্তুত হইয়াছিল, কিন্তু তিনি বাবণ করিয়াছিলেন । ”

প্রতাপ—“অদৃশ্য ভাবে, দূরে দূরে থাকিয়া কেন যায় নাই ? ”

মন্ত্রী “তাহা কোন প্রকার অন্যায় সন্দেহ করে নাই । ”

প্র—“সন্দেহ করে নাই ! মন্ত্রী, তুমি কি আমাকে বুঝাইতে চাও, তাহার বড় ভাল কাজ করিয়াছিল ? এই যে ঘটনাটি ঘটিল, এক জন অপরিণামদর্শী, নির্বোধ জৈণ বালক একটা জীর পরামর্শ শুনিয়া কোথায় চলিয়া গেল,

তুমি কি বলিতে চাও ইহার জন্য পৃথিবীতে কেহই দায়ী নহে, সকলেই নির্দোষী? মজি, তুমি আমাকে অনর্থক বাহা-তাহা একটা বুঝাইতে চেষ্টা পাইও না। প্রহরীরা কর্তব্য কাজে বিশেষ অবহেলা করিয়াছে। সে সময় দ্বারে কাহারো ছিল ডাকিয়া পাঠাও। এই ঘটনাটির জন্য যদি আমার কোন একটা ইচ্ছা বিফল হয়, তবে আমি সর্বনাশ করিব। মজি, তোমারও তাহা হইলে ভয়ের সম্ভাবনা আছে। আমার কাছে তুমি প্রমাণ করিতে আসিয়াছ, এ কাজের জন্য কেহই দায়ী নয়! তবে এ দায় তোমার!

প্রতাপদিত্য প্রহরীদিগকে ডাকাইয়া পাঠাইলেন। কিয়ৎক্ষণ গভীর ভাবে থাকিয়া জিজ্ঞাসা করিলেন “হাঁ। দিল্লীখরের কথা কি বলিতেছিলে?”

মন্ত্রী “শুনিলাম আপনার নামে দিল্লীখরের নিকট অভিযোগ করিয়াছে।”

প্রতাপ “কে? তোমাদের ঘুবরাজ উদয়াদিত্য না কি?”

মন্ত্রী “আজ্ঞা, মহারাজ, এমন কথা বলিবেন না। কে করিয়াছে সন্ধান পাই নাই।”

প্রতাপ “যেই করুক, তাহার জন্য অধিক ভাবিও না, আমিই দিল্লীখরের বিচারকর্তা, আমিই তাহার দণ্ডের উদ্যোগ করিতেছি। সে পাঠানেরা এখনো ফিরিল না? উদয়াদিত্য এখনো আসিল না? শীঘ্র প্রহরীদিগকে ডাক।”

চতুর্থ পরিচ্ছেদ ।

বিজ্ঞান পথ দিয়া বিদ্যাবেগে যুবরাজ অশ্ব ছুটাইয়া চলি-
য়াছেন। অন্ধকার রাত্রি, কিন্তু পথ দীর্ঘ সরল প্রশস্ত
বলিয়া কোন ভয়ের আশঙ্কা নাই। স্তব্ধ রাত্রি অশ্বের
ক্লুরের শব্দে চারিদিক প্রতিধ্বনিত হইতেছে, দুই একটি
কুকুর ঘেউ ঘেউ করিয়া ডাকিয়া উঠিতেছে, দুই একটা শৃগাল
চকিত হইয়া পথ ছাড়িয়া বাঁশঝাড়ের মধ্যে লুকাইতেছে।
আলোকের মধ্যে আকাশে তারা ও পথপ্রাস্তস্থিত গাছে
জোনাকি ; শব্দের মধ্যে কিঁকি পোকাকার অবিশ্রাম শব্দ ;
মল্লযোঁর মধ্যে কঙ্কাল-অবশেষ একটি ভিখারী বৃদ্ধা গাছের
তলায় ঘুমাইয়া আছে। পাঁচ ক্রোশ পথ অতিক্রম করিয়া,
যুবরাজ পথ ছাড়িয়া একটা মাঠে নামিলেন। অশ্বের বেগ
অপেক্ষাকৃত সংযম করিতে হইল। দিনের বেলায় বৃষ্টি
হইয়াছিল, মাটি ভিজা ছিল, পদে পদে অশ্বের পা বসিয়া
যাইতেছে। যাইতে যাইতে সম্মুখের পায়ে ভর দিয়া অশ্ব
তিনবার পড়িয়া গেল। শ্রান্ত অশ্বের নাসারন্ধ্র বিস্তারিত,
মুখে ফেন, পশ্চাতের পদদ্বয়ের ঘর্ষণে ফেন জন্মিয়াছে, পঞ্জ-
বের ভিতর হইতে একটা শব্দ বাহির হইতেছে, সর্কাজ ঘর্ষে
প্লাবিত। এদিকে দারুণ গ্রীষ্ম, বাতাসের লেশ মাত্র নাই,
এখনো অনেকটা পথ অবশিষ্ট রহিয়াছে। বহুতর জলা
ও চষা মাঠ অতিক্রম করিয়া যুবরাজ অবশেষে একটা কাঁচা

রাস্তায় আসিয়া উপস্থিত হইলেন। অন্ধকে আবার দ্রুত-বেগে ছুটাইলেন। একবার তাহার স্কন্ধ চাপড়াইয়া উৎসাহ দিয়া ডাকিলেন,—“সুগ্রীব”—সে চকিতে একবার কান খাড়া করিয়া বড় বড় চোখে বন্ধিম দৃষ্টিতে প্রভুর দিকে চাহিল, একবার গ্রীবা বাঁকাইয়া হ্রেষ্মাঙ্গনি করিল ও সবলে মুখ নামাইয়া রাশ শিথিল করিয়া লইল ও গ্রীবানত করিয়া উদ্ধ-শ্বাসে ছুটিতে লাগিল। দুই পার্শ্বের গাছপালা চোখে ভাল দেখা যাইতেছে না, আকাশে চাহিলে মনে হইতেছে যেন দলে দলে নক্ষত্রেরা অগ্নি-ফুলিঙ্গের মত সববেগে উড়িয়া যাইতেছে এবং সেই স্তব্ধ-বায়ু আকাশে বায়ু তরঙ্গিত হইয়া কানের কাছে সাঁ সাঁ করিতে লাগিল। রাজি যখন তৃতীয় প্রহর, লোকালয়ের কাছে শৃগালেরা যখন প্রহর ডাকিয়া গেল, তখন যুবরাজ, শিমুলতলীর চটির ছায়ায় আসিয়া দাঁড়াইলেন, তাহার অশ্ব তৎক্ষণাৎ গতজীবন হইয়া ভূমিতে পড়িয়া গেল। নামিয়া তাহার পিঠ চাপড়াইলেন, তাহার মুখ তুলিয়া ধরিলেন, “সুগ্রীব” বলিয়া কতবার ডাকিলেন, সে আর নড়িল না। দীর্ঘনিশ্বাস ফেলিয়া যুবরাজ দ্বারে গিয়া আঘাত করিলেন। বার বার আঘাতের পর চটীর অধ্যক্ষ দ্বার না খুলিয়া জানলার মধ্য দিয়া কহিল “এতরাত্রে ভূমি কেগো?” দেখিল একজন সশস্ত্র যুবক দ্বারে দাঁড়াইয়া।

যুবরাজ কহিলেন “একটা কথা জিজ্ঞাসা করিব দ্বার খোল।”

সে কহিল, “দ্বার খুলিবার আবশ্যক কি, বাহা জিজ্ঞাসা কবিবার আছে, জিজ্ঞাসা কর না !”

যুবরাজ জিজ্ঞাসা করিলেন—“রায়গড়ের রাজা বসন্তরায় এখানে আছেন ?”

সে কহিল—“আজ্ঞা সন্ধ্যার পর তাঁহার আসিবার কথা ছিল বটে, কিন্তু এখনো আসেন নাই। আজ বোধ করি, তাঁহার আসা হইল না।”

যুবরাজ দুইটি মুদ্রা লইয়া শব্দ করিয়া কহিলেন “এই লও।”

সে তাড়াতাড়ি ছুটিয়া আসিয়া দ্বারখুলিয়া মুদ্রা দুইটি লইল। তখন যুবরাজ তাহাকে কহিলেন “বাপু, আমি একবারটি তোমার চটি অহুসন্ধান করিয়া দেখিব, কে কে আছে।”

চটি-রক্ষক সন্দিগ্ধ ভাবে কহিল “না মহাশয়, তাহা হইবেক না।”

উদয়াদিত্য কহিলেন “আমাকে বাধা দিও না। আমি রাজবাটির কর্মচারী। দুই জন অপরাধীর অহুসন্ধানে আসিয়াছি।”

এই কথা বলিয়াই তিনি প্রবেশ করিলেন। চটি-রক্ষক তাঁহাকে আর বাধা দিল না। তিনি সমস্ত অহুসন্ধান করিয়া দেখিলেন। না বসন্ত রায়, না তাঁহার অহুচর, না কোন পার্থানকে দেখিতে পাইলেন। কেবল দুই জন

স্বপ্নোথিতা প্রৌঢ়া চাঁচাইয়া উঠিল “আ মরণ মিসে, অমন করিয়া তাকাইতেছি কেন?”

চট্টা হইতে বাহির হইয়া পথে দাঁড়াইয়া যুবরাজ ভাবিতে লাগিলেন। একবার মনে করিলেন যে, ভালই হইয়াছে, হয়ত আজ দৈবক্রমে তিনি আসিতে পাবেন নাই। আবাব মনে করিলেন যদি ইহাব পূর্ববর্তী কোন চটিতে থাকেন ও পাঠানোবা তাঁহার অনুসন্ধানে সেখানে গিয়া থাকে? এইরূপ ভাবিতে ভাবিতে সেই পথ বাহিয়া চলিতে লাগিলেন। কিয়দূর গিয়া দেখিলেন, বিপরীত দিক হইতে একজন অস্থারোগী আসিতেছে। নিকটে আসিলে কহিলেন “কেও? রতন নাকি?” সে অস্থ হইতে তৎক্ষণাৎ নামিয়া তাঁহাকে প্রণাম করিয়া কহিল “আজ্ঞা হাঁ। যুবরাজ আপনি এতরাত্রে এখানে যে!”

যুবরাজ কহিলেন “তাঁহার কারণ পরে বলিব। এখন বল ত দাদা মহাশয় কোথায় আছেন।”

“আজ্ঞা, তাঁহার ত চট্টাতেই থাকিবার কথা।”

“সে কি? সেখানে ত তাঁহাকে দেখিলাম না।”

সে অবাক হইয়া কহিল “৩০ জন অনুচর সমেত মহারাজ যশোর উদ্দেশে যাত্রা করিয়াছেন। আমি কায্য বশতঃ পিছাইয়া পড়িয়াছিলাম। এই চট্টাতে আজ সন্ধ্যাবেলা তাঁহার সহিত মিলিবার কথা।”

“পথে যেক্রপ কাদা, তাহাতে পলচিহ্ন থাকিবার কথা

তাহাই অনুসরণ করিয়া আমি তাঁহার অনুসন্ধানে চলিলাম ।
তোমার ঘোটক লইলাম । তুমি পদব্রজে আইস !”

পঞ্চম পরিচ্ছেদ ।

বিজয় পথের ধারে অশথ গাছের তলায় বাহকশূন্য
ভুলভ্রমিত এক শিবিকার মধ্যে বুদ্ধ বসন্তরায় বসিয়া
আছেন। কাছে আর কেহ নাই, কেবল একটি পাঠান
শিবিকার বাহিরে। একটা জনকোলাহল দূরে মিলাইয়া
গেল, বজ্রনী স্তব্ধ হইয়া গেল। বসন্তরায় জিজ্ঞাসা করি-
লেন :—

‘খা সাহেব, তুমি যে গেলে না?’

পাঠান কহিল, ‘হজুর, কি করিয়া যাইব? আপনি
আমাদের ধন প্রাণ রক্ষার জন্ত আপনার সকল অনুচর
গুলিকেই পাঠাইলেন। আপনাকে এই পথের ধারে রাত্রে
অবক্ষিত অবস্থায় ফেলিয়া যাইব, এত বড় অকৃতজ্ঞ আমাকে
ঠাহরাইবেন না। আমাদের কবি বলেন, ‘যে আমার
অপকার করে সে আমার কাছে ঋণী, পরকালে সে ঋণ
তাহাকে শোধ করিতে হইবে; যে আমার উপকার করে
আমি তাহার কাছে ঋণী, কিন্তু কোন কালে তাহার সে ঋণ
শোধ করিতে পারিব না।’

বসন্তরায় মনে মনে কহিলেন, বাহবা, লোকটাত বড় ভাল । কিছুক্ষণ বিতর্ক করিয়া পাঁকী হইতে তাঁহার টাক-বিশিষ্ট মাথাটি বাহির করিয়া কহিলেন, ‘খাঁ সাহেব তুমি বড় ভাল লোক ।’

খাঁ সাহেব তৎক্ষণাৎ এক সেলাম করিলেন । এ বিষয়ে বসন্তরায়ের সহিত খাঁ সাহেবের কিছুমাত্র মতের অনৈক্য ছিল না । বসন্তরায় মশালের আলোকে তাহার মুখ নিরীক্ষণ করিয়া কহিলেন ‘তোমাকে বড়-ঘরের লোক বলিয়া মনে হইতেছে ।’

পাঠান আবার সেলাম করিয়া কহিল ‘কেয়া তাজ্জব, মহারাজ, ঠিক ঠাহরাইয়াছেন ।’

বসন্তরায় কহিলেন “এখন তোমার কি করা হয় ?”

পাঠান নিখাস ছাড়িয়া কহিল “হজুর, দুরবস্থায় পড়িয়াছি, এখন চাপ বাস করিয়া গুজরান্ ঢালাইতে হইতেছে । কবি বলিতেছেন—হে অদৃষ্ট, তুমি যে, তৃণকে তৃণ করিয়া গড়িয়াছ, ইহাতে তোমার নিষ্ঠুরতা প্রকাশ পায় না, কিন্তু তুমি যে, অশথ গাছকে অশথ গাছ করিয়া গড়িয়া অবশেষে বড়ের হাতে তাহাকে তৃণের সহিত সমতল করিয়া শোয়াও ইহাতেই আন্দাজ করিতেছি, তোমার মনটা পাথরে গড়া ।’

বসন্তরায় নিতান্ত উল্লসিত হইয়া বলিয়া উঠিলেন ‘বাহবা, বাহবা, কবি কি কথাই বলিয়াছেন । সাহেব, যে দুইটি বয়েৎ আজ বলিলে, ঐ দুইটি লিখিয়া দিতে হইবে ।’

পাঠান ভাবিল, তাহার অদৃষ্ট স্প্রশসন্ন । বুড়া, লোক বড় সরেশ ; গরীবের বহু কাজে লাগিতে পারিবে । বসন্তরায় ভাবিলেন, আহা, এককালে যে ব্যক্তি বড়লোক ছিল আজ তাহার এমন দুরবস্থা ! চপলা লক্ষ্মীর এ বড় অভ্যাচার ! মনে মনে তিনি কিছু কাতর হইলেন, পাঠানকে কহিলেন,

‘তোমার যে রকম সুন্দর শরীর আছে, তাহাতে ত তুমি অনায়াসে সৈন্তশ্রেণীতে নিযুক্ত হইতে পার ।’

পাঠান তৎক্ষণাৎ বলিয়া উঠিল ‘হজুর পারি বৈকি ! সেইত আমাদের কাজ । আমার পিতা পিতামহেরা সকলেই তলোয়ার হাতে করিয়া মরিয়াছেন, আমরা সেই এক মাত্র সাধ আছে । কবি বলেন’—

বসন্তরায় হাসিতে হাসিতে কহিলেন ‘কবি ঘাহাই বলুন বাপু, আমার কাজ যদি গ্রহণ কর, তবে, তলোয়ার হাতে করিয়া মরিবার সাধ মিটিতেও পারে, কিন্তু সে তলোয়ার খাপ হইতে খোলা তোমার ভাগ্যে ঘটিয়া উঠিবে না । বুড়া হইয়া পড়িয়াছি, প্রজারা সুখে স্বচ্ছন্দে আছে, ভগবান করুন, আর যেন লড়াই করিবার আবশ্যক না হয় । বয়স গিয়াছে, তলোয়ার ত্যাগ করিয়াছি । এখন তলোয়ারের পরিবর্তে আর একজন আমার পাণিগ্রহণ করি-
য়াছে ।’ এই বলিয়াই পার্শ্বে শায়িত সহচরী সেতারটিকে হুট একটী বন্ধার দিয়া একবার জাগাইয়া দিলেন ।

পাঠান ঘাড় নাড়িয়া চোখ বুজিয়া কহিল, “আহা, যাহা বলিতেছেন, ঠিক বলিতেছেন। একটি বয়েৎ আছে যে, তলোয়ারে শত্রুকে জয় করা যায়, কিন্তু সঙ্গীতে শত্রুকে মিত্র করা যায়।’

বসন্তরায় বলিয়া উঠিলেন ‘কি বলিলে খাঁ সাহেব ? সঙ্গীতে শত্রুকে মিত্র করা যায় ! কি চমৎকার !’ চুপ করিয়া কিস্তিক্ষণ ভাবিতে লাগিলেন, যতই ভাবিতে লাগিলেন ততই যেন অধিকতর অবাক হইতে লাগিলেন। কিছুক্ষণ পরে বয়েৎটির ব্যাখ্যা করিয়া বলিতে লাগিলেন, ‘তলোয়ারে যে এত বড় ভয়ানক দ্রব্য তাহাতেও শত্রুর শত্রুতা নাশ করা যায় না,—কেমন করিয়া বলিব নাশ করা যায় ?—বোগীকে বধ করিয়া রোগ আরোগ্য করা সে কেমনতর আরোগ্য ? কিন্তু সঙ্গীত যে এমন মধুব জিনিষ, তাহাতে শত্রু নাশ না করিয়াও শত্রুতা নাশ করা যায়। এ কি সাধারণ কবিত্বের কথা ? বাঃ, কি তারিফ !’ বুদ্ধ এত দূর উত্তেজিত হইয়া উঠিলেন যে, শিখি চার বাহিরে পা বাগিয়া বসিলেন, পাঠানকে আরো কাছে আসিতে বলিলেন ও কহিলেন ‘তলোয়ারে শত্রুকে জয় করা যায়, কিন্তু সঙ্গীতে শত্রুকেও মিত্র করা যায়, কেমন খাঁ সাহেব ?’

পাঠান—“আজ্ঞা হাঁ হজুর।”

বসন্তরায় “তুমি একবার রায়গড়ে যাইও। আমি যশোর হইতে ফিরিয়া গিয়া তোমার যথাসাধ্য উপকার করিব।”

পাঠান উৎফুল্ল হইয়া কহিল “আপনি ইচ্ছা করিলে কি না করিতে পারেন !” পাঠান ভাবিল, একরকম বেশ গুছাইয়া লইয়াছি। জিজ্ঞাসা করিল “আপনার সেতার বাজান’ আসে ?”

বসন্তরায় কহিলেন “হঁ। ”ও তৎক্ষণাৎ সেতার তুলিয়া লইলেন। অঙ্গুলীতে মেজরাপ্ আঁটিয়া বেহাগ আলাপ করিতে লাগিলেন। মাঝে মাঝে পাঠান মাথা নাড়িয়া বলিয়া উঠিল “বাহবা ! খাসী ।” ক্রমে উত্তেজনার প্রভাবে শিবিকার মধ্যে বসিয়া থাকা’ বসন্তরায়ের পক্ষে অসাধ্য হইয়া উঠিল। তিনি উঠিয়া দাঁড়াইয়া বাজাইতে লাগিলেন। মর্যাদা গার্ভার্য্য আত্মপর সমস্ত বিস্মৃত হইলেন ও বাজাইতে বাজাইতে অবশেষে গান ধরিলেন “কেয়সে কাটোঙ্গী রয়ন, সো পিয়া বিনা” নিশীথের গভীর স্তব্ধতার সমাধি ভঙ্গ হইল। সেই ঘোর অন্ধকারের শিরায় শিরায় স্বরলহরী প্রস্রাবিত হইতে লাগিল। সেই নিদ্রা-সমুদ্রের মধ্যে জাগ্রত সঙ্গীত-তরঙ্গগুলি দূর দিগন্ত পর্য্যন্ত গিয়া শিথিল ও শ্রান্ত অঙ্গে ঘুমাইয়া পড়িতে লাগিল।

গান থামিলে পাঠান কহিল “বাঃ কি চমৎকার আওয়াজ !”

বসন্তরায় কহিলেন “তবে বোধ করি, নিস্তক রাত্রে, ধোলা মাঠে সকলের আওয়াজই মিঠা লাগে। কারুণ, গলা অনেক সাধিয়াছি বটে কিন্তু লোকে আমার আওয়াজেরত

বড় প্রশংসা করে না। তবে কি না, যিথাতা যতগুলি রোগ দিয়াছেন তাহার সকল গুলিরই একটি না-একটি ঔষধ দিয়াছেন, তেমনি যতগুলি গলা দিয়াছেন তাহার একটি না একটি শ্রোতা আছেই। আমার গলাও ভাল লাগে এমন ছোটো অর্ধাচীন আছে। নহিলে, এত দিনে, সাহেব, এ গলার দোকানপাট বন্ধ করিতাম; সেই ছোটো আনাড়ি খরিদার আছে, মাল চিনে না, তাহাদেরি কাছ হইতে বাহবা মিলে। অনেক দিন ছটাকে দেখি নাই, গীত গানও বন্ধ আছে; তাই ছুটিয়া চলিয়াছি; মনের সাথে গান শুনাইয়া, প্রাণের বোকা নামাইয়া বাড়ি ফিরিব।” বৃদ্ধের ক্ষীণজ্যোতি চোক ছুটি মেহে ও আনন্দে দীপ্যমান হইয়া উঠিল।

পাঠান মনে মনে কহিল “তোমার একটা সাধ মিটিয়াছে, গান শুনান হইয়াছে, এখন প্রাণের বোকাটা আমিই নামাইব কি? তোবা, তোবা, এমন কাজও করে! কাকেরকে মারিলে পুণ্য আছে বটে, কিন্তু সে পুণ্য এত উপার্জন করিয়াছি, যে পরকালের বিষয়ে আর বড় ভাবনা নাই, কিন্তু ইহকালের সমস্তই যে প্রকার বেবন্দোবস্ত দেখিতেছি, তাহাতে এই কাকেরটাকে না মারিয়া যদি তাহার একটা বিলিবন্দেজ করিয়া লইতে পারি, তাহাতে আপত্তি দেখিতেছি না।”

বসন্তরায় কিয়ৎক্ষণ চুপ করিয়া আর থাকিতে পারিলেন না; তাঁহার কল্পনা উত্তেজিত হইয়া উঠিল; পাঠানের

পঞ্চম পরিচ্ছেদ ৬

নিকটবর্তী হইয়া অতি চুপি চুপি কহিলেন “কাহাদের কথা বলিতেছিলাম, সাহেব, জান ? তাহারা আমার নাতি ও নাতিনী।” বলিতে বলিতে অধীর হইয়া উঠিলেন, ডাবিলেন, “আমার অলুচরেরা কখন ফিরিয়া আসিবে।” আবার সেতার লইয়া গান আরম্ভ করিলেন।

একজন অস্বাভাবিক পুরুষ নিকটে আসিয়া কহিল “আঃ বাঁচলাম। দাদা মহাশয়, পথের ধারে এত রাত্রে কাহাকে গান শুনাইতেছ ?”

আনন্দে ও বিশ্বাসে অভিভূত বসন্তরায় তৎক্ষণাৎ তাঁহাব সেতার শিবিকার উপবে বাধিয়া উদয়াদিত্যের হাত ধরিয়া নামাইলেন ও তাহাকে দৃঢ়রূপে আলিঙ্গন করিলেন। জিজ্ঞাসা করিলেন “খবর কি দাদা ? দিদি ভাল আছে ত ?”

উদয়াদিত্য কহিলেন “সমস্তই মঙ্গল।”

তখন বৃদ্ধ হাসিতে হাসিতে সেতার তুলিয়া লইলেন ও পা দিয়া তাল রাখিয়া মাথা নাড়িয়া গান আরম্ভ করিয়া দিলেন।

“বঁধুয়া অসময়ে কেন হে প্রকাশ ?

সকলি যে স্বপ্ন বলে হতেছে বিশ্বাস।

চন্দ্রাবলীর কুঞ্জে ছিলে, সেথায় ত আদর মিলে ?

এরি মধ্যে মিটিল কি হে প্রণয়েরি আশ !

এখনোত রয়েছে রাত এখনোত হয়নি প্রভাত,

• এখনো এ রাধিকারফু রায়নিত অশ্রুপাত।

চন্দ্রাবলীর কুসুম সাজ এখনি কি শুকাল' আজ ?

চকোর হে, মিলাল' কি সে চন্দ্র-মুখের মধুর হাস ?”

উদয়াদিত্য পাঠানের দিকে চাহিয়া বসন্তরায়কে কানে কানে জিজ্ঞাসা করিলেন, ‘দাদা মহাশয়, এ কাবুলী কোথা হইতে জুটিল ?’

বসন্তরায় তাড়াতাড়ি কহিলেন ‘খাঁ সাহেব, বড় ভাল লোক। সমজ্জদার ব্যক্তি। আজ রাত্রি বড় আনন্দে কাটান গিয়াছে।’

উদয়াদিত্যকে দেখিয়া খাঁ সাহেব মনে মনে বিশেষ চঞ্চল হইয়া পড়িয়াছিল, কি করিবে ভাবিয়া পাইতে ছিল না।

উদয়াদিত্য পিতামহকে জিজ্ঞাসা করিলেন ‘চটিতে না গিয়া এখানে যে ?’

পাঠান সহসা বলিয়া উঠিল ‘হুজুর, আশ্বাস পাই ত একটা বলি। আমরা রাজ্য প্রতাপাদিত্যের প্রজা। মহারাজ আমাকে ও আমার ভাইকে আদেশ করেন যে, আপনি যখন যশোহরের মুখে আসিবেন, তখন পথে আপনাকে খুন করা হয় !’

বসন্তরায় চমকিয়া কহিয়া উঠিলেন ‘রাম, রাম, রাম !’

উদয়াদিত্য কহিলেন ‘বলিয়া যাও !’

পাঠান—‘আমরা কখন এমন কাজ করি নাই, সন্তরায় আপত্তি করাতে তিনি আমাদেরকে নানা প্রকার ভয়

দেখান্। স্ত্রুতরাং বাধ্য হইয়া এই কাজের উদ্দেশে যাত্রা করিতে হইল। পথের মধ্যে আপনার সহিত সাক্ষাৎ হইল। আমার ভাই, গ্রামে ডাকাতি পড়িয়াছে বলিয়া কাঁদিয়া কাটিয়া আপনার অলুচরদের লইয়া গেলেন। আমার উপর এই কাজের ভার ছিল। কিন্তু মহারাজ, যদিও রাজার আদেশ, তথাপি এমন কাজে আমার কোন মতেই প্রবৃত্তি হইল না। কারণ, আমাদের কবি বলেন, রাজার আদেশে প্রভুর আদেশে সমস্ত পৃথিবী ধ্বংস করিতে পার, কিন্তু সাবধান, তোমার স্বর্গ ধ্বংস করিও না। এখন গরীব মহারাজের শরণাপন্ন হইল। দেশে ফিরিয়া গেলে আমার সর্বনাশ হইবে। আপনি রক্ষা না করিলে আমার আর 'উপায় নাই!' বলিয়া ঘোড়হাত করিয়া দাঁড়াইল।

বসন্তরায় অবাক্ হইয়া দাঁড়াইয়া রহিলেন। কিছুক্ষণ পরে পাঠানকে কহিলেন—‘তোমাকে একটি পত্র দিতেছি তুমি রায়গড়ে চলিয়া যাও। আমি সেখানে ফিরিয়া গিয়া, তোমার একটা স্ত্রীবিধা করিয়া দিব।’

উদয়াদিত্য কহিলেন ‘দাদা মহাশয়, আবার বশোহরে যাইবে না কি?’

বসন্তরায় কহিলেন ‘হাঁ ভাই!’

উদয়াদিত্য অবাক্ হইয়া কহিলেন ‘সে কি কথা!’

বসন্তরায়—‘প্রতাপ আমার ত আর কেহ নয়, সহস্র

অপরাধ করুক সে আমার নিতান্তই মেহভাজন। আমার নিজের কোন হানি হইবে বলিয়া ভয় করি না। (আমিত, ভাই, ভব-সমুদ্রের কূলে দাঁড়াইয়া ; একটা ঢেউ লাগিলেই আমার সমস্ত ফুরাইল) কিন্তু এই পাপ কার্য্য করিলে, প্রতাপের ইহকালের ও পরকালের যে হানি হইত, তাহা ভাবিয়া কি আমি নিশ্চিত্ত থাকিতে পারি। তাহাকে আলিঙ্গন করিয়া একবার সমস্ত বুঝাইয়া বলিবা।

বলিতে বলিতে বসন্তরায়ের চোখে জল আসিল। উদয়াদিত্য দুই হস্তে তাঁহার চক্ষু আচ্ছাদন করিলেন।

এমন সময়ে কোলাহল করিতে করিতে বসন্তরায়ের অন্তরঙ্গগণ ফিরিয়া আসিল।

‘মহারাজ কোথায় ? মহারাজ কোথায় ?’

“এইখানেই আছি বাপু, আর কোথায় যাইব ?”

সকলে সম্মুখে “সে নেড়ে বেটা কোথায় ?”

বসন্তরায় বিব্রত হইয়া মাঝে পড়িয়া কহিলেন “হাঁ হাঁ বাপু, তোমরা খাঁ সাহেবকে কিছু বলিও না।”

১ম “আজ মহারাজ, বড় কষ্ট পাইয়াছি, আজ সে”—

২য় “তুই থাম্‌নায়ে ; আমি সমস্ত ভাল করিয়া গুছাইয়া বলি। সে পাঠান বেটা আমাদের বরাবর সোজা লইয়া গিয়া অবশেষে বাঁহাতী একটা আম বাগানের মধ্যে”—

৩য় “নায়ে সেটা বাব্বা বন।”

৪র্থ “সেটা বাঁহাতী নহে সেটা ডানহাতী।”

২য় “দূর কেপা, সেটা বাঁহাতী !”

৪র্থ “তোর কথাতেই সেটা বাঁহাতী ?”

১য় “বাঁহাতী না যদি হইবে তবে সে পুকুরটা”—

উদয়াদিত্য “হাঁ বাপু সেটা বাঁহাতী বলিয়াই বোধ হই-
তেছে তার পরে বলিয়া যাও ।”

২য় “আজ্ঞা হাঁ । সেই বাঁহাতী আম বাগানের মধ্যে দিয়া
একটা মাঠে লইয়া গেল । কত চনা মাঠ জমি জলা বাঁশ-
ঝাড় পার হইয়া গেলাম, কিন্তু গাঁয়ের নাম গন্ধও পাইলাম
না । এমনি সময় তিন ঘণ্টা ঘুরিয়া গাঁয়ের কাছাকাছি হই-
তেই সে বেটা যে কোথায় পলাইল খোঁজ পাইলাম না ।”

১ম “সে বেটাকে দেখিয়াই আমার ভাল ঠেকে নাই।”

২য় “আমিও মনে করিয়াছিলাম এই রকম একটা কিছু
হইবেই ।”

৩য় “যখনি দেখিয়াছি নেড়ে, তখনি আমার নন্দেহ
হইয়াছে !”

অবশেষে সকলেই ব্যক্ত করিল যে তাহারা পূর্বে হই-
তেই সমস্ত বুঝিতে পারিয়াছিল ।

ষষ্ঠ পরিচ্ছেদ ।

প্রতাপাদিত্য কহিলেন “দেখ দেখি মজ্জি, সে পাঠান দুটা এখনও আসিল না !”

মজ্জী ধীরে ধীরে কহিলেন, “সেটা ত আর আমার দোষ নয় মহারাজ !”

প্রতাপাদিত্য বিরক্ত হইয়া কহিলেন, “দোষের কথা হইতেছে না। দেৱী যে হইতেছে তাহার ত একটা কারণ আছে! তুমি কি অনুমান কর, তাহাই জিজ্ঞাসা করিতেছি।”

মজ্জী। “শিমুলতলী এখান হইতে বিস্তর দূর। বাইতে, কাজ সমাধা করিতে ও কিরিয়া আগিতে বিলম্ব হইবার কথা।”

প্রতাপাদিত্য মজ্জীর কথায় অসন্তুষ্ট হইলেন। তিনি চান, তিনিও যাহা অনুমান করিতেছেন, মজ্জীও তাহাই অনুমান করেন। কিন্তু মজ্জী সে দিক দিয়া গেলেন না। প্রতাপাদিত্য কহিলেন, “উদয়াদিত্য কাল রাত্রে বাহির হইয়া গেছে?”

মজ্জী। “আজ্ঞা হাঁ; সে ত পূর্কেই জানাইয়াছি।”

প্রতাপাদিত্য। “পূর্কেই জানাইয়াছি! কি উপযুক্ত সময়েই জানাইয়াছ! যে সময়ে হউক জানাইলেই বুঝি তোমার কাজ শেষ হইল?..... উদয়াদিত্য ত পূর্কে

এমনতর ছিল না । শ্রীপুরের জমিদারের মেয়ে বোধ করি তাহাকে কুপরামর্শ দিয়া থাকিবে । কি বোধ হয় ?”

মন্ত্রী । “কেমন করিয়া বলিব মহারাজ ?”

প্রতাপাদিত্য বলিয়া উঠিলেন “তোমার কাছে কি আমি বেদবাক্য শুনিতে চাহিতেছি ? তুমি কি আন্দাজ কর, তাহাই বল না !”

মন্ত্রী । “আপনি মহিষীর কাছে বধূমাতা ঠাকুরাণীর কথা সমস্তই শুনিতে পান, এ বিষয়ে আপনিই অল্পমান করিতে পারেন, আমি কেমন করিয়া অল্পমান করিব ?”

একজন পাঠান গৃহে প্রবেশ করিল । প্রতাপাদিত্য লিয়া উঠিলেন—“কি হইল ? কাজ নিকাশ করিয়াছ ?”

পাঠান । “হাঁ মহারাজ, এতক্ষণে নিকাশ হইয়া গেছে ।”

প্রতাপাদিত্য । “সে কি রকম কথা ! তবে তুমি জান না ?”

পাঠান । “আজ্ঞা হাঁ, জানি । কাজ নিকাশ হইয়াছে, তাহাতে আর ভুল নাই, তবে আমি সে সময়ে উপস্থিত ছিলাম না !”

প্রতাপাদিত্য । “তবে কি করিয়া কাজ নিকাশ হইল ?”

পাঠান । “আপনার পরামর্শ মতে আমি তাঁহার লোক জনদের তফাৎ করিয়াই চলিয়া আসিতেছি, হোসেন খাঁ কাজ শেষ করিয়াছে ।”

প্রতাপাদিত্য । “যদি না করিয়া থাকে ?”

পাঠান। “মহারাজ, আমার শির জামিন রাখিলাম।”

প্রতাপাদিত্য। “আচ্ছা ঐখানে হাজির থাক। তোমার ভাই ফিরিয়া আসিলে পুৰস্কার মিলিবে।”

পাঠান দূরে ঘরের নিকট গ্রহরীদের জিন্মায় দাঁড়াইয়া রহিল।

প্রতাপাদিত্য অনেকক্ষণ চুপ করিয়া থাকিয়া মন্ত্রীকে ধীরে ধীরে কহিলেন,—“এটা যাহাতে প্রজারা কোন মতে না জানিতে পায় তাহার চেষ্টা করিতে হইবে।”

মন্ত্রী কহিলেন—“মহারাজ, অসম্ভব না হন যদি ত বলি, ইহা প্রকাশ হইবেই।”

প্রতাপাদিত্য। “কিসে তুমি জানিতে পারিলে?”

মন্ত্রী। “ইতিপূর্বে আপনি প্রকাশ্যভাবে আপনার পিতৃব্যের প্রতি ঘেঁষ প্রকাশ করিয়াছেন। আপনার কন্যার বিবাহের সময় আপনি বসন্তরায়কে নিমন্ত্রণ করেন নাই তিনি স্বয়ং অনিমন্ত্রিত আসিয়া উপস্থিত হইয়াছিলেন। আজ আপনি সহসা বিনা কারণে তাঁহাকে নিমন্ত্রণ করিলেন ও পথের মধ্যে কে তাঁহাকে হত্যা করিল। এমন অবস্থায় প্রজারা আপনাকেই এই ঘটনাটার মূল বলিয়া জানিবে।”

প্রতাপাদিত্য রুষ্ট হইয়া কহিলেন; “তোমার ভাব আমি কিছুই বুঝিতে পারি না মন্ত্রী! এই কথাটা প্রকাশ হইলেই তুমি যেন খুসী হও, আমার নিন্দা রটিলেই তোমার যেন মনস্কামনা পূর্ণ হয়! নহিলে দিন রাত্রি তুমি কেন

বলিতেছি যে, কথাটা প্রকাশ হইবেই ! প্রকাশ হইবার আমি ত কোন কারণ দেখিতেছি না । বোধ করি, আর কিছুতেই সংবাদটা রাষ্ট্র না হইলে তুমি নিজের গিয়া দ্বারে দ্বারে প্রকাশ করিয়া বেড়াইবে ;”

মন্ত্রী কহিলেন—“মহারাজ, মার্জনা করিবেন । আপনি আমার অপেক্ষা সকল বিষয়েই অনেক ভাল বুঝেন । আপনাকে মঞ্জনা দেওয়া আমাদের মত ক্ষুদ্র-বুদ্ধি লোকের পক্ষে অত্যন্ত স্পর্ধার বিষয় । তবে, আপনিই না কি আমাকে বাছিয়া মন্ত্রী রাখিয়াছেন, এই সাহসেই ক্ষুদ্র-বুদ্ধিতে যাহা মনে হয়, আপনাকে মাঝে মাঝে বলিয়া থাকি । মঞ্জনা কঠিন হইবে যদি তবে এ দাসকে এ কার্য্যভার হইতে অব্যাহতি দিন ।”

প্রতাপাদিত্য সিধা হইলেন । মাঝে মাঝে মন্ত্রী যখন তাঁহাকে ছই এক শব্দ কথা শুনাইয়া দেন, তখন প্রতাপাদিত্য মনে মনে সন্তুষ্ট হন ।

প্রতাপাদিত্য কহিলেন, “আমি বিবেচনা করিতেছি, ঐ পাঠান ছুটাকে মারিয়া ফেলিলে এ বিষয়ে আব কোন ভয়ের কারণ থাকিবে না ।”

মন্ত্রী কহিলেন “একটা খুন চাপিয়া রাখাই দায়, তিনটা খুন সামলান অসম্ভব । প্রজারা জানিতেই পারিবে ।”

প্রতাপাদিত্য বলিয়া উঠিলেন, “তবে ত আমি ভয়ে

সারা হইলাম! প্রজারা জানিতে পারিবে! যশোহর রায়গড় নহে; এখানে প্রজাদের রাজত্ব নাই! এখানে রাজা ছাড়া আর বাকী সকলেই রাজা নহে। অতএব আমাকে তুমি প্রজার ভয় দেখাইও না। যদি কোন প্রজা এ বিষয়ে আমার বিরুদ্ধে কোন কথা কহে, তবে তাহার জিহ্বা তপ্ত লৌহ দিয়া পুড়াইব।”

মন্ত্রী মনে মনে হাসিলেন। মনে মনে কহিলেন, “প্রজার জিহ্বাকে এত ভয়! তথাপি মনকে প্রবোধ দিয়া থাকেন যে, কোন প্রজাকে ডরাই না।”

প্রতাপাদিত্য। “শ্রদ্ধা শান্তি শেষ করিয়া লোক জন লইয়া একবার রায়গড়ে যাইতে হইবে। আমি ছাড়া সেখানকার সিংহাসনের উত্তরাধিকারী আর ত কাহাকেও দেখিতেছি না।”

বৃদ্ধ বসন্তরায় ধীরে ধীরে গৃহমধ্যে প্রবেশ করিলেন। প্রতাপাদিত্য চমকিয়া পিছু হটিয়া গেলেন। সহসা তাঁহার মনে হইল, বৃদ্ধ উপদেবতা। অবাক হইয়া একটি কথাও বলিতে পারিলেন না। বসন্তরায় নিকটে গিয়া তাঁহার গায়ে হাত বুলাইয়া মৃদু স্বরে কহিলেন—“আমাকে কিসের ভয় প্রতাপ? আমি তোমার পিতৃব্য। তাহাতেও যদি বিশ্বাস না হয়, আমি বৃদ্ধ, তোমার অনিষ্ট করিতে পারি এমন শক্তি আমার নাই।”

প্রতাপাদিত্যের চৈতন্য হইয়াছে, কিন্তু কথা বানাইয়া

বলিতে তিনি নিতান্ত অপটু। নিরুত্তর হইয়া, অবাচ্ হইয়া দাঁড়াইয়া রহিলেন। পিতৃব্যকে প্রণাম করা পর্য্যন্ত হইল না।

বসন্তরায় আবার ধীরে ধীরে কহিলেন; “প্রতাপ, একটা বাহা হয় কথা কও। যদি দৈবাৎ এমন একটা কাজ করিয়া থাক, বাহাতে আমাকে দেখিয়া তোমার লজ্জা ও সঙ্কোচ উপস্থিত হয়, তবে তাহার জন্য ভাবিও না! আমি কোন কথা উত্থাপন করিব না। আইস বৎস, তুমি জনে একবার কোলাকুলি করি। আজ অনেক দিনের পর দেখা হইয়াছে; আর ত অধিক দিন দেখা হইবে না।”

এতক্ষণের পর প্রতাপাদিত্য প্রণাম করিলেন ও উঠিয়া পিতৃব্যের সহিত কোলাকুলি করিলেন। ইতিমধ্যে মঞ্জী আস্তে আস্তে গৃহ হইতে বাহির হইয়া গেছেন। বসন্তরায় ঈষৎ কোমল হাস্য হাসিয়া প্রতাপাদিত্যের গায়ে হাত দিয়া কহিলেন, “বসন্তরায় অনেক দিন বাঁচিয়া আছে; না প্রতাপ? সময় হইয়া আসিয়াছে, এখনো যে কেন ডাক পড়িল না বিধাতা জানেন। কিন্তু আর অধিক বিলম্ব নাই।”

বসন্তরায় কিয়ৎক্ষণ চুপ করিয়া রহিলেন, প্রতাপাদিত্য কোন উত্তর করিলেন না। বসন্তরায় আবার কহিলেন, “তবে স্পষ্ট করিয়া সমস্ত বলি। তুমি যে আমাকে

ছুরি তুলিয়াছ, তাহাতে আমাকে ছুরীর অপেক্ষা অধিক বাজিয়াছে। (বলিতে বলিতে তাঁহার চক্ষে জল আসিল।) কিন্তু আমি কিছুমাত্র রাগ করি নাই। আমি কেবল তোমাকে উপদেশ দিবার জন্য ছুটি কথা বলিব। আমাকে বধ করিও না প্রতাপ! তাহাতে তোমার ইহকাল পরকালের ভাল হইবে না। এত দিন পর্য্যন্ত যদি আমার মৃত্যুর জন্য অপেক্ষা করিয়া থাকিতে পারিলে, তবে আর ছুটি দিন পারিবে না? এই টুকুর জন্য পাপের ভাগী হইবে?”

বসন্তরায় দেখিলেন, প্রতাপাদিত্য কোন উত্তর দিলেন না; দোষ অস্বীকার করিলেন না, বা অমৃত্যুতাপের কথা কহিলেন না; তৎক্ষণাৎ তিনি অন্য কথা পাড়িলেন, কহিলেন,—“প্রতাপ, একবার রায়গড়ে চল। অনেক দিন সেখানে যাও নাই। অনেক পরিবর্তন দেখিবে। সৈন্যেরা এখন তলোয়ার ছাড়িয়া লাঙ্গল ধরিয়াছে; যেখানে সৈন্যদের বাসস্থান ছিল সেখানে অতিথিশালা—”

এমন সময়ে প্রতাপাদিত্য দূর হইতে দেখিলেন পাঠানটা পলাইবার উদ্যোগ করিতেছে। আর থাকিতে পারিলেন না। মনের মধ্যে যে নিকরক রোষ ফুটিতেছিল, তাহা অগ্নি-উৎসের ন্যায় উচ্ছ্বসিত হইয়া উঠিল। বজ্র-স্বরে বলিয়া উঠিলেন—“খবরদার উহাকে ছাড়িস্ না।

পাকড়া করিয়া রাখ্ । ” বলিয়া ঘর হইতে দ্রুতপদে বাহির হইয়া গেলেন ।

রাজা মন্ত্রীকে ডাকাইয়া কহিলেন ;—“রাজকার্য্যে তোমার অত্যন্ত অমনোযোগ লক্ষিত হইতেছে । ”

মন্ত্রী আস্তে আস্তে কহিলেন,—“মহারাজ, এ বিষয়ে আমার কোন দোষ নাই । ”

প্রতাপাদিত্য তারস্বরে বলিয়া উঠিলেন; “আমি কি কোন বিষয়ের উল্লেখ করিতেছি! আমি বলিতেছি, রাজকার্য্যে তোমার অত্যন্ত অমনোযোগ লক্ষিত হইতেছে । সে দিন তোমার কাছে এক চিঠি রাখিতে দিলাম, তুমি হারাইয়া ফেলিলে ! ”

দেড় মাস পূর্বে এইরূপ একটা ঘটনা ঘটিয়াছিল বটে, কিন্তু তখন মহারাজ মন্ত্রীকে একটি কথাও বলেন নি ।

“আর এক দিন উমেশ রায়ের নিকট তোমাকে যাইতে আদেশ করিলাম, তুমি লোক পাঠাইয়া কাজ সারিলে ! চূপ কর ! • দোষ কাটাইবার জন্ত মিছামিছি চেষ্টা করিও না ! যাহা হউক, তোমাকে জানাইয়া রাখিলাম, রাজকার্য্যে তুমি কিছুমাত্র মনোযোগ দিতেছ না । ”

রাজা প্রহরীদের ডাকাইলেন । পূর্বে রাত্রের প্রহরীদের বেতন কাটিয়াছিলেন, এখন তাহাদের প্রতি কারাবানের আদেশ হইল ।

অন্তঃপুরে গিয়া মহিষীকে ডাকাইয়া কহিলেন,—“মহিষি,

রাজ-পরিবারের মধ্যে অত্যন্ত বিশৃঙ্খলা দেখিতেছি ! উদ-
য়াদিত্য পূর্বে ত এমনতর ছিল না। এখন সে যখন-তখন
বাহির হইয়া যায়। প্রজাদের কাজে যোগ দেয়। আমার
বিক্রদ্ধাচরণ করে। এ সকলের অর্থ কি ?”

মহিষী ভীত হইয়া কহিলেন, “মহারাজ, তাহার কোন
দোষ নাই। এ সমস্ত অনর্থের মূল ঐ বড় বৌ। বাছা
আমার ত আগে এমন ছিল না। যে দিন হইতে শ্রীপুরের
ঘরে তাহার বিয়ে হইল, সেই দিন হইতে উদয় কেমন
যে হইল কিছু বুঝিতে পারিতেছি না।”

মহারাজ সুরমাকে শাসনে রাখিতে আদেশ করিয়া
বাহিরে গেলেন। মহিষী উদয়াদিত্যকে ডাকাইয়া পাঠা
ইলেন। উদয়াদিত্য আসিলে তাঁহার মুখের দিকে চাহিয়া
কহিলেন, “আহা, বাছা আমার রোগা, কালো হইয়া
গিয়াছে ! বিয়ের আগে বাছার রঙ কেমন ছিল ! যেন
তপ্ত-সোণার মত ! তোর এমন দশা কে করিল ? বাবা,
বড় বৌ তোকে যা বলে তা’ শুনিব না ! তার কথা শুনি
য়াই তোর এমন দশা হইয়াছে।” সুরমা ঘোমটা দিয়া
চুপ করিয়া এক পাশে দাঁড়াইয়া ছিল। মহিষী বলিতে
লাগিলেন “ওর ছোট বংশে জন্ম, ও কি তোর যোগ্য ?
ও কি তোকে পরামর্শ দিতে জানে ? আমি যথার্থ কথা
বলিতেছি ও কখন তোকে ভাল পরামর্শ দেয় না। তোর
মন্দ হইলেই ও যেন বাঁচে ! এমন রাক্ষসীর সঙ্গেও মহা-

রাজ তোর বিবাহ দিয়াছিলেন ।” মহিষী অশ্রুবর্ষণ করিতে আরম্ভ করিলেন । উদয়াদিত্যের প্রশান্ত ললাটে ঘনবিন্দু দেখা দিল । তাঁহার মনের অধীরতা পাছে প্রকাশ হইয়া পড়ে, এই নিমিত্ত তাঁহার আয়ত নেত্র অন্ত দিকে ফিরাইলেন ।

একজন পুরাণ বৃদ্ধ দাসী বসিয়াছিল, সে হাত নাড়িয়া বলিয়া উঠিল,—“শ্রীপুরের মেয়েরা যাহু জানে । নিশ্চর বাচ্চাকে ওষুধ করিয়াছে ।” এই বলিয়া, উঠিয়া উদয়াদিত্যের কাছে গিয়া বলিল, “বাবা, ও তোমাকে ওষুধ করিয়াছে । ঐ যে মেয়েটি দেখিতেছ, উনি বড় সামান্য মেয়ে নন ! শ্রীপুরের ঘরের মেয়ে । ওরা ডাইনি ! আছা বাছার শরীরে আর কিছু রাখিল না !” এই বলিয়া সে সুরমার দিকে তীরের মত এক কটাক্ষ বর্ষণ করিল ও অঁচল দিয়া দুই হস্তে দুই গুচ্চ চক্ষু রগড়াইয়া লাল করিয়া তুলিল । তাহা দেখিয়া আবার মহিষীর দুঃখ একেবারে উথলিয়া উঠিল । অন্তঃপুরে বৃদ্ধাদের মধ্যে ক্রন্দনের সংক্রামক ব্যাপ্ত হইয়া পড়িল ! কাঁদিবার অভিপ্রায়ে সকলে রাণীর ঘরে আসিয়া সমবেত হইল । উদয়াদিত্য ককণ নেত্রে একবার সুরমার মুখের দিকে চাহিলেন । ঘোমটার মধ্য হইতে সুরমা তাহা দেখিতে পাইল, ও চোখ মুছিয়া একটি কথা না কহিয়া ধীরে ধীরে ঘরে চলিয়া গেল ।

সন্ধ্যাবেলা মহিষী প্রতাপাদিত্যকে কহিলেন, “রাজ

উদয়কে সমস্ত বুঝাইয়া বলিলাম। বাছা আমার ভেমন
নহে। বুঝাইয়া বলিলে বুঝে। আজ তাহার চোখ ফুটি-
য়াছে।”

সপ্তম পরিচ্ছেদ।

বিভার স্নানমুখ দেখিয়া সুরমা আর থাকিতে পারিল
না; তাহার গলা ধরিয়া কহিল, “বিভা তুই চুপ করিয়া
থাকিস্ কেন? তোর মনে যখন যাঁহা হয়, বলিস্ না
কেন?”

বিভা ধীরে ধীরে কহিল, “আমার আর কি বলিবার
আছে?”

সুরমা কহিল, “অনেক দিন তাঁহাকে দেখিস্ নাই,
তোর মন কেমন করিবেই ত! তুই তাঁহাকে আসিবার জন্য
একখানা চিঠি লেখ্ না। আমি তোর দাদাকে দিয়া
পাঠাইবার সুবিধা করিয়া দিব।”

বিভার স্বামী চন্দ্রদীপ-পতি রামচন্দ্র রায়ের সম্বন্ধে কথা
হইতেছে।

বিভা ঘাড় হেঁট করিয়া কহিতে লাগিল,—“এখানে
কেহ যদি তাঁহাকে গ্রাহ না করে, কেহ যদি তাঁহাকে ডাকি-

বার আবশ্যক বিবেচনা না করে, তবে এখানে তিনি না আসিলেই ভাল । তিনি যদি আপনি আসেন তবে আমি বারণ করিব । তিনি রাজা, যেখানে তাঁহার আদর নাই, সেখানে তিনি কেন আসিবেন ? আমাদের চেয়ে তিনি কিসে ছোট, যে, পিতা তাঁহাকে অপমান করিবেন ? ” বলিতে বলিতে বিভা আর সামলাইতে পারিল না, তাহার মুখখানি লাল হইয়া উঠিল ও সে কাঁদিয়া ফেলিল ।

সুরমা বিভার মুখ বুকে রাখিয়া তাহার চোখের জল মুছাইয়া কহিল ;—“আচ্ছা, বিভা, তুই যদি পুরুষ হইতিস্ ত কি করিতিস্ ? নিমন্ত্রণ-পত্র পাশ্ নাই বলিয়া কি শ্বশুর বাড়ি যাইতিস্ না ?”

বিভা বলিয়া উঠিল, “না, তাহা পারিতাম না । আমি যদি পুরুষ হইতাম ত এখনি চলিয়া যাইতাম ; মান অপমান কিছুই ভাবিতাম না । কিন্তু তাহাই বলিয়া তাঁহাকে আদর করিয়া না ডাকিয়া আনিলে তিনি কেন আসিবেন ?”

বিভা এত কথা কখন কহে নাই । আজ আবেগের মাথায় অনেক কথা বলিয়াছে । এতক্ষণে একটু লজ্জা করিতে লাগিল । মনে হইল, “বড় অধিক কথা বলিয়া ফেলিয়াছি । আবার, যে রকম করিয়া বলিয়াছি, বড় লজ্জা করিতেছে ।” ক্রমে তাহার মনের উত্তেজনা হ্রাস হইয়া আসিল, ও মনের মধ্যে একটা গুরুভার অবসাদ আস্তে আস্তে চাপিয়া পড়িতে লাগিল । বিভা বাহুতে মুখ ঢাকিয়া

সুরমার কোলে মাথা দিয়া শুইয়া পড়িল ; সুরমা মাথা নত করিয়া কোমল হস্তে তাহার ঘন কেশভার পৃথক্ করিয়া দিতে লাগিল। এমন কতক্ষণ গেল। উভয়ের মুখে একটি কথা নাই। বিভার চোক দিয়া এক এক বিন্দু করিয়া জল পড়িতেছে ও সুরমা আস্তে আস্তে মুছাইয়া দিতেছে।

অনেকক্ষণ বাদে যখন সন্ধ্যা হইয়া আসিল। তখন বিভা ধীরে ধীরে উঠিয়া বসিল ও চোখের জল মুছিয়া ঈষৎ হাসিল। সে হাসির অর্থ—“আজ কি ছেলেমানুষীই করিয়াছি!” ক্রমে মুখ ফিরাইয়া সরিয়া গিয়া পলাইয়া যাইবার উদ্যোগ করিতে লাগিল। সুরমা কিছু না বলিয়া তাহার হাত ধরিয়া রহিল। পূর্বকার কথা আর কিছু উত্থাপন না করিয়া কহিল, “বিভা শুনিয়াছিস্, দাদামহাশয় আসিয়াছেন?”

বিভা। “দাদা মহাশয় আসিয়াছেন?”

সুরমা। “হাঁ।”

বিভা আগ্রহের সহিত জিজ্ঞাসা করিল, “কখন আসিয়াছেন?”

সুরমা। “প্রায় চার প্রহর বেলায় সময়।”

বিভা। “এখনো যে আমাদের দেখিতে আসিলেন না।”

বিভার মনে ঈষৎ অভিমানের উদয় হইল। দাদা মহাশয়ের দখল লইয়া বিভা অতিশয় সতর্ক। এমন কি, এক দিন বসন্তরায় উদয়াদিত্যের সহিত অনেকক্ষণ কথোপ-

কখন করিয়া বিভাকে অন্তঃপুরে তিন দণ্ড অপেক্ষা করাই-
য়াছিলেন, একেবারেই তাহার সহিত দেখা করিতে যান
নাই, এই জন্য বিভার এমন কষ্ট হইয়াছিল, যে, যদিও সে
বিষয়ে সে কিছু বলে নাই বটে তবু প্রসন্ন মুখে দাদা-
মহাশয়ের সঙ্গে কথা কহিতে পারে নাই ।

বসন্তরায় ঘরে প্রবেশ করিয়াই হাসিতে হাসিতে গান
ধরিলেন ।

“আজ তোমারে দেখুতে এলেম অনেক দিনের পরে !

ভয় নাইক, স্নেহে থাক,
অধিকক্ষণ থাকব নাক’
আসিয়াছি হৃদয়ের তরে !
দেখব শুধু মুখ খানি
শুনব তুটি মধুর বাণী

আড়াল থেকে হাসি দেখে চলে যাব দেশান্তরে ।”

গান শুনিয়া বিভা মুখ নত করিয়া হাসিল । তাহার বড়
আহ্লাদ হইয়াছে । অতটা আহ্লাদ পাছে ধরা পড়ে,
বলিয়া বিব্রত হইয়া পড়িয়াছে !

সুরমা বিভার মুখ তুলিয়া ধরিয়া কহিল, “দাদা মহাশয়,
বিভার হাসি দেখিবার জন্য ত আড়ালে যাইতে হইল না ?”

বসন্তরায় । “না । বিভা মনে করিল, নিতান্তই না
হাসিলে যদি বুড়া বিদায় না হয়, তবে না হয় একটু হাসি ।
ওঁ ডাকিনীর মৎলব আগি বেশ বুঝি, আমাকে তাড়াইবার

কন্দি ! কিন্তু শীঘ্র তাহা হইতেছে না। আসিলাম যদি ত ভাল করিয়া জ্বালাইয়া যাইব, আবার যত দিন না দেখা হয় মনে থাকিবে।”

সুদমা হাসিয়া কহিল, “দেখ দাদা মহাশয়, বিভা আমার কানে কানে বলিল যে, “মনে রাখানই” যদি অভিপ্রায় হয়, তবে যা’ জ্বালাইয়াছ তাহাই যথেষ্ট হইয়াছে, আর নূতন করিয়া জ্বালাইতে হইবে না।”

কথাটা শুনিয়া বসন্তরায়ের বড়ই আনন্দ বোধ হইল। তিনি হাসিতে লাগিলেন।

বিভা অপ্রতিভ হইয়া বলিয়া উঠিল, “না, আমি কখনো ওকথা বলি নাই। আমি কোন কথাই কই নাই।”

সুদমা কহিল, “দাদামহাশয়, তোমার মনকামনা ত পূর্ণ হইল ! তুমি হাসি দেখিতে চাহিলে তাহা দেখিলে, কথা শুনিতে চাহিয়াছিলে তাহাও শুনাইলাম, তবে এখন দেশান্তরে যাও !”

বসন্তরায়। “না ভাই, তাহা পারিলাম না ! আমি গোটা-পনের গান ও এক মাথা পাকা চুল আনিয়াছি, সেগুলি সমস্ত নিকাশ না করিয়া যাইতে পারিতেছি না !”

বিভা আর থাকিতে পারিল না, হাসিয়া উঠিল, কহিল,— “তোমার আধ মাথা বই চুল নাই যে দাদামহাশয় !”

দাদামহাশয়ের অভিসন্ধি সিদ্ধ হইল। অনেক দিনের পর প্রথম আলাপে বিভার মুখ খুলিতে কিছু আয়োজনের

আবশ্যক করে, কিন্তু দাদামহাশয়ের কাছে বিভার মুখ একবার খুলিলে তাহা বন্ধ করিতে আবার ততোধিক আয়োজনের আবশ্যক হয়! কিন্তু, দাদামহাশয় ব্যতীত আর কাহারো কাছে কোন অবস্থাতেই বিভার মুখ খুলে না।

বসন্তরায় টাকে হাত বুলাইতে বুলাইতে বলিলেন, “সে এক দিন গিয়াছেরে ভাই! যে দিন বসন্তরায়ের মাথায় এক মাথা চুল ছিল, সে দিন কি আর এত রাস্তা হাঁটিয়া তোমাদের খোঁষামোদ কবিত্তে আসিতাম? একগাছি চুল পাকিলে তোমাদের মত পাঁচটা রূপসী চুল তুলিবার জন্ত উমেদার হইত ও মনের আগ্রহে দশটা কাঁচা চুল তুলিয়া ফেলিত!”

বিভা গভীর স্বরে জিজ্ঞাসা কবিল, “আচ্ছা দাদামহাশয়, তোমার যখন এক মাথা চুল ছিল, তখন কি তোমাকে এখনকার চেয়ে ভাল দেখিতেছিল?”

মনে মনে বিভার সে বিষয়ে বিষম সন্দেহ ছিল। দাদামহাশয়ের টাকটি, তাঁহার গুফ-সম্পর্কশূন্য অধরের প্রশস্ত হাসিটি, তাঁহার পাকা আঙ্গুর ছায় ভাবটি, সে মনে মনে পরিবর্তন করিতে চেষ্টা করিল, কোন মতেই ভাল ঠেকিল না। সে দেখিল, সে টাকটি না দিলে তাহার দাদামহাশয়কে কিছুতেই মানায় না। আর গোঁফ জুড়িয়া দিলে দাদামহাশয়ের মুখখানি একেবারে খারাপ দেখিতে হইয়া যায়। এই খারাপ হইয়া যায় যে, সে তাহা কল্পনা করিলে হাসি

রাখিতে পারে না । দাদামহাশয়ের আবার গৌফ ! দাদামহাশয়ের আবার টাক নাই ! হিঃ হিঃ হিঃ ।

বসন্তরায় কহিলেন, “সে বিষয়ে অনেক মতভেদ আছে । আমার নাতনীরা আমার টাক দেখিয়া মোহিত হয়, তাহারা আমার চুল দেখে নাই । আমার দিদিমারা আমার চুল দেখিয়া মোহিত হইতেন, তাঁহারা আমার টাক দেখেন নাই । যাহারা উভয়ই দেখিয়াছে, তাহারা এখনো একটা মতস্থির করিতে পারে নাই !”

* বিভা কহিল “কিন্তু তা বলি দাদামহাশয়, যতটা টাক পড়িয়াছে, তাহার অধিক পড়িলে আর ভাল দেখাইবে না !”

স্বরমা কহিল, “দাদামহাশয়, টাকের আলোচনা পরে হইবে । এখন বিভার একটা যাহা হব উপায় করিয়া দাও ।”

বিভা ভাড়াভাড়ি বসন্তবাসেব কাছে গিয়া বলিয়া উঠিল, “দাদামহাশয়—আমি তোমার পাকাচুল তুলিয়া দিই ।”

স্বরমা । “আমি বলি কি—”

বিভা । “শোননা দাদামহাশয়, তোমার—”

স্বরমা । “বিভা চুপ কব্ । আমি বলি কি, তুমি গিবে একবার——”

বিভা । “দাদামহাশয়, তোমার মাথায় পাকাচুল ছাড়া যে আর কিছু নেই, তুলে দিলে সমস্ত মাথায় টাক পড়বে !”

বসন্তরায় । “আমাকে যদি কথা শুন্তে না দিস্ দিদি,

আমাকে যদি বিরক্ত করিস্ তবে আমি রাগ হিন্দোল আলাপ করিব।”

বলিয়া তাঁহার ক্ষুদ্রায়তন সেতারটির কাণ মোছড়াইতে আরম্ভ করিলেন। হিন্দোল রাগের উপর বিভার বিশেষ বিদ্রোহ ছিল।

বিভা বলিল, “কি সর্বনাশ! তবে আমি পলাই!” বলিয়া ঘর হইতে বাহির হইয়া গেল।

তখন সুরমা গভীর হইয়া কহিল, “বিভা নীরব হইয়া দিনরাত্রি যে কষ্ট প্রাণের মধ্যে বহন করে, তাহা জানিতে পারিলে বোধ করি মহারাজারও মনে দয়া হয়।”

“কেন! কেন! তাহার কি হইয়াছে!” বলিয়া নিতান্ত আগ্রহের সহিত বসন্তরায় সুরমার কাছে গিয়া বসিলেন।

সুরমা কহিল, “বৎসরের মধ্যে একটি দিন ঠাকুর-জামাইকে নিমন্ত্রণ করিয়া পাঠাইতেও কাহারো মনে পড়ে না?”

বসন্তরায় চিন্তা করিয়া কহিলেন, “ঠিক কথাই ত।”

সুরমা কহিল; “স্বামীর প্রতি এ অনাদর কয়জন মেয়ে সহিতে পারে বল ত? বিভা ভাল মানুষ, তাই কাহাকেও কিছু বলে না, আপনার মনে লুকাইয়া কাঁদে।”

বসন্তরায় ব্যাকুল হইয়া বলিয়া উঠিলেন “আপনার মনে লুকাইয়া কাঁদে?”

স্বরমা। “আজ বিকালে আমার কাছে কত কাঁদিতেছিল।”

বসন্তরায়। “বিভা আজ বিকালে কাঁদিতেছিল?”

স্বরমা। “হাঁ।”

বসন্তরায়। “আহা, তাকে একবার ডাকিয়া আন, আমি দেখি।”

স্বরমা বিভাকে ধরিয়া আনিল। বসন্তরায় তাহার চিবুক ধরিয়া কহিলেন, “তুই কাঁদিস্ কেন দিদি? যখন তোর যা' কষ্ট হয় তোর দাদা মহাশয়কে বলিস্ না কেন? তা হ'লে আমি আমার যথাসাধ্য করি! আমি এখন যাই, প্রতাপকে বলিয়া আসি গে।”

বিভা বলিয়া উঠিল, “দাদা মহাশয়, তোমার ছুট পায়ে পড়ি, আমার বিষয়ে বাবাকে কিছু বলিও না। দাদা মহাশয়, তোমার পায়ে পড়ি যাইও না।”

বলিতে বলিতে বসন্তরায় বাহির হইয়া গেলেন। প্রতাপাদিত্যকে গিয়া বলিলেন, “তোমাব জামাতাকে অনেক দিন নিমন্ত্রণ কর নাই ইহাতে তাহার প্রতি নিতান্ত অবহেলা প্রকাশ করা হইতেছে। যশোহর-পতির জামা তাকে যতখানি সমাদর করা উচিত, ততখানি সমাদর যদি তাহাকে না করা হয়, তবে তাহাতে তোমারই অপমান। তাহাতে গোরবের কথা কিছু নাই।”

প্রতাপাদিত্য পিতৃব্যের কথায় কিছু মাত্র দ্বিকক্তি

করিলেন না। লোকসহ নিমজ্জণ-পত্র চন্দ্রদ্বীপে পাঠাইবার হকুম হইল।

অন্তঃপুরে বিভা ও সুরমার কাছে আসিয়া বসন্তরায়ের সেতার বাজাইবার ধুম পড়িয়া গেল।

“মলিন মুখে ফুটুক হাসি, জুড়াকু ছু নয়ন!”

বিভা লজ্জিত হইয়া কহিল, “দাদা মহাশয়, বাবার কাছে আমার কথা সমস্ত বলিয়াছ?” বসন্তরায় গান গাহিতে লাগিলেন,

“মলিন মুখে ফুটুক হাসি, জুড়াকু ছু নয়ন।

মলিন বসন ছাড় সখি, পর আভরণ।”

বিভা সেতারের তারে হাত দিয়া সেতার বন্ধ করিয়া আবার কহিল, “বাবাব কাছে আমার কথা বলিয়াছ?”

এমন সময়ে উদয়াদিত্যের কনিষ্ঠ অষ্টমবর্ষীয় সমরাদিত্য ঘরের মধ্যে উঁকি মারিয়া বলিয়া উঠিল, “অ্যা, দিদি! দাদা মহাশয়ের সহিত গল্প করিতেছ! আমি মাকে বলিয়া দিয়া আসিতেছি।”

“এস, এস, ভাই এস!” বলিয়া বসন্তরায় তাকে পাকড়া করিলেন।

রাজ-পরিবারে বিশ্বাস এই যে, বসন্তরায় ও সুরমায় মিলিয়া উদয়াদিত্যের সর্বনাশ করিয়াছে। এই নিমিত্ত বসন্তরায় আসিলে সামাল্ সামাল্ পড়িয়া যায়। সমরাদিত্য বসন্তরায়ের হাত ছাড়াইবার জন্য টানা-হেঁচড়া

আরম্ভ করিল। বসন্তরায় তাহাকে সেতার দিয়া, তাহাকে কাঁধে চড়াইয়া, তাহাকে চব্বা পরাইয়া, দুই দণ্ডের মধ্যে এমনি বশ করিয়া লইলেন, যে, সে সমস্ত দিন দাদা মহাশয়ের পশ্চাৎ পশ্চাৎ ফিরিতে লাগিল ও অনবরত সেতার বাজাইয়া তাঁহার সেতারের পাঁচটা তার ছিঁড়িয়া দিল ও মেজরাপ্ কাড়িয়া লইয়া আর দিল না :

অষ্টম পরিচ্ছেদ ।

চন্দ্রদ্বীপের রাজা রামচন্দ্র রায় তাঁহার বাজ-কক্ষে বসিয়া আছেন। ঘরটি অষ্টকোণ। কড়ি হইতে কাপড়ে মোড়া ঝাড় ঝুলিতেছে। দেয়ালের কুলঙ্গির মধ্যে একটাতে গণেশের ও বাকী গুলিতে শ্রীকৃষ্ণের নানা অবস্থার নানা প্রতিমূর্তি স্থাপিত। সে গুলি বিখ্যাত কাবীর বটকৃষ্ণ কুন্তকা রের স্বহস্ত গঠিত। চারিদিকে চাদর পড়িয়াছে, মধ্যস্থলে জরিখচিত মহলন্দের গদি, তাহার উপরে একটি রাজা ও একটা তাকিয়া। তাহার চারি কোণে জরির ঝালর। দেয়ালের চারিদিকে দিশি আয়না ঝুলান, তাহাতে মুখ ঠিক দেখা যায় না। রাজার চারিদিকে যে সকল মনুষ্য আয়না আছে, তাহাতেও তিনি মুখ ঠিক দেখিতে পান না, শরীরের পরিমাণ অভ্যস্ত বড় দেখায়! রাজার বামপার্শ্বে এক

প্রকাণ্ড আলবোলা ও মঞ্জী হরিশঙ্কর। রাজার দক্ষিণে রমাই ভাঁড়, ও চষমা-পরা সেনাপতি ফণাণ্ডিজ্।

রাজা বলিলেন, “ওহে রমাই !”

রমাই বলিল, “আজ্ঞা, মহারাজ !”

রাজা হাসিয়া আকুল। মঞ্জী রাজার অপেক্ষা অধিক হাসিলেন। ফণাণ্ডিজ্ হাততালি দিয়া হাসিয়া উঠিল। দস্তোষে রমাইয়ের চোখ মিটমিট করিতে লাগিল। রাজা ভাবেন রমাইয়ের কথায় না হাসিলে অরসিকতা প্রকাশ পায়; মঞ্জী ভাবেন, রাজা হাসিলে হাস্য কর্তব্য; ফণাণ্ডিজ্ ভাবে অবশ্য হাসিবার কিছু আছে। তাহা ছাড়া যে দুর্ভাগ্য, রমাই ঠোঁট খুলিলে দৈবাৎ না হাসে, রমাই তাহাকে কাদাইয়া ছাড়ে। নহিলে, রমাইয়ের মাঝাতার সমবয়স্ক ঠাট্টাগুলি শুনিয়া অল্প লোকেই আমোদে হাসে। তবে, ভয়ে ও কর্তব্য-জ্ঞানে সকলেরই বিষম হাসি পায়, রাজা হইতে আবশ্য করিয়া দ্বারী পর্য্যন্ত।

রাজা জিজ্ঞাসা করিলেন, “খবর কি হে ?”

রমাই ভাবিল, রসিকতা করা আবশ্যিক।

“পরম্পরায় শুনা গেল, সেনাপতি মহাশয়ের ঘরে চোর পড়িয়াছিল।”

সেনাপতি মহাশয় অধীর হইয়া উঠিলেন। তিনি বুঝিলেন একটা পুরাতন গল্প তাঁহার উপর দিয়া চালাইবার চেষ্টা হইতেছে। তিনি রমাইয়ের রসিকতার ভয়ে যেমন

কাতর, রমাই প্রতি পদে তেমনি তাঁহাকেই চাপিয়া ধরে। রাজার বড়ই আনন্দ। রমাই আসিলেই ফণাণ্ডীকে ডাকিয়া পাঠান! রাজার জীবনে দুইটি প্রধান আনন্দ আছে; এক ভেড়ার লড়াই দেখা, আর রমাইয়ের মুখের সামনে ফণাণ্ডীকে স্থাপন করা। রাজকাৰ্য্যে প্রবেশ করিয়া অবধি সেনাপতির গায়ে একটা ছিটা গুলি বা তীরের আঁচড় লাগে নাই। অনবরত হাস্যের গোলাগুলি খাইয়া সে ব্যক্তি কঁাদ'-কঁাদ' হইয়া আসিয়াছে। পাঠকেরা মার্জনা করিবেন, আমরা রমাইয়ের সকল রসিকতা-গুলি লিপি-বদ্ধ করিতে পারিব না, স্মৃতির অনুরোধে অধিকাংশ স্থলই পবিত্যাগ করিতে হইবে।

রাজা চোক টিপিয়া জিজ্ঞাসা করিলেন, “তার পরে?”

“নিবেদন করি মহারাজ। (ফণাণ্ডী, তাঁহার কোর্টার বোতাম খুলিতে লাগিলেন ও পরিতে লাগিলেন।) আজ দিন তিন চার ধরিয়া সেনাপতি মহাশয়ের ঘরে রাত্রি চোর আনাগোনা করিতেছিল। সাহেবের ব্রাহ্মণী জানিতে পারিয়া কর্তাকে অনেক ঠেলাঠেলি করেন, কিন্তু কোন মতেই কর্তার খুম ভাঙ্গাইতে পারেন নাই।”

রাজা। “হাঃ হাঃ হাঃ হাঃ।”

মন্ত্রী। “হোঃ হোঃ হোঃ হোঃ হোঃ হোঃ।”

সেনাপতি। “হিঃ হিঃ।”

“দিনের বেলা গৃহিণীর নিগ্রহ আর সহিতে না পারিয়া

ঘোড়হস্তে কহিলেন, ‘লোহাই তোমার, আজ রাতে চোর ধরিব।’ রাত্রি দুই দণ্ডের সময় গৃহিণী বলিলেন, “ওগো চোর আসিয়াছে!” কর্তা বলিলেন, “ওই ষাঃ, ঘরে যে আলো জলিতেছে! চোর যে আমাদের দেখিতে পাইবে ও দেখিতে পাইলেই পলাইবে।” চোরকে ডাকিয়া কহিলেন, “আজ তুই বড় বাঁচিয়া গেলি। ঘরে আলো আছে, আজ নিরাপদে পলাইতে পারিবি, কাল আসিস্ দেখি, অন্ধকারে কেমন না ধরা পড়িস্!”

রাজা। “হাহাহাহা!”

মন্ত্রী। “হোহোহোহোহোহো।”

সেনাপতি। “হি।”

রাজা বলিলেন, “তার পরে?”

রমাই দেখিল, এখনো রাজার তৃপ্তি হয় নাই। “জানি না, কি কারণে চোবের যথেষ্ট ভয় হইল না। তাহার পর-রাজেও ঘরে আগুন। গিন্নি কহিলেন, ‘সর্বনাশ হইল, ওঠ।’ কর্তা কহিলেন ‘ভূমি ওঠ না।’ গিন্নি কহিলেন, ‘আমি উঠিয়া কি করিব?’ কর্তা বলিলেন ‘কেন; ঘরে একটা আলো জ্বালাও না। কিছু যে দেখিতে পাই না!’ গিন্নি বিষম ক্রুদ্ধ; কর্তা ততোধিক ক্রুদ্ধ হইয়া কহিলেন, ‘দেখ দেখি, তোমার জন্তইত যথাসর্বস্ব গেল! আলোটা জ্বালাও, বন্দুকটা আন!’ ইতিমধ্যে চোর কাজকর্ম সমাধা কহিল, ‘মহাশয়, এক ছিলাম তামাকু খাওয়াইতে

পারেন? বড় পরিশ্রম হইয়াছে।” কর্তা বিষম ধমক দিয়া কহিলেন, “রোস্ বেটা! আমি তোমাক সাজিয়া দিতেছি। কিন্তু আমার কাছে আসিবি ত এই বন্দুকে তোরা মাথা উড়াইয়া দিব।” তোমাক খাইয়া চোর কহিল ‘মহাশয়, আলোটা যদি জ্বালেন ত উপকার হয়। সিঁধকাটিটা পড়িয়া গিয়াছে খুঁজিয়া পাইতেছি না। তাহা ছাড়া অন্ধকাবে বাহির হইবার পথ দেখিতেছি না।’ সেনাপতি কহিলেন ‘বেটার ভয় হইয়াছে। তফাতে থাক, কাছে আসিস্ না।’ বলিয়া তাড়াতাড়ি আলো জ্বালিয়া দিলেন। ধীবে স্নেহে জ্বিনিস পত্র বাঁধিয়া চোর চলিয়া গেল। কর্তা গিল্মিকে কহিলেন ‘বেটা বিষম ভয় পাইয়াছে।’

রাজা ও মন্ত্রী হাসি সামলাইতে পারেন না। ফণা গুঁজ্ থাকিয়া থাকিয়া মাঝে মাঝে ‘হিঃ’ ‘হিঃ’ করিয়া টুকবা টুকরা হাসি টানিয়া টানিয়া বাহির করিতে লাগিলেন।

রাজা কহিলেন, ‘রমাই, শুনিয়াছ আমি ঋগ্বেদে যাইতেছি?’

রমাই মুখভঙ্গী করিয়া কহিল, ‘অসারং খলু সংসাবে সারং ঋগ্বেদমন্দিরং (হাস্য। প্রথমে রাজা, পরে মন্ত্রী, পরে সেনাপতি।) কথাটা মিথ্যা নহে। (দীর্ঘ নিঃশ্বাস ফেলিয়া) ঋগ্বেদমন্দিরের সকলি সার,—আহারটা, সমাদরটা; হৃদয়ের নরটি পাওয়া যায়, মাছের মুড়াটি পাওয়া যায়; সকলি সার পদার্থ। কেবল সর্কাপেক্ষা অসার ঐ ত্রীটা!’

রাজা হাসিয়া কহিলেন ‘সে কিহে, তোমার অর্দ্ধাঙ্গ’—

রমাই ঘোড়হস্তে ব্যাকুল ভাবে কহিল, “মহারাজ, তাহাকে অর্দ্ধাঙ্গ বলিবেন না। তিন জন্ম তপস্যা করিলে আমি বরঞ্চ, এক দিন তাহার অর্দ্ধাঙ্গ হইতে পারিব, এমন ভরসা আছে। আমার মত পাঁচটা অর্দ্ধাঙ্গ জুড়িলেও তাহার আয়তনে কুলায় না!” (যথাক্রমে হাস্য) কথাটার বস আর সকলেই বুঝিল, কেবল মন্ত্রী পারিলেন না; এই নিমিত্ত মন্ত্রীকে সর্বাপেক্ষা অধিক হাসিতে হইল।

রাজা কহিলেন, ‘আমি ত শুনিয়াছি, তোমার ব্রাহ্মণী বড়ই শান্ত-স্বভাবা ও ঘরকন্নার বিশেষ পটু।’

রমাই। “সে কথায় কাজ কি! ঘরে তিনখানি কাঁটা আছে, কিন্তু ঘর কাঁটাটিতে তাহাব একখানিও ব্যবহার হয় না, তিনখানাই তিন সন্ধ্যা আমার পিঠ পরিষ্কার রাখিতে নিযুক্ত আছে। ঘরে আর আর সকল রকম জঞ্জালই আছে, কেবল আমি তিষ্ঠিতে পারি না। প্রত্যুসে গৃহিণী এমনি কাঁটাইয়া দেন যে, একেবারে মহারাজের হবারে আসিয়া পড়ি!”

এইখানে কথাপ্রসঙ্গে রমাইয়ের ব্রাহ্মণীর পরিচয় দিই। তিনি অত্যন্ত কৃশাদী ও দিনে দিনে ক্রমেই আরো ক্ষীণ হইয়া যাইতেছেন। রমাই ঘরে আসিলে তিনি কোথায় যে আশ্রয় লইবেন ভাবিয়া পান না! রাজসভায় রমাই এক প্রকার ভক্তিতে দাঁত দেখায় ও ঘরে আসিয়া গৃহিণীর কাছে

আর এক প্রকার ভঙ্গীতে দাঁত দেখায়। কিন্তু গৃহিণীর যথার্থ স্বরূপ বর্ণনা করিলে নাকি হাস্যরস না আসিয়া করুণ রস আস, এই নিমিত্ত রাজসভায় রমাই তাঁহার গৃহিণীকে স্থূলকায়া ও উগ্রচণ্ডা করিয়া বর্ণনা করেন, রাজা ও মন্ত্রীরা হাসি রাখিতে পারেন না।

হাসি থামিলে পর রাজা কহিলেন, “ওহে রমাই, তোমাকে যাইতে হইবে, সেনাপতিকেও সঙ্গে লইব।”

সেনাপতি বুঝিলেন, এইবার রমাই তাঁহার উপর দ্বিতীয় আক্রমণ করিবে। চষমাটা চোখে তুলিয়া পরিলেন এবং বোতাম খুলিতে ও পরিতে লাগিলেন।

রমাই কহিল, “উৎসব স্থলে যাইতে সেনাপতি মহাশয়ের কোন আপত্তি থাকিতে পারে না, কারণ এ ত আবুদ্ধস্থল নয়!”

রাজা ও মন্ত্রী ভাবিলেন, তাপি একটা মজার কথা আসিতেছে; আগ্রহের দ্বারা বিজ্ঞানা করিলেন, “কেন?”

রমাই। ‘সাহেবের চক্ষে দিন রাত্রি চষমা, আঁটা। যুমাঈবার সময়েও চষমা পরিয়া শোন, নহিলে ভাল করিয়া স্বপ্ন দেখিতে পারেন না। সেনাপতি মহাশয়ের যুদ্ধে যাইতে আর কোন আপত্তি নাই, কেবল, পাছে চষমার কাঁচে কামানের গোলা লাগে, ও কাঁচ ভাঙ্গিয়া চোক কানা হইয়া যায়, এই যা’ ভয়! কেমন মহাশয়?”

সেনাপতি চোক টিপিয়া কহিলেন, “তাহা নীরত

কি ?” তিনি আসন হইতে উঠিয়া কহিলেন “মহারাজ, আদেশ করেন ত বিদায় হই !”

রাজা সেনাপতিকে যাত্রার জন্ত প্রস্তুত হইতে কহিলেন, “যাত্রার সমস্ত উদ্যোগ কর। আমার ৬৪ দাঁড়ের নৌকা যেন প্রস্তুত থাকে।” মন্ত্রী ও সেনাপতি প্রস্থান করিলেন।

রাজা কহিলেন, “রমাই, তুমি ত সমস্তই শুনিয়াছ। গতবারে ষষ্ঠরাত্রে আমাকে বড়ই মাটি করিয়াছিল।”

রমাই। “আজ্ঞা হাঁ, মহারাজের লাজুল বানাইয়া দিয়াছিল।”

রাজা হাসিলেন। কিন্তু মুখে দস্তুর বিছাৎছটা বিকাশ হইল বটে, মনের মধ্যে ঘোরতর মেঘ করিয়া উঠিল। এ সংবাদ রমাই জানিতে পারিয়াছে শুনিয়া তিনি বড় সন্তুষ্ট নহেন। আর কেহ জানিলে ততটা ক্ষতি ছিল না। অনববত গুড়্‌গুড়ি টানিতে লাগিলেন।

রমাই কহিল, “আপনার এক শ্যালক আসিয়া আমাকে কহিলেন ‘বাসর ঘরে তোমাদের রাজার লেজ প্রকাশ পাইয়াছে। তিনি রামচন্দ্র, না রামদাস ? এমনত পূর্বে জানিতাম না !’ আমি তৎক্ষণাৎ কহিলাম, পূর্বে জানিবেন কিরূপে ? পূর্বেত ছিল না। আপনাদের ঘরে বিবাহ করিতে আসিয়াছেন, তাই স্বস্ব দেশে যদাচার অবলম্বন করিয়াছেন !”

রাজা অবাব শুনিয়া বড়ই খুসী! ভাবিলেন রমাই হইতে তাঁহার এবং তাঁহার পূর্বপুরুষদের মুখ উজ্জ্বল হইল ও প্রতাপাদিত্যের আদিভা একেবারে চির-রাহগ্রস্ত হইল। রাজা যুদ্ধবিগ্রহের বড় একটা ধার ধারেন না। এই সকল ছোটখাট ঘটনা শুলিকে তিনি যুদ্ধবিগ্রহের জায় বিষম বড় করিয়া দেখেন। এত দিন তাঁহার ধারণা ছিল যে তাঁহার ঘোরতর অপমানসূচক পরাজয় হইয়াছে। এ কলঙ্কের কথা দিনরাত্রি তাঁহার মনে পড়িত ও তিনি লজ্জাধ পৃথিবীকে দ্বিধা হইতে অনুরোধ করিতেন। আজ তাঁহার মন অনেকটা সান্ত্বনা লাভ করিল যে, সেনাপতি রমাই রণে জিতিয়া আসিয়াছে। কিন্তু তথাপি তাঁহার মন হইতে লজ্জার ভার একেবারে দূব হয় নাই।

রাজা রমাইকে কহিলেন ‘রমাই, এবারে গিয়া জিতিয়া আসিতে হইবে। যদি জয় হয় তবে তোমাকে আমার অঙ্গুবী উপহার দিব।’

রমাই বলিল ‘মহারাজ, জয়ের ভাবনা কি? রমাইকে যদি অস্ত্রপুরে লইয়া যাইতে পাবেন, তবে স্বয়ং স্বাভিধি ঠাকুরাণীকে পর্য্যন্ত মনের সাধে ছোল পান করাইয়া আসিতে পারি।’

রাজা কহিলেন, ‘তাঁহার ভাবনা? তোমাকে আমি অস্ত্রপুরেই লইয়া যাইব।’

রমাই কহিল ‘আপনার অনাধ্য কি আছে?’

রাজারও তাহাই বিশ্বাস। তিনি কি না করিতে পারেন !
অল্পগত-বর্গের কেহ যদি বলে, ‘মহারাজের জয় হউক ;
সেবকের বাসনা পূর্ণ করুন ।’ মহামহিম রামচন্দ্র রায় তৎ-
ক্ষণে বলেন ‘হাঁ, তাহাই হইবে !’ কেহ যেন মনে না করে
এমন কিছু কাজ আছে, যাহা তাঁহা দ্বারা হইতে পারে না ।
তিনি স্থির করিলেন, রমাই ভাঁড়কে প্রতাপাদিত্যের অন্তঃপুরে
লইয়া যাইবেন, স্বয়ং মহিষী মাতার সঙ্গে বিজ্ঞপ করাইবেন,
তবে তাঁহার নাম রাজা রামচন্দ্র রায় ! এত বড় মহৎ কাজটা
যদি তিনি না করিতে পারিলেন, তবে আর তিনি কিসের
রাজা !

চন্দ্রদ্বীপাধিপতি, রামমোহন মালকে ডাকিয়া পাঠাই-
লেন । রামমোহন মাল পরাক্রমে ভীমের মত ছিল । শরীর
প্রায় সাড়ে চার হাত লম্বা । সমস্ত শরীরে মাংসপেশী
তরঙ্গিত । সে স্বর্গীয় রাজার আমলের লোক । রামচন্দ্রকে
পাল্যকাল হইতে পালন করিয়াছে । রমাইকে সকলেই ভয়
করে, রমাই যদি কাহাকেও ভয় করে সে এই রামমোহনকে ।
রামমোহন রমাইকে অত্যন্ত ঘৃণা করিত । রমাই তাহার
ঘণার দৃষ্টিতে কেমন আপনাআপনি সঙ্কুচিত হইয়া পড়িত ।
রামমোহনের দৃষ্টি এড়াইতে পারিলে সে ছাড়িত না । রাম-
মোহন আসিয়া দাঁড়াইল । রাজা কহিলেন, তাঁহার সঙ্গে
দশ জন অহুচর যাইবে । রামমোহন তাহাদিগের সঙ্গ
লইয়া যাইবে ।

রামমোহন কহিল ‘যে আজ্ঞা। রমাই ঠাকুর যাই
বেন কি?’ বিড়াল-চক্ষু শৰ্ম্মাকৃতি রমাই ঠাকুর সজ্জিত
হইয়া পড়িল।

নবম পরিচ্ছেদ।

যশোহর রাজবাটীতে আজ কর্মচারীরা ভারি ব্যস্ত।
জামাতা আসিবে, নানা প্রকার উদ্যোগ করিতে হইতেছে।
আহারাদির বিস্তৃত আয়োজন হইতেছে। চন্দ্রদ্বীপের
রাজবংশ যশোহরের তুলনায় যে নিতান্ত অকিঞ্চিৎকর, সে
বিষয়ে প্রতাপাদিত্যের সহিত মহিষীর কোন মতান্তর ছিল
না, তথাপি জামাতা আসিবে বলিয়া আজ তাঁহার অত্যন্ত
আহ্লাদ হইয়াছে। প্রাতঃকাল হইতে বিভাকে তিনি
স্বহস্তে সাজাইতে আরম্ভ করিয়াছেন—বিভা বিয়ম গোল-
যোগে পড়িয়াছে। কারণ সাজাইবার পদ্ধতি সম্বন্ধে বয়স্ক
মাতার সহিত যুবতী হুহিতার নানা বিষয়ে ক্রটিভেদ আছে,
কিন্তু হইলে হয় কি, বিভার কিসে ভাল হয়, মহিষী তাহা
অবশ্য ভাল বুঝেন। বিভার মনে মনে ধারণা ছিল, তিন
গাছি করিয়া পাতলা ফিরোজ রঙের চূড়ি পরিলে তাহার
শুভ্র কচি হাতখানি বড় মানাইবে—মহিষী তাহাকে আট

গাছা মোটা শোণার চুড়ি ও এক এক গাছা বৃহদাকার হীরায়
 বালা পরাইয়া এত অধিক আনন্দিত হইয়া উঠিলেন যে, সক-
 লকে দেখাইবার জন্য বাড়ির সমুদায় বৃদ্ধা দাসী ও বিধবা
 পিসীদিগকে ডাকাইয়া পাঠাইলেন । বিভা জানিত যে,
 তাহার ছোট স্নকুমার মুখখানিতে নথ কোন মতেই মানায়
 না--কিন্তু মহিষী তাহাকে একটা বড় নথ পরাইয়া তাহার
 মুখখানি একবার দক্ষিণপার্শ্বে একবার বাম-পার্শ্বে ফিরাইয়া
 গর্বসহকারে নিরীক্ষণ করিতে লাগিলেন । ইহাতেও বিভা
 চুপ করিয়াছিল, কিন্তু মহিষী যে ছাঁদে তাহার চুল বাঁধিয়া
 দিলেন, তাহা তাহার একেবারে অসহ্য হইয়া উঠিল । সে
 গোপনে সুরমার কাছে গিয়া তাহার মনের মত চুল বাঁধিয়া
 আসিল । কিন্তু তাহা মহিষীর নজর এড়াইতে পারিল না ।
 মহিষী দেখিলেন, কেবল চুল বাঁধার দোষে বিভার সমস্ত সাজ
 গাটি হইয়া গিয়াছে । তিনি স্পষ্ট দেখিতে পাইলেন সুরমা
 হিংসা করিয়া বিভার চুল বাঁধা খারাপ করিয়া দিয়াছে ;—
 সুরমার হীন উদ্দেশ্যের প্রতি বিভার চোখ ফুটাইতে চেষ্টা
 করিলেন ;—অনেক ক্ষণ বকিয়া যখন স্থির করিলেন, কৃত-
 কার্য্য হইয়াছেন, তখন তাহার চুল খুলিয়া পুনরায় বাঁধিয়া
 দিলেন । এইরূপে বিভা তাহার খোপা; তাহার নথ, তাহার
 দুই বাহুপূর্ণ চুড়ি, তাহার এক হৃদয়পূর্ণ আনন্দের ভার বহন
 করিয়া নিতান্ত বিব্রত হইয়া পড়িয়াছে । সে বুকিতে
 পারিয়াছে যে, হৃদয়স্ত আত্মাদিকে কোন মতেই সে হৃদয়ের

অন্তঃপুরে বদ্ধ করিয়া রাখিতে পারিতেছে না, চোখে মুখে সে ক্রমিক বিদ্যুতের মত উঁকি মারিয়া যাইতেছে। তাহার মনে হইতেছে, বাড়ির দেয়াল গুলি পর্যন্ত তাহাকে উপহাস করিতে উদ্যত রহিয়াছে। যুবরাজ উদয়াদিত্য আসিয়া গভীর স্নেহপূর্ণ প্রশান্ত আনন্দের সহিত বিভার সলজ্জ হৃৎপূর্ণ মুখখানি দেখিলেন। বিভার হৃৎ দেখিয়া তাঁহার এমন আনন্দ হইল যে, গৃহে গিয়া স্নেহ মৃদু হাস্যে স্রমাকে চুষন করিলেন।

স্রমা জিজ্ঞাসা করিল, “কি?”

উদয়াদিত্য কহিলেন,—“কিছুই না!”

এমন সময়ে বসন্তরায় জোর করিয়া বিভাকে টানিয়া ঘরের মধ্যে আনিয়া হাজির করিলেন। চিবুক ধরিয়া তাহার মুখ তুলিয়া ধরিয়া কহিলেন—“দেখ, দাদা, আজ এক বার তোমাদের বিভার মুখখানি দেখ! স্রমা,—ও স্রমা, একবার দেখে যাও!” আনন্দে গদগদ হইয়া বৃদ্ধ হাসিতে লাগিলেন। বিভার মুখের দিকে চাহিয়া কহিলেন, “আফ্লাদ হয় ত ভাল করেই হাসনা ভাই দেখি!

“হাসিরে পায়ে ধরে রাখিবি কেমন করে,

হাসির যে প্রাণের সাধ ঐ অধরে খেলা করে!”

বয়স যদি না যাইত ত আজ তোর ঐ মুখখানি দেখিয়া
এই খানে পড়িতাম আর মরিতাম। হাস, হাস, মরিবো

বয়স গিয়াছে ! যৌবন কালে ঘড়ি ঘড়ি মরিতাম । বৃদ্ধ বয়সে রোগ না হইলে আর মরণ হয় না !”

প্রতাপাদিত্যকে যখন তাঁহার শ্যালক আসিয়া জিজ্ঞাসা করিলেন, “জামাই বাবাজিকে অভ্যর্থনা করিবার জন্য কে গিয়াছে ” তিনি কহিলেন “আমি কি জানি !” “আজ পথে অবশ্য আলো দিতে হইবে ?” নেত্র বিস্তারিত করিয়া মহারাজা কহিলেন “অবশ্যই দিতে হইবে, এমন কোন কথা নাই !” তখন রাজ-শ্যালক সমক্ষোচে কহিলেন, “নহবৎ বসিবে না কি ?” “সে সকল বিষয় ভাবিবার অবসর নাই ।” আসল কথা, বাজনা বাজাইয়া একটা জামাই ঘরে আনা প্রতাপাদিত্যের কার্য্য নহে ।

রামচন্দ্র রায়ের মহা অভিমান উপস্থিত হইয়াছে । তিনি স্থির করিয়াছেন, তাঁহাকে ইচ্ছা পূর্ব্বক অপমান করা হই-
য়াছে । পূর্ব্বের দুই একবার তাঁহাকে অভ্যর্থনা করিয়া লইয়া যাইবার জন্য রাজবাটী হইতে চকদিহিতে লোক প্রেরিত হইত, এবারে চকদিহি পার হইয়া দুইক্রোশ আসিলে পর বামনহাটিতে দেওয়ানজি তাঁহাকে অভ্যর্থনা করিতে আসি-
য়াছেন । যদি বা দেওয়ানজি আগিলেন, তাঁহার সহিত দুই শত পঞ্চাশ জন বই লোক আসে নাই । কেন, সমস্ত যশোহরে কি আর পঞ্চাশ জন লোক মিলিল না ? রাজাকে লইতে যে হাতীটি আনিয়াছে, রমাই ভাঁড়ের মতে স্থূলকায় দেও-
য়ানজি তাহার অপেক্ষা বৃহত্তর । দেওয়ানকে রমাই

জিজ্ঞাসা করিয়াছিল, “মহাশয়, উটি বুঝি আপনার কনিষ্ঠ?”
ভালমানুষ দেওয়ানজি দ্বয়ং বিস্মিত হইয়া উত্তর দিয়া-
ছিলেন, “না, ওটা হাতী।”

রাজা ক্ষুব্ধ হইয়া দেওয়ানকে কহিলেন “তোমাদের
মন্ত্রী যে হাতীটাতে চড়িয়া থাকে, সেটাও যে ইহা অপেক্ষা
বড়।”

দেওয়ান কহিলেন, “বড় হাতীগুলি রাজকার্য্য উপলক্ষে
দূরে পাঠান’ হইয়াছে, সহরে একটিও নাই।”

রামচন্দ্র স্থির করিলেন, তাঁহাকে অপমান করিবার জন্তই
তাহাদের দূরে পাঠান’ হইয়াছে। নহিলে আর কি কারণ
থাকিতে পারে !

রাজাধিরাজ রামচন্দ্র রায় আরক্তিম হইয়া স্বগুরের নাম
ধরিয়া বলিয়া উঠিলেন, “প্রতাপাদিত্য রায়ের চেয়ে আমি
কিসে ছোট?”

রমাই ভাঁড় কহিল, “বয়সে আর সম্পর্কে, নহিলে আর
কিসে ? তাহার মেয়েকে যে আপনি বিবাহ করিয়াছেন,
ইহাতেই—”

কাছে রামমোহন মাল দাঁড়াইয়াছিল, তাহার আর সহ্য
হইল না, বিষম ক্রুদ্ধ হইয়া বলিয়া উঠিল, “দেখ ঠাকুর,
তোমার বড় বাড়ি বাড়িয়াছে। আমার মাঠাকরুণের কথা
অমন করিয়া বলিও না। এই স্পষ্ট কথা বলিলাম।”

প্রতাপাদিত্যকে লক্ষ্য করিয়া রমাই কহিল, “অমন ঢের

চের আদিত্য দেখিয়াছি। জানেন'ত মহারাজ, আদিত্যকে যে ব্যক্তি বগলে ধরিয়া রাখিতে পারে, সে ব্যক্তি রামচন্দ্রের দাস।”

রাজা মুখ টিপিয়া হাসিতে লাগিলেন। রামমোহন তখন ধীরপদক্ষেপে রাজার সম্মুখে আসিয়া ষোড় হস্তে কহিল, “মহারাজ, ঐ বামনা যে আপনার খণ্ডরের নামে যাহা-ইচ্ছা-তাই বলিবে, ইহাত আমার সহ্য হয় না; বলেন ত উহার মুখ বন্ধ করি।”

রাজা কহিলেন, “রামমোহন, তুমি থাম।”

তখন রামমোহন সেখান হইতে দূরে চলিয়া গেল।

রামচন্দ্র সে দিন বহু সহস্র খুঁটিনাটি পর্যালোচনা করিয়া স্থির করিলেন, প্রতাপাদিত্য তাঁহাকে অপমান করিবার জন্য বহুদিন ধরিয়া বিস্তৃত আয়োজন করিয়াছেন। অভিমানে তিনি নিতান্ত ক্ষীণ হইয়া উঠিয়াছেন। স্থির করিয়াছেন, প্রতাপাদিত্যের কাছে এমন মূর্ধি ধারণ করিবেন, যাহাতে প্রতাপাদিত্য বুকিতে পারেন তাঁহার জামাতা কতবড় লোক।

যখন প্রতাপাদিত্যের সহিত রামচন্দ্র রায়ের দেখা হইল, তখন প্রতাপাদিত্য রাজকক্ষে তাঁহার মন্ত্রী সহিত উপবিষ্ট ছিলেন। প্রতাপাদিত্যকে দেখিবামাত্রই রামচন্দ্র নতমুখে ধীরে ধীরে আসিয়া তাঁহাকে প্রণাম করিলেন।

* প্রতাপাদিত্য কিছু মাত্র উল্লাস বা ব্যস্তভাব প্রকাশ না

করিয়া শান্তভাবে কহিলেন। “এস, ভাল আছত!”

রামচন্দ্র মুহূর্ত্তে কহিলেন, “আজ্ঞা, হাঁ।”

মন্ত্রী দিকে চাহিয়া প্রতাপাদিত্য কহিলেন, “ভান্ধা-মাখী পরগণার তহশিলদারের নামে যে অভিযোগ আসি-আছে, তাহার কোন তদন্ত করিয়াছ?”

মন্ত্রী দীর্ঘ এক কাগজ বাহির করিয়া রাজার হাতে দিলেন, রাজা পড়িতে লাগিলেন। কিয়দূর পড়িয়া একবার চোখ তুলিয়া জামাতাকে জিজ্ঞাসা করিলেন,—“গত বৎসরের মত এবার ত তোমাদের ওখানে বন্যা হয় নাই?”

রামচন্দ্র “আজ্ঞা না। আশ্বিন মাসে একবার জল বৃষ্টি—”

প্রতাপাদিত্য—“মন্ত্রী, এ চিঠিখানার অবশ্য একটা নকল রাখা হইয়াছে।” বলিয়া আবার পড়িতে লাগিলেন। পড়া শেষ করিয়া জামাতাকে কহিলেন, “যাও, বাপু, অন্তঃপুরে যাও।”

রামচন্দ্র ধীরে ধীরে উঠিলেন। তিনি বৃষ্টিতে পারি-রাছেন তাঁহার অপেক্ষা প্রতাপাদিত্য কিসে বড়!



দশম পরিচ্ছেদ ।

রামমোহন মাল যখন অন্তঃপুরে আসিয়া বিভাকে প্রণাম করিয়া কহিল, “মা, তোমায় একবার দেখিতে আইলাম” তখন বিভার মনে বড় আনন্দ হইল। রামমোহনকে সে বড় ভাল বাসিত। কুটুম্বিতার নানাবিধ কার্যভার বহন করিয়া রামমোহন প্রায় মাঝে মাঝে চন্দ্রদ্বীপ হইতে যশোহরে আসিত। কোন আবশ্যক না থাকিলেও অবসর পাইলে সে এক একবার বিভাকে দেখিতে আসিত। রামমোহনকে বিভা কিছুমাত্র লজ্জা করিত না। বুদ্ধ, বলিষ্ঠ, দীর্ঘ রামমোহন যখন “মা” বলিয়া আসিয়া দাঁড়াইত তখন তাহার মধ্যে এমন একটা বিশুদ্ধ, সরল, অলঙ্কারশূন্য স্নেহের ভাব থাকিত, যে বিভা তাহার কাছে আপনাকে নিতান্ত বালিকা মনে করিত। বিভা তাহাকে কহিল, “মোহন, তুই এতদিন আসিস্ নাই কেন ?”

রামমোহন কহিল, “তা’ মা, ‘কুপুত্র যদি বা হয়, কুমাত্রা কখন নয়,’ তুমি কোন্ আমাকে মনে কবিলে ? আমি মনে মনে কহিলাম, ‘মা না থাকিলে আমি যাব না, দেখি, কত দিনে তাঁর মনে পড়ে ! তা’ কৈ, একবাবোত মনে পড়িল না !”

বিভা ভারি মুক্ছিলে পড়িল। সে যে কেন ডাকে নাই, ঠাণ্ডা ভাল করিয়া বলিতে পারিল না। তাহা ছাড়া, ডাকে

নাই বলিয়া যে মনে করে নাই, এই কথাটার মধ্যে এক জায়গায় কোথায় যুক্তির দোষ আছে বলিয়া মনে হইতেছে, অথচ ভাল করিয়া বুঝাইয়া বলিতে পারিতেছে না ।

বিভার মুকিল দেখিয়া রামমোহন হাসিয়া কহিল, “না মা, অবসর পাই নাই বলিয়া আসিতে পারি নাই ।”

বিভা কহিল, “মোহন, তুই বোস ; তোদের দেশের গল্প আমার বল্ ।’

রামমোহন বলিল । চন্দ্রদ্বীপের বর্ণনা করিতে লাগিল । বিভা গালে হাত দিয়া এক মনে শুনিতে লাগিল । চন্দ্রদ্বীপের বর্ণনা শুনিতে শুনিতে তাহার হৃদয় টুকুর মধ্যে কত কি যে কল্পনা জাগিয়া উঠিয়াছিল, সে দিন সে আসমানের উপর কত ঘর বাড়িই যে বাঁধিয়াছিল, তাহার আর ঠিকানা নাই । যখন রামমোহন গল্প করিল, গত বর্ষের বঙ্গাব তাহার ঘর বাড়ি সমস্ত ভাসিয়া গিয়াছিল, সন্ধ্যার প্রাক্কালে সে একাকী তাহার বুদ্ধা মাতাকে পিঠে করিয়া শাঁতার দিয়া মন্দিরের চূড়ায় উঠিয়াছিল, ও তুই জনে মিলিয়া সমস্ত রাত্রি সেই থানে ঘাপন করিয়াছিল ;—তখন বিভার ক্ষুদ্র বুকটির মধ্যে কি হৃৎকম্পই উপস্থিত হইয়াছিল !

গল্প ফুরাইলে পর রামমোহন কহিল “মা, তোমার জন্ত চারগাছি শাঁখা আনিয়াছি, তোমাকে ঐ হাতে পরিতে হইবে, আমি দেখিব ।”

বিভা তাহার চারগাছি শোণার চুড়ি খুলিয়া শাঁখা

পল্লি, ও হাসিতে হাসিতে মায়ের কাছে গিয়া কহিল,—
“মা, মোহন তোমার চুড়ি খুলিয়া আমাকে চারগাছি শাঁখা
পরাইয়া দিয়াছে ।”

মহিষী কিছু মাত্র অসন্তুষ্ট না হইয়া হাসিয়া কহিলেন,
“তা, বৈশ ত নাজিয়াছে, বৈশ ত মানাইয়াছে ।”

রামমোহন অভ্যস্ত উৎসাহিত ও গর্জিত হইয়া উঠিল ।
মহিষী তাহাকে ডাকাইয়া লইয়া গেলেন, নিজে উপস্থিত
ধাকিয়া তাহাকে আহ্বার করাইলেন । সে তৃপ্তিপূর্বক
ভোজন করিলে পর তিনি অভ্যস্ত সন্তুষ্ট হইয়া কহিলেন ;—
“মোহন, এই বারে তোর সেই আগমনীর গানটি গা’ ।”
রামমোহন বিভার দিকে চাহিয়া গাহিল ;—

“সারা বরষ দেখিনে মা, মা তুই আমার কেমন ধারা,

ময়ন-তারার হারিয়ে আমার অন্ধ হ’ল ময়ন-তারার !

এলি কি পাষাণী ওয়ে,

দেখ তোর অঁখি ভোবে,

কিছুতেই থামেনা যে মা,

পোড়ো এ ময়নের ধারা ! ”

রামমোহনের চোখে জল আসিল, মহিষীও বিভার
স্থলের দিকে চাহিয়া চখের জল মুছিলেন । আগমনীর গানে
তাহার বিজয়ার কথা মনে পড়িল ।

ক্রমে সন্ধ্যা হইয়া আসিল । পুরমহিলাদের জনতা
বাড়িতে লাগিল । প্রতিবেশিনীরা জামাই দেবিবার জন্ত

ও সম্পর্ক অল্পসারে জামাইকে উপহাস করিবার জন্য অন্তঃ-পুরে সমাগত হইল। আনন্দ, লজ্জা, আশঙ্কা, একটা অনিশ্চিত, অনির্দেশ্য না জানি-কি-হইবেক ভাবে বিভার হৃদয় তোলপাড় করিতেছে, তাহার মুখ কান লাল হইয়া উঠিয়াছে, তাহার হাত পা শীতল হইয়া গিয়াছে। ইহা কষ্ট কি স্থখ কে জানে !

জামাই অন্তঃপুরে আসিয়াছেন। হল-বিশিষ্ট সৌন্দর্যের কাঁকের ন্যায় রমণীগণ চারিদিক হইতে তাঁহাকে আক্রমণ করিয়াছে। চারিদিকে হাসির কোলাহল উঠিল। চারিদিক হইতে কোকিল-কণ্ঠের তীব্র উপহাস, মৃণাল-বাহব কণ্ঠের তাড়ন, চম্পক-অঙ্গুলির চন্দ্র-নখরের তীক্ষ্ণ পীড়ন চলিতে লাগিল। রামচন্দ্র রায় যখন নিতান্ত কাতর হইয়া পড়িয়াছেন, তখন এক জন প্রৌঢ়া রমণী আসিয়া তাঁহাব পক্ষ অবলম্বন করিয়া বসিল। সে কণ্ঠের কণ্ঠে এমনি কাটা কাটা কথা কহিতে লাগিল ও ক্রমেই তাহার মুখ দিয়া এমনি সকল ক্রুর বিকার বাহির হইতে লাগিল যে পুর-রমণীদের মুখ এক প্রকার বন্ধ হইয়া আসিল। তাহার মুখের কাছে থাকদিদিও চুপ করিয়া গেলেন। বিমলা দিদি ঘর হইতে উঠিয়া চলিয়া গেলেন। কেবল ভূতোব মা তাহাকে খুব এক কথা শুনাইয়াছিল। যখন উল্লিখিত ভূতোর মার মুখ খুব চলিতেছিল, তখন সেই প্রৌঢ়া তাহাকে বলিয়াছিল, “মাগোমা, তোমার মুখ নয়ত, এক গাছা

কাঁটা !” ভূতোর মা তৎক্ষণাৎ কহিল, “আর মাগি, তোর মুখটা অঁস্তাকুড়, এত কাঁটাইলাম, তবুও সাফ হইল না !” বলিয়া গন্ গন্ করিয়া চলিয়া গেল। একে একে ঘর খালি হইল, রামচন্দ্র রায় বিরাম পাইলেন।

তখন সেই প্রৌঢ়া গৃহ হইতে বাহির হইয়া মহিবীর কক্ষে উপস্থিত হইল। সেখানে মহিবী দাস দাসীদিগকে খাওয়াইতেছিলেন। রামমোহনও এক পার্শ্বে বসিয়া থাইতেছিল। সেই প্রৌঢ়া, মহিবীর কাছে আসিয়া তাঁহাকে নিবীক্ষণ করিয়া কহিল,—“এই যে নিকষা জননী !” শব্দটা শুনিবামাত্র রামমোহন চমকিয়া উঠিল, প্রৌঢ়ার মুখের দিকে চাহিল। তৎক্ষণাৎ আহার পরিত্যাগ করিয়া শার্কূলের ন্যায় লক্ষ দিয়া তাহার দুই হস্ত বজ্রমুষ্টিতে ধরিয়া বজ্রস্বরে বলিয়া উঠিল, “আমি যে ঠাকুর তোমায় চিনি !” বলিয়া তাহার মস্তকের বজ্র উন্মোচন করিয়া ফেলিল। আর কেহ নহে, রমাই ঠাকুর ! রামমোহন ক্রোধে কাঁপিতে লাগিল, গাত্র হইতে চাদর খুলিয়া ফেলিল ; দুই হস্তে অবলীলাক্রমে রমাইকে আকাশে তুলিল, কহিল “আজ আমার হাতে তোর মরণ আছে !” বলিয়া তাহাকে দুই এক পাক আকাশে ঘুরাইল। মহিবী ছুটিয়া আসিয়া কহিলেন, “রামমোহন তুই করিস্ কি ?” রমাই কাতর স্বরে কহিল, “দোহাই বাবা, ব্রহ্মহত্যা করিস্ না !” চারিদিক হইতে বিবম একটা গোলযোগ উঠিল। তখন রামমোহন

রমাইকে ভূমিতে নামাইয়া কাঁপিতে কাঁপিতে কহিল,
“হতভাগা, তোর কি আর মরিবার জায়গা ছিল না?”

রমাই কহিল, “মহারাজ আমাকে আদেশ করিয়াছেন।”

রামমোহন বলিয়া উঠিল, “কি বলিলি, নেমক হারাম?
ফের অমন কথা বলিবি ত, এই শানের পাথরে তোর মুখ
ঘষিয়া দিব!” বলিয়া তাহার গলা টিপিয়া ধরিল। রমাই
আর্তনাদ করিয়া উঠিল। তখন রামমোহন খর্ব্বকায় রমা-
ইকে চাদর দিয়া বাঁধিয়া বস্তার মতন করিয়া বুলাইয়া
অন্তঃপুর হইতে বাহির হইয়া গেল।

দেখিতে দেখিতে কথাটা অনেকটা রাষ্ট্র হইয়া গিয়াছে।
রাত্রি তখন দুই প্রহর অতীত হইয়া গিয়াছে। রাজাব
শ্যালক আসিয়া সেই রাত্রে প্রতাপাদিতাকে সংবাদ
দিলেন, যে, জামাতা রমাই ভাঁড়কে রমণীবেশে অন্তঃপুরে
লইয়া গেছেন। সেখানে সে পুর-রমণীদের সহিত, এমন
কি, মহিষীর সহিত বিজ্ঞপ করিয়াছে।

তখন প্রতাপাদিতোর মূর্তি অতিশয় ভয়ঙ্কর হইয়া
উঠিল। রোষে তাঁহার সর্বাঙ্গ আলোড়িত হইয়া উঠিল।
ক্ষীভজটা সিংহের ছায় শয্যা হইতে উঠিয়া বসিলেন।
কহিলেন, “লছমন্ সর্দারকে ডাক।” লছমন্ সর্দারকে
কহিলেন “আজ রাত্রে আমি রামচন্দ্র রায়ের ছিন্ন মুণ্ড
দেখিতে চাই!” সে তৎক্ষণাৎ সেলাম করিয়া কহিল,
“যো হুকুম মহারাজ!” তৎক্ষণাৎ তাঁহার শ্যালক তাঁহার

পদতলে পড়িল, কহিল—“মহারাজ, মার্জনা করুন, বিভার কথা একবার মনে করুন। অমন কাজ করিবেন না!” প্রতাপাদিত্য পুনরায় দৃঢ়স্বরে কহিলেন, “আজ রাজের মধ্যেই আমি রামচন্দ্র রায়ের মৃত্যু চাই!” তাঁহার শ্যালক তাঁহার পা জড়াইয়া ধরিয়া কহিল, “মহারাজ, আজ তাঁহারা অস্ত্রপুরে শয়ন করিয়াছেন, মার্জনা করুন, মহারাজ মার্জনা করুন!” তখন প্রতাপাদিত্য কিয়ৎক্ষণ স্তম্ভভাবে থাকিয়া কহিলেন—“লছমন্ শুন, কাল প্রভাতে যখন রামচন্দ্র রায় অস্ত্রপুর হইতে বাহির হইবে, তখন তাহাকে বধ করিবে, তোমার উপর আদেশ রহিল।” শ্যালক দেখিলেন, তিনি যত দূর মনে করিয়াছিলেন, তাহা অপেক্ষা অনেক অধিক হইয়া গিয়াছে। তিনি সেই রাজে চুপি চুপি আসিয়া বিভার শয়ন-কক্ষের দ্বারে আঘাত করিলেন।

তখন দূর হইতে দুই প্রহরের নহবৎ বাজিতেছে। নিম্নরাজ্যে সেই নহবতের শব্দ, জ্যোৎস্নার সহিত, দক্ষিণ-বাতাসের সহিত মিশিয়া যুমন্ত প্রাণের মধ্যে স্বপ্ন সৃষ্টি করিতেছে। বিভার শয়ন-কক্ষের মুক্ত বাতায়ন ভেদ করিয়া জ্যোৎস্নার আলো বিছানায় আসিয়া পড়িয়াছে। রামচন্দ্র রায় নিদ্রায় মগ্ন। বিভা উঠিয়া বসিয়া, চুপ করিয়া গালে হাত দিয়া ভাবিতেছে। জ্যোৎস্নার দিকে চাহিয়া তাহার চেহারা দুই এক বিন্দু অশ্রু বরিয়া পড়িতেছিল। বৃষ্টি,

যেমনটি কল্পনা করিয়াছিল, ঠিক তেমনটি হয় নাই। তাহার প্রাণের মধ্যে কাঁদিতেছিল। এত দিন যাহার জন্য অপেক্ষা করিয়াছিল, সে দিন ত আজ আসিয়াছে!

রামচন্দ্র রায় শয্যায় শয়ন করিয়া অবধি বিভার সহিত একটি কথা কন নাই। প্রতাপাদিত্য তাঁহাকে অপমান করিয়াছে—তিনি প্রতাপাদিত্যকে অপমান করিবেন কি করিয়া? না, বিভাকে অগ্রাহ্য করিয়া। তিনি জানাইতে চান, “তুমি ত যশোহরের প্রতাপাদিত্যের মেয়ে, চন্দ্রদ্বীপাধিপতি রাজা রামচন্দ্র রায়ের পাশে কি তোমাকে সাজে?” এই স্থির করিয়া সেই যে পাশ ফিরিয়া শুইয়াছেন, আর পার্শ্ব পরিবর্তন করেন নাই। যত মান অভিমান সমস্ত বিভার প্রতি। বিভা জাগিয়া বসিয়া ভাবিতেছে। একবার জ্যোৎস্নার দিকে চাহিতেছে, একবার স্বামীর মুখের দিকে চাহিতেছে। তাহার বুক কাঁপিয়া কাঁপিয়া এক একবার দীর্ঘ নিশ্বাস উঠিতেছে—প্রাণের মধ্যে বড় ব্যথা বাজিয়াছে। সহসা একবার রামচন্দ্রের ঘুম ভাঙিয়া গেল। সহসা দেখিলেন, বিভা চুপ করিয়া বসিয়া কাঁদিতেছে। সেই নিদ্রোখিত অবস্থার প্রথম মুহূর্তে, যখন অপমানের স্মৃতি এখনো জাগিয়া উঠে নাই, গভীর নিদ্রার পরে মনের স্তম্ভ ভাব ফিরিয়া আসিয়াছে, রোষের ভাব চলিয়া গিয়াছে;—তখন সহসা বিভার সেই অশ্রু-প্লাবিত ককণ কচি মুখখানি দেখিয়া সহসা তাঁহার মনে ককণ

জাগিয়া উঠিল। বিভার হাত ধরিয়া কহিলেন, “বিভা, কাদিতেছ!” বিভা আবুল হইয়া উঠিল। বিভা কথা কহিতে পারিল না, বিভা চোখে দেখিতে পাইল না, বিভা শুইয়া পড়িল। তখন রামচন্দ্র রায় উঠিয়া বসিয়া ধীরে ধীরে বিভার মাথাটি লইয়া কোলের উপরে রাখিলেন, তাহার অশ্রুজল মুছাইয়া দিলেন। এমন সময়ে দ্বারে কে আঘাত করিল। রামচন্দ্র বলিয়া উঠিলেন, “কেও?” বাহির হইতে উত্তর আসিল, “অবিলম্বে দ্বার খোল!”

একাদশ পরিচ্ছেদ ।

রামচন্দ্র রায় শয়ন-কক্ষের দ্বার উন্মোচন করিয়া বাহিরে আসিলেন। রাজশ্যালক রমাপতি কহিলেন, “বাবা এখনি পালাও, মুহূর্ত্ত বিলম্ব করিও না।”

সেই রাত্রে সহসা এই কথা শুনিয়া রামচন্দ্র রায় একেবারে চমকিয়া উঠিলেন, তাঁহার মুখ শাদা হইয়া গেল, রুদ্ধ নিঃশ্বাসে জিজ্ঞাসা করিলেন, “কেন, কেন কি হইয়াছে।”

“কি হইয়াছে তাহা বলিব না এখনি পালাও।”

বিভা শয্যা ত্যাগ করিয়া আসিয়া জিজ্ঞাসা করিল, “আমা, কি হইয়াছে?”

রমাপতি কহিলেন, “সে কথা তোমার গুনিয়া কাজ নাই মা!”

বিভার প্রাণ কাঁপিয়া উঠিল। সে একবার বসন্ত রায়ের কথা ভাবিল, একবার উদয়াদিত্যের কথা ভাবিল। বলিয়া উঠিল—“মামা, কি হইয়াছে বল।”

রমাপতি তাহার কথার কোন উত্তর না দিয়া রামচন্দ্রকে কহিলেন “বাবা, অনর্থক কাল বিলম্ব হইতেছে। এই বেলা গোপনে পলাইবার উপায় দেখ।”

হঠাৎ বিভার মনে একটা দারুণ অশুভ আশঙ্কা জাগিয়া উঠিল। গমনোদ্যত মাতুলের পথরোধ করিয়া কহিল, “ওগো তোমার ছুটি পায়ে পড়ি কি হইয়াছে বলিয়া যাও।”

রমাপতি সভয়ে চারিদিকে চাহিয়া কহিলেন,—“গোল করিস্নে বিভা, চূপ কর, আমি সমস্তই বলিতেছি।”

যখন রমাপতি একে একে সমস্তটা বলিলেন, তখন বিভা একেবারে চীৎকার করিয়া উঠিবার উপক্রম করিল। রমাপতি তাড়াতাড়ি তাহার মুখ চাপিয়া ধরিলেন—কহিলেন—“চূপ, চূপ, সর্বনাশ করিস্নে।” বিভা রুদ্ধশ্বাসে অর্ধ-রুদ্ধ স্বরে সেই থানে বসিয়া পড়িল।

রামচন্দ্র রায় সকাতরে কহিলেন “এখন আমি কি উপায় করিব? পলাইবার কি পথ আছে, আমিত কিছুই জানি না।”

রমাপতি কহিলেন—“আজ রাত্রে প্রহরীরা চারিদিকে

সত্যক আছে । আমি একবার চারিদিক দেখিয়া আসি, যদি কোথাও কোন উপায় থাকে ।”

এই বলিয়া তিনি প্রস্থানের উপক্রম করিলেন । বিভা তাঁহাকে ধরিয়া কহিল, “মামা, তুমি কোথায় যাও । তুমি যাইও না, তুমি আমাদের কাছে থাক ।”

রমাপতি কহিলেন, “বিভা তুই পাগল হইয়াছিস্ ! আমি কাছে থাকিলে কোন উপকার দেখিবে না । ততক্ষণ আমি একবার চারিদিকের অবস্থা দেখিয়া আসি ।”

বিভা তখন বলপূর্বক উঠিয়া দাঁড়াইল । হাত পা ধরত্ব করিয়া কাঁপিতেছে । কহিল “মামা, তুমি আর একটু এই ধানে থাক । আমি একবার দাদার কাছে যাই ।” বলিয়া বিভা তাড়াতাড়ি উদয়াদিত্যের শয়নকক্ষে গিয়া উপস্থিত হইল ।

তখন ক্ষীণ চন্দ্র অস্ত যায় যায় । চারিদিকে অন্ধকার হইয়া আসিতেছে । কোথাও সাড়া শব্দ নাই । রামচন্দ্র রায় তাঁহার শয়ন কক্ষের দ্বারে দাঁড়াইয়া দেখিলেন দুই পার্শ্বে রাজঅস্তঃপুরের শ্রেণীবদ্ধ কক্ষে দ্বার বন্ধ, সকলেই নিশ্শেষচিন্তে ঘুমাইতেছে । সম্মুখের প্রাঙ্গণে চারিদিকের ভিত্তির ছায়া পড়িয়াছে, ও তাহার এক পার্শ্বে একটু খানি জ্যোৎস্না এখণে অবশিষ্ট রহিয়াছে । ক্রমে সে টুকুও মিলাইয়া গেল । অন্ধকার এক-পা এক-পা করিয়া সমস্ত জগৎ দখল করিয়া লইল । অন্ধকার দূরে বাগানের শ্রেণীবদ্ধ

নারিকেল গাছ গুলির মধ্যে আসিয়া জমিয়া বসিল। অন্ধকার কোল ঘেসিয়া অতিশয় কাছে আসিয়া দাঁড়াইল। রামচন্দ্র রায় কল্পনা করিতে লাগিলেন, এই চারিদিকের অন্ধকারের মধ্যে না জানি কোথায় একটি ছুরি তাঁহার জন্য অপেক্ষা করিতেছে? দক্ষিণে না বামে, সম্মুখে না পশ্চাতে? ঐ যে ইতস্তত এক একটা কোণ দেখা যাইতেছে, উহার মধ্যে একটা কোণে ত কেহ মুখ গুঁজিয়া, সর্বাঙ্গ চাদরে ঢাকিয়া চূপ করিয়া বসিয়া নাই? কি জানি, ঘরের মধ্যে যদি কেহ থাকে! খাটের নীচে, অথবা দেয়ালের এক পাশে! তাঁহার সর্বাঙ্গ শিহরিয়া উঠিল, কপাল দিয়া ঘাম পড়িতে লাগিল। একবার মনে হইল যদি মামা কিছু করেন, যদি তাঁহার কোন অভিসন্ধি থাকে? আন্তে আন্তে একটু সরিয়া দাঁড়াইলেন। একটা বাতাস আসিয়া ঘরের প্রদীপ নিভিয়া গেল। রামচন্দ্র ভাবিলেন—কে একজন বুঝি প্রদীপ নিভাইয়া দিল—কে একজন বুঝি ঘরে আছে! রমাপতির কাছে ঘেসিয়া গিয়া ডাকিলেন—“মামা।” মামা কহিলেন, “কি বাবা?” রামচন্দ্র রায় মনে মনে কহিলেন, বিভা কাছে থাকিলে ভাল হইত, মামাকে ভাল বিশ্বাস হইতেছে না।

বিভা উদয়াদিত্যের কাছে একেবারে কাঁদিয়া গিয়া পড়িল, তাহার মুখ দিয়া আর কথা বাহির হইল না। সুরমা তাহাকে উঠাইয়া বসাইয়া জিজ্ঞাসা করিল, “কি

হইয়াছে বিভা ?” বিভা সুরমাকে দুই হস্তে জড়াইয়া ধরিয়া একটি কথাও বলিতে পারিল না । উদয়াদিত্য সন্নেহে বিভার মাথায় হাত দিয়া কহিলেন, “কেন, বিভা, কি হইয়াছে ?” বিভা তাহার ভ্রাতার দুই হাত ধরিয়া কহিল, “দাদা আমার সন্নে এস, সমস্ত শুনিবে ।”

তিন জনে মিলিয়া বিভার শয়ন-কক্ষের দ্বারে গিয়া উপস্থিত হইলেন । সেখানে অন্ধকারে রামচন্দ্র বসিয়া, ও রমাপতি দাঁড়াইয়া আছেন । উদয়াদিত্য তাড়াতাড়ি জিজ্ঞাসা করিলেন “মামা, হইয়াছে কি ?” রমাপতি একে একে সমস্তটা কহিলেন । উদয়াদিত্য তাঁহার আয়ত নেত্র বিষ্ফারিত করিয়া সুরমার দিকে চাহিয়া কহিলেন “আমি এখনি পিতার কাছে যাই—তাঁহাকে কোন মতেই আমি এ কাজ করিতে দিব না ! কোন মতেই না !”

সুরমা কহিল, “তাঁহাতে কি কোন ফল হইবে ? তাহার চেয়ে বরং একবার দাদা মহাশয়কে তাঁহার কাছে পাঠাও, যদি কিছু উপকার দেখে ।”

যুবরাজ কহিলেন, “আচ্ছা ।”

বসন্তরাঘ তখন অগাধ নিদ্রা দিতেছিলেন । ঘুম ভাঙিয়াই উদয়াদিত্যকে দেখিয়া ভাবিলেন, বুঝি ভোর হইয়াছে । তৎক্ষণাৎ ললিতে একটা গান গাহিবার উপক্রম করিলেন,

‘কবরীতে ফুল শুকাল, কাননের ফুল ফুটল বনে,

দিনের আলো প্রকাশিল মনের সাধ রহিল মনে !”

উদয়াদিত্য বলিলেন—“দাদা মহাশয়, বিপদ ঘটিয়াছে।”

তৎক্ষণাৎ বসন্তরায়ের গান বন্ধ হইয়া গেল। ত্রস্ত ভাবে উঠিয়া উদয়াদিত্যের কাছে আসিয়া শশব্যস্তে জিজ্ঞাসা করিলেন—“জ্যা! সে কি দাদা! কি হইয়াছে! কিসের বিপদ!”

উদয়াদিত্য সমস্ত বলিলেন। বসন্তরায় শয্যায় বসিয়া পড়িলেন। উদয়াদিত্যের মুখে দিকে চাহিয়া ঘাড় নাড়িয়া কহিলেন—“না, দাদা, না, এ কি কখনো হয়? এ কি কখনো সম্ভব?”

উদয়াদিত্য কহিলেন, “আর সময় নাই, একবার পিতার কাছে যাও!”

বসন্তরায় উঠিলেন, চলিলেন, ঘাইতে ঘাইতে কতবার জিজ্ঞাসা করিলেন, “দাদা, এ কি কখনো হয়, এ কি কখনো সম্ভব?”

প্রতাপাদিত্যের গৃহে প্রবেশ করিয়াই জিজ্ঞাসা করিলেন; “বাবা প্রতাপ, এ কি কখন সম্ভব?” প্রতাপাদিত্য এখনো শয়ন-কক্ষে যান নাই—তিনি তাঁহার মন্ত্রগৃহে বসিয়া আছেন। একবার এক মুহূর্তের জন্ত মনে হইয়াছিল লহমন্ সর্দারকে ফিরিয়া ডাকিবেন! কিন্তু সে সঙ্কল্প তৎক্ষণাৎ মন হইতে দূর হইয়া গেল। প্রতাপাদিত্য কখনও ছুইবার আদেশ করেন? যে মুখে আদেশ দেওয়া, সেই

যুখে আদেশ কিরাইয়া লওয়া ? আদেশ লইয়া ছেলেখেলা কবা তাঁহার কার্য্য নহে । কিন্তু বিভা ? বিভা বিধবা হইবে ! রামচন্দ্র রায় যদি স্বেচ্ছা পূর্ব্বক অগ্নিতে ঝাঁপ দিত, তাহা হইলেও ত বিভা বিধবা হইত—রামচন্দ্র রায় প্রতাপাদিত্য রায়ের রোষাগ্নিতে স্বেচ্ছাপূর্ব্বক ঝাঁপ দিয়াছে, তাহার অনিবার্য্য ফল স্বরূপ বিভা বিধবা হইবে ! ইহাতে প্রতাপাদিত্যের কি হাত আছে ! কিন্তু এত কথাও তাঁহার মনে হয় নাই । মাঝে মাঝে যখন সমস্ত ঘটনাটা উজ্জ্বল রূপে তাঁহার মনে আগিয়া উঠিতেছে, তখন তিনি একেবারে অধীর হইয়া উঠিতেছেন, ভাবিতেছেন, রাত কখন পোহাইবে ? ঠিক এমন সময়ে বুদ্ধ বসন্তরায় ব্যস্ত সমস্ত হইয়া গৃহে প্রবেশ করিলেন ও আকুল ভাবে প্রতাপাদিত্যের দুই হাত ধরিয়া কহিলেন, “বাবা প্রতাপ, ইহাও কি কখনও সম্ভব ?”

প্রতাপাদিত্য একেবারে অলিয়া উঠিয়া বলিলেন, “কেন সম্ভব নয় ?”

বসন্তরায় কহিলেন, “ছেলে মানুষ, অপরিণামদর্শী, সে কি তোমার ক্রোধের ষোগ্যপাত্র ?”

প্রতাপাদিত্য বলিয়া উঠিলেন, “ছেলে মানুষ ! আগুনে হাত দিলে হাত পুড়িয়া যায়, ইহা বুঝিবার বয়স তাহার হয় নাই ! ছেলে মানুষ ! কোথাকার একটা লক্ষ্মীছাড়া নির্বোধ মুর্থ ব্রাহ্মণ—নির্বোধদের কাছে দাঁত দেখাইয়া

যে রোজগার করিয়া খায়, তাহাকে স্ত্রীলোক সাজাইয়া আমার মহিষীর সঙ্গে বিক্রপ করিবার জন্ত আনিয়াছে ;—এতটা বুদ্ধি যাহার যোগাইতে পারে, তাহার ফল কি হইতে পারে, সে বুদ্ধিটা আর তাহার মাথায় যোগাইল না ! হুখে এই, বুদ্ধিটা যখন মাথায় যোগাইবে, তখন তাহার মাথাও তাহার শরীরে থাকিবে না ।” যতই বলিতে লাগিলেন তাঁহার শরীর আরও কাঁপিতে লাগিল, তাঁহার প্রতিজ্ঞা আরো দৃঢ় হইতে লাগিল, তাঁহার অধীরতা আরো বাড়িয়া উঠিল ।

বসন্তরায় পুনশ্চ মাথা নাড়িয়া কহিলেন, “আহা, সে ছেলে মাছৰ । সে কিছুই বুকে না !”

প্রতাপাদিত্যের অসহ্য হইয়া উঠিল, তিনি বলিলেন,— “দেখ পিতৃব্য ঠাকুর, যশোহরের রায় বংশের কিসে মান অপমান হয়, সে জ্ঞান যদি তোমার থাকিবে, তবে কি ঐ পাকাতুলের উপর মোগল বাদশাহের শিরোপা জড়াইয়া বেড়াইতে পার ! বাদশাহের প্রসাদ গর্বে তুমি মাথা তুলিয়া বেড়াইতেছ বলিয়া প্রতাপাদিত্যের মাথা একেবারে নত হইয়া পড়িয়াছে । যবন-চরণের মৃত্তিকা তুমি কপালে কোঁটা করিয়া পরিয়া থাক’ । তোমার ঐ যবনের পদধূলিময় অকিঞ্চিৎকর মাথাটা ধুলিতে লুটাইবার সাধ ছিল, বিধাতার বিড়ম্বনায় তাহাতে বাধা পড়িল । এই তোমাকে স্পষ্টই বলিলাম । তুমি বলিয়াই বুঝিলে না, আজ রায়

বংশের কত বড় অপমান হইয়াছে, তুমি বলিয়াই আজ রায়-বংশের অপমানকারীর ক্ষত মার্জনা ভিক্ষা করিতে আদিয়াছ ! ”

বসন্তরায় তখন ধীরে ধীরে বলিলেন—“প্রতাপ, আমি বুঝিয়াছি ;—তুমি যখন একবার ছুরি তোল, তখন সে ছুরি এক জনের উপর পড়িতেই চায়। আমি তাহার লক্ষ্য হইতে সরিয়া পড়িলাম বলিয়া আর একজন তাহার লক্ষ্য হইয়াছে। ভাল প্রতাপ, তোমার মনে যদি দয়া না থাকে, তোমার ক্ষুধিত ক্রোধ একজনকে যদি গ্রাস করিতেই চায়, তবে আমাকেই করুক ! এই তোমার খুড়ার মাথা (বলিয়া বসন্তরায় মাথা নীচু করিয়া দিলেন) ইহা লইয়া যদি তোমার তৃপ্তি হয় তবে লও। ছুরি আন’। এ মাথায় চুল নাই, এ মুখে ঘোবনের রূপ নাই ; যম নিমজ্জন-লিপি পাঠাইয়াছে, সে সভার উপযোগী সাজসজ্জাও শেষ হইয়াছে। (বসন্তরায়ের মুখে অতি মৃদু হাস্যরেখা দেখা দিল।) কিন্তু ভাবিয়া দেখ দেখি প্রতাপ, বিভা আমাদের হৃদের মেয়ে, তার যখন ছুটি চক্ষু দিয়া অশ্রু পড়িবে তখন—” বলিতে বলিতে বসন্তরায় অধীর উচ্ছ্বাসে একেবারে কাঁদিয়া উঠিলেন—“আমাকে শেষ করিয়া ফেল প্রতাপ ! আমার বাঁচিয়া রাখা নাই। তাহার চখে জল দেখিবার আগে আমাকে শেষ করিয়া ফেল !”

* প্রতাপাদিত্য এতক্ষণ চুপ করিয়া ছিলেন। যখন

বসন্তরায়ের কথা শেষ হইল, তখন তিনি ধীরে ধীরে উঠিয়া চলিয়া গেলেন। বুঝিলেন কথাটা প্রকাশ হইয়াছে। নীচে গিয়া গ্রহরীদের ডাকাইয়া আদেশ করিলেন, রাজ-প্রাসাদ-সংলগ্ন খাল এখনি যেন বড় বড় শাল কাঠ দিয়া বন্ধ করিয়া দেওয়া হয়। সেই খালে রামচন্দ্র রায়ের নৌকা আছে। গ্রহরীদিগকে বিশেষ করিয়া সাবধান করিয়া দিলেন, আজ রাত্রে অস্তঃপুর হইতে কেহ যেন বাহির হইতে না পারে।

দ্বাদশ পরিচ্ছেদ।

বসন্তরায় যখন অস্তঃপুরে ফিরিয়া আসিলেন, তাঁহাকে দেখিয়া বিভা একেবারে কাঁদিয়া উঠিল। বসন্তরায় আর অশ্রু-সম্বরণ করিতে পারিলেন না, তিনি উদয়াদিত্যের হাত ধরিয়া কহিলেন, “দাদা, তুমি ইহার একটা উপায় করিয়া দাও।” রামচন্দ্র রায় একেবারে অধীর হইয়া উঠিলেন। তখন উদয়াদিত্য তাঁহার তরবারী হস্তে লইলেন। কহিলেন, “আইস, আমার সঙ্গে সঙ্গে আইস।” সকলে সঙ্গে সঙ্গে চলিল। উদয়াদিত্য কহিলেন—“বিভা তুই এখানে থাক্, তুই আসিস্নে।” বিভা স্তব্ধ হইল না। রাণী-

চন্দ্র রায়ও কহিলেন—“না, বিভা সঙ্গে সঙ্গেই আসুক!” সেই নিম্নরূপ রাত্রি সকলে পাটিপিয়া চলিতে লাগিল। মনে হইতে লাগিল বিভীষিকা চারিদিক হইতে তাহার অদৃশ্য হস্ত প্রসারিত করিতেছে! রামচন্দ্র রায় সম্মুখে পশ্চাতে পার্শ্বে দৃষ্টিপাত করিতে লাগিলেন। মামার প্রতি মাঝে মাঝে সন্দেহ জন্মিতে লাগিল। অন্তঃপুর অতিক্রম করিয়া বহির্দেশে যাইবার দ্বারে আসিয়া উদয়া-দিত্য দেখিলেন দ্বার বন্ধ। বিভা ভয়কম্পিত রুদ্ধকণ্ঠে কহিল “দাদা, নীচে যাইবার দরজা হয় ত বন্ধ করে নাই। সেইখানে চল।” সকলে সেই দিকে চলিল। দীর্ঘ অন্ধকার সিঁড়ি বাহিয়া নীচে চলিতে লাগিল। রামচন্দ্র রায়ের মনে হইল, এ সিঁড়ি দিয়া নামিলে বুঝি আর কেহ উঠে না—বুঝি বাসুকী শাপের গর্তট। এইখানে, পাতালে নামিবার সিঁড়ি এই। সিঁড়ি ফুরাইলে দ্বারের কাছে গিয়া দেখিলেন দ্বার বন্ধ। আবার সকলে ধীরে ধীরে উঠিল। অন্তঃপুর হইতে বাহির হইবার যতগুলি পথ আছে সমস্তই বন্ধ। সকলে মিলিয়া দ্বারে দ্বারে ঘুরিয়া বেড়াইল, প্রত্যেক দ্বারে ফিরিয়া ফিরিয়া দুই তিন বার করিয়া গেল। সকল গুলিই বন্ধ।

যখন বিভা দেখিল, বাহির হইবার কোন পথই নাই, তখন সে অশ্রু মুছিয়া ফেলিল। স্বামীর হাত ধরিয়া তাহার শরন কক্ষে লইয়া গেল। দৃঢ় পদে দ্বারের নিকট দাঁড়াইয়া

অকম্পিত স্বরে কহিল,—“দেখিব, এ ঘর হইতে তোমাকে কে বাহির করিয়া লইতে পারে! তুমি যেখানে যাইবে, আমি তোমার আগে আগে যাইব, দেখিব আমাকে কে বাধা দেয়!” উদয়াদিত্য ঘরের নিকট দাঁড়াইয়া কহিলেন, “আমাকে বধ না করিয়া কেহ ঘরের মধ্যে প্রবেশ করিতে পারিবে না।” সুরমা কিছু না বলিয়া স্বামীর পার্শ্বে গিয়া দাঁড়াইল। বৃদ্ধ বসন্তরায় সকলের আগে আসিয়া দাঁড়াইলেন। মামা ধীরে ধীরে চলিয়া গেলেন। কিন্তু রামচন্দ্র রায়ের এ বন্দোবস্ত কিছুতেই ভাল লাগিল না। তিনি ভাবিতেছেন, “প্রতাপাদিত্য যে রকম লোক দেখিতেছি, তিনি কি না করিতে পারেন! বিভা ও উদয়াদিত্য যে মাঝে পড়িয়া কিছু করিতে পারিবেন, এমন ত ভরসা হয় না। এ বাড়ি হইতে কোন মতে বাহির হইতে পারিলেই বাঁচি।”

কিছুক্ষণ বাদে সুরমা উদয়াদিত্যকে মৃদুস্বরে কহিল, “আমাদের এখানে দাঁড়াইয়া থাকিলে যে কোন ফল হইবে তাহা ত বোধ হয় না; বরং উণ্টা। পিতা যতই বাধা পাইবেন, ততই তাঁহার সংকল্প আরো দৃঢ় হইবে। আজ রাত্রেই কোন মতে প্রাসাদ হইতে পলাইবার উপায় করিয়া দেও!”

উদয়াদিত্য চিন্তিতভাবে কিয়ৎক্ষণ সুরমার মুখের দিকে চাহিয়া কহিলেন “তবে আমি যাই, বল-প্রয়োগ করিয়া দেখি গে!”

স্বরমা দৃঢ় ভাবে সম্মতি-সূচক ঘাড় নাড়িয়া কহিল
“যাও !”

উদয়াদিত্য তাঁহার উত্তরীয় বসন ফেলিয়া দিলেন—
চলিলেন। স্বরমা সঙ্গে সঙ্গে কিছু দূর গেল। নিভৃত
স্থানে গিয়া সে উদয়াদিত্যের বক্ষ আলিঙ্গন করিয়া ধরিল।
উদয়াদিত্য শির নত করিয়া তাহাকে একটি দীর্ঘ চুম্বন
করিলেন, ও মুহূর্তের মধ্যে চলিয়া গেলেন। তখন স্বরমা
তাহার শয়ন-কক্ষে আসিয়া উপস্থিত হইল, তাহার দুই
চোখ বহিয়া অশ্রু পড়িতে লাগিল। ঘোড় হস্তে কহিল—
“মাগো—যদি আমি পতিব্রতা সতী হই, তবে এবার আমার
স্বামীকে তাঁহার পিতার হাত হইতে রক্ষা কর। আমি
যে তাঁহাকে আজ এই বিপদের মধ্যে বিদায় দিলাম, সে
কেবল তোর ভরষাতেই মা ! তুই যদি আমাকে বিনাশ
করিস, তবে পৃথিবীতে তোকে আর কেহ বিশ্বাস করিবে
না !” বলিতে বলিতে কাঁদিয়া উঠিল। স্বরমা সেই
অন্ধকারে বসিয়া কতবার মনে মনে “মা” “মা” বলিয়া
ডাকিল, কিন্তু মনে হইল যেন মা তাহার কথা শুনিতে
পাইলেন না। মনে মনে তাঁহার পায়ে যে পুষ্পাঞ্জলি দিল,
মনে হইল যেন, তিনি তাহা লইলেন না, তাঁহার পা
হইতে পড়িয়া গেল। স্বরমা কাঁদিয়া কহিল “কেন মা,
আমি কি করিয়াছি ?” তাহার উত্তর শুনিতে পাইল না।
সে সেই চারিদিকের অন্ধকারের মধ্যে দেখিতে পাইল,

প্রলয়ের মূর্তি নাচিতেছে! সুরমা চারিদিক শূন্যময় দেখিতে লাগিল। সে একাকী সে ঘরে আর বসিয়া থাকিতে পারিল না। বাহির হইয়া বিভার ঘরে আসিল।

বসন্তরায় কাতর স্বরে কহিলেন—“দাদা এখনো ফিরিল না, কি হইবে?”

সুরমা দেয়ালে ঠেস দিয়া দাঁড়াইয়া কহিল, “বিধাতা যাহা করেন!”

রামচন্দ্র রায় তখন মনে মনে তাঁহার পুরাতন ভৃত্য রামমোহনের সর্কনাশ করিতেছিলেন। কেন না, তাহা হইতেই এই সমস্ত বিপদ ঘটিল। তাহার যত প্রকার শাস্তি সম্ভব তাহার বিধান করিতেছিলেন। মাঝে মাঝে এক একবার চৈতন্য হইতেছে যে, শাস্তি দিবার বুঝি আর অবসর থাকিবে না।

উদয়াদিত্য তলবারী হস্তে অস্ত্রপূর অতিক্রম করিয়া রুদ্ধ দ্বারে গিয়া সবলে পদাঘাত করিলেন—কহিলেন “কে আছিল?”

বাহির হইতে উত্তর আসিল “আজ্ঞা, আমি সীতারাম!”

সুবরাজ দৃঢ় স্বরে কহিলেন—“শীঘ্র দ্বার খোল’।”

সে অবিলম্বে দ্বার খুলিয়া দিল। উদয়াদিত্য চলিয়া যাইবার উপক্রম করিলে সে ঘোড়হস্তে কহিল,—“সুবরাজ, মাপ করুন—আজ রাত্রে অস্ত্রপূর হইতে কাহারো বাহির হইবার হুকুম নাই।”

যুবরাজ কহিলেন, “সীতারাম, তবে কি তুমিও আমার বিরুদ্ধে অস্ত্রধারণ করিবে ? আচ্ছা তবে আইস ।” বলিয়া অসি নিক্ষেপিত করিলেন ।

সীতারাম যোড় হস্তে কহিল, “না যুবরাজ, আপনার বিরুদ্ধে অস্ত্রধারণ করিতে পারিব না—আপনি হুইবার আমার প্রাণ রক্ষা করিয়াছেন ।” বলিয়া তাঁহার পায়ের ধূলা মাথায় তুলিয়া লইল ।

যুবরাজ কহিলেন, “তবে কি করিতে চাও, শীঘ্র কর—আর সময় নাই ।”

সীতারাম কহিল—“যে প্রাণ আপনি হুইবার রক্ষা করিয়াছেন, এবার তাহাকে বিনাশ করিবেন না । আমাকে নিরস্ত্র করুন । এই লউন আমার অস্ত্র । আমাকে আপাদ-মস্তক বন্ধন করুন । নহিলে মহারাজের নিকট কাল আমার রক্ষা নাই !”

যুবরাজ তাহার অস্ত্র লইলেন, তাহার কাপড় দিয়া তাহাকে বাঁধিয়া ফেলিলেন । সে সেই থানে পড়িয়া রহিল, তিনি চলিয়া গেলেন । কিছু দূর গিয়া একটা অনতিউচ্চ প্রাচীরের মত আছে । সে প্রাচীরে একট মাত্র দ্বার, ও সে দ্বার রুদ্ধ । সেই দ্বার অতিক্রম করিলেই একেবারে অস্ত্রপুরের বাহিরে যাওয়া যায় । যুবরাজ দ্বারে আঘাত না করিয়া একেবারে প্রাচীরের উপর লাফ দিয়া উঠিলেন । দেখিলেন, একজন প্রহরী প্রাচীরে ঠেসান্ দিয়া দিব্য

আরামে নিদ্রা যাইতেছে। অতি সাবধানে তিনি নামিয়া পড়িলেন। বিছাদেগে সেই নিদ্রিত প্রহরীর উপর গিয়া পড়িলেন। তাহার অস্ত্র কাড়িয়া দূরে ফেলিয়া দিলেন ও সেই হতবুদ্ধি অভিভূত প্রহরীকে আপাদমস্তক বাঁধিয়া ফেলিলেন। তাহার কাছে চাবি ছিল, সেই চাবি কাড়িয়া লইয়া দ্বার খুলিলেন—তখন প্রহরীর চৈতন্য হইল, বিস্মিত স্বরে কহিল “যুবরাজ, করেন কি?”

যুবরাজ কহিলেন, “অস্ত্রপূরের দ্বার খুলিতেছি।”

প্রহরী কহিল—“কাল মহারাজের কাছে কি জবাব দিব?”

উদয়াদিত্য কহিলেন, “বলিস, যুবরাজ বলপূর্বক আমাদিগকে পরাভূত করিয়া অস্ত্রপূরের দ্বার খুলিয়াছেন। তাহা হইলে খালাস পাইবি।”

উদয়াদিত্য অস্ত্রপূর হইতে বাহির হইয়া যে ঘরে জামাতার লোক জন থাকে সেইখানে উপস্থিত হইলেন। সে ঘরে কেবল রামমোহন ও রমাই ভাঁড় ঘুমাইতেছিল, আর বাকী সকলে আহারাদি করিয়া নৌকায় গিয়াছে। যুবরাজ ধীরে ধীরে রামমোহনকে স্পর্শ করিলেন। সে চমকিয়া লাকাইয়া উঠিল। বিস্মিত হইয়া কহিল—“এ কি? যুবরাজ?” যুবরাজ কহিলেন, “বাহিরে আইস।” রামমোহন বাহিরে আসিল। রামমোহনকে যুবরাজ সমস্ত কহিলেন।

তখন রামমোহন মাথায় চাদর বাঁধিয়া লাঠি বাগাইয়া ধরিল, ক্রোধে স্ফূর্ত হইয়া কহিল, “দেখিব লঙ্ঘন সর্দার কত বড় লোক ! যুবরাজ, আমাদের মহারাজকে একবার কেবল আমার কাছে আনিয়া দিও । আমি এক। এই লাঠি নইয়া একশ জন লোক ভাগাইতে পারি !”

যুবরাজ কহিলেন, “সে কথা আমি মানি, কিন্তু যশো-হরের রাজ-প্রাসাদে একশর অপেক্ষা অনেক অধিক লোক আছে ! তুমি বল-পূর্ব্বক কিছু করিতে পারিবে না । অন্ত কোন উপায় দেখিতে হইবে ।”

রামমোহন কহিল, “আচ্ছা, মহারাজকে একবার আমার কাছে আনুন, আমার পাশে তিনি দাঁড়াইলে আমি নিশ্চিন্ত হইয়া উপায় ভাবিতে পারি ।” তখন অন্তঃপুরে গিয়া উদয়াদিত্য রামচন্দ্রকে আহ্বান করিলেন । তিনি এবং তাঁহার সঙ্গে সঙ্গে সকলেই আসিল ।

রামচন্দ্র রামমোহনকে দেখিয়াই ক্রোধে অভিভূত হইয়া কহিলেন—“তোকে আমি এখনি ছাড়াইয়া দিলাম—তুই দূর্ব্ব হইয়া যা’ । তুই পুরাণ’ লোক, তোকে আর অধিক কি শাস্তি দিব—যদি এ যাত্রা বাঁচিয়া যাই, তবে তোর মুখ আর আমি দেখিব না ।” বলিতে বলিতে রামচন্দ্রের কণ্ঠরোধ হইয়া আসিল । তিনি যথার্থই রামমোহনকে ভাল বাসিতেন, শিশুকাল হইতে রামমোহন তাঁহাকে পালন করিয়া আসিতেছে ।

রামমোহন ষোড়হাত করিয়া কহিল—“তুমি আমাকে ছাড়াইবার কে মহারাজ ? আমার এ চাকরী ভগবান দিয়াছেন। যে দিন যমের তলব পড়িবে, সে দিন ভগবান আমার এ চাকরী ছাড়াইবেন। তুমি আমাকে রাখ না রাখ আমি তোমার চাকর।” বলিয়া সে রামচন্দ্রকে আগ্লাইয়া দাঁড়াইল।

উদয়াদিত্য কহিলেন—“রামমোহন, কি উপায় করিলে?”

বামমোহন কহিল “আপনার শ্রীচরণাশীর্ষাদে এই লাঠিই উপায়। আর মা কালীর চরণ ভরষা।”

উদয়াদিত্য ঘাড় নাড়িয়া কহিলেন—“ও উপায় কোন কাজের নয়। আচ্ছা, রামমোহন, তোমাদের নৌকা কোন্ দিকে আছে?”

রামমোহন কহিল, “রাজবাটির দক্ষিণ পার্শ্বে থালা।”

উদয়াদিত্য কহিলেন, “চল একবার ছাদে যাই।”

রামমোহনের মাথায় হঠাৎ একটা উপায় উদ্ভাবিত হইল—সে কহিল, “হাঁ, ঠিক কথা, সেইখানে চলুন।”

সকলে প্রাসাদের ছাদে উঠিলেন। ছাদ হইতে প্রায় ৭০ হাত নীচে থাল। সেই থালে রামচন্দ্রের ৬৪ দাঁড়ের নৌকা ভাসিতেছে। রামমোহন কহিল, রামচন্দ্র রাসকে পিঠে বাঁধিয়া লইয়া সে সেই থালে ঝাঁপাইয়া পড়িবে।

বসন্তরায় তাড়াতাড়ি শশব্যস্ত হইয়া রামমোহনকে ধরিয়া বলিয়া উঠিলেন—“না, না, না, সে কি হয়?”

রামমোহন ভূমি অমন অসম্ভব কাজ করিতে যাইও না !”

বিভা চমকিয়া সত্রাসে বলিয়া উঠিল—“না, মোহন, তুই ও কি বলিতেছি!”

রামচন্দ্র বলিলেন—“না রামমোহন, তাহা হইবে না।”

তখন উদয়াদিত্য অন্তঃপুরে গিয়া কতকগুলি খুব মোটা বৃহৎ চাদর সংগ্রহ করিয়া আনিলেন। রামমোহন সে গুলি পাকাইয়া বাঁধিয়া বাঁধিয়া একটা প্রকাণ্ড রজ্জুর মত প্রস্তুত করিল। যে দিকে নৌকা ছিল, সেই দিককার ছাদের উপরের একটি ক্ষুদ্র স্তম্ভের সহিত রজ্জু বাঁধিল। রজ্জু নৌকার কিঞ্চিৎ উর্দ্ধে গিয়া শেষ হইল। রামমোহন রামচন্দ্র রায়কে কহিল, “মহারাজ, আপনি আমার পিঠ জড়াইয়া ধরিবেন, আমি রজ্জু বাহিয়া নামিয়া পড়িব।” রামচন্দ্র তাহাতে অগত্যা সম্মত হইলেন। তখন রামমোহন সকলকে একে একে প্রণাম করিল, ও সকলের পদ-ধূলি লইল। কহিল “জয় মা কালী!” রামচন্দ্রকে পিঠে তুলিয়া লইল, রামচন্দ্র চোক বুজিয়া প্রাণপণে তাহার পিঠ আঁকড়িয়া ধরিলেন। বিভার দিকে চাহিয়া রামমোহন কহিল “মা, তবে আমি চলিলাম। তোমার সন্তান থাকিতে কোন ভয় করিও না!”

রামমোহন রজ্জু আঁকড়িয়া ধরিল। বিভা স্তম্ভে ভর দিয়া প্রাণপণে দাঁড়াইয়া রহিল। বৃদ্ধ বসন্ত রায় কম্পিত

চরণে দাঁড়াইয়া চোক বুজিয়া “হুর্গা” “হুর্গা” জপিতে লাগিলেন। রামমোহন রজ্জু বাহিয়া নামিয়া রজ্জুর শেষ প্রান্তে গেল। তখন সে হাত ছাড়িয়া দাঁত দিয়া রজ্জু কামড়াইয়া ধরিল, ও রামচন্দ্রকে পৃষ্ঠ হইতে ছাড়াইয়া লইয়া দুই হস্তে বুলাইয়া অতি সাবধানে নৌকায় নামাইয়া দিল, ও নিজেও লাফাইয়া পড়িল। রামচন্দ্র যেমন নৌকায় নামিলেন। অমনি মুচ্ছিত হইয়া পড়িলেন; রামচন্দ্র যেমন নৌকায় নামিলেন, অমনি বিভা গভীর ও সূদীর্ঘ এক নিশ্বাস কেলিয়া মুচ্ছিত হইয়া পড়িল। বসন্ত রায় চোখ মেলিয়া জিজ্ঞাসা করিলেন “দাদা কি হইল?” উদয়াদিত্য মুচ্ছিতা বিভাকে সঙ্গেহে কোলে করিয়া অন্তঃপুরে চলিয়া গেলেন। স্রমা উদয়াদিত্যের হাত ধরিয়া কহিল, “এখন ভোমাব কি হইবে?” উদয়াদিত্য কহিলেন, “আমার জন্ত আমি ভাবি না।”

এদিকে নৌকা খানিক দূর গিয়া আটক পড়িল। বড় বড় শাল কাঠে খাল বদ্ধ। এমন সময়ে সহসা গ্রহরীরা দূর হইতে দেখিল, নৌকা পলাইয়া যায়। পাথর ছুঁড়িতে আরম্ভ করিল, একটাও গিয়া পৌঁছিল না। গ্রহরীদের হাতে তলোয়ার ছিল, বন্দুক ছিল না। এক জন বন্দুক আনিতে গেল। খোঁজ খোঁজ করিয়া বন্দুক জুটিল ত চকমকি জুটিল না—“ওরে, বাকুদ কোথায়—গুলি কোথায়” করিতে করিতে রামমোহন ও অন্নচরণ কাঠের উপর দিয়া নৌকা

টানিয়া তুলিয়া লইয়া গেল । প্রহরীগণ অনুসরণ করিবার
 জন্য একটা নৌকা ডাকিতে গেল । যাহার পরে নৌকা
 ডাকিবার ভার পড়িল, পথের মধ্যে সে হরিমুদীর দোকানে
 এক ছিলিম তামাক খাইয়া লইল ও রামশঙ্করকে তাহার
 বিছানা হইতে উঠাইয়া তাহার পাওনা টাকা শীঘ্র পাই-
 বার জন্য তাগাদা করিয়া গেল । যখন নৌকার প্রয়োজন
 একেবারে ফুরাইল তখন হাঁক ডাক করিতে করিতে নৌকা
 আসিল । বিলম্ব দেখিয়া সকলে নৌকা-আহ্বান-কারীকে
 স্তম্ভিত ভৎসনা করিতে আরম্ভ করিল । সে কহিল,
 “আমিত আর ঘোড়া নই !” একে একে সকলের যখন
 ভৎসনা করা ফুরাইল, তখন তাহাদের চৈতন্য হইল যে,
 নৌকা ধরিবার আর কোন সম্ভাবনাই নাই । নৌকা
 আনিতে যে বিলম্ব হইয়াছিল ভৎসনা করিতে তাহার
 তিন গুণ বিলম্ব হইল । যখন রামচন্দ্রের নৌকা ভৈরব নদে
 গিয়া পৌছিল তখন ফণাণ্ডিজ এক তোপের আওয়াজ
 কবিল । প্রত্যুষে প্রতাপাদিত্যের নিদ্রাকর্ষণ হইয়াছিল ।
 সেই তোপের শব্দে সহসা যুম ভাঙ্গিয়া গেল । তিনি ডাকিয়া
 উঠিলেন “প্রহরি !” কেহই আসিল না । দ্বারের প্রহরীগণ
 সেই রাতেই পলাইয়া গেছে । প্রতাপাদিত্য উচ্চতর স্বরে
 ডাকিলেন—“প্রহরি !”

ত্রয়োদশ পরিচ্ছেদ ।

প্রতাপাদিত্য যুম ভাঙ্গিয়া উচ্চস্বরে ডাকিলেন “প্রহরি ।” যখন প্রহরী আসিল না, তখন অবিলম্বে শয্যা ত্যাগ করিয়া তিনি বিছাৎবেগে ঘর হইতে বাহির হইয়া গেলেন । ডাকিলেন, “মন্ত্রী !” এক জন ভৃত্য ছুটিয়া গিয়া অবিলম্বে মন্ত্রীকে অন্তঃপুরে ডাকিয়া আনিল ।

“মন্ত্রী, প্রহরীরা কোথায় গেল ?”

মন্ত্রী কহিলেন—“বহির্দ্বারের প্রহরীরা পলাইয়া গেছে ।” মন্ত্রী দেখিলেন, মাথার উপরে বিপদ ঘনাইয়া আসিয়াছে । এই নিমিত্ত প্রতাপাদিত্যের কথার স্মরণ, পরিকার ও দ্রুত উত্তর দিলেন । যতই ঘুরাইয়া ও যতই বিলম্ব করিয়া তাঁহার কথার উত্তর দেওয়া হয়, ততই তিনি আগুন হইয়া উঠিতে থাকেন ।

প্রতাপাদিত্য কহিলেন, “অন্তঃপুরের প্রহরীরা ?”

মন্ত্রী কহিলেন—“আসিবার সময় দেখিলাম তাহারা হাত পা বাঁধা পড়িয়া আছে ।” মন্ত্রী রাত্রির ব্যাপার কিছুই জানিতেন না । কি হইয়াছে কিছু অনুমান করিতে পারিতেছেন না, অথচ বুঝিয়াছেন, একটা কি ঘোরতর ব্যাপার ঘটিয়াছে । সে সময়ে মহারাজকে কোন কথা জিজ্ঞাসা করা অসম্ভব ।

প্রতাপাদিত্য তাড়াতাড়ি বলিয়া উঠিলেন “রামচন্দ্র রায় কোথায় ? উদয়াদিত্য কোথায় ? বসন্ত রায় কোথায় ?”

মন্ত্রী ধীরে ধীরে কহিলেন “বোধ করি তাঁহারা অন্তঃ-পুরেই আছেন।”

প্রতাপাদিত্য বিরক্ত হইয়া কহিলেন, “বোধ ত আমিও করিতে পারিতাম ! তোমাকে জিজ্ঞাসা করিলাম কি করিতে। যাহা বোধ করা যায় তাহা সকল সময়ে সত্য হয় না !”

মন্ত্রী কিছু না বলিয়া ধীরে ধীরে বাহির হইয়া গেলেন। রমাপতির কাছে রাত্রের ঘটনা সমস্তই অবগত হইলেন। যখন শুনিলেন, রামচন্দ্র রায় পলাইয়া গেছেন, তখন তাঁহার বিশেষ ভাবনা উপস্থিত হইল। মন্ত্রী বাহিরে গিয়া দেখিলেন, খর্ব্বকায় রমাই ভাঁড় গুড়ি মারিয়া বসিয়া আছে। মন্ত্রীকে দেখিয়া রমাই ভাঁড় কহিল “এই যে মুন্ত্রী জাসুবান !” বলিয়া দাঁত বাহির করিল। রমাই ভাঁড়ের দাঁতের পরিমাণ কিছু বড় ; এই জন্য তার দাঁত অর্ধেক বাহির করাই থাকে। রমাই ভাঁড়ের দাঁতের পাটি বারবিলাসিমীদের মত অধরৌষ্ঠের বাতাগ্ন খুলিয়াই বসিয়া থাকে। রমাই ভাঁড়ের দাঁতের নাট্যশালায় কোন মতেই ওষ্ঠের যবমিকা-পতন হইতে পারে না, এবং সেখানে দিন রাত্রিই হাস্যের অভিনয় চলিতে থাকে।

তাহার সেই দম্ভ-প্রধান হাস্যকে রামচন্দ্রের শতাব্দেদেরা
রসিকতা বলিত, বিভীষিকা বলিত না! মন্ত্রী তাহার
সাদর সম্ভাষণ শুনিয়া কিছুই বলিলেন না, তাহার প্রতি
দৃকপাতও করিলেন না। এক জন ভৃত্যকে কহিলেন
“ইহাকে লইয়া আয়।” মন্ত্রী ভাবিলেন, এই অপদার্ঘ-
টাকে এই বেলা প্রতাপাদিত্যের ক্রোধের সাম্নে খাড়া
করিয়া দিই। প্রতাপাদিত্যের বজ্র এক জন না এক
জনের উপরে পড়িবেই—তা’ এই কলাগাছটার উপরেই
পড়ুক, বাকী বড় বড় গাছ রক্ষা পাক!

রমাইকে দেখিয়াই প্রতাপাদিত্য একেবারে জ্বলিয়া
উঠিলেন—বিশেষতঃ সে যখন প্রতাপাদিত্যকে সন্তুষ্ট কবি-
বার জন্ত দাঁত বাহির করিয়া, অঙ্গভঙ্গী করিয়া একটা হাস্য-
রসের কথা কহিবার উপক্রম করিল, তখন প্রতাপাদিত্যের
আর সহ্য হইল না, তিনি অবিলম্বে আসন ত্যাগ করিয়া
উঠিয়া, দুই হাত নাড়িয়া দারুণ ঘৃণায় বলিয়া উঠিলেন.
“দূর কর, দূর কর, উহাকে এখনি দূর করিয়া দাও! ওটাকে
আমার সম্মুখে আনিতে কে কহিল?” প্রতাপাদিত্যের
রাগের সহিত যদি ঘৃণার উদয় না হইত, তবে রমাই ভাঁড় এ
ষাড়া পরিজ্ঞাণ পাইত না! কেমনা ঘৃণ্য ব্যক্তিকে প্রহার
করিতে গেলেও স্পর্শ করিতে হয়। রমাইকে উৎকর্ণাৎ
বাহির করিয়া দেওয়া হইল।

মন্ত্রী কহিলেন, “মহারাজ, রাজ-স্বামী—”

প্রতাপাদিত্য অধীর ভাবে মাথা নাড়িয়া কহিলেন,
“রামচন্দ্র রায়—”

মন্ত্রী কহিলেন, “হাঁ, তিনি কাল রাত্রে রাজপুরী পরি-
ত্যাগ করিয়া গিয়াছেন ।”

প্রতাপাদিত্য দাঁড়াইয়া উঠিয়া কহিলেন, “পরিত্যাগ
করিয়া গিয়াছেন ! প্রহরীরা গেল কোথায় ?”

মন্ত্রী পুনরায় কহিলেন, “বহির্দ্বারের প্রহরীরা পলাইয়া
গেছে ।”

প্রতাপাদিত্য মুষ্টিবদ্ধ কবিশা কহিলেন “পলাইয়া
গেছে ? পলাইবে কোথায় ? সেখানে থাকে তাহাদের
খুঁজিয়া আনিতে হইবে ! অন্তঃপুবেব প্রহরীদের এখনি
ডাকিয়া লইয়া আইন ।” মন্ত্রী বাহির হইয়া গেলেন ।

রামচন্দ্র রায় যখন নৌকায় চড়িলেন, তখনো অন্ধকার
আছে । উদয়াদিত্য, বসন্ত রায়, সুরমা ও বিভা, সে রাত্রে
আসিয়া আর বিছানায় শুইল না । বিভা একটি কথা না
বলিয়া, একটি অশ্রু না ফেলিয়া অবসন্ন ভাবে শুইয়া বহিল,
সুরমা তাহার কাছে বসিয়া তাহার মাথায় হাত বুলাইয়া
দিতে লাগিল । উদয়াদিত্য ও বসন্তরায় চুপ করিয়া বসিয়া
রহিলেন । অন্ধকার ঘরে পরস্পরের মুখ অস্পষ্ট ভাবে
দেখা যাইতেছে । ঘরের মধ্যে বেন অদৃশ্য এক জন কে—
অন্ধকার বল,’ আশঙ্কা বল,’ অদৃষ্ট বল—বসিয়া আছে,
তাহার নিশ্বাস পতনের শব্দ শুনা যাইতেছে । সদানন্দ-জুদর

বসন্তরায় চারিদিকে নিরামল দেখিয়া একেবারে আকুল হইয়া পড়িয়াছেন। তিনি অনবরত টাকে হাত বুলাইতেছেন, চারিদিক দেখিতেছেন ও ভাবিতেছেন—এ কি হইল। তাঁহার গোলমাল ঠেকিয়াছে, চারিদিককার ব্যাপার ভালরূপ আয়ত্ত করিতে পারিতেছেন না। সমস্ত ঘটনাটা তাঁহার একটা জটিল দুঃস্বপ্ন বলিয়া মনে হইতেছে। এক একবার বসন্তরায় উদয়াদিত্যের হাত ধরিয়া কাতর স্ববে কহিতেছেন, “দাদা !” উদয়াদিত্য কহিতেছেন “কি দাদা মহাশয় ?” তাহার উত্তরে বসন্তরায়ের আর কথা নাই। ঐ এক “দাদা” সন্শোধনের মধ্যে একটি আকুল দিশাহাবা হৃদয়ের বাক্যহীন সহস্র অব্যক্ত প্রশ্ন প্রকাশ পাইবার জন্ম আঁকুর্বাঁকু করিতেছে। তাঁহার বিশেষ একটা কোন প্রশ্ন নাই, তাঁহার সমস্ত কথার অর্থ এই—এ কি ? চারিদিককার অন্ধকার এমনি গোলমাল করিয়া একটা কি ভাষায় তাঁহার কানের কাছে কথা কহিতেছে, তিনি কিছুই বুঝিতে পারিতেছেন না। এমন সময়ে উদয়াদিত্যের সাড়া পাইলেও তাঁহার মনটা একটু স্থির হয়। থাকিয়া থাকিয়া তিনি সকাতিরে উদয়াদিত্যের হাত ধরিয়া কহিলেন, “দাদা আমার জন্মই কি এ সমস্ত হইল ?” তাঁহার বার বার মনে হইতেছে তাঁহাকে বিনাশ করিতে না পারাতেই এই সমস্ত ঘটিয়াছে। উদয়াদিত্যের তখন অধিক কথা কহিবার মত ভাব নহে। তিনি কোমল স্বরে কহিলেন, “না দাদা

মহাশয় !” অনেক ক্ষণ ঘর নিস্তব্ধ হইয়া রহিল। থাকিয়া থাকিয়া বসন্তরায় আবার কহিয়া উঠিলেন, “বিভা দিদি আমাব, তুই কথা কহিতেছিষ্ না কেন ?” বলিয়া বসন্তরায় বিভার কাছে গিয়া বসিলেন। কিছু ক্ষণ পরে বসন্তরায় আবার বলিয়া উঠিলেন, “স্বরমা, ও স্বরমা !” স্বরমা মুখ তুলিয়া চাহিল, আর কিছু বলিল না। বৃদ্ধ বসিয়া বসিয়া মাথায় হাত বুলাইতে লাগিলেন। একটা অনির্দেশ্য বিপদের প্রতীক্ষা করিয়া রহিলেন। স্বরমা তখন স্থিরভাবে বসিয়া বিভার কপালে হাত বুলাইতেছিল, কিন্তু স্বরমার হৃদয়ে যাহা হইতেছিল, তাহা অন্তর্যামীই দেখিতেছিলেন। স্বরমা সেই অন্ধকারে একবার উদয়াদিত্যের মুখের দিকে চাহিল। তখন উদয়াদিত্য দেয়ালে মাথা রাখিয়া এক মনে কি ভাবিতেছিলেন। স্বরমার হুই চক্ষু বাহিয়া অশ্রুজল পড়িতে লাগিল। আন্তে আন্তে মুছিয়া ফেলিল, পাছে বিভা জানিতে পায়।

যখন চারিদিক আলো হইয়া আসিল তখন বসন্তরায় নিশ্বাস ফেলিয়া বাঁচিলেন। তখন তাঁহার মন হইতে একটা অনির্দেশ্য আশঙ্কার ভাব দূর হইল। তখন স্থির চিত্তে সমস্ত ঘটনা একবার আলোচনা করিয়া দেখিলেন। তিনি বিভার ঘর হইতে উঠিয়া গেলেন। অন্তঃপুরের দ্বারে হাত-পা-বাঁধা সীতারামের কাছে গিয়া উপস্থিত হইলেন। তাঁহাকে কহিলেন, “দেখ সীতারাম, তোকে যখন প্রতাপ

জিজ্ঞাসা করিবে, কে তোকে বাঁধিয়াছে, তুই আমার নাম করিস্। প্রতাপ জানে, এক কালে বসন্তরায় বলিষ্ঠ ছিল, সে তোর কথা বিশ্বাস করিবে।”

সীতারাম, প্রতাপাদিত্যের কাছে কি জবাব দিবে, এতক্ষণ ধরিয়া তাহাই ভাবিতেছিল। এ সম্বন্ধে উদয়াদিত্যের নাম করিতে কোন মতেই তাহার মন উঠিতে ছিল না। সে একটা বাঁকা-পা, তিনচোথো ভাল-বুদ্ধাকৃতি ভূতকে আসামী করিবে বলিয়া একবার স্থির করিয়াছিল, কিন্তু বসন্ত রায়কে পাইয়া নিরপরাধী ভূতটাকে খালাস দিল। বসন্ত রায়ের কথায় সে তৎক্ষণাৎ রাজি হইল। তখন তিনি দ্বিতীয় প্রহরীর নিকট গিয়া কহিলেন, “ভাগবৎ, প্রতাপ জিজ্ঞাসা করিলে বলিও বসন্তরায় তোমাকে বাঁধিয়াছে।” সহসা ভাগবতের ধর্মজ্ঞান অত্যন্ত প্রবল হইয়া উঠিল, অসত্যের প্রতি নিতান্ত বিরাগ জন্মিল; তাহার প্রধান কারণ, উদয়াদিত্যের প্রতি সে ভারি ক্রুদ্ধ হইয়া উঠিয়াছিল।

ভাগবৎ কহিল, “এমন কথা আমাকে আদেশ করিবেন না, ইহাতে আমার অধর্ম হইবে।”

বসন্তরায় তাহার কাঁধে হাত দিয়া কহিলেন, “ভাগবৎ আমার কথা শুন, ইহাতে কোন অধর্ম নাই। সাধু লোকের প্রাণ বাঁচাইতে মিথ্যা কথা বলিতে যদি কোন অধর্ম থাকিবে, তবে আমি কেন তোমাকে এমন অজ্ঞরোধ

করিব ?” বসন্ত রায় তাহার কাঁধে হাত দিয়া পিঠে হাত দিয়া বার বার করিয়া বুকাইতে চেষ্টা করিলেন, ইহাতে কোন অর্থ নাই। কিন্তু লোকের যখন ধর্মজ্ঞান সহসা বিশেষ প্রবল হইয়া উঠে, তখন কোন যুক্তিই তাহার কাছে খাটে না। সে কহিল, “না, মহারাজ, মনিবের কাছে মিথ্যা কথা বলিব কি করিয়া !”

বসন্ত রায় বিষম অস্থির হইয়া উঠিলেন ; ব্যাকুল ভাবে কহিলেন, “ভাগবৎ, আমার কথা শুন, আমি তোমাকে বুকাইয়া বলি, এ মিথ্যা কথায় কোন পাপ নাই। দেখ বাপু, আমি তোমাকে পরে খুব খুদী করিব, তুমি আমার কথা রাখ। এই লও আমার কাছে যাহা আছে, এই দিলাম।”

ভাগবৎ তৎক্ষণাৎ হাত বাড়াইল, ও সেই টাকাগুলি মুহূর্তের মধ্যে তাহার টাকে আশ্রয় লাভ করিল। বসন্ত রায় কিয়ৎ পরিমাণে নিশ্চিন্ত হইয়া ফিরিয়া গেলেন।

প্রতাপাদিত্যের নিকট প্রহরীদ্বয়ের ডাক পড়িয়াছে। মন্ত্রী তাহাদিগকে সঙ্গে করিয়া লইয়া গেলেন। প্রতাপাদিত্য তখন তাঁহার উচ্ছ্বসিত ক্রোধ দমন করিয়া স্থির গম্ভীর ভাবে বসিয়া আছেন। প্রত্যেক কথা ধীরে ধীরে স্পষ্ট-রূপে উচ্চারণ করিয়া কহিলেন, “কাল রাত্রে অন্তঃপুরের দ্বার খোলা হইল কি করিয়া ?”

সীতারামের প্রাণ কাঁপিয়া উঠিল, সে যোড়হস্তে কহিল, “দোহাই মহারাজ, আমার কোন দোষ নাই।”

মহারাজ ঙ্কুণ্ডিত করিয়া কহিলেন, “সে কথা তোকে কে জিজ্ঞাসা করিতেছে?”

সীতারাম তাড়াতাড়ি কহিল, “আজ্ঞা না, বলি মহারাজ; যুবরাজ—যুবরাজ আমাকে বল-পূর্বক বাঁধিয়া অন্তঃপুর হইতে বাহির হইয়াছিলেন।” যুবরাজের নাম তাহার মুখ দিয়া কেমন হঠাৎ বাহির হইয়া গেল। ঐ নামটা কোন মতে করিবে না বলিয়া সে সৰ্ব্বাপেক্ষা অধিক ভাবিয়াছিল, এই নিমিত্ত গোলেমালে ঐ নামটাই সৰ্ব্বাগ্রে তাহার মুখাগ্রে উপস্থিত হইল। একবার যখন বাহির হইল, তখন আর বক্ষা নাই।

এমন সময়ে বসন্ত রায় শুনিলেন, প্রহরীদের ডাক পড়িয়াছে। তিনি ব্যস্তমত হইয়া প্রতাপাদিত্যের কক্ষে গিয়া উপস্থিত হইলেন। তখন সীতারাম কহিতেছে “যুবরাজকে আমি নিষেধ করিলাম, তিনি শুনিলেন না।”

বসন্ত রায় তাড়াতাড়ি বলিয়া উঠিলেন, “হাঁ হাঁ সীতারাম, কি কহিলি? অধর্ম্য করিস্নে, সীতারাম, ভগবান তোর পরে সন্তুষ্ট হইবেন। উদয়াদিত্যের ইহাতে কোন দোষ নাই।”

সীতারাম তাড়াতাড়ি বলিয়া ফেলিল, “আজ্ঞা না যুবরাজের কোন দোষ নাই।”

প্রতাপাদিত্য দৃঢ় স্বরে কহিলেন, “তবে তোর দোষ?”

সীতারাম কহিল “আজ্ঞা, না।”

“তবে কার দোষ ?”

“আজ্ঞা, যুবরাজ—”

ভাগবতকে যখন দ্বিজ্ঞাসা করা হইল, তখন সে সমস্ত কথা ঠিক করিয়া কহিল, কেবল সে যে যুমাইয়া পড়িয়া ছিল সেইটে গোপন করিল। বৃদ্ধ বসন্ত রায় চারিদিক ভাবিয়া কোন উপায় দেখিলেন না। তিনি চোখ বুজিয়া মনে মনে দুর্গা দুর্গা কহিলেন। গ্রহরীদয়কে তৎক্ষণাৎ কস্মচ্যুত করা হইল। তাহাদের অপরাধ এই যে, তাহাদের যদি বলপূর্বক বাঁধিতে পারা যায় তবে তাহার। গ্রহরী-বৃন্ত করিতে আসিয়াছিল কি বলিয়া ? এই অপ-
বাদের জন্য তাহাদের প্রতি কষাঘাতের আদেশ হইল।

তখন প্রতাপাদিত্য বসন্ত রায়ের মুখের দিকে চাহিয়া বজ্রগন্তীর স্বরে কহিলেন, “উদয়াদিত্যের এ অপরাধের মার্জনা নাই।” এমনি ভাবে বলিলেন যেন উদয়াদিত্যের সে অপরাধ বসন্তরায়েরই। যেন তিনি উদয়াদিত্যকে সম্মুখে রাখিয়াই তৎসনা করিতেছেন। বসন্তরায়ের অপরাধ, তিনি উদয়াদিত্যকে প্রাণের অধিক ভাল বাসেন।

বসন্তরায় তাড়াতাড়ি কহিয়া উঠিলেন, “বাবা প্রতাপ, উদয়ের ইহাতে কোন দোষ নাই !”

প্রতাপাদিত্য আশ্বন হইয়া কহিলেন “দোষ নাই ? তুমি ‘দোষ নাই’ বলিতেছ বলিয়াই জাহাকে বিশেষরূপে

শান্তি দিব! তুমি মাঝে পড়িয়া মীমাংসা করিতে আসিয়াছ কেন?”

বসন্তরায় অত করিয়া উদয়াদিত্যের পক্ষ লইয়াছেন বলিয়াই প্রতাপাদিত্যের মন উদয়াদিত্যের বিশেষ বিপক্ষ হইয়া দাঁড়াইল। বসন্তরায় দেখিলেন, তাঁহাকে শান্তি দিবার জন্যই পাছে উদয়াদিত্যকে শান্তি দেওয়া হয়। চুপ করিয়া বসিয়া ভাবিতে লাগিলেন।

কিয়ৎক্ষণ পরে শান্ত হইয়া প্রতাপাদিত্য কহিলেন, “যদি জানিতাম, উদয়াদিত্যের কিছুমাত্র নিজের মনের জোব আছে; তাহার একটা মত আছে; একটা অভিপ্রায় আছে; যাহা করে, সব নিজে হইতেই কবে; যদি না জানিতাম, যে, সে নির্দোষটাকে যে খুনী হুঁ দিয়া উড়াইয়া বেড়াইতে পারে, কটাক্ষের সঙ্কেতে ঘুরাইয়া মারিতে পারে, তাহা হইলে তাহার আজ আর রক্ষা ছিল না। আমি যেখানে ঐ পালকটাকে উড়িতে দেখিয়াছি, নীচের দিকে চাহিয়া দেখিয়াছি, হুঁ দিতেছে কে! এই জন্য উদয়াদিত্যকে শান্তি দিতে ইচ্ছা করে না। সে শান্তিরও অযোগ্য। কিন্তু শোন, পিতৃব্য ঠাকুর, তুমি যদি দ্বিতীয়বার যশোহরে আসিয়া উদয়াদিত্যের সহিত দেখা কর, তবে তাহার প্রাণ বাঁচান দায় হইবে।”

বসন্তরায় অনেক ক্ষণ চুপ করিয়া বসিয়া রহিলেন, পরে ধীরে ধীরে উঠিয়া কহিলেন; “ভাল প্রতাপ, আজ

দক্ষা বেলায় তবে আমি চলিলাম । ” আর, একটি কথা না বলিয়া বসন্ত রায় ঘর হইতে বাহির হইয়া গেলেন, বাহির হইয়া গিয়া গভীর এক নিশ্বাস কেলিলেন ।

প্রতাপাদিত্য স্থির করিয়াছেন, যে কেহ উদয়াদিত্যকে ভাল বাসে, উদয়াদিত্য যাহাদের বশীভূত, তাহাদিগকে উদয়াদিত্যের নিকট হইতে তফাৎ করিতে হইবে । মন্ত্রীকে কহিলেন “বউমাকে আর রাজপুত্বে থাকিতে দেওয়া হইবে না, কোন হস্তে তাহাকে তাহার বাপের বাড়ি পাঠাইতে হইবে । ” বিভার প্রতি প্রতাপাদিত্যের কোন আশঙ্কা হয় নাই । হাজার হউক, সে বাড়ির মেয়ে ।

চতুর্দশ পরিচ্ছেদ ।

বসন্তরায় উদয়াদিত্যের ঘরে আসিয়া কহিলেন, “দাদা, তোর সঙ্গে আর দেখা হইবে না । ” বলিয়া উদয়াদিত্যকে বৃদ্ধ হুই হাতে জড়াইয়া ধরিলেন ।

উদয়াদিত্য বসন্তরায়ের হাত ধরিয়া কহিলেন, “কেন দাদা মহাশয় ? ”

বসন্তরায় সমস্ত বলিলেন । কঁদিয়া কহিলেন “ভাই, তুমি আমি ভাল বাসি বলিয়াই তোর এত দুঃখ । তা, তুই

যদি স্নেহে থাকিস্ ত এ কটা দিন আমি এক রকম কাটা
ইয়া দিব।”

উদয়াদিত্য মাথা নাড়িয়া কহিলেন, “না, তাহা কখনই
হইবে না। তোমাতে আমাতে দেখা হইবেই। তাহাতে
কেহ বাধা দিতে পারিবে না। দাদা মহাশয়, তোমার ঐ
আনন্দময় হাসিমুখ দেখিতে পাই বলিয়া আমার এখনো
যৌবন আছে, তোমার কাছেই আমি যুবা হইতে শিখিয়াছি।
যখন পৃথিবীর কোথাও হাসি দেখিতে পাই না, তখন
তোমার কাছে যাই, যখন পৃথিবীর কোথাও আনন্দ দেখিতে
পাই না, তখন তোমার কাছে আনন্দ আছে। আমার কাছ
হইতে তুমি যদি চলিয়া যাও—না—না,—আমি তোমাকে
ছাড়িতে পারিব না।” বলিতে বলিতে উদয়াদিত্য উত্তে-
জিত হইয়া উঠিলেন, তাঁহার মুখ রক্তিম হইয়া উঠিল, বস-
ন্তরায়ের হাত ধরিয়া কহিলেন, “তুমি গেলে দাদা মহাশয়,
আমি আর বাঁচিব না।”

বসন্তরায় ব্যাকুল হইয়া কহিলেন “প্রত্যাপ আমাকে
বধ করিল না, তোকে আমার কাছ হইতে কাড়িয়া লইল!
দাদা, আমি যখন চলিয়া যাইব, আমার পানে ফিরিয়া
চাহিস্নে, মনে করিস্, বসন্তরায় মরিয়া গেল!”

উদয়াদিত্য শয়ন কক্ষে সুরমার নিকটে গেলেন। বস-
ন্তরায় বিভার কাছে গিয়া বিভার চিবুক ধরিয়া কহিলেন,
“বিভা দিদি আমার, একবার ওঠ! বুড়ার এই মাথাটায়

একবার ঐ হাত বুলাইয়া দে ।” বিভা উঠিয়া বসিয়া দাদা মহাশয়ের মাথা লইয়া পাকা চুল তুলিয়া দিতে লাগিল ।

উদয়াদিত্য সুরমাকে সমস্ত कहিলেন ও বলিলেন,—
“সুরমা, চারিদিক হইতে মেঘ করিয়া আসিতেছে ।
ভাবিতেছি, আমার দশা কি হইবে ! পৃথিবীতে আমার
যাহা কিছু অবশিষ্ট আছে তাহাই কাড়িয়া লইবার জন্য
যেন একটা ষড়যন্ত্র চলিতেছে ।” সুরমার হাত ধরিয়া कहি-
লেন ; “সুরমা, তোমাকে যদি কেহ আমার কাছ হইতে
ছিনিয়া লইয়া যায় ।”

সুরমা দৃঢ় ভাবে উদয়াদিত্যকে আলিঙ্গন করিয়া
দৃঢ়স্বরে कहিল, “সে যম পারে, আর কেহ পারে না ।”

সুরমার মনেও অনেক ক্ষণ ধরিয়া সেই রূপ একটা
আশঙ্কা জন্মিতেছে । সে যেন দেখিতে পাইতেছে, একটা
কঠোর হস্ত তাহার উদয়াদিত্যকে তাহার কাছ হইতে
দূরীয়া দিবার জন্য অগ্রসর হইতেছে । সে মনে মনে
উদয়াদিত্যকে প্রাণ-পণে আলিঙ্গন করিয়া ধরিল, মনে মনে
কহিল, “আমি ছাড়িব না, আমাকে কেহ ছাড়াইতে
পারিবে না ।”

সুরমা আবার कहিল, “আমি অনেক ক্ষণ হইতে ভাবিয়া
, বাধিয়াছি, আমাকে তোমার কাছ হইতে কেহই লইতে
পারিবে না ।”

* সুরমা ঐ কথা বার বার করিয়া বলিল । সে মনের

মধ্যে বল সঞ্চয় করিতে চায়, যে বলে সে উদয়াদিত্যকে
ছুই বাহু দিয়া এমন জড়াইয়া থাকিবে, যে, কোন পার্থিব
শক্তি তাহাদের বিচ্ছিন্ন করিতে পারিবে না। বার বার
ঐ কথা বলিয়া মনকে সে বজের বলে বাঁধিতেছে।

উদয়াদিত্য সুরমার মুখের দিকে চাহিয়া নিঃশ্বাস
ফেলিয়া কহিলেন “সুরমা, দাদা মহাশয়কে আর দেখিতে
পাইব না!”

সুরমা নিঃশ্বাস ফেলিল।

উদয়াদিত্য কহিলেন, “আমি নিজের কষ্টের জন্য
ভাবি না সুরমা,—কিন্তু দাদা মহাশয়ের প্রাণে যে বড়
বাজিবে। দেখি, বিধাতা আরো কি করেন! তাঁর আবে
কি ইচ্ছা আছে।”

উদয়াদিত্য বসন্তরায়ের কত গল্প করিলেন; বসন্ত
রায় কোথায় কি কহিয়াছিলেন, কোথায় কি করিয়া-
ছিলেন, সমুদয় তাঁহার মনে পড়িতে লাগিল। বসন্ত
রায়ের করুণ হৃদয়ের কত ক্ষুদ্র ক্ষুদ্র কাজ, কত ক্ষুদ্র
ক্ষুদ্র কথা, তাঁহার স্মৃতির ভাণ্ডারে ছোট ছোট রঙের মত
জমা করিয়া রাখিয়াছিলেন, তাহাই আজ একে একে সুর-
মার কাছে বাহির করিতে লাগিলেন।

সুরমা কহিল, “আ—হা, দাদা মহাশয়ের মত কি আর
লোক আছে?”

সুরমা ও উদয়াদিত্য বিভ্রাট ঘরে পেলেন। তখন

বিভা তাহার দাদা মহাশয়ের পাকা চুল ভুলিতেছে, ও
তিনি বসিয়া বসিয়া গান গাইতেছেন,

“ওরে, যেতে হবে, আর দেৱী নাই,

পিছিয়ে প’ড়ে র’বি কত, সঙ্গীরা তোর গেল সবাই ।

আয়রে ভবের খেলা সেরে, আঁধার করে এসেছেরে,

(ওরে) পিছন ফিরে বারেবারে কাহার পানে চাহিস্বে ভাই

খেলতে এল ভবের নাটে নতুন লোকে নতুন খেলা,

হেথা হতে আয়রে সোরে, নইলে তোরে মা’বে ঢেলা,

নামিয়ে দেরে প্রাণের বোকা, আরেক দেশে চল্বে সোজা,

(সেথা) নতুন করে বাঁধবি বাসা, নতুন খেলা খেল’বি সে’ঠাই ।

উদয়াদিভাকে দেখিয়া বসন্ত রায় হাসিয়া কহিলেন
“দেখ ভাই, বিভা আমাকে ছাড়িতে চায় না । কি জানি
আমাকে উহার কিসের আবশ্যক । এক কালে যে দুধ
ছিল, বৃড়া হইয়া সে ঘোল হইয়া উঠিয়াছে, তা, বিভা
দুধের সাধ ঘোলে মিটাইতে চায় কেন ? আমি যাব শুনিয়া
বিভা কাঁদে ! এমন আর কখন শুনিয়াছ ? আমি, জাই,
বিভার কান্না দেখিতে পারি না ।” বলিয়া গাহিতে লাগি-
লেন,

“আমার যাবার সময় হল, আমায় কেন রাখিস্ ধ’রে,

চোখের জলের বাঁধন দিয়ে বাঁধিস্নে আর মায়া-ডোরে ।

কুরিয়েছে জীবনের ছুটি ; ফিরিয়ে নে তোর নয়ন ছুটি,

“নাম ধরে আর ডাকিস্নে ভাই, যেতে হবে দূর করে !”

“ঐ দেখ, ঐ দেখ, বিভার রকম দেখ। দেখ বিভা, তুই যদি অমন করিয়া কাঁদিবি ত—” বলিতে বলিতে বসন্ত রায়ের আর কথা বাহির হইল না। তিনি বিভাকে শাসন করিতে গিয়া নিজেকে আর সামলাইতে পারিলেন না, তাড়াতাড়ি চোখের জল মুছিয়া হাসিয়া কহিলেন, “দাদা, ঐ দেখ ভাই সুরমা কাঁদিতেছে! এই বেলা ইহার প্রতি-বিধান কর, নহিলে আমি সত্য নতাই থাকিয়া যাইব; তোমার জায়গাটি দখল করিয়া বসিব। ঐ দুই হাতে পাকাচুল তুলাইব, ঐ কানের কাছে এই ভাঙ্গা দাঁতের পাটির মধ্যে হইতে ফিস্ফিস্ করিব, আর কানের অত কাছে গিয়া আর যদি কোন প্রকার অঘটন সংঘটন হয় তবে তাহার দায়ী আমি হইব না।” বসন্ত রায় দেখিলেন, কেহ কোন কথা কহিল না, তখন তিনি কাতর হইয়া তাঁহার নেতারটা তুলিয়া লইয়া ঝন্ ঝন্ করিয়া বিষম বেগে বাজাইতে শুরু করিলেন। কিন্তু বিভার চোখের জল দেখিয়া তাঁহার সেতার বাজাইবার বড়ই ব্যাঘাত হইতে লাগিল, তাঁহার চোখ মাঝে মাঝে ঝাপসা হইয়া আসিতে লাগিল, মাঝে মাঝে বিভাকে এবং উপস্থিত সকলকে তিরস্কারচ্ছলে রাশ রাশ কথা বলিবার বাসনা হইতে লাগিল, কিন্তু আর কথা জোগাইল না, কণ্ঠ রুদ্ধ হইয়া আসিল, সেতার বন্ধ করিয়া নামাইয়া রাখিতে হইল। অবশেষে বিদায়ের সময় আসিল। উদয়াদিত্যকে দীর্ঘ

কাল আলিঙ্গন করিয়া শেষ কথা এই বলিয়া গেলেন,
“এই সেতার রাখিয়া গেলাম দাদা, আর সেতার বাজা-
ইব না। সুরমা, ভাই, সুখে থাক ; বিভা—” কথা শেষ
হইল না, অশ্রু মুছিয়া পাকীতে উঠিলেন।

পঞ্চদশ পরিচ্ছেদ ।

মঙ্গলার কুটীর বশোহরের এক প্রান্তে ছিল। সেইখানে
বসিয়া সে মালা জপ করিতেছিল। এমন সময়ে শাক-
সব্জির চুবুড়ি হাতে করিয়া রাজবাটীর দাসী মাতঙ্গিনী
আসিয়া উপস্থিত হইল।

মাতঙ্গ কহিল, “আজ হাটে আসিয়াছিলাম, অমনি
ভাবিলাম, অনেক দিন মঙ্গলা দিদিকে দেখি নাই, তা’
একবার দেখিয়া আসিগে। আজ ভাই অনেক কাজ
আছে, অধিক ক্ষণ থাকিতে পারিব না।” বলিয়া চুবুড়ি
রাখিয়া নিশ্চিন্ত ভাবে সেই খানে বসিল। “তা, দিদি,
তুমি ত সব জানই, সেই মিলে আমাদের বড় ভাল বাসিত,
ভাল এখনো বাসে, তবে আর এক জন কা’র পরে তাঁর
মন গিয়াছে আমি টের পাইয়াছি—তা’ সেই মাগীটার
কিরাতির মধ্যে মরণ হয়, এমন করিতে পার না ?”

মঙ্গলার নিকট গরু হারান' হইতে স্বামী হারান' পর্য্যন্ত সকল-প্রকার দুর্ঘটনারই ঔষধ আছে। তা' ছাড়া সে বশীকরণের এমন উপায় জানে, যে, রাজবাটীর বড় বড় ভৃত্য মঙ্গলার কুটীরে কত গণ্ডা গণ্ডা গড়াগড়ি যায়! যে মাগীটার ত্রিরাত্রির মধ্যে মরণ হইলে মাতঙ্গিনী বাঁচে, সে আর কেহ নহে, স্বয়ং মঙ্গলা।

মঙ্গলা মনে মনে হাসিয়া কহিল, “সে মাগীর মরিবার জন্ম বড় তাড়াতাড়ি পড়ে নাই, যমের কাজ বাড়াইয়া তবে সে মরিবে!” মঙ্গলা হাসিয়া প্রকাশ্যে কহিল, “তোমার মতন রূপসীকে ফেলিয়া আর কোথাও মন যায় এমন অরসিক আছে না কি?”

মাতঙ্গিনী বিষম সন্তুষ্ট হইয়া কহিল, “না হয় রূপসী না হইলাম, না হয় বিধাতা আমাকে বানরী করিয়া গড়িয়াছেন, তাই বলিয়া কি অমন ঠাট্টা করিতে হয়?”

মঙ্গলা কহিল, “তা' নাহুনী, তোমাব ভাবনা নাই। তাহার মন তুমি ফিরিয়া পাইবে। তোমার চখের মধ্যেই ঔষধ আছে, একটু বেশী করিয়া প্রয়োগ করিয়া দেখিও, তাহাতেও না যদি হয়, তবে এই শিকড়টি তাহাকে পানের সঙ্গে খাওয়াইও।” বলিয়া এক শুকুন শিকড় আনিয়া দিল।

মাতঙ্গিনী শিকড়টি যত্নপূর্ব্বক আঁচলের কোণে বাঁধিয়া হাসিয়া কহিল, “সে আমাকে ভাল বাসে, তাহার মন

ফিরিয়া পাইবার জন্ত ওষুধের কোন দরকার হইবে না ।
তবে, সেই মাগীটার নাম আমাকে বলিতে পার ? ”

মঙ্গলা খানিকটা মালা জপিয়া কহিল, “ভাহার নাম দ
দিয়া আরম্ভ । ”

মাতঙ্গ বলিয়া উঠিল, “জামিও তাই বলিয়াছিলাম ।
শশি না হলে আর কে হইবে ? তিনি বড় সতীপনা করেন ।
এইবার বুঝা গেল । ছিছি, মাগীর লজ্জাও নাই, সরমও
নাই । মাগীকে পাই ত একবার ঝাটাপেটা করিয়া লই ! ”

উল্লিখিত শশির নৈতিক অবনতি দেখিয়া মঙ্গলার
মনে সহসা অভ্যন্ত ঘৃণার উদয় হইল । শশিকে গ্রহণ
করিতে বিন্মত হইয়া যম যে নিজ কার্যে অভ্যন্ত শৈথিল্য
প্রকাশ করিয়াছেন, তজ্জন্য যমকে পর্য্যন্ত তিরস্কার করা
ফুরাইলে পর মঙ্গলা মাতঙ্গিনীকে জিজ্ঞাসা করিলেন, “বলি,
রাজবাটীর খবর কি ? ”

মাতঙ্গিনী হাত উল্টাইয়া কহিল, “সে সব কথায়
আমাদের কাজ কি ভাই ? ”

মঙ্গলা কহিল, “ঠিক কথা, ঠিক কথা । ”

মঙ্গলার যে এ বিষয়ে সহসা মতের এতটা ঐক্য হইয়া
যাইবে, তাহা মাতঙ্গিনী আশা করে নাই । সে কিঞ্চিৎ
ফাঁকরে পড়িয়া কহিল, “তা’ তোমাকে বলিতে দোষ নাই,
তবে আজ আমার বড় সময় নাই ; আর এক দিন সমস্ত
বলিব । ” বলিয়া বসিয়া রহিল ।

মঙ্গলা কহিল, “তা’ বেশ, আর এক দিন শুনা যাইবে।”

মাতঙ্গিনী অধীর হইয়া পড়িল, কহিল, “তবে আমি যাই ভাই। দেৱী করিলাম বলিয়া আবার কত বকুনী থাইতে হইবে। দেখ ভাই, সে দিন আমাদের ওখানে রাজার জামাই আসিয়াছিলেন, তা’ তিনি যে দিন আসিয়াছিলেন, সেই রাত্রেই কাহাকে না বলিয়া চলিয়া গিয়াছেন।”

মঙ্গলা কহিল, “সত্য নাকি ? সটে ; কেন বল দেখি ; তাই বলি, মাতঙ্গ না হইলে আমাকে ভিতরকার খবর কেহ দিতে পারে না।”

মাতঙ্গ প্রফুল্ল হইয়া কহিল, “আসল কথা কি জান ? আমাদের যে বৌঠাকরুণটি আছেন, তিনি ছুটি চক্ষে কাহারো ভাল দেখিতে পারেন না। তিনি কি মস্তুর জানেন, স্বেয়ামীকে একেবারে ভেড়ার মতন করিয়া রাখিয়াছেন, তিনি—না ভাই, কাজ নাই, কে কোথা দিয়া শুনিবে, আর বলিবে মাতঙ্গ রাজবাড়ির কথা বাহিবে বলিয়া বেড়ায়।”

মঙ্গলা আর কৌতূহল সামালিতে পারিল না ; যদিও সে জানিত, আর খানিক ক্ষণ চুপ করিয়া থাকিলে মাতঙ্গ আপনি সমস্ত বলিবে, তবু তাহার বিলম্ব সহিল না, কহিল, “এখানে কোন লোক নাই নাতনী। আর আপনা-আপনি মধ্য কথা, ইহাতে আর দোষ কি ? তা’ ভোমাদের বৌঠাকরুণ কি করিলেন ?”

“তিনি আমাদের দিদি ঠাকরুণের নামে জামাইয়ের কাছে কি সব লাগাইয়াছিলেন, তাই জামাই রাতারাতিই দিদি ঠাকরুণকে ফেলিয়া চলিয়া গেছেন। দিদি ঠাকরুণত কাঁদিয়া কাটিয়া অনান্ত করিতেছেন। মহারাজা খাপা হইয়া উঠিয়াছেন, তিনি বৌঠাকরুণকে শ্রীপুরে বাপের বাড়ি পাঠাইতে চান। ঐ দেখ ভাই, তোমার সকল কথাতেই হাসি! ইহাতে হাসিবার কি পাইলে? তোমার যে আর হাসি ধরে না।”

রামচন্দ্র রায়ের পলায়ন-বার্তার যথার্থ কারণ রাজবা-টীর প্রত্যেক দাস দানী সটাক অবগত ছিল, কিন্তু কাহারো সহিত কাহারো কথার ঐক্য ছিল না।

মঙ্গলা কহিল, “তোমাদের মাঠাকরুণকে বলিও যে, বৌঠাকরুণকে শীঘ্র বাপের বাড়ি পাঠাইয়া কাজ নাই। মঙ্গলা এমন ওষুধ দিতে পারে যাহাতে যুবরাজের মন তাঁহার উপর হইতে একেবারে চলিয়া যায়।” বলিয়া সে খল্ খল্ করিয়া হাসিতে লাগিল। মাতঙ্গ কহিল, “তা বেশ কথা!”

মঙ্গলা জিজ্ঞাসা করিল, “তোমাদের বৌঠাকরুণকে কি যুবরাজ বড় ভাল বাসেন?”

“সে কথায় কাজ কি! এক দণ্ড না দেখিলে থাকিতে পারেন না। যুবরাজকে “তু” বলিয়া ডাকিলেই আসেন!”

“আচ্ছা, আমি ওষুধ দিব। দিনের বেলাও কি শুবরাজ তাহার কাছেই থাকেন?”

“হঁ।”

মঙ্গলা কহিল “ওমা কি হইবে!” দাঁতে দাঁতে লাগাইয়া কহিল, “সে ডাকিনী না জানি কি মন্ত্র জানে! তা,’ সে শুবরাজকে কি বলে, কি করে, দেখিয়াছিস্?”

“না ভাই, তাহা দেখি নাই।”

“আমাকে একবার রাজবাটিতে লইয়া যাইতে পারিস্, আমি তাহা হইলে একবার দেখিয়া আসি!”

মাতঙ্গ কহিল “কেন ভাই, তোমার এত মাথাব্যথা কেন?”

মঙ্গলা কহিল, “বলি তা’ নয়! একবার দেখিলেই বুঝিতে পারিব, কি মন্ত্রে সে বশ করিয়াছে, আমার মন্ত্র খাটিবে কি না!”

মাতঙ্গ কহিল, “তা’ বেশ, আজ তবে আসি!” বলিয়া চুপড়ি লইয়া চলিয়া গেল।

মাতঙ্গ চলিয়া গেলে মঙ্গলা যেন ফুলিতে লাগিল, দাঁতে দাঁতে লাগাইয়া চক্ষু-তারকা প্রসারিত করিয়া বিড়-বিড় করিয়া বকিতে লাগিল।

একে একে রাজবাটির দুই এক জন ভৃত্য আসিয়া হাজির হইল। অমনি মঙ্গলা তাহার হাসি বাহির করিয়া কহিল, “কি ভাগ্য! আজ কার মুখ দেখিয়া উঠিয়া-

হিলাম, এত গুলি ডুমুর ফুলের একত্রে দর্শন পাইলাম !” ইত্যাদি ।

তাহাদের মধ্যে কেহ কহিল, “মাইরি !” কেহ কহিল, “তাইত !” কেহ কহিল, “মরে যাই ।” অবশেষে নানাবিধ বসগুৰ্ত্ত সন্মোদন চলিতে লাগিল । মজলার হাস্যলহরী আকাশে উঠিল । গান বাদ্য, হাস্য পরিহাস জমিয়া উঠিল । সে মজলিস যখন ভাঙ্গিল, তখন, মজলা ঘরে দ্বার রুদ্ধ করিয়া, আগুন জালিয়া, মড়ার মাথা লইয়া রক্তবস্ত্র পরিয়া সমস্ত রাত্রি নানাবিধ অমুঠানে রত হইল !

ষোড়শ পরিচ্ছেদ ।

বসন্তরায় চলিয়া গেলেন । তখন সন্ধ্যা হইয়া আসি-
যাছে । বিভা প্রাসাদের ছাদের উপর গেল । ছাদের
উপর হইতে দেখিল, পাক্কী চলিয়া গেল । বসন্তরায় পাক্কীব
মধ্য হইতে মাথাটি বাহির করিয়া একবার মুখ ফিরাইয়া
পশ্চাতে চাহিয়া দেখিলেন । সন্ধ্যার অন্ধকারের মধ্যে,
চথের জলের মধ্য হইতে, পরিবর্তনহীন অবিচলিত, পাষণ-
হৃদয় রাজবাটির দীর্ঘ কঠোর দেয়ালগুলি ঝাপসা ঝাপসা
দেখিতে পাইলেন । পাক্কী চলিয়া গেল, কিন্তু বিভা সেই

খানে দাঁড়াইয়া রহিল। পথের পানে চাহিয়া রহিল।
 তারা গুলি উঠিল, দীপগুলি জলিল, পথে লোক রহিল
 না। বিভা দাঁড়াইয়া চুপ করিয়া চাহিয়া রহিল। স্মরমা
 তাহাকে সারাদেশ খুঁজিয়া, কোথাও না পাইয়া অবশেষে
 ছাদে গিয়া উপস্থিত হইল। বিভার গলা ধরিয়া স্নেহের স্বরে
 কহিল, “কি দেখিতেছিষ্ বিভা?” বিভা নিশ্বাস ফেলিয়া
 কহিল, “কে জানে ভাই!” বিভা সমস্তই শূন্যময় দেখি-
 তেছে, তাহার প্রাণে আর স্মৃতি নাই। সে, কেন যে ঘরের
 মধ্যে যায়, কেন যে ঘর হইতে বাহির হইয়া আসে, কেন
 শুইয়া পড়ে, কেন উঠিয়া যায়, কেন ছুই গ্রহর মধ্যাক্ষে
 বাড়ির এ ঘরে ও ঘরে ঘুরিয়া বেড়ায়, তাহার কাবণ খুঁজিয়া
 পায় না। রাজবাড়ি হইতে তাহার বাড়ি চলিয়া গেছে
 যেন, রাজবাড়িতে যেন তাহার ঘর নাই। অতি ছেলে-
 বেল্য হইতে নানা খেলাধুলা, নানা স্মৃতি স্মৃতি, হাসি কান্নায়
 মিলিয়া রাজবাড়ির মধ্যে তাহার জন্ম যে একটি সাধের
 ঘর বাঁধিয়া দিয়াছিল, সে ঘরটি এক দিনে কে ভাঙ্গিয়া
 দিল রে! এ ঘর ত আর ত হার ঘর নয়! সে, এখন
 গৃহের মধ্যে গৃহহীন। তাহার দাদা মহাশয় ছিল, গেল,
 তাহার—চন্দ্রদীপ হইতে বিভাকে লইতে কবে লোক
 আসিবে? হয়ত রামমোহন মাল রওনা হইয়াছে, এত-
 ক্ষণে তাহারা না জানি কোথায়! বিভার স্মৃতির এখনো
 কিছু অবশিষ্ট আছে। তাহার অমন দাদা আছে, তাহার

প্রাণের সুরমা আছে, কিন্তু তাহাদের সম্বন্ধেও যেন একটা কি বিপদ ছায়ার মত পশ্চাতে কিরিতেছে। যে বাড়ির ভিটা ভেদ করিয়া একটা ঘন ঘোর গুপ্ত রহস্য অদৃশ্য ভাবে ধুমায়িত হইতেছে, সে বাড়িকে কি আর ঘর বলিয়া মনে হয় ?

উদয়াদিত্য শুনিলেন কৰ্ম্মচ্যুত হইয়া সীতাবামের বড় দুর্দশা হইয়াছে। একে তাহার এক পয়সার সম্বল নাই, তাহার উপর তাহার অনেক গুলি গলগ্রহ জুড়িয়াছে। কারণ যখন সে রাজবাড়ি হইতে মোটা মাহিয়ানা পাইত, তখন তাহাব পিসা, সহসা স্নেহের আধিক্য বশতঃ কাজ কৰ্ম্ম সমস্ত ছাড়িয়া দিয়া তাহার স্নেহাস্পদের বিরহে কাতর হইয়া পড়িয়াছিল; মিলনের সুবাস্থা করিয়া লইয়া আনন্দে গদগদ হইয়া কহিল যে, সীতারামকে দেখিয়াই তাহার ক্ষুধা তৃষ্ণা সমস্ত দূর হইয়াছে। ক্ষুধা তৃষ্ণা দূর হওয়ার বিষয়ে অনেক প্রমাণ আছে, কিন্তু কেবল সীতারামকে দেখিয়াই হইত কি না, সে বিষয়ে কোন প্রমাণ নাই। সীতাবামের এক দূব সম্পর্কের বিধবা ভগিনী তাহার এক পুত্রকে কাজ কৰ্ম্মে পাঠাইবার উদ্যোগ করিতেছিল, এমন সময়ে সহসা তাহার চৈতন্য হইল যে, বাছাকে ছোট কাজে নিযুক্ত করিলে বাছার মামাকে অপমান করা হয়, এই বুঝিয়া সে বাছার মামার মান রক্ষা করিবার জন্য কোন মতে সে কাজ করিতে পারিল না। এইরূপে সে মান রক্ষা করিয়া

সীতারামকে ধনী করিল ও তাহার বিনিময়ে আপনার প্রাণরক্ষার বন্দোবস্ত করিয়া লইল। ইহার উপর সীতারামের বিধবা মাতা আছে ও এক অবিবাহিতা বালিকা কন্যা আছে। এদিকে আবার সীতাবাম লোকটি অতিশয় সৌখীন, আমোদ প্রমোদটি নহিলে তাহার চলে না। সীতারামের অবস্থার পরিবর্তন হইয়াছে, অথচ তাহার সঙ্গে সঙ্গে আনুসঙ্গিক পরিবর্তন কিছুই হয় নাই। তাহার পিসার ক্ষুধাতৃষ্ণা ঠিক সমান রহিয়াছে; তাহার ভাগিনেয়টির যতই বয়স বাড়িতেছে, ততই তাহার উদরের প্রসব ও মামার মান অপমানের প্রতি দৃষ্টি অধিক করিয়া বাড়িতেছে। সীতারামের টাকার খলি ব্যতীত আর কাহারো উদর কমিবার কোন লক্ষণ প্রকাশ করিতেছে না। সীতারামের অন্যান্য গলগ্রহের সঙ্গে সখটিও বজায় আছে, সেটি ধারের উপর বন্ধিত হইতোহু পুন্দও যে পরিমাণে পুষ্ট হইতেছে, সেও সেই পরিমাণে পুষ্ট হইয়া উঠিতেছে।

উদয়াদিত্য সীতারামের দারিদ্র্য দশা শুনিয়া তাহার ও ভাগবতের মাসিক বৃত্তি নির্ধারণ করিয়া দিলেন। সীতারাম টাকাটা পাইয়া অত্যন্ত লজ্জিত হইয়া পড়িল। মহারাজার নিকট উদয়াদিত্যের নাম করিয়া অবধি সে নিজের কাছে ও উদয়াদিত্যের কাছে নিতান্ত অপরাধী হইয়া আছে। উদয়াদিত্যের টাকা পাইয়া সে কাঁদিয়া ফেলিল।

এক দিন যুবরাজের সাক্ষাত পাইয়া তাঁহার পা জড়াইয়া ধরিয়া তাঁহাকে উগবান, জগদীশ্বর, দয়াময় সন্মোহন করিয়া বিস্তর ক্ষমা চাহিল। ভাগবৎ লোকটা অত্যন্ত ঠাণ্ডা প্রকৃতির! সে সতরঞ্চ গেলে, তামাক খায় ও প্রতিবাসীদিগকে স্বর্ণ নরকের জমী বিলি করিয়া দেয়! সে যখন উদয়াদিত্যের টাকা পাইল, তখন মুখ বেঁকাইয়া নানা ভাব ভঙ্গীতে জানাইল যে, যুবরাজ তাহার যে সৰ্ব্বনাশ করিয়াছেন, এ টাকাতে তাহার কি প্রতিশোধ হইবে! টাকাটা লইতে সে কিছুমাত্র আপত্তি করিল না, গোটা-দুয়েক কৃতজ্ঞতার কথাও বলিল, কিন্তু সেই কৃতজ্ঞতার পুষ্পাজলির মধ্যে এমন ছটা কাঠ-পিপড়া ছাড়িয়া দিল, যাহাতে যুবরাজ সে কৃতজ্ঞতার যত্নাণা অনেক দিন ভুলিতে পারেন নাই।

যুবরাজ কৰ্ম্মচ্যুত প্রহরীদ্বয়কে মাসিক বৃত্তি দিতেছেন, একথা প্রতাপাদিত্যের কানে গেল। আগে হইলে যাইত না। আগে তিনি উদয়াদিত্যকে এত অবহেলা করিতেন যে উদয়াদিত্য সম্বন্ধে সকল কথা তাঁহার কানে যাইত না। মহারাজ জানিতেন যে, উদয়াদিত্য প্রজাদের সহিত মিশিতেন, এবং অনেক সময়ে প্রজাদের পক্ষ অবলম্বন করিয়া তাঁহার বিরুদ্ধাচরণ করিয়াছেন, কিন্তু সে গুলি প্রায় এমন সামান্ত ও এমন অল্পে অল্পে তাহা তাঁহার সহিয়া আসিয়াছিল যে, বিশেষ একটা কিছু না হইলে উদয়াদিত্যের অস্তিত্ব

সম্মুখে তাঁহার মনোযোগ আকর্ষণ করিতে পারিত না। এইবার উদয়াদিত্যের প্রতি তাঁহার একটু বিশেষ মনোযোগ পড়িয়াছে, তাই উপরি-উক্ত ঘটনাটি অবিলম্বে তাঁহার কানে গেল। শুনিয়া প্রতাপাদিত্য অত্যন্ত রুষ্ট হইলেন। উদয়াদিত্যকে ডাকাইয়া আনিলেন, ও কহিলেন “আমি যে নীতারামকে ও ভাগবতকে কর্ম্মচ্যুত করিলাম, সে কি কেবল রাজকোষে তাহাদের বেতন দিবার উপযুক্ত অর্থ ছিল না বলিয়া? তবে যে তুমি নিজের হইতে তাহাদের মাসিক বৃত্তি নির্ধারণ করিয়া দিয়াছ?”

উদয়াদিত্য ধীরে ধীরে কহিলেন, “আমি দোষী। আপনি তাহাদের দণ্ড দিয়া আমাকে দণ্ডিত করিয়াছেন। আমি আপনার সেই বিচার অল্পস্বারে মাসে মাসে তাহাদের নিকট দণ্ড দিয়া থাকি।”

ইতিপূর্বে কখনই প্রতাপাদিত্যকে উদয়াদিত্যের কথা মনোযোগ দিয়া শুনিতো হয় নাই। উদয়াদিত্যের ধীর গম্ভীর বিনীত স্বর ও তাঁহার স্নসংযত কথা শুনি প্রতাপাদিত্যের মিতান্ত্র মন্দ লাগিল না। উদয়াদিত্যের কথাঃ কোন উত্তর না দিয়া প্রতাপাদিত্য কহিলেন, “আমি আদেশ করিতেছি, উদয়, ভবিষ্যতে তাহাদের যেন আর অর্থ সাহায্য না করা হয়।”

উদয়াদিত্য কহিলেন, “আমার প্রতি আরো গুরুতর শাস্তির আদেশ হইল। কিন্তু” হাত ঘোড় করিয়া কহিলেন

কিন্তু এমন কি অপরাধ করিয়াছি, যাহাতে এত বড় শাস্তি আমাকে বহন করিতে হইবে? আমি কি করিয়া দেখিব, আমার স্ত্রী আট নয়টি ক্ষুধিত মুখে স্নান জুটিতেছে না, আট নয়টি হস্তভাগা নিরাশ্রয় হইয়া পথে পথে কাঁদিয়া বেড়াইতেছে, অথচ আমার পাতে স্নানের অভাব নাই? পিতা, আমার যাহা কিছু সব আপনাবই প্রসাদে। আপনি আমার পাতে আবশ্যকের অধিক স্নান দিতেছেন, কিন্তু আপনি যদি আমার আহ্বারের সময় আমার সমুখে আট নয়টি ক্ষুধিত কাতরকে বসাইয়া রাখেন, অথচ তাহাদের মুখে স্নান তুলিয়া দিতে বাধা দেন, তবে সে স্নান যে আমার বিষ!”

উত্তেজিত উদযাদিত্যকে প্রতাপাদিত্য কথা কহিবার সময় কিছু মাত্র বাধা দিলেন না, সমস্ত কথা শেষ হইলে পর আস্তে আস্তে কহিলেন, “তোমার যা বক্তব্য তাহা শুনলাম, এক্ষণে আমার যা বক্তব্য পুনশ্চ বলি। ভাগবৎ ও নীতারামের বৃত্তি আমি বন্ধ করিয়া দিয়াছি, আর কেহ যদি তাহাদের বৃত্তি নির্দ্ধারণ করিয়া দেয়, তবে সে আমার ইচ্ছার বিরুদ্ধাচারী বলিয়া গণ্য হইবে।” প্রতাপাদিত্যের মনে মনে বিশেষ একটু রোষের উদয় হইয়াছিল। সম্ভবতঃ তিনি নিজেও তাহার কারণ বুঝিতে পারেন নাই, কিন্তু তাহার কারণ এই, “আমি যেন ভারি একটা নিষ্ঠুরতা করিয়াছি, তাই দয়ার শরীর উদযাদিত্য তাহার প্রতিবধান করিতে আইলেন। দেখি তিনি দয়া করিয়া কি করিতে

পারেন!” আমি যেখানে নিষ্ঠুর, সেখানে আর যে কেহ দয়ালু হইবে, এত বড় আশ্পর্ক! কাহার প্রাণে নয়!

উদয়াদিত্য সুরমার কাছে গিয়া সমস্ত कहিলেন। সুরমা कहিল, “সে দিন সমস্ত দিন কিছু খাইতে পায় নাই, সন্ধ্যাবেলায় সীতারামের মা, সীতারামের ছোট মেয়েটিকে লইয়া আমার কাছে আসিয়া কাঁদিয়া পড়িল। আমি সেই সন্ধ্যাবেলায় কিছু দিই, তবে তাহারা সমস্ত পরিবার খাইতে পায়। সীতারামের মেয়েটি ছুধের মেয়ে, সমস্ত দিন কিছু খায় নাই, তাহার মুখপানে কি তাকান’ যায়! ইহাদের কিছু কিছু না দিলে ইহারা যাইবে কোথায়?”

উদয়াদিত্য कहিলেন, “বিশেষতঃ, রাজবাটি হইতে যখন তাহারা তাড়িত হইয়াছে, তখন পিতার ভয়ে অল্প কেহ তাহাদের কর্ম দিতে বা সাহায্য করিতে সাহস করিবে না, এ সময়ে আমরাও যদি বিমুখ হই, তাহা হইলে তাহাদের আর সংসারে কেহই থাকিবে না। সাহায্য আমি করিবই, তাহার জন্য ভাবিও না সুরমা, কিন্তু অনর্থক পিতাকে অনন্তষ্ট করা ভাল হয় না, যাহাতে এ কাজটা গোপনে সমাধা করা যায়, তাহার উপায় করিতে হইবে।”

সুরমা উদয়াদিত্যের হাত ধরিয়া कहিল, “তোমাকে আর কিছু করিতে হইবে না, আমিই সমস্ত করিব, আমাব উপরে ভার দাও।” সুরমা নিজেকে দিয়া উদয়াদিত্যকে ঢাকিয়া রাখিতে চায়। এই বৎসরটা উদয়াদিত্যের দুর্ভ-

সর পড়িয়াছে। অদৃষ্ট তাঁহাকে যে কাজেই প্রবৃত্ত করা-
ইতেছে, সবগুলিই তাঁহার পিতার বিরুদ্ধে; অথচ সে গুলি
এমন কাজ যে, সুরমার মত স্ত্রী প্রাণ ধরিয়া স্বামীকে সে
কাজ হইতে নিবৃত্ত করিতে পারে না। সুরমা তেমন
স্ত্রী নহে; স্বামী যখন ধর্ম যুদ্ধে যান, তখন সুরমা নিজের
হাতে তাঁহার বর্ম বাঁধিয়া দেয়, তাহার পর ঘরে গিয়া
সে কাঁদে। সুরমার প্রাণ প্রতিপদে ভয়ে আকুল হই-
য়াছে, অথচ উদয়াদিত্যকে সে প্রতিপদে ভরসা দিয়াছে।
উদয়াদিত্য ঘোর বিপদের সময় সুরমার মুখের দিকে চাহি-
য়াছেন, দেখিয়াছেন, সুরমার চখে জল, কিন্তু সুরমার
হাত কাঁপে নাই, সুরমার পদক্ষেপ অটল।

সুরমা তাঁহার এক বিশ্বস্তা দাসীর হাত দিয়া, সীতা-
রামের মার কাছে ও ভাগবতের স্ত্রীর কাছে বৃত্তি পাঠা-
ইবার বন্দোবস্ত করিয়া দিলেন। দাসী বিশ্বস্তা বটে,
কিন্তু মঙ্গলার কাছে একথা গোপন রাখিবার সে কোন
আবশ্যক বিবেচনা করে নাই। এই নিমিত্ত মঙ্গলা ব্যতীত
বাহিরের আর কেহ একথা অবগত ছিল না।

সপ্তদশ পরিচ্ছেদ ।

রাজপ্রাসাদের কোতোয়াল হরদয়াল আসিলে পর মঙ্গলা মুখ ভার করিয়া ঘাড় বঁকাইয়া কহিল, “আমার মন ফিরাইয়া দাও !”

হরদয়াল হাসিয়া কহিল, “আমার কাছে থাকিলেত !”

মঙ্গলা চোক ঘুরাইয়া কহিল, “আমিত তোমার কাছে দিয়াছিলাম, তার পরে তুমি জান ।”

হরদয়াল কহিল, “যদি বা দিয়া থাক আমার মনটি আগে বন্ধক রাখিয়াছ, তবে দিয়াছ। তুমি তেমন মেয়ে নহ। আগে সেটি বাহির কর, তার পরে দেখা যাবে।”

মঙ্গলা কহিল, “ছিঃ, তুমি বড় কাপুরুষ !”

হরদয়াল কহিল, “আমি কাপুরুষ ? আমি ভয় কব কেবল আমার গৃহিণীর জিহ্বাকে, আর তোমার ঐ বাঁকা ভুরু দুটিকে। বাণের মধ্যে ভয় করি পঞ্চবাণকে। আমি কাপুরুষ হইলাম ?”

মঙ্গলা কহিল, “সে দিন দশ জন লোকের সাক্ষাতে সীতারাম তোমার কথা পাড়িয়া তোমাকে উল্লুক বলিয়াছে, আমি স্বকর্ণে শুনিয়াছি।”

হরদয়াল কহিল, “আমি না হয় বিশ জন লোকের সাক্ষাতে তাহাকে গাধা বলিব !”

মঙ্গলা কহিল, “সীতারাম বলে, সীতারামের ছায়া দেখিলে তোমার দাঁতকপাটা লাগে !”

হরদয়াল কহিল, “আমি না হয়, উহা অপেক্ষা আরো একটা গুরুতর মিথ্যা কথা বলিব !” কিছুতেই হরদয়ালকে রাগাইতে পারিল না, মঙ্গলা হার মানিয়া কান্ত হইল ।

তাহার পর দিন দেওয়ানজির জ্যেষ্ঠ পুত্র অনঙ্গমোহন মঙ্গলার দ্বারা আসিয়া হাজির হইলেন । মঙ্গলা হাসিয়া কহিল, “মাইরি, চের চের সুপুরুষ দেখিয়াছি, কিন্তু এমন চাদের মত মুখ কোথাও দেখি নাই ।”

অনঙ্গমোহন গদগদ হইয়া কহিলেন, “সত্যি বল্চিস মঙ্গলা ? আচ্ছা আমার গা ছুঁয়ে বল্ !”

“তোমার দিব্য, অমন আর কাহাকেও দেখি নাই !”

অনঙ্গমোহন—“কাহাকেও না ? রূপচাঁদকে ?”

মঙ্গলা—“ছিঃ ! রূপ ত তার আর কোথাও দেখি না, কেবল নামটায় আছে !”

অনঙ্গমোহন একেবারে বিহ্বল হইয়া হাসিতে লাগিলেন । কিছুক্ষণ বাদে কহিলেন, “দেখ্ মঙ্গলা, বাবা বলেন ছেলেবেলা আমার রং আরো সাফ ছিল, ঠিক যেন কার্পিকের মত দেখিতে ছিল । সে রঙের কাছে এ রং ত কিছুই নয় !” বলিয়া চাদর খুলিয়া হাতের রং দেখাইলেন ।

মঙ্গলা কহিল, “ওমা, কোথায় যাব ! এর চেয়েও রং সাফ ছিল !

অনঙ্গমোহন আনন্দে পরিপূর্ণ হইয়া উঠিলেন, কহিলেন,
“মা বলেন, আমার চোক দুটি পদ্মফুলের মত।”

মঙ্গলা কহিল “তা’ তিনি ঠিক বলিয়াছেন। কিন্তু দেখ,
আমাদের সীতারামের চোক দুটি বড় সরেশ। তেমন চোক
আমি কোথাও দেখি নাই।”

অনঙ্গ। “কার চোক?”

মঙ্গলা। “সীতারামের।”

অনঙ্গ “সে বেটার চোক আবার ভাল হল কবে?”

মঙ্গলা। “কেন ভাই, বেশত, ডাগর পটলচেরা টানা
চোক!”

অনঙ্গমোহন খেপিয়া উঠিয়া কহিলেন, “সে গণ্ড মূর্খটার
চোক ভাল দেখতে হল!”

মঙ্গলা। “তা ভাই অজায় বলিলে হবে কেন? মূর্খ
বলিয়া তাহার চোক খারাপ হবে কেন? শুধু চোখ কেন,
তার ভুরু দুটিও মন্দ নয়!”

অনঙ্গ। “সীতারামের ভুরু দুটিও মন্দ নয়? সে বেটা
কোথাকার একটা ভিথিরি, এক কানা কড়ির সঙ্গতি নাই,
হুই সন্ধ্যা আহাৰ জোটে না, তার চোখ ভাল, তার ভুরু
দুটি মন্দ নয়!”

মঙ্গলা—“কেন ভাই, আমার ত বেশ লাগে। নাক
কান চোক সব শুদ্ধ ধরিয়া তাহার মুখ থানি ত আমার বড়
ভাল লাগে!”

তখন অনঙ্গমোহন হতাশাস হইয়া কহিল, “কে জানে ভাই, তোমাদের কেমন পছন্দ ! সেটা একটা পাজী, নচ্ছার, হতভাগা, লক্ষীছাড়া ; সে দিন আমার কাছে ভিক্ষা চাহিতে আসিয়াছিল, ফের যদি আসে ত কোন্ গোখাদক তাহাকে এক পয়সা ভিক্ষা দেয় ! বেটাকে গলা ধাক্কা দিয়া দূর করিয়া দিব !”

মঙ্গলা কহিল, “ভিক্ষা না করিলেও ত তাহার দিন চলে !”

অনঙ্গ কহিল, “কেমন করিয়া চলিবে ? বেটা যুবরাজের কাছে কিছু কিছু করিয়া পাইত। আমিই মহারাজকে বলিয়া তাহা বন্ধ করাই। এইবার বেটার ভিটামাটি উচ্ছিন্ন না করিলে দেখিতেছি কোন মতেই জ্বল হইবে না।”

মঙ্গলা—“যুবরাজ তাহার টাকা বন্ধ করিয়াছেন বটে, কিন্তু রাজবাড়ির বোর্ঠাকরণ যে দাসীর হাত দিয়া তাহাকে টাকা পাঠাইয়া দেন। তুমি সীতারামের টাকা কি করিয়া বন্ধ করিবে ?”

অনঙ্গ—“বটে ? দাসীর হাত দিয়া টাকা পাঠান হয় ? আমি অনঙ্গমোহন ইহার প্রতিকার করিব ! দেখিব, এইবার তোমাদের সীতারাম পটল-চেরা চোখ লইয়া কি করেন ? ডাগর ডাগর টানা চোখ লইয়া ত আর পেট ভরে না !”

মঙ্গলা কহিল, “ঠিক বলিয়াছ ভাই, যাহার পেটে অন্ন নাই, তাহার পটল-চেরা চোক কেন ? ভারি অন্যা—

কিন্তু তোমাদের বৌঠাকুরাণী কেমন লোক? এমন বৌ
ত বাপের জন্মে দেখি নাই গা!”

অনঙ্গ, “এইবার তিনি টের পাইবেন।”

মঙ্গলা “তুমি তাঁহার কি করিতে পারিবে?”

অনঙ্গ “দেখিতেই পাইবে।”

মঙ্গলা “তবু, বলই না শুনি।”

অনঙ্গ “তাঁহাকে রাজপুরী হইতে তাড়াইব।”

মঙ্গলা, “যুবরাজ যদি তাহার সঙ্গে সঙ্গে যায়? সে
ডাকিনীটা যে মস্ত করিয়াছে, তাহাতে কিছুই অসম্ভব নয়।”

অনঙ্গ, “না, যুবরাজকে তাহার কাছ হইতে ছাড়াইব।”

মঙ্গলা দাঁতে দাঁতে লাগাইয়া কহিল, “তোমাদের মহা-
রাজের এত সৈন্য আছে, ঐ একটা মেয়েকে যুববাজেব
কাছ হইতে টানিয়া হেঁচড়াইয়া লইয়া আসিতে পারে না?
উহার জন্য এত বিলম্বই বা কেন, আর এত আয়োজনই
বা কেন?” বলিতে বলিতে তাহার দুই হাতের মুষ্টি বদ্ধ
হইয়া আসিল। সে যেন পাইলে একবার দেখাইয়া দেয়
কি করিয়া হিড় হিড় করিয়া টানিয়া আনিতে হয়।

তাহার পরে অনঙ্গমোহন মঙ্গলার কাছে নিজের
দোৰ্দ্দণ্ড প্রতাপের পরিচয় দিতে লাগিল, এবং মুখে মুখে যুব-
রাজকে ও সুরমাকে নানাবিধ প্রকারে শাসন করিতে
লাগিল। যদিও মঙ্গলা জানিত, সে সমস্ত নিষ্ফল, তবুও
কথাগুলি শুনিতে বেশ লাগিল।

লোকে বলে, যে ব্যক্তি উৎপীড়িত, তাহার প্রতি দৃষ্টাবতই দয়া হয়, কিন্তু সে কথাটা যোথ করি ঠিক নহে। যাহাকে দয়া করা “ফেসিয়ান” নহে, তাহাকে দয়া করিতে লোকের লজ্জা করে। সকল বিষয়ই সংক্রামক, উৎপীড়ন করাও সংক্রামক, নিষ্ঠুরতা করাও সংক্রামক। সাধারণ মনুষ্য ভেড়ার পাল, কোন বিষয়েই নুতনঙ্গ দেখাইতে ইহারা অগ্রসর হয় না। দয়া করার বিষয়েও নুতনঙ্গ দেখাইতে ইহারা প্রস্তুত নহে। অতএব, উদয়াদিত্যকে দয়া কে দেখাইবে? এমন ক্যাষান-বিরুদ্ধ কান্স কে করিবে!

সেই দিনই সন্ধ্যাবেলায় মাতঙ্গিনীকে সঙ্গে করিয়া মঙ্গলা বাজবাটীতে প্রবেশ করিল। গৃহে প্রদীপ জালিয়া সুরমা ও উদয়াদিত্য বাতায়নে বসিয়াছিলেন। অল্প অল্প করিয়া সন্ধ্যার বাতাস আসিতেছিল। সুরমা হেলিয়া উদয়াদিত্যের কাঁধে মাথা দিয়া আছে, উদয়াদিত্য সুরমার হাত লইয়া বাগানের দিকে চাহিয়া আছেন। তখন সেই সন্ধ্যার বাতাসে, ফুলের গন্ধে, আকাশের তারায়, বিজ্ঞান গৃহে, বিজ্ঞান আলিঙ্গনে হৃদয়ের হৃদয়ে কি গভীর সুখ বিরাজ করিতেছিল! মুখে কথা নাই, চোখে জল আসিয়াছে, মাঝে মাঝে দীর্ঘ নিশ্বাস উঠিতেছে। চুপ করিয়া আকাশের পানে চাহিয়া হৃদয়ে কি দেখিতেছে কে জানে! বুঝি ঐ নক্ষত্র-খচিত আকাশের নীচে তাহাদের কতদিনকার কত সুখের স্মৃতি

আজ খেলা করিতে আসিয়াছে। হুজনের হৃদয়ে আজ বাঁশি বাজিয়াছে, তাই শুনিতে পাইয়া বুঝি ঐ ছায়াময়ী স্মৃতি গুলি তাহাদের শত শত মৃদু মধুর কণ্ঠ একত্রে মিশাইয়া ঐ আকাশের নীচে হইতে সাড়া দিতেছে। স্নেহের প্রতি স্নেহের কি টান! যখন একটি স্নেহের মুহূর্ত্ত জন্ম গ্রহণ কবে, তখন মরণের রাজ্য হইতে আমাদের পুরাণে স্নেহের দিন গুলি উঠিয়া আসিয়া তাহাব সহিত কোলাকুলি করিতে আসে; একটি স্নেহ জন্মাইলে মৃত স্নেহ গুলি জীবিত হইয়া উঠে। আজ উদয়াদিত্য ও সুরমার সেই শুভ মুহূর্ত্ত, যখন হৃৎকের মুখেও হাসি ফুটে, স্নেহের চখেও জল আসে। উদয়াদিত্য তাঁহার বৃকের কাছে সুরমাব মুখখানি অলুভব করিতেছেন, তাঁহার অনাবৃত বক্ষে সুরমার নিঃশ্বাস ধীরে ধীরে আসিয়া পড়িতেছে। সুরমার সে মুখখানি শত সহস্র অতীত যুগের স্মৃতির মত, শত সহস্র ভবিষ্যৎ যুগের অশ্রু মত তাঁহার বৃকের উপরে পড়িয়া রহিয়াছে, তাঁহার নিঃশ্বাস গুলি কোমল প্রেমের অতি মৃদু পদক্ষেপের ন্যায় তাঁহার বক্ষে আসিয়া পড়িতেছে।

মঙ্গলা দ্বারের আড়ালে অন্ধকাবে দাঁড়াইয়া ফুলিতেছিল ফুঁসিতেছিল, চোক ছুটা পাকাইয়া বাঘিনীর মত সুরমাব দিকে তাকাইয়াছিল—মনে মনে कहিতেছিল, “আমি এমন, করিয়া তাকাইয়া আছি, তবু ও ডাইনিটা বুক ফাটিয়া ঐ থানেই মরিয়া পড়িল না! মর, মর, আব্বার মুখের পাঁনে

তাকান' হইতেছে ! ঐ চোক দুটা শকুনীতে কবে উপ-
ড়াইবে ! আমি দেখিয়া চক্ষু সার্থক করিব ! কেন গা,
আমার চোক কি উহার চেয়ে খারাপ ছিল ? কেন
গা, আমিও কি অমনি করিয়া ছেনালি করিতে
জানিতাম না ? অা মর, সোহাগে যে একেবারে
গলিয়া পড়িল ! অত সোহাগ ভাল না ! অত সুখ বিধা-
তার নয় না ! এ সুখের ফল এক দিন ভোগ করিতে
হইবে ! সোহাগে গরবে বোধ করি তোমার আর মাটিতে
পা পড়ে না ! কিন্তু দর্পহারী মধুসূদন আছেন । আমরা
এক দিন বড় গরব হইয়াছিল, বিধাতার সহিল না ! আবাব
বুকের কাছে মুখ রাখা হইয়াছে ! কাল যখন রূপসী
সোহাগী-আমার সাজ গোজ করিবি, তখন আমাকে
ডাকিস্, আমি ওই মুখখানি লইয়া এই নথ গুলি দিয়া অঁচড়
কাটিয়া কাটিয়া মনের মত করিয়া সাজাইয়া দিব ! ইস্—
বড় আদর যে ! এখানে আর দাঁড়ান হইল না ।” বলিয়া
সে গস্ গস্ করিয়া চলিয়া গেল ।

কত রাত্রি পর্য্যন্ত উদয়াদিত্য বাতায়নে বসিয়া রহিলেন,
সুমনা তাঁহার বক্ষের উপর ঘুমাইয়া পড়িল, সে সেই শিশু
বায়ুহিল্লোলে সুখের স্বপ্ন দেখিতে লাগিল, উদয়াদিত্য
অনেক ক্ষণ চাহিয়া চাহিয়া তাহার সুমন্ত মুখ চুশন
করিলেন ।

অষ্টাদশ পরিচ্ছেদ ।

যখন গোপনে বৃষ্টি পাঠান'র কথা প্রতাপাদিত্যের কানে গেল, তখন তিনি দ্বিতীয় কথা না কহিয়া অন্তঃপুরে আদেশ পাঠাইয়া দিলেন সুরমাকে পিত্রালয়ে যাইতে হইবে। উদয়াদিত্য বক্ষে দৃঢ় বল বাঁধিলেন। বিভা কঁাদিয়া সুরমার গলা জড়াইয়া কহিল, “তুমি যদি যাও, তবে এ আশান-পুরীতে আমি কি করিব ?” সুরমা বিভার চিবুক ধরিয়া, বিভাব মুখ চুসন করিয়া কহিল, “আমি কেন যাইব বিভা, আমার সর্বস্ব এখানে রহিয়াছে।” সুরমা যখন প্রতাপাদিত্যের আদেশ শুনিল, তখন কহিল, “আমি পিত্রালয়ে যাইবার কোন কারণ দেখিতেছি না। সেখান হইতে আমাকে লইতে লোক আসে নাই, আমার স্বামীরও এবিষয়ে মত নাই। অতএব বিনা কারণে সহসা পিত্রালয়ে যাইবার আমি কোন আবশ্যক দেখিতেছি না।” শুনিয়, প্রতাপাদিত্য জলিয়া গেলেন। কিন্তু ভাবিয়া দেখিলেন কোন উপায় নাই। সুরমাকে কিছু বল পূর্বক বাড়ি হইতে বাহির করা যায় না, অন্তঃপুরে শারীরিক বল খাটে না। প্রতাপাদিত্য মেয়েদের বিষয়ে নিতান্ত অনাড়ি ছিলেন বলের প্রতি বল প্রয়োগ করিতে তিনি জানিতেন, কিন্তু এই অবলাদের সম্বন্ধে কিরূপ চাল চালিতে হয়, তাহা তাঁহার মাথায় আসিত না। তিনি বড় বড় কাছি টানিয়া

ছিড়িতে পারেন, কিন্তু তাঁহার মোটা মোটা অঙ্গুলি দিয়া কীধ স্ত্রের স্বস্ত্র স্বস্ত্র গ্রহি মোচন করিতে পারেন না । এই মেয়ে শুলা, তাঁহার মতে, নিতান্ত হুজুর্গ ও জানিবার অল্পপযুক্ত সামগ্রী । ইহাদের সম্বন্ধে যখনি কোন গোল বাধে, তিনি তাড়াতাড়ি মহিষীর প্রতি ভার দেন । ইহাদের বিষয়ে ভাবিতে বসিতে তাঁহার অবসরও নাই, ইচ্ছাও নাই এবং যোগ্যতাও নাই । ইহা তাঁহার নিতান্ত অল্পপযুক্ত কাজ । এবারেও প্রতাপাদিত্য মহিষীকে ডাকিয়া কহিলেন, “স্বরমাকে বাপের বাড়ি পাঠাও ।” মহিষী কহিলেন, “তাহা হইলে বাবা উদয়ের কি হইবে ?” প্রতাপাদিত্য বিরক্ত হইয়া কহিলেন, “উদয় ত আর ছেলেমানুষ নয়, আমি রাজকাৰ্য্যের অহুরোধে স্বরমাকে রাজপুরী হইতে দূরে পাঠাইতে চাই, এই আমার আদেশ ।”

মহিষী উদয়াদিত্যকে ডাকাইয়া কহিলেন, “বাবা উদয়, স্বরমাকে বাপের বাড়ি পাঠান যাক্ ! ”

উদয়াদিত্য কহিলেন, “কেন, মা, স্বরমা কি অপরাধ করিয়াছে ?”

মহিষী কহিলেন, “কি জানি বাছা, আমরা মেয়ে মানুষ, কিছু বুঝি না, বউমাকে বাপের বাড়ি পাঠাইয়া মহারাজার রাজকাৰ্য্যের যে কি সুযোগ হইবে, তা মহারাজই জানেন !”

উদয়াদিত্য কহিলেন, “মা, আমাকে কষ্ট দিমা আমাকে

দুঃখী করিয়া রাজকাৰ্য্যের কি উন্নতি হইল ? যতদূর কষ্ট সহিবার তাহাত সহিয়াছি, কোন্ সুখ আমার অবশিষ্ট আছে ? সুরমা যে বড় সুখে আছে তাহা নয়। দুই সন্ধ্যা সে ভৎসনা সহিয়াছে, দুৰ্ছাই সে অঙ্গ-আভরণ করিয়াছে, অবশেষে কি রাজবাড়িতে তাহার অন্য একটুকু স্থানও কুলাইল না ! তোমাদের সঙ্গে ক তাহার কোন সম্পর্ক নাই মা ? সে কি ভিখারী অতিথ, যে, যখন খুসী রাখিবে, যখন খুসী তাড়াইবে ? তাহা হইলে মা, আমার জন্যও রাজবাড়িতে স্থান নাই, আমাকেও বিদায় করিয়া দেও !”

মহিষী কাঁদিতে আরম্ভ করিলেন, কহিলেন “কি জানি বাবা ! মহারাজা কখন কি যে করেন, কিছু বুঝিতে পারি না। কিন্তু, তাও বলি বাছা, আমাদের বৌমাও বড় ভাল মেয়ে নয়। ও রাজবাড়িতে প্রবেশ করিয়া অর্ধি এখানে আর শান্তি নাই। হাড় জ্বালাতন হইয়া গেল ! তা', ও দিন-কতক বাপের বাড়িতেই থাক না কেন, দেখা যাক, কি বল বাছা ! ও দিন কতক এখান হইতে গেলেই দেখিতে পাইবে, বাড়ীর স্ত্রী ফেরে কি না !”

উদয়াদিত্য এ কথার আর কোন উত্তর করিলেন না, কিছুক্ষণ চুপ করিয়া বসিয়া রহিলেন, তাহার পরে উঠিয়া চলিয়া গেলেন।

মহিষী কাঁদিয়া প্রতাপাদিত্যের কাছে গিয়া পড়িলেন,

কহিলেন “মহারাজ, রক্ষা কর ! সুরমাকে পাঠাইলে উন্নয়ন হইবে না । বাছার কোন দোষ নাই, ঐ সুরমা, ঐ ডাই-নোট! তাহাকে কি মন্ত করিয়াছে।” বলিয়া মহিষী কাঁদিয়া জাকুল হইলেন ।

প্রতাপাদিত্য বিষম ক্রুদ্ধ হইয়া কহিলেন, “সুরমা যদি না যায় ত আমি উন্নয়নাদিত্যকে কারারুদ্ধ করিয়া রাখিব !”

মহিষী মহারাজার কাছ হইতে আসিয়া সুরমার কাছে গিয়া কহিলেন, “পোড়ারমুখি, আমার বাছাকে তুই কি করিলি ? আমার বাছাকে আমাকে ফিরাইয়া দে ! আসিয়া অবধি তুই তাহার কি সর্বনাশ না করিলি ? অবশেষে—সে রাজার ছেলে—তাঁর হাতে বেড়ি না দিয়া কি তুই ক্ষান্ত হইবি না ?”

সুরমা শিহরিয়া উঠিয়া কহিল, “আমার জন্য তাঁর হাতে বেড়ী পড়িবে ? সে কি কথা মা ! আমি এখনি চলিলাম !”

সুরমা বিভার কাছে গিয়া সমস্ত কহিল ; বিভার গলা ধরিয়া কহিল, “বিভা, এই যে চলিলাম, আর বোধ করি আমাকে এখানে ফিরিয়া আসিতে দিবে না !” বিভা কাঁদিয়া সুরমাকে জড়াইয়া ধরিল । সুরমা সেই খানে বসিয়া পড়িল । অনন্ত ভবিষ্যতের অনন্ত প্রাপ্ত হইতে একটা কথা আসিয়া তাহার প্রাণে বাজিতে লাগিল, “আর হইবে না !” আর আসিতে পাইব না, আর হইবে না,

আর কিছু রহিবে না ! এমন একটা মহাশূন্য ভবিষ্যৎ তাহার সমুখে প্রসারিত হইল,—যে ভবিষ্যতে সে মুখ নাই, সে হাসি নাই, সে আদর নাই, চোখে চোখে বৃকে বৃকে প্রাণে প্রাণে মিলন নাই, সুখ দুঃখের বিনিময় নাই, বুক কাটিয়া গেলেও এক মুহূর্তের জন্যও এক বিন্দু প্রেম নাই, রেহ নাই, কিছু নাই, কি ভয়ানক ভবিষ্যৎ ! সুরমার বুক কাটিতে লাগিল, মাথা ঘুরিতে লাগিল, চখের জল শুকাইয়া গেল ! উদয়াদিত্য আসিবামাত্র সুরমা তাঁহাব পা ছুট জড়াইয়া বৃকে চাপিয়া বুক কাটিয়া কাঁদিয়া উঠিল। সুরমা এমন করিয়া কখন কাঁদে নাই। তাহার বলিষ্ঠ হৃদয় আঙ্গ শতধা হইয়া গিয়াছে। উদয়াদিত্য সুরমার মাথা কোলে তুলিয়া লইয়া জিজ্ঞাসা করিলেন, “কি হইয়াছে সুরমা ?” সুরমা উদয়াদিত্যের মুখের দিকে চাহিয়া আব কি কথা কহিতে পারে ? মুখের দিকে চায় আর কাঁদিয়া ওঠে ! বলিল, “ঐ মুখ আমি দেখিতে পাইব না ? নক্ষা হইবে, তুমি বাতায়নে আনিয়া বসিবে, আমি পাশে নাই ? ঘরে দীপ জ্বলাইয়া দিবে, তুমি ঐ দ্বারের নিকট আসিয়া দাঁড়াইবে, আর আমি হাসিতে হাসিতে তোমার হাত ধরিয়া আনিব না ? তুমি যখন এখানে, আমি তখন কোথায় ?” সুরমা যে বলিল “কোথায়” তাহাতে কতখানি নিরাশা ! তাহাতে কত দূর দূরান্তরের বিচ্ছেদের ভাব। যখন কেবল মাত্র চোখে চোখেই মিলন হইতে পারে তখন মধ্যে কত

হুঁ! যখন কাহাও হইতে পারে না, তখন আরো কত দূর !
যখন কার্ত্তী হইতে বিলম্ব হয়, তখন আরো কতদূর ! যখন
প্রাণান্তিক ইচ্ছা হইলেও এক মুহূর্তের জন্যও দেখা হইবে
না, তখন—তখন ঐ পা দুখানি ধরিয়া এমনি করিয়া
বুকে চাপিয়া এই মুহূর্তেই মরিয়া যাওয়াতেই সুখ !

উনবিংশ পরিচ্ছেদ ।

উপাখ্যানের আরম্ভ ভাগে ক্লষ্ণিণীর উল্লেখ করা হই-
য়াছে, বোধ করি পাঠকেরা তাহাকে বিস্মৃত হন নাই ।
এই মঙ্গলাই সেই ক্লষ্ণিণী । সে রায়গড় পরিত্যাগ করিয়া
নামপরিবর্তন পূর্বক যশোহরের প্রান্তদেশে বাস করি-
তেছে । যুবরাজের প্রতি যে তাহার উদার, গভীর, নিঃস্বার্থ,
উপাখ্যানের নায়িকার উপযোগী প্রেম ছিল এরূপ ভ্রম
বোধ করি কাহারো হয় নাই । উপজ্ঞাসে এমন অনেক
রমণীর কথা পাঠ করা যায়, যাহারা হীনপ্রকৃতি, উগ্রচণ্ডা,
প্রথরস্বভাবা, কিন্তু তাহাদের হৃদয়ের মধ্যে কোমল বৃত্তি
কল্প নদীর স্থায় অন্তঃসলিলা হইয়া বহিতেছে । ক্লষ্ণিণীর
স্বভাব সেরূপও নহে । তাহার মধ্যে অসাধারণ কিছুই নাই ।
সাধারণ নীচ প্রকৃতির স্ত্রীলোকের স্থায় সে ইন্দ্রিয় পরায়ণ,

ঈর্ষ্যাপরায়ণ, মনোরাজ্য-অধিকার-লোলুপ। হাসি কান্না তাহার হাত-ধরা, আবশ্যক হইলে বাহির করে, আবশ্যক হইলে তুলিয়া রাখে। সর্বদাই সে রসিকতা করিয়া থাকে, কিন্তু তাহা এমন নহে যে, লিখিয়া রাখিতে পারি। গান গাহিয়া থাকে কিন্তু বিস্তৃত ভাবের গান নহে। চোখ ঠারিয়া কথা কয়, হাব ভাব করে, উচ্চ হাস্য হাসে। যখন সে রাগে, তখন সে অতি প্রচণ্ড; মনে হয় যেন রাগের পাত্ৰকে দাঁতে নখে ছিড়িয়া ফেলিবে। তখন অধিক কথা কয় না, চোখ ঠিয়া আঙুন বাহির হইতে থাকে, থরথর করিয়া কাঁপে। গলিত লোহের মত তাহার হৃদয়ের কটাহে রাগ টগবগ করিতে থাকে। তাহার মনের মধ্যে ঈর্ষ্য সাপের মত ফোঁস্ ফোঁস্ করে ও ফুলিয়া ফুলিয়া লেজ আঁহড়াইতে থাকে। এদিকে সে নানাবিধ ভ্রত করে, নানাবিধ তান্ত্রিক অনুষ্ঠান করে। যে শ্রেণীর লোকদের সহিত সে মেশে, তাহাদের মন সে আশ্চর্য্য রূপে সুকিতে পারে। যুবরাজ যখন সিংহাসনে বসিবেন তখন সে যুবরাজের হৃদয়ের উপর সিংহাসন পাতিয়া তাহার হৃদয়-রাজ্য ও যশোহর-রাজ্য একবে শাসন করিবে, এ আশা শয়নে স্বপ্নে তাহার হৃদয়ে জাগিতেছে। ইহার জন্ত সে কি না করিতে পারে! বহু দিন ধরিয়া অনবরত চেষ্টা করিয়া, রাজবাটির সমস্ত দাস দাসীর সহিত সে ভাব করিয়া লইয়াছে। রাজবাটির প্রত্যেক ক্ষুদ্র খবরটি পর্য্যন্ত সে রাখে।

সুরমার মুখ কবে মলিন হইল তাহাও সে শুনিতে পায়, প্রতাপাদিত্যের সামান্য পীড়া হইলেও তাহার কানে যায়, ভাবে এইবার বুঝি আপদটার মরণ হইবে। প্রতাপাদিত্য ও সুরমার মরণোদ্দেশে সে নানা অনুষ্ঠান করিয়াছে, কিন্তু এখনোত কিছুই সফল হয় নাই। প্রতিদিন প্রাতে উঠিয়া সে মনে করে, আজ হয় ত শুনিতে পাইব, প্রতাপাদিত্য অথবা সুরমা বিছানায় পড়িয়া মরিয়া আছে। প্রতিদিন তাহার অধীরতা বাড়িয়া উঠিতেছে। ভাবিতেছে মন্ত্র তন্ত্র চুলায় বাক, একবার হাতের কাছে পাই ত মনের সাধ মিটাই। ভাবিতে ভাবিতে এমন অধর দংশন করিতে থাকে, যে, অধর কাটিয়া রক্ত পড়িবার উপক্রম হয়। ঠিক এমন সময়ে হয়ত রাজবাটির এক ভৃত্য আসিয়া হাজির হইল, অমনি চকিতের মধ্যে হাসিটি বাহির করিয়া, সোহাগে চলিয়া বলিয়া উঠে—“আজ কি মনে করে ? তবু ভাল, এত দিন পরে মনে পড়িল !” ইত্যাদি। সুব-রাজের প্রতি কুস্মিনীর নজর আছে বলিয়া যে ছোট খাট শীকার তাহার হাত এড়াইতে পারে, তাহা নয়। মন পাইলেই হইল, তা’ সে ষাহারই হউক।

কুস্মিনী দেখিল যে, প্রতিদিন সুরমার প্রতি রাজার ও রাজমহিষীর বিরাগ বাড়িতেছে। অবশেষে এতদূর পর্যন্ত হইল যে, সুরমাকে রাজবাট হইতে বিদায় করিয়া দিবার ঐত্তাব হইয়াছে। তাহার আর আনন্দের সীমা নাই।

যখন সে দেখিল তবুও সুরমা গেল না, তখন সে বিদায় করিয়া দিবার সহজ উপায় অবলম্বন করিল ।

রাজমহিষী যখন শুনিলেন মঙ্গলা নামক একজন বিধবা তত্ত্ব মস্ত্র ঔষধ নানা প্রকার জানে, তখন তিনি ভাবিলেন সুরমাকে রাজবাটি হইতে বিদায় করিবার আগে বুঝাজের মনটা তাহার কাছ হইতে আদায় করিয়া লওয়া ভাল । মাতঙ্গিনীকে মঙ্গলার নিকট হইতে গোপনে ঔষধ আনাইতে পাঠাইলেন ।

মঙ্গলা নানাবিধ শিকড় লইয়া সমস্ত রাত ধরিয়া কাটিয়া, ভিজাইয়া, ঝাঁটিয়া, মিশাইয়া মস্ত্র পড়িয়া বিষ প্রস্তুত করিতে লাগিল ।

“না, এখনো হয় নাই ! আর এই টুকুতে কিইবা হইবে । এই টুকুতেই হয় বটে,—না হয় একটু বেশী করিয়াই দিইনা কেন । তাহার হাত, পা, মাথা, তাহার সর্ব্বাঙ্গ এলাইয়া পড়িবে; তাহার চোখ উল্টাইয়া পড়িবে, তখন দেখিব, রূপ-সীর চোখ দুটি দেখিতে কেমন হয় ! তাহার মুখে যখন কালী পড়িবে, তখন দেখিব তাহার মুখখানি কেমন মানায় ! হাতদুটি যখন শক্ত কাঠ হইয়া যাইবে, তখন দেখিব, মৃণাল বাহু দিয়া সোহাগিনী কেমন করিয়া তাহার প্রাণনাথের গলা বেড়িয়া ধরে ! মরিবার সময় সে আর সোহাগে মরিবে না ! মুখটা যখন নীল হিম হইয়া আসিবে, তখন সে মুখ আর কেহ বুকের কাছে রাখিবে না !”

এইরূপ ভাবিতে থাকে আর দ্বিগুণ বলে শিকড় পিষিতে থাকে । সারারাত পিষিয়া তবু হাত ব্যথা হয় না । সেই নিস্তরু গভীর রাত্রে, নির্জন নগরপ্রান্তে, প্রচ্ছন্ন কুটারমধ্যে হামানদিস্তার শব্দ উঠিতে লাগিল, সেই শব্দই তাহার এক যাত্র সঙ্গী হইল, সেই অবিশ্রাম একঘেয়ে শব্দ তাহার নর্ভন শীল উৎসাহের তালে তালে করতালি দিতে লাগিল, তাহার উৎসাহ দ্বিগুণ নাচিতে লাগিল, তাহার চোখে আর ঘুম রহিল না ।

ঔষধ প্রস্তুত করিতে পাঁচদিন লাগিল । বিষ প্রস্তুত করিতে পাঁচদিন লাগিবার আবশ্যক করে না । কিন্তু সুরমা মরিবার সময় বাহাতে যুবরাজের মনে দয়া না হয়, এই উদ্দেশে মন্ত্র পড়িতে ও অন্নষ্ঠান করিতে অনেক সময় লাগিল ।

প্রতাপাদিত্যের মত লইয়া মহিষী সুরমাকে আরো কিছু দিন রাজবাটিতে থাকিতে দিলেন । সুরমা চলিয়া যাইবে, বিভা চারিদিকে অকূল পাথার দেখিতেছে । এ কয় দিন সে অনবরত সুরমার কাছে বসিয়া আছে । একটি মলিন ছায়ার মত সে চূপ করিয়া সুরমার সঙ্গে সঙ্গে ফেরে । এক একটা দিন যায়, সন্ধ্যা আইসে, বিভা ততই যেন ঘনিষ্ঠতর ভাবে সুরমাকে আলিঙ্গন করিয়া ধরিয়া রাখিতে চায় । দিন গুলিকে কে যেন তাহার প্রাণপণ আকর্ষণ হইতে টানিয়া ছিড়িয়া লইয়া যাইতেছে । বিভার চারিদিকে

অন্ধকার। সুরমার চক্ষেও সমস্তই শূন্য। তাহার আর উত্তর দক্ষিণ পূর্ব পশ্চিম নাই, সংসারের দিগ্বিদিক সমস্ত মিশাইয়া গেছে। সে উদয়াদিত্যের পায়ের কাছে পড়িয়া থাকে, কোলের উপর শুইয়া থাকে, তাঁহার মুখের পানে চুপ করিয়া চাহিয়া থাকে, আর কিছু করে না। বিভাকে বলে, “বিভা, তোর কাছে আমার সমস্ত রাখিয়া গেলেম” বলিয়া দুই হাতে মুখ আচ্ছাদন করিয়া কাঁদিয়া ফেলে।

অপরাত্ন হইয়া আসিয়াছে; কাল প্রত্যুষে সুরমার বিদায়ের দিন। তাহার গার্হস্থ্যের বাহা কিছু সমস্ত একে একে বিভার হাতে সমর্পণ করিল। উদয়াদিত্য প্রশান্ত ও দৃঢ়প্রতিজ্ঞ ভাবে বসিয়া আছেন। তিনি স্থির করিয়াছেন, হয় সুরমাকে রাজপুরীতে রাখিবেন, নয় তিনিও চলিয়া যাইবেন। যখন সন্ধ্যা হইল, তখন সুরমা আর দাঁড়াইতে পারিল না, তাহার পা কাঁপিতে লাগিল মাথা ঘুবিতে লাগিল। সে শয়নগৃহে গিয়া শুইয়া পড়িল। কহিল, “বিভা, বিভা, শীঘ্র একবার তাঁহাকে ডাক্, আর বলিব নাই!”

উদয়াদিত্য দ্বারের কাছে আসিতেই সুরমা বলিয়া উঠিল, “এস, এস, আমার প্রাণ কেমন করিতেছে!” বলিয়া দুই বাহু বাড়াইয়া দিল। উদয়াদিত্য কাছে আসিতেই তাঁহার পা ছুটি জড়াইয়া ধরিল। উদয়াদিত্য বসিলেন, তখন সুরমা বহু কষ্টে নিঃশ্বাস লইতেছে, তাহার হাত পা

শীতল হইয়া আসিয়াছে । উদয়াদিত্য ভীত হইয়া ডাকিলেন, “সুরমা ।” সুরমা অতি ধীরে মাথা তুলিয়া উদয়াদিত্যের মুখের পানে চাহিয়া কহিল, “কি নাথ !” উদয়াদিত্য ব্যাকুল হইয়া কহিলেন, “কি হইয়াছে সুরমা !” সুরমা কহিল, “বোধ করি আমার সময় হইয়া আসিয়াছে, ” বলিয়া উদয়াদিত্যের কণ্ঠ আলিঙ্গন করিবার জন্ত হাত উঠাইতে চাহিল, মাথা উঠিল না ! কেবল মুণের দিকে সে চাহিয়া রহিল । উদয়াদিত্য ছই হাতে সুরমার মুখ তুলিয়া ধরিয়া কহিলেন, “সুরমা, সুরমা, তুমি কোথায় যাইবে সুরমা ! আমার আর কে রহিল ?” সুরমার ছই চোখ দিয়া জল পড়িতে লাগিল । সে কেবল বিভার মুখের দিকে চাহিল । বিভা তখন হতচেতন হইয়া বোধশূন্য নয়নে সুরমার দিকে চাহিয়া আছে । যেখানে প্রতি সন্ধ্যায় সুরমা ও উদয়াদিত্য বসিয়া থাকিতেন, সমুখে সেই বাতায়ন উন্মুক্ত । আকাশের তারা দেখা যাইতেছে, ধীরে ধীরে বাতাস বহিতেছে, চারিদিক স্তব্ধ । ঘরে প্রদীপ জ্বলাইয়া গেল । রাজবাটিতে পূজার শাঁক ঘণ্টা বাজিয়া ক্রমে থামিয়া গেল । সুরমা উদয়াদিত্যকে মৃদুস্বরে কহিল, “একটা কথা কও, আমি চোখে ভাল দেখিতে পাইতেছি না !”

ক্রমে রাজবাড়িতে রাষ্ট্র হইল যে, সুরমা নিজ হস্তে বিশ্ব খাইয়া মরিতেছে । রাজমহিষী ছুটিয়া আসিলেন, সন্ধ্যা ছুটিয়া আসিল ! সুরমার মুখ দেখিয়া মহিষী কাদিয়া

উঠিয়া কহিলেন, “সুরমা, মা আমার, তুই এইখানেই থাক, তোকে কোথাও যাইতে হইবে না। তুই আমাদের ঘরের লক্ষ্মী, তোকে কে যাইতে বলে ?” সুরমা শাওড়ির পায়ের ধূলা মাথায় তুলিয়া লইল। মহিষী দ্বিগুণ কাঁদিয়া উঠিয়া কহিলেন, “মা, তুই কি রাগ করিয়া গেলি রে ?” তখন সুরমার কণ্ঠরোধ হইয়াছে, কি কথা বলিতে গেল, বাহির হইল না। রাত্রি যখন চারি দণ্ড আছে, তখন চিকিৎসক কহিলেন “শেব হইয়া গেছে !” “নাদা, কি হইল গো” বলিয়া বিভা সুরমার বুকের উপরে পড়িয়া সুরমাকে জড়াইয়া ধরিল। প্রভাত হইয়া গেল, উদয়াদিত্য সুরমার মাথা কোলে রাখিয়া বসিয়া রহিলেন !

বিংশ পরিচ্ছেদ ।

সুরমা কি আর নাই? বিভার কিছুতেই তাহা মনে হয় না কেন? যেন সুরমার দেখা পাইবে, যেন সুরমা ঐদিকে কোথায় আছে! বিভা ঘরে ঘরে ঘুরিয়া বেড়ায়, তাহার প্রাণ যেন সুরমাকে খুঁজিয়া বেড়াইতেছে। সে চুল বাঁধিবার সময় চুপ করিয়া বসিয়া থাকে, যেন, এখনি সুরমা আসিবে, তাহার চুল বাঁধিয়া দিবে, তাহারি জন্য অপেক্ষা করিতেছে। না রে না, সন্ধ্যা হইয়া আসিল, রাত্রি হইয়া আইসে, সুরমা বুঝি আর আসিল না, চুল বাঁধা আর হইল না। আজ বিভার মুখ এত মলিন হইয়া গিয়াছে, আজ বিভা এত কাঁদিতেছে, তবু কেন সুরমা আসিল না, সুরমা ত কখন এমন করে না! বিভার মুখ একটু মলিন হইলেই অমনি সুরমা তাহার কাছে আইসে, তাহার গলা ধরে, প্রাণ জুড়াইয়া তাহার মুখের পানে চাহিয়া থাকে, আর আজ—ওরে, আজ বুক ফাটিয়া গেলেও সে আসিবে না।

উদয়াদিত্যের অর্ধেক বল, অর্ধেক প্রাণ চলিয়া গিয়াছে। প্রত্যেক কাজে যে তাঁহার আশা ছিল, উৎসাহ ছিল; যাহার মন্ত্রণা তাঁহার একমাত্র সহায় ছিল, যাহার হাসি তাঁহার একমাত্র পুরস্কার ছিল—সেই চলিয়া গেল!

তিনি তাঁহার শয়ন-গৃহে যাইতেন, যেন কি ভাবিতেন, এক-বার চারিদিক দেখিতেন, দেখিতেন,—কেহ নাই!—ধীরে ধীরে সেই বাতায়নে আসিয়া বসিতেন; যেখানে সুরমা বসিত, সেই খানটি শূন্য রাখিয়া দিতেন—আকাশে সেই জ্যোৎস্না, স্রুগ্ধে সেই কানন, তেমনি করিয়া বাতাস বহিতেছে—মনে করিতেন, এমন সম্ভাষ্য সুরমা কি না আসিয়া থাকিতে পারিবে? সহসা তাঁহার মনে হইত, যেন সুরমার মত কার গলার স্বর শুনিতে পাইলাম, চমকিয়া উঠিতেন, যদিও অসম্ভব মনে হইত, তবু একবার চারিদিকে দেখিতেন, একবার বিছানায় যাইতেন, দেখিতেন—কেহ আছে কি না! যে উদয়াদিত্য সমস্ত দিন শত শত ক্ষুদ্র কাজে ব্যস্ত থাকিতেন, দরিদ্র প্রজাণ তাহাদের ক্ষেতের ও বাগানের ফল মূল শাক সবজি উপহার লইয়া তাঁহার কাছে আসিত, তিনি তাহাদের জিজ্ঞাসা পড়া করিতেন, তাহাদের পরামর্শ দিতেন; আজ কাল আর সে সব কিছুই করিতে পারেন না, তবুও সম্ভাষ্যবেলায় শ্রান্ত হইয়া পড়েন—শ্রান্তপদে শয়নালয়ে আইসেন, মনের মধ্যে যেন একটা আশা থাকে, যে, সহসা শয়ন-কক্ষের দ্বার খুলিলেই দেখিতে পাইব—সুরমা সেই বাতায়নে বসিয়া আছে। উদয়াদিত্য যখন দেখিতে পান, বিভা একাকী ম্লান মুখে ঘুরিয়া বেড়াইতেছে, তখন তাঁহার প্রাণ কাঁদিয়া উঠে। বিভাকে কাছে ডাকেন, তাহাকে আঁদর

করেন, তাহাকে কত কি স্নেহের কথা বলেন, অবশেষে দাদার হাত ধরিয়া বিভা কাঁদিয়া উঠে, উদয়াদিভ্যেরও চোখ দিয়া জল পড়িতে থাকে! এক দিন উদয়াদিভ্য বিভাকে ডাকিয়া কহিলেন, “বিভা, এ বাড়িতে আর তোর কে রহিল? তোকে এখন স্বস্তুর বাড়ি পাঠাইবার বন্দোবস্ত করিয়া দিই। কি বলিস্? আমার কাছে লজ্জা করিস্ না বিভা! তুই আর কার কাছে তোর মনের সাধ প্রকাশ করিবি বল্?” বিভা চুপ করিয়া রহিল। কিছু বলিল না। এ কথা কি আর জিজ্ঞাসা করিতে হয়? পিতৃ-ভবনে কি আর তাহার থাকিতে ইচ্ছা করে? পৃথিবীতে যে তাহার একমাত্র জুড়াইবার স্থল আছে, সেইখানে—সেই চন্দ্রদ্বীপে যাইবাব জন্য তাহার প্রাণ অস্থির হইবে না ত কি? কিন্তু তাহাকে লইতে এ পর্য্যন্ত একটিও ত লোক আসিল না! কেন আসিল না?

বিভাকে স্বস্তুর বাড়ি পাঠাইবার প্রস্তাব উদয়াদিভ্য একবার পিতার নিকট উত্থাপন করিলেন। প্রতাপাদিত্য কহিলেন “বিভাকে স্বস্তুরবাড়ি পাঠাইতে আমার কোন আপত্তি নাই। কিন্তু তাহাদের নিকট যদি বিভার কোন আদর থাকিত, তবে তাহারা বিভাকে লইতে নিজে হইতে লোক পাঠাইত! আমাদের অত ব্যস্ত হইবার আবশ্যক দেখি না।”

• রাজমহিষী বিভাকে দেখিয়া কান্নাকাটি করেন। বিভার

সধবাবস্থায় বৈধব্য কি চোখে দেখা যায় ? বিভার করুণ মুখখানি দেখিলে তাঁহার প্রাণে শেল বাজে। তাহা ছাড়া মহিষী তাঁহার জামাতাকে অত্যন্ত ভাল বাসেন, সে একটা কি ছেলেমানুষী করিয়াছে বলিয়া তাহার ফল যে এত দূর পর্য্যন্ত হইবে, ইহা তাঁহার কিছুতেই ভাল লাগে নাই। তিনি মহারাজার কাছে গিয়া মিনতি করিয়া বলিলেন, “মহারাজ, বিভাকে শ্বশুরবাড় পাঠাও !” মহারাজা রাগ করিলেন, কহিলেন “ঐ এক কথা আমি অনেক বার শুনিয়াছি, আর আমাকে বিরক্ত করিও না। যখন তাহার বিভাকে ভিক্ষা চাহিবে, তখন তাহার বিভাকে পাইবে।” মহিষী কহিলেন, “মেয়ে অধিক দিন শ্বশুর বাড়ি না গেলে দশ জনে কি বলিবে ?” প্রতাপাদিত্য কহিলেন “আর—প্রতাপাদিত্য নিজে সাধিয়া যদি মেয়েকে পাঠায় আর রামচন্দ্র রায় যদি তাহাকে দ্বাব হইতে দূর করিয়া দেয়, তাহা হইলেই বা দশ জনে কি বলিবে ?”

মহিষী কাদিতে কাদিতে ভাবিলেন, মহারাজা এক এক সময় কি যে করেন তাহার কোন ঠিকানা থাকে না।

একবিংশ পরিচ্ছেদ ।

মান অপমানের প্রতি রাজা রামচন্দ্র রায়ের অত্যন্ত
স্বল্প দৃষ্টি। রাজা এক দিন চতুর্দোলায় করিয়া রাস্তায়
বাহির হইয়াছিলেন, দুই জন অনভিজ্ঞ তাঁতী তাহাদের
কুটারের সম্মুখে বসিয়া তাঁত বুনিতেছিল, চতুর্দোল দেখিয়া
উঠিয়া দাঁড়ায় নাই, রাজা তাহাই লইয়া হুলস্থূল করিয়া
তুলিয়াছিলেন। একবার যশোহরে তাহার স্বশুর বাড়ির
এক চাকরকে তিনি একটাকি কাজের জন্য আদেশ
করিয়াছিলেন, সে বেচারী এক গুনিতে আর গুনিয়াছিল,
কাজে ভুল করিয়াছিল ; মহামানী রামচন্দ্র রায় তাহা হইতে
সদ্বাস্ত করিয়াছিলেন, যে, স্বশুরবাড়ির ভৃত্যেরা তাঁহাকে
মানে না, তাহার। অবশ্য তাহাদের মনিবদের কাছেই
এইরূপ শিখিয়াছে, নহিলে তাহার। সাহস করিত না।
বিশেষতঃ সেই দিন প্রাতঃকালেই তিনি দেখিয়াছিলেন
বিরাজ উদয়াদিত্য সেই চাকরকে চুপি চুপি কি-একটা
কথা বলিতেছিলেন—অবশ্য তাঁহাকে অপমান করিবার
পরামর্শই চলিতেছিল, নহিলে আর কি হইতে পারে।
একদিন কয়েক জন বালক মাটির চিপির সিংহাসন গড়িয়া,
রাজা, মন্ত্রী ও সভাসদ সাজিয়া রাজসভার অলঙ্কারে খেলা
করিতেছিল, রাজার কানে যায়, তিনি তাহাদের পিতাদের
ডাকিয়া বিলক্ষণ শাসন করিয়া দেন।

আজ মহারাজা গদীর উপরে ভাকিয়া ঠেসান দিয়া শুড়গুড়ি টানিতেছেন। সম্মুখে এক ভীকু দরিদ্র অপরাধী খাড়া রহিয়াছে, তাহার বিচার চলিতেছে। সে ব্যক্তি কোন সূত্রে প্রতাপাদিত্য ও রামচন্দ্র রায় সংক্রান্ত ঘটনা শুনিতে পায়, ও তাহাই লইয়া আপনা-আপনির মধ্যে আলোচনা করে, তাহাই শুনিয়া তাহার শত্রুপক্ষের এক জন সে কথাটা রাজার কানে উত্থাপন করে। রাজা মহা খাপা হইয়া তাহাকে তলব করেন। তাহাকে ফাঁসিই দেন কি নির্বাসনই দেন, এমনি একটা কাণ্ড বাধিয়া গেছে।

রাজা বলিতেছেন, “বেটা, তোর এত বড় যোগ্যতা !”

সে কাঁদিয়া কহিতেছে, “দোহাই মহারাজ, আমি এমন কাজ করি নাই !”

মন্ত্রী কহিতেছেন, “বেটা, প্রতাপাদিত্যের শত্রে আর আমাদের মহারাজের তুলনা।”

দেওয়ান কহিতেছেন, “বেটা, জানিস্ না, যখন প্রতাপাদিত্যের বাপ প্রথম রাজা হয়, তখন তাহাকে রাজটীকা পরাইবার জন্য সে আমাদের মহারাজার স্বর্গীয় পিতামহের কাছে আবেদন করে। অনেক কাঁদাকাটা করিতে ভিঁয়ি তাঁহার বাঁ পায়ের ক’ড়ে আঙুল দিয়া তাহাকে টীকা পরাইয়া দেন।”

রমাই ভাড়া কহিতেছে, “বিক্রমাদিত্যের ছেলে প্রতী

পাদিতা, উহারা ত তুই পুরুষে রাজা ! প্রতাপাদিত্যের পিতামহ ছিল কেঁচো, কেঁচোর পুত্র হইল জ্যৈষ্ঠ, বেটা প্রজার রক্ত খাইয়া খাইয়া বিষম ফুলিয়া উঠিল, সেই জ্যৈষ্ঠের পুত্র আজ মাথা খুঁড়িয়া খুঁড়িয়া মাথাটা কুলোপানা করিয়া তুলিয়াছে ও সাপের মত চক্র ধরিতে শিখিয়াছে । আমবা পুরুষ-ভুক্তমে বাঙ্গলভায় ভাঁড়বুত্তি করিয়া আসিতেছি, আমবা বেদে, আমরা জাতসাপ চিনি না ?” রাজা বিষম সন্তুষ্ট হইয়া সহাস্য বদনে গুড়গুড়ি টানিতে লাগিলেন । আজ কাল প্রতাপ সভায় প্রতাপাদিত্যের উপর একবার করিয়া আক্রমণ হয় । প্রতাপাদিত্যের পৃষ্ঠ লক্ষ্য পূৰ্ব্বক শঙ্কভেদী বচন-বাণ বর্ষণ করিয়া সেনানীদের তুণ নিঃশর হইলে পর সভা ভঙ্গ হয় । যাহা হউক, আজিকার বিচারে অপরাধী অনেক কাঁদাকাটি করাতে দোৰ্দণ্ড-প্রতাপ রামচন্দ্র রায় কহিলেন—“আচ্ছা যা—এ যাত্রা বাঁচিয়া গেলি, ভবিষ্যতে সাবধান থাকিস্ !”

অন্তান্ত সভাসদ চলিয়া গেল, কেবল মন্ত্রী ও রমাই ভাঁড় রাজার কাছে রহিল । প্রতাপাদিত্যের কথাই চলিতে লাগিল ।

রমাই কহিল, “আপনি ত চলিয়া আইলেন, এদিকে স্বরাজ বাবাজি বিষম গোলে পড়িলেন । রাজার অভি-প্রায় ছিল, কত্যাটি বিধবা হইলে হাতের লোহা ও বালা হুগাছি বিক্রয় করিয়া রাজকোষে কিঞ্চিৎ অর্থাগম হয় ।

সুবরাজ তাহাতে ব্যাঘাত করিলেন। তাহা লইয়া তদ্বী
কৃত।”

রাজা হাসিতে লাগিলেন, কহিলেন “বটে।”

মন্ত্রী কহিলেন, “মহারাজ, শুণিতে পাই, প্রতাপাদিত্য
আজকাল আপ্শোষে সারা হইতেছেন। এখন কি উপায়ে
মেয়েকে শস্ত্র বাড়ি পাঠাইবেন, তাহাই ভাবিয়া তাঁহার
আহার নিদ্রা নাই।”

রাজা কহিলেন “সত্য না কি!” বলিয়া হাসিতে লাগি-
লেন, তামাক টানিতে লাগিলেন, বড়ই আনন্দ বোধ হইল।

মন্ত্রী “আমি বলিলাম, আর মেয়েকে শস্ত্র বাড়ি পাঠা-
ইয়া কাজ নাই! তোমাদের ঘরে মহারাজ বিবাহ করিয়া-
ছেন, ইহাতেই তোমাদের সাত পুরুষ উদ্ধার হইয়া গেছে।
তাহার পরে আবার তোমাদের মেয়েকে ঘরে আনিয়া ঘর
নীচু করা, এত পুণ্য এখনো তোমরা কর নাই! কেমন
হে ঠাকুর!”

রমাই কহিল, “তাহার সন্দেহ আছে! মহারাজ, আপনি
যে, পাঁকে পা দিয়াছেন, সে ত পাঁকের বাবার ভাগ্য, কিন্তু
তাই বলিয়া ঘরে ঢুকিবার সময় পা ধুইয়া আসিবেন না ত
কি!”

এই রূপে হাস্য পরিহাস চলিতে লাগিল। প্রতাপাদিত্য
ও উদয়াদিত্যের কাল্পনিক মূর্তি সম্মুখে রাখিয়া তাহা-
দিগকে ক্ষতবিক্ষত করা হইতে লাগিল। উদয়াদিত্যের

যে কি অপরাধ তাহা বুঝিতে পারি না। তিনি যে নিজের বিপদকে অগ্রাহ করিয়া রামচন্দ্র রায়ের প্রাণরক্ষা করিলেন, সে সকল কথা চুলায় গেল, আর, তিনি প্রতাপাদিত্যের সম্ভান হইয়াছেন, এই অপরাধে রামচন্দ্র রায় তাঁহার কথা তুলিয়া অকাতরে হাস্য পরিহাস করিতে লাগিলেন। রামচন্দ্র রায় যে নিষ্ঠুর তাহা নহে, তিনি একজন লঘু-হৃদয়, সন্ধর্ষণ-প্রাণ লোক। উদয়াদিত্য যে তাঁহা প্রাণ রক্ষা করিয়াছেন, তজ্জন্ত তিনি কৃতজ্ঞ নহেন। তিনি মনে কবেন, ইহাত হইবেই, ইহা না হওয়াই অন্যায়। রামচন্দ্র রায় বিপদে পড়িলে তাঁহাকে সকলে মিলিয়া বাঁচাইবে না ত কি! তাঁহার মনে হয়, রামচন্দ্র রায়ের পায়ে কাঁটা ফুটিলে সমস্ত জগৎসংসারের প্রাণে বেদনা লাগে। তিনি মনে করিতে পারেন না, যে, পৃথিবীর একজন অতি ক্ষুদ্রতম লোকেরও নিজের বিপদের কাছে মহারাজাধিরাজ রামচন্দ্র রায় কিছুই নহে। দিব্য-রাত্রি শত শত স্ততিবাদকের দাঁড়িপাল্লায় একদিকে জগৎকে ও একদিকে নিজেকে চড়াইয়া তিনি নিজেকেই ওজনে ভারী বলিয়া স্থির করিয়া রাখিয়াছেন, এই জন্য সহজে আর কাহারো উপরে তাঁর কৃতজ্ঞতার উদয় হয় না। তাহা ছাড়া উদয়াদিত্যের প্রতি কৃতজ্ঞতা উদয় না হইবার আর এক কারণ এই যে, তিনি মনে করেন উদয়াদিত্য নিজের জগিনীর জন্যই তাঁহাকে বাঁচাইয়াছেন, তাঁহার প্রাণ

রক্ষাই উদয়াদিত্যের উদ্দেশ্য ছিল না। তাহা ছাড়া, যদি বা রামচন্দ্রের হৃদয়ে কৃতজ্ঞতার সঞ্চার হইত, তবুও তিনি উদয়াদিত্যকে লইয়া হাস্য পরিহাসে ক্রটি করিতেন না। কারণ সেখানে দশজনে মিলিয়া একজনকে লইয়া হাসিতামাসা করিতেছে, বিশেষতঃ রমাই ভাঁড় যাহাকে লইয়া বিক্রম করিতেছে, সেখানে তিনি তাহাদের মুখ বন্ধ করেন বা তাহাদের সহিত যোগ না দেন, এমন তাঁহার মনের জোর নাই। তাঁহার মনে হয়, তাহা হইলে সকলে কি মনে করিবে।

এখনো বিভার প্রেতি রামচন্দ্র রায়ের আসক্তির মত একটা ভাব আছে। বিভা স্নানরী, বিভা সবে মাত্র ঘোবনে পদার্পণ করিয়াছে, রামচন্দ্র রায়ের সহিত বিভার অতি অল্প দিনই সাক্ষাৎ হইয়াছে। প্রতাপাদিত্যের প্রেতি অবহেলা প্রদর্শন করিয়াছেন—কিন্তু যখন সেই রাত্রে প্রথম নিদ্রা ভাঙ্গিয়া সহসা তিনি দেখিলেন, বিভা শয্যায় বসিয়া কাঁদিতেছে, তাহার মুখে জ্যোৎস্না পড়িয়াছে, তাহার অর্ধ-অনারৃত বন্ধ কাঁপিয়া কাঁপিয়া উঠিতেছে, তাহার মধুর করুণ দুটি চক্ষু বহিয়া জল পড়িতেছে, তাহার ক্ষুদ্র দুটি অধর কচি কিশলয়ের মত কাঁপিতেছে, যখন তাঁহার মনে সহসা একটা কি উচ্ছ্বাস হইল, বিভার মাথা কোলে রাখিলেন, বিভার চোখের জল মুছাইয়া দিলেন, বিভার করুণ অধর চুষন করিবার জন্যে হৃদয়ে একটা আবেগ উপস্থিত

হইল, তখনই প্রথম তাঁহার শরীরে মুহূর্তের জন্য বিজ্ঞান
সম্ভার হইল, তখনই প্রথম তিনি বিভার নব-বিকশিত
যৌবনের লাবণ্যরাশি দেখিতে পাইলেন, সেই প্রথম
তাঁহার নিঃশ্বাস বেগে বহিল, অর্দ্ধ-নিম্নীলিত নেত্র-পল্লবে
জলের রেখা দেখা দিল, হৃদয় বেগে উঠিতে পড়িতে
লাগিল। বিভাকে চুপন করিতে গেলেন। এমন সময়ে
দ্বারে আঘাত পড়িল, এমন সময়ে বিপদের সংবাদ শুনিতে
পাইলেন। সেই যে হৃদয়ের প্রথম বিকাশ, সেই যে
বাসনার প্রথম উচ্ছ্বাস, সেই যে নয়নের মোহ দৃষ্টি, তাহা
পরিতৃপ্ত হইল না বলিয়া তাহার। তৃষা কাতর হইয়া
রামচন্দ্র রায়ের স্থিতি অধিকার করিয়া রহিল। ইহা স্থায়ী
প্রেমের ভাব নহে, কারণ রামচন্দ্র রায়ের লসু হৃদয়ের
পক্ষে তাহা সম্ভব নহে। ইহা যৌবনের মোহ, ইহা
একটা অচিরস্থায়ী আশুতৃপ্ত মনোবিকার। একটা বিলাস-
দ্রব্যের প্রতি সৌখীন হৃদয়ের যেমন সহসা একটা টান
পড়ে, সৌখীন রামচন্দ্র রায়েরও বিভার প্রতি সেইরূপ
একটা ভাব জন্মিয়াছিল। বাহা হউক, যে কারণেই হউক,
রামচন্দ্র রায়ের যৌবন-স্বপ্নে বিভা জাগিতেছিল। বিভাকে
পাইবার জন্য তাঁহার একটা অভিনায উদয় হইয়াছিল।
কিন্তু যদি বিভাকে আনিতে পাঠান, তাহা হইলে সকলে কি
মনে করিবে! সভাসদেরা যে তাঁহাকে জৈরণ মনে করিবে,
নবী যে মনে মনে অসন্তুষ্ট হইবে, রমাই ভাঁড় যে মনে মনে

হাসিবে। তাহা ছাড়া, প্রতাপাদিত্যের তাহা হইলে কি শাস্তি হইল? স্বপ্নের উপর প্রতিহিংসা তোলা হইল কৈ? এইরূপ সাত পাঁচ ভাবিয়া বিভাকে আনিতে পাঠাইতে তাঁহার ভরসা হয় না, প্রবৃত্তি হয় না। এমন কি বিভাকে লইয়া হাস্য পরিহাস চলিতে থাকে, তাহাতে বাধা দিতে তাঁহার স হস হয় না, এবং প্রতাপাদিত্যের কথা মনে করিয়া তাহাতে বাধা দিতে তাঁহার ইচ্ছাও হয় না।

রমাই ভাঁড় ও মন্ত্রী চলিয়া গেলে রামমোহন মাল আসিয়া ঘোড়হাতে কহিল “মহারাজ!”

রাজা ক’হলেন, “কি রামমোহন!”

রামমোহন, “মহারাজ, আজ্ঞা দিন, আমি মাঠাকুরাণীকে আনিতে যাই।”

রাজা কহিলেন, “সে কি কথা!”

রামমোহন কহিল, “আজ্ঞা হাঁ। অন্তঃপুর গৃহ হইয়া আছে, আমি তাহা দেখিতে পারি না। অন্তঃপুরে যাই মহারাজার ঘরে কাঁহাকেও দেখিতে পাই না, আমার যেন প্রাণ কেমন করিতে থাকে। আমার মা লক্ষ্মী গৃহে আসিয়া গৃহ উজ্জল করুন, আমরা দেখিয়া চক্ষু সার্থক করি।”

রাজা কহিলেন “রামমোহন, তুমি পাগল হইয়াছ? সে মেয়েকে আমি ঘরে আনি?”

রামমোহন নেত্র বিস্ফারিত করিয়া কহিল, “কেন মহারাজ, আমার মাঠাকুরাণী কি অপরাধ করিয়াছেন?”

রাজা কহিলেন, “বল কি রামমোহন ? প্রতাপাদিত্যের মেয়েকে আমি ঘরে আনিব ?”

রামমোহন কহিল, “কেন আনিবেন না ? প্রতাপাদিত্যের সহিত তাঁহার সম্পর্ক কিসের ? যত দিন বিবাহ না হয় তত দিন মেয়ে বাপের ; বিবাহ হইলে পর আর তাহাতে বাপের অধিকার থাকে না। এখন আপনার মহিষী আপনার—আপনি যদি তাঁহাকে ঘরে না আনেন আপনি যদি তাঁহাকে সমাদর না করেন, তবে আর কে করিবে ?”

রাজা কহিলেন, “প্রতাপাদিত্যের মেয়েকে যে আমি বিবাহ করিয়াছি, ইহাই যথেষ্ট হইয়াছে, আবার তাহাকে ঘরে আনিব ? তাহা হইলে মান রক্ষা হইবে কি করিয়া ?”

রামমোহন কহিল, “মান রক্ষা ? আপনার নিজের মহিষীকে আপনি পরের ঘরে ফেলিয়া রাখিয়াছেন, তাঁহার উপর আপনার কোন অধিকার নাই, তাঁহার উপর অন্য লোকে যাহা ইচ্ছা প্রভুত্ব করিতে পারে, ইহাতেই কি আপনার মান রক্ষা হইতেছে ?”

রাজা কহিলেন, “যদি প্রতাপাদিত্য মেয়েকে না দেয় ?”

রামমোহন বিশাল বক্ষ ফুলাইয়া কহিল, “কি বলিলেন মহারাজ ? যদি না দেয় ? এতবড় সাধ্য কাহার যে দিবে না ? আমার মা জননী, আশাদের ঘরের মালস্বী, কীর সাধ্য তাঁহাকে আমাদের কাছ হইতে রাখিতে পারে ?

বত বড় প্রতাপাদিত্যই হউন না কেন, তাঁহার হাত হইতে কাড়িয়া লইব। এই বলিয়া গেলেম। তুমি কে মহারাজ? তুমি আদেশ না দিলেই বা আমি গুনিব কেন? আমার মাকে আমি আনিব, তুমি বারণ করিবার কে?” বলিয়া রামমোহন প্রস্থানের উপক্রম করিল।

রাজা ভাড়াভাড়ি কহিলেন—“রামমোহন, যেওনা, শোন শোন। আচ্ছা তুমি মহিষীকে আনিতে যাও তাহাতে কোন আপত্তি নাই, কিন্তু—দেখ—এ কথা যেন কেহ গুনিতে না পায়! রমাই কিম্বা মন্ত্রী কানে যেন একথা না উঠে!”

রামমোহন কহিল, “যে আজ্ঞা মহারাজ!” বলিয়া চলিয়া গেল।

যদিও মহিষী রাজপুরে আসিলেই সকলে জ্ঞানিতে পারিবে, তথাপি সে অনেক বিলম্ব আছে, তাহার জন্য প্রস্তুত হইবার সময় আছে, আপাততঃ উপস্থিত লজ্জাব হাত এড়াইতে পারিলেই রামচন্দ্র রায় বাঁচেন।

দ্বাবিংশ-পরিচ্ছেদ ।

উদয়াদিত্য কিসে সুখে থাকেন, দিনরাত বিভার সেই একমাত্র চেষ্টা। নিজের হাতে সে তাঁহার সমস্ত কাজ করে। সে নিজে তাঁহার খাবার আনিয়া দেয়, আহারের সময় সমুখে বসিয়া থাকে, সামান্য বিষয়েও ক্রটি হইতে দেয় না। যখন সন্ধ্যার সময় উদয়াদিত্য তাঁহার ঘরে আসিয়া বসেন, দুই হাতে চক্ষু আচ্ছাদন করিয়া চুপ করিয়া বসিয়া থাকেন—বুঝি চোখ দিয়া জল পড়িতে থাকে, তখন বিভা আস্তে আস্তে তাঁহার পায়ের কাছে আসিয়া বসে—কথা উত্থাপন করিতে চেষ্টা করে, কিছুই কথা যোগায় না। দুই জনে স্তব্ধ, কাহারো মুখে কথা নাই, মলিন দাঁপের আলো মাঝে মাঝে কাঁপিয়া কাঁপিয়া উঠিতেছে, সেই সঙ্কে সঙ্কে দেয়ালের উপরে একটা আঁধা-বের ছায়া কাঁপিতেছে, বিভা অনেক ক্ষণ ধরিয়া চুপ করিয়া সেই ছায়ার দিকে চাহিয়া চাহিয়া বুক ফাটিয়া নিঃশ্বাস ফেলিয়া কানিয়া উঠে, “দাদা সে কোথায় গেল?” উদয়াদিত্য চমকিয়া উঠেন, চক্ষুর আচ্ছাদন অপসারণ করিয়া বিভার মুখের দিকে চাহিয়া থাকেন, যেন বিভা কি বলিল ভাল বুঝিতে পারেন নাই, যেন তাহাই বুঝিতে চেষ্টা করিতেছেন, সহসা চৈতন্য হয়, তাড়াতাড়ি চোখের

জল মুছিয়া বিভার কাছে আসিয়া বলেন, “আয়, বিভা একটা গল্প বলি শোন।”

বর্ষার দিন,—খুব মেঘ করিয়াছে ; সমস্ত দিন ঝুপ্ ঝুপ্ করিয়া বৃষ্টি হইতেছে। দিনটা আঁধার করিয়া রহিয়াছে, বাগানের গাছপালাগুলি স্থির ভাবে দাঁড়াইয়া ভিজিতেছে। এক একবার বাতাস দিতেছে ও ঘরের মধ্যে বৃষ্টির ছাঁট আসিতেছে। উদয়াদিত্য চুপ করিয়া বসিয়া আছেন। আকাশে মেঘ ডাকিতেছে, দিগন্তে বিদ্যুৎ হানিতেছে। বৃষ্টির অবিশ্রাম শব্দ কেবল যেন বলিতেছে, “স্বরমা নাই—সে নাই।” মাঝে মাঝে আর্দ্র বাতাস হহ করিয়া আসিয়া যেন বলিয়া যায়, “স্বরমা কোথায় !” বিভা ধীরে ধীরে উদয়াদিত্যের কাছে আসিয়া কহে—“দাদা !” দাদা আর উত্তর দিতে পাবেন না, বিভাকে দেখিয়াই তিনি মুখ চাকিয়া বাতায়নের উপরে মাথা রাখিয়া পড়েন, মাথা উপরে বৃষ্টি পড়িতে থাকে। এমনি করিয়া দিন চলিয়া যায়, সন্ধ্যা হইয়া আসে, রাত্রি হইতে থাকে। বিভা উদয়াদিত্যের আহ্বারের আয়োজন করিয়া আবার আসিয়া বলে, “দাদা, খাবার আসিয়াছে, খাও’সে !” উদয়াদিত্য কোন উত্তর করেন না। রাত্রি অধিক হইতে লাগিল। বিভা কাদিয়া কহে, “দাদা, উঠ, রাত হইল।” উদয়াদিত্য মুখ তুলিয়া দেখেন বিভা কাদিতেছে ; জাড়া জাড়া উঠিয়া বিভার চোখ মুছাইয়া খাইতে যান। ভাল করিয়া খান।

না। বিভা ভাই দেখিয়া নিঃশ্বাস ফেলিয়া শুইতে যায়, সে আর আহার স্পর্শ করে না।

বিভা কথা কহিতে, গল্প করিতে চেষ্টা করে, কিন্তু বিভা অধিক কথা কহিতে পারে না; উদয়াদিত্যকে কি করিয়া যে সুখে রাখিবে ভাবিয়া পায় না। সে কেবল ভাবে, ‘আঁহা যদি দাদা মহাশয় থাকিতেন !

আজ কাল উদয়াদিত্যের মনে কেমন একটা ভয় উপস্থিত হইয়াছে। তিনি প্রতাপাদিত্যকে অত্যন্ত ভয় করেন। আর সে পূর্ব্বেকার সাহস নাই। বিপদকে ভূণ্জান করিয়া অত্যাচারের বিরুদ্ধে প্রাণপণ করিতে এখন আর পারেন না। সকল কাজেই ইতস্তত করেন, সকল বিষয়েই সংশয় উপস্থিত হয়।

একদিন উদয়াদিত্য শুনিলেন, ছাপরার জমিদারের কাছারীতে রাত্রিযোগে লাঠিয়াল পাঠাইয়া কাছারী লুণ্ঠ করিবার ও কাছারী বাড়িতে আগুণ লাগাইয়া দিবার আদেশ হইয়াছে। উদয়াদিত্য তৎক্ষণাৎ তাঁহার অশ্ব প্রস্তুত করিতে কহিয়া অস্ত্রপুবে গেলেন। শয়নগৃহে প্রবেশ করিয়া একবার চারিদিক দেখিলেন। কি ভাবিতে লাগিলেন। ভাবিতে ভাবিতে অন্যমনস্ক হইয়া বেশ পরিবর্তন করিতে লাগিলেন। বাহিবে আসিলেন। ভৃত্য আসিয়া কহিল, “সুবরাজ, অশ্ব প্রস্তুত হইয়াছে। কোণায় যাইতে হইবে?” সুবরাজ কিছুক্ষণ অন্যমনস্ক হইয়া ভৃত্যের মুখের

দিকে চাহিয়া রহিলেন ও অবশেষে কহিলেন, “কোথাও না। তুমি অস্থগইয়া যাও।”

এক দিন এক ক্রন্দনের শব্দ শুনিতে পাইয়া উদয়াদিত্য বাহির হইয়া আসিলেন। দেখিলেন রাজকর্মচারী এক প্রজাকে গাছে বাঁধিয়া মারিতেছে। প্রজা কঁাদিয়া সুবরাজের মুখের দিকে চাহিয়া কহিল, “দোহাই সুবরাজ!” সুবরাজ তাহার যজ্ঞ দেখিতে পারিলেন না, তাড়াতাড়ি ছুটিয়া গৃহের মধ্যে প্রবেশ করিলেন। আগে হইলে ফলাফল বিচার না করিয়া কর্মচারীকে বাধা দিতেন, প্রজাকে রক্ষা করিতে চেষ্টা করিতেন।

ভাগবত ও মীতারাণীর বৃত্তি বন্ধ হইয়া গেছে। তাহা দিগকে প্রকাশ্যে অথবা গোপনে অর্থ সাহায্য করিতে সুবরাজের আর সাহস হয় না। যখন তাহাদের কষ্টের কথা শুনে, তখন মনে করেন “আজই আমি টাকা পাঠাইয়া দেব।” তাহার পরেই ইতস্তত করিতে থাকেন, পাঠান’ আর হয় না।

কেহ যেন মনে না করেন, উদয়াদিত্য প্রাণের ভয়ে এরূপ করিতেছেন। সম্প্রতি জীবনেব প্রতি তাঁহার বে পূর্বাপেক্ষা বিশেষ আসক্তি জন্মিয়াছে, তাহা নহে। তাঁহার মনে একটা অন্ধ ভয় উপস্থিত হইয়াছে। প্রত্যা-
পাদিত্যকে তিনি যেন রহস্যময় কি-একটা মনে করেন! যেন উদয়াদিত্যের অদৃষ্ট, উদয়াদিত্যের ভবিষ্যৎ জীবনের

প্রতিদিন প্রতি মুহূর্তে প্রতাপাদিত্যের মুষ্টির মধ্যে রহিয়াছে। উদয়াদিত্য যখন মৃত্যুকে আলিঙ্গন করিতে যাঠিতেছেন, জীবনের শেষ মুহূর্তে অবস্থান করিতেছেন, তখনো যদি প্রতাপাদিত্য ক্রকৃষ্ণিত করিয়া বাঁচিতে আদেশ করেন, তাহা হইলে যেন তখনো তাঁহাকে মৃত্যুর মুখ হইতে ফিরিয়া আসিতে হইবে।

ত্রয়োবিংশ পরিচ্ছেদ ।

বিধবা কৃষ্ণিণীর (মঙ্গলার) কিঞ্চিৎ নগদ টাকা আছে। সেই টাকা খাটাইয়া শুদ লইয়া সে জীবিকা নির্বাহ করে। রূপ এবং রূপা এই দুয়ের জোরে সে অনেককে বেশে রাখিয়াছে। সীতারাম সৌখীন লোক, অথচ ঘরে এক গয়নার সংস্থান নাই, এই জন্য কৃষ্ণিণীর রূপ ও রূপা উভয়ের প্রতিই তাহার আন্তরিক টান আছে। যে দিন ঘরে হাঁড়ি কাঁদিতেছে, সে দিন সীতারামকে দেখ, দিব্য নিশ্চিন্ত মুখে, হাতে লাঠি লইয়া, পাতলা চাদর উড়াইয়া বুক ফুলাইয়া রাস্তা দিয়া চলিয়াছে, মঙ্গলার বাড়ি যাইবে। পথে যদি কেহ জিজ্ঞাসা করে, “কেমন হে সীতারাম, সংসার কেমন চলিতেছে?” সীতারাম তৎক্ষণাৎ অগ্নানবদনে বঁলে, “বেশ চলিতেছে! কাল আমাদের ওখানে তোমার

নিমজ্ঞ রহিল ! ” নীতারামের বড় বড় কথাগুলো কিছু মাত্র কমে নাই, বরঞ্চ অবস্থা যতই মন্দ হইতেছে, কণার পরিমাণ লম্বা ও চওড়ার দিকে ততই বাড়িতেছে। নীতারামের অবস্থাও বড় মন্দ হইতে চলিল। সম্প্রতি এমন হইয়া দাঁড়াইয়াছে যে, পিসা তাঁহার অনরারি পিসা-বুস্তি পরি-
ত্যাগ করিয়া স্বদেশে ফিরিয়া যাইতে মানস করিতেছেন।

আজ টাকার বিশেষ আবশ্যক হইয়াছে, নীতারাম কৃষ্ণিণীর বাড়িতে আসিয়াছে। হাসিয়া, কাছে ঘেঁসিয়া কহিল,—

“ভিক্ষা যদি দেবে রাই,
(আমার) সোণা রূপায় কাজ নাই,
(আমি) প্রাণের দায়ে এসেছি হে,
মান রতন ভিক্ষা চাই।”

না ভাই, ছড়াটা ঠিক খাটিল না। মান রতনে আমার আপাতত তেমন আবশ্যক নাই, যদি আবশ্যক হয় পরে দেখা যাইবে; আপাততঃ কিঞ্চিৎ সোণা রূপা পাইলে কাজে লাগে।”

কৃষ্ণিণী সহসা বিশেষ অল্পরাগ প্রকাশ করিয়া কহিল,
“তা' তোমার যদি আবশ্যক হইয়া থাকে ত তোমাকে দিব না ত কাহাকে দিব ? ”

নীতারাম তাড়াতাড়ি কহিল “নাঃ—আবশ্যক এমনিই কি ! তবে কি জান ভাই, আমার মার কাছে টাকা থাকে,

আমি নিজের হাতে টাকা রাখি না। আজ সকালে মা দ্বাদ্বাঘাটায় তাঁর জামাইয়ের বাড়ি গিয়াছেন। টাকা বাহির করিয়া দিতে ভুলিয়া গেছেন। তা আমি কালই শোধ করিয়া দিব।”

মঙ্গলা মনে মনে হাসিয়া কহিল, “তোমার অত তাড়া-তাড়ি করিবার আবশ্যক কি? যখন সুবিধা হয় শোধ দিলেই হইবে। তোমার হাতে দিতেছি, এ ত আর জলে ফেলিয়া দিতেছি না।” জলে ফেলিয়া দিলেও বরঞ্চ পাইবার সম্ভাবনা আছে, সীতারামের হাতে দিলে সে সম্ভাবনা টুকুও নাই, এই প্রভেদ।

মঙ্গলার এইরূপ অল্পরাগের লক্ষণ দেখিয়া সীতারামের ভালবাসা একেবারে উথলিত হইয়া উঠিল। সীতারাম রসিকতা করিবার উদ্যোগ করিল। বিনাটাকায় নবাবী করা ও বিনা হাস্যরসে রসিকতা করা সীতারামের স্বভাব-সিদ্ধ। সে যাহা মুখে আসে তাহাই বলে, ও আর কাহারো অপেক্ষা না করিয়া নিজেই হাসিতে থাকে। তাহার হাসি দেখিয়া হাসি পায়। সে যখন রাজবাড়ির প্রহরী ছিল, তখন অন্যান্য প্রহরীদের সহিত সীতারামের প্রায় মাঝে মাঝে দাঙ্গাহাঙ্গামা বাধিবার উদ্যোগ হইত, তাহার প্রধান কারণ, সীতারাম যাহাকে মজা মনে করিত, আর সকলে তাহাকে মজা মনে করিত না। হুন্মানপ্রসাদ তেওয়ারি পাহারা দিতে দিতে ঢুলিতেছিল, সীতারাম

আন্তে আন্তে তাহার পশ্চাতে গিয়া হঠাৎ পিঠে এমন এক কিল মারিল যে, সেই হাড়ভাঙ্গা রসিকতার জ্বালায় তাহার পিঠ ও পিত্ত এক সঙ্গে জলিয়া উঠিল । সীতারাম উচ্চৈঃস্বরে হাসিতে লাগিল, কিন্তু হনুমানপ্রসাদ সে হাসিতে যোগ না দিয়া, কিলের সহিত হাস্যরসের প্রভেদ ও কল্পনাসের সম্বন্ধ উদাহরণ দ্বারা সীতারামকে অতিশয় স্পষ্ট করিয়া বুঝাইয়া দিয়াছিল । সীতারামের রসিকতার এমন আরো শত শত গল্প এইখানে উদ্ধৃত করা যাইতে পারে । আজ কাল সকল বিষয়েই একটা-না একটা তত্ত্ব বা নীতি বাহির হইতেছে, ছুঁড়াগ্য সীতারামের গল্প হইতে এই তত্ত্ব, এই নীতি পাওয়া যায় যে ভাল মনে করিয়া কাজ করিলেই হইল না, ভাল কাজ করা আবশ্যিক ।

পূর্বেই বলা হইয়াছে, সীতারামের অনুরাগ সহসা উৎপলিত হইয়া উঠিল, সে রুক্ষিণীর কাছে ঘেসিয়া প্রীতিভঞ্জন করিল “তুমি আমার স্নেহদ্রা, আমি তোমার জগন্নাথ ।”

রুক্ষিণী কহিল “মর্ মিঙ্গে । স্নেহদ্রা যে জগন্নাথের বোন !”

সীতারাম কহিল, “তাহা কেমন করিয়া হইবে ? তাহা হইলে স্নেহদ্রাহরণ হইল কি করিয়া !”

রুক্ষিণী হাসিতে লাগিল, সীতারাম বুক ফুলাইয়া কহিল, “না, তা হইবে না, হাসিলে হইবে না, জবাব দাও ! স্নেহদ্রা যদি বোনই হইল, তবে স্নেহদ্রা হরণ হইল কি করিয়া !”

সীতারামের বিশ্বাস যে, সে এমন প্রবল শক্তি প্রয়োগ করিয়াছে যে, ইহার উপরে আর কথা কহিবার যো নাই !

রুক্মিণী অতি মিষ্টস্বরে কহিল, “দূর মূৰ্খ ! ”

সীতারাম গলিয়া গিয়া কহিল, “মূৰ্খই ত বটে ! তোমার কাছে আমি ত ভাই হারিয়াই আছি, তোমার কাছে আমি চিরকাল মূৰ্খ !” সীতারাম মনে মনে ভাবিল, খুব জবাব দিয়াছি, বেশ কথা যোগাইয়াছে !

আবার কহিল, “আচ্ছা ভাই, কথাটা যদি তোমার পছন্দ না হইল, কি বলিয়া ডাকিলে তুমি খুসী হইবে, আমাকে বল !”

রুক্মিণী হাসিয়া কহিল, “বল, প্রাণ !”

সীতারাম কহিল “প্রাণ !”

রুক্মিণী কহিল “বল, প্রিয়ে !”

সীতারাম কহিল “প্রিয়ে !”

রুক্মিণী কহিল “বল প্রিয়তমে !”

সীতারাম কহিল “প্রিয়তমে !”

রুক্মিণী কহিল “বল প্রাণপ্রিয়ে !”

সীতারাম কহিল “প্রাণপ্রিয়ে !”

“আচ্ছা ভাই, প্রাণ-প্রিয়ে, তুমি যে টাকাটা দিলে, তাহার শুদ কত লইবে ?”

রুক্মিণী রাগ করিল, মুখ বাঁকাইয়া কহিল, “যাও যাও,

এই বুঝি তোমার ভালবাসা! শুদের কথা কোন্ মুখে
জিজ্ঞাসা করিলে?”

সীতারাম আনন্দে উচ্ছ্বসিত হইয়া কহিল, “না না,
সে কি হয়? আমি কি ভাই সত্য বলিতেছিলাম? আমি
যে ঠাট্টা করিতেছিলাম, এইটে আর বুঝিতে পারিলে না?
ছি, প্রিয়তমে!”

সীতারামের মায়ের কি রোগ হইল জানি না, আজ
কাল প্রায় মাঝে মাঝে সে জামাই বাড়ি যাইতে লাগিল ও
টাকা বাহির করিয়া দিবার বিষয়ে তাহার স্মরণশক্তি
একেবারে বিলুপ্ত হইয়া গেল! কাজেই সীতারামকে প্রায়
মাঝে মাঝে রুক্মিণীর কাছে আসিতে হইত। আজ কাল
দেখা যায় সীতারাম ও রুক্মিণীতে মিলিয়া অতি গোপনে
কি একটা বিষয় লইয়া পরামর্শ চলিতেছে। অনেক দিন
পরামর্শের পর সীতারাম কহিল, “আমার ভাই অত ফন্দি
আসে না। এ বিষয়ে ভাগবতের সাহায্য না লইলে
চলিবে না!”

সেই দিন সন্ধ্যাবেলায় অত্যন্ত বড় হইতেছে। রাজ-
বাড়ির ইতস্তত দুমদাম করিয়া দরজা পড়িতেছে। বাতাস
এমন বেগে বহিতেছে যে, বাগানের বড় বড় গাছের
শাখা হেলিয়া ভূমিস্পর্শ করিতেছে। বন্যার মুখে ভগ্ন
চূর্ণ গ্রামপল্লীর মত, বড়ের মুখে ছিন্নভিন্ন মেঘ ছুটিয়া চলি-
য়াছে। ঘন ঘন বিজ্ঞাৎ, ঘন ঘন গর্জন। উদয়াদিভা

চারি দিকের দ্বার রুদ্ধ করিয়া ছোট একটি মেয়েকে কোলে
 লইয়া বসিয়া আছেন। ঘরের প্রদীপ নিভাইয়া দিয়া-
 ছেন। ঘর অন্ধকার। মেয়েটি কোলের উপর ঘুমাইয়া
 পড়িয়াছে। সুরমা যখন বাঁচিয়াছিল, এই মেয়েটিকে
 অত্যন্ত ভালবাসিত। সুরমার মৃত্যুর পর ইহার মা ইহাকে
 আর রাজবাড়িতে পাঠায় নাই। অনেক দিনের পর সে
 আশ্র একবার রাজবাড়িতে বেড়াইতে আসিয়াছিল।
 সহসা উদয়াদিত্যকে দেখিয়া “কাকা” “কাকা” বলিয়া
 সে তাঁহার কোলের উপরে ঝাঁপাইয়া পড়িয়াছিল। উদ-
 যাদিত্য তাহাকে বুকে চাপিয়া ধরিয়া তাঁহার শয়নগৃহে
 লইয়া আসিয়াছেন। উদয়াদিত্যের মনের ভাব এই যে,
 “সুরমা এই মেয়েটিকে যদি একবার দেখিতে আসে!
 ইহাকে যে সে বড় ভাল বাসিত! এত স্নেহ ছিল, সে কি
 না আসিয়া থাকিতে পারিবে!” মেয়েটি একবার জিজ্ঞাসা
 করিল, “কাকা, কাকি মা কোথায়!” উদয়াদিত্য
 রুদ্ধকণ্ঠে কহিলেন—“একবার তাঁহাকে ডাক না!” মেয়েটি
 “কাকি মা” “কাকি মা” করিয়া ডাকিতে লাগিল। উদ-
 যাদিত্যের মনে হইল, ঐ যেন কে সাড়া দিল! দূর হইতে
 ঐ যেন কে বলিয়া উঠিল “এই যাই রে!” যেন স্নেহের
 মেয়েটির করুণ আহ্বান শুনিয়া স্নেহময়ী আর থাকিতে
 পারিল না, তাহাকে বুকে তুলিয়া লইতে আসিতেছে।
 বালিকা কোলের উপর ঘুমাইয়া পড়িল। উদয়াদিত্য

প্রদীপ নিভাইয়া দিলেন। একটি ঘুমন্ত মেয়েকে কোলে করিয়া অন্ধকার ঘরে একাকী বসিয়া রহিলেন। বাহিরে ছুঁ করিয়া বাতাস বহিতেছে। ইতস্তত খট্ খট্ করিয়া শব্দ হইতেছে। ঐ না পদশব্দ শুনা গেল? পদশব্দই ষটে। বুক এমন দুড়দুড় করিতেছে যে, শব্দ ভাল শুনা যাইতেছে না। দ্বার খুলিয়া গেল, ঘরের মধ্যে দীপালোক প্রবেশ করিল। ইহাও কি কখনো সম্ভব! দীপ হস্তে চুপি চুপি ঘরে একটি স্ত্রীলোক প্রবেশ করিল; উদয়াদিত্য চক্ষু মুদ্রিত করিয়া কহিলেন “স্বরমা কি?” পাছে স্বরমাকে দেখিলেই স্বরমা চলিয়া যায়! পাছে স্বরমা না হয়!

রমণী প্রদীপ রাখিয়া কহিল, “কেন গা, আমাকে কি আর মনে পড়ে না?”

বজ্রধ্বনি শুনিয়া যেন স্বপ্ন ভাঙ্গিল। চমকিয়া উঠিয়া চক্ষু চাহিলেন। মেয়েটি জাগিয়া উঠিয়া কাকা কাকা বলিয়া কাঁদিয়া উঠিল। তাকে বিছানার উপরে ফেলিয়া উদয়াদিত্য উঠিয়া দাঁড়াইলেন। কি করিবেন কোথায় যাইবেন, যেন ভাবিয়া পাইতেছেন না। রুজ্বিণী কাছে আসিয়া মুখ নাড়িয়া কহিল, “বলি, এখন ত মনে পড়িবেই না! তবে এক কালে কেন আশা দিয়া আকাশে তুলিয়া-ছিলে?” উদয়াদিত্য চুপ করিয়া দাঁড়াইয়া রহিলেন, কিছুই বলিতে পারিলেন না।

তখন রুজ্বিণী তাহার ব্রহ্মাজ বাহির করিল। কাঁদিয়া

কহিল, “আমি তোমার কি দোষ করিয়াছি, যাহাতে তোমার চক্ষু-শূল হইলাম। তুমিইত আমার সর্বনাশ করিয়াছ। যে রমণী যুবরাজকে এক দিন দেহপ্রাণ বিকাইয়াছে, সে আজ ভিখারিণীর মত পথে পথে বেড়াইতেছে, এ পোড়াকপালে বিধাতা কি এই লিখিয়াছিল ?”

এইবার উদয়াদিত্যের প্রাণে গিয়া আঘাত লাগিল। সহসা তাঁহার মনে হইল, আমিই বুঝি ইহার সর্বনাশ করিয়াছি। অতীতের কথা ভুলিয়া গেলেন। ভুলিয়া গেলেন, যৌবনের প্রমত্ত অবস্থায় কৃষ্ণিণী কি করিয়া পদে পদে তাঁহাকে প্রলোভন দেখাইয়াছে, প্রতিদিন তাঁহার পথের সম্মুখে জাল পাতিয়া বসিয়াছিল, আবর্তের মত তাঁহাকে তাহার দুই মোহময় বাহু দিয়া বেঁধন করিয়া ঘুরাইয়া ঘুরাইয়া মুহূর্তের মধ্যে পাতালের অন্ধকারে নিক্ষেপ করিয়াছিল—সে সমস্তই ভুলিয়া গেলেন। দেখিলেন কৃষ্ণিণীর বসন মলিন, ছিন্ন, কৃষ্ণিণী কাঁদিতেছে। কৰুণহৃদয় উদয়াদিত্য কহিলেন “তোমার কি চাই ?”

কৃষ্ণিণী কহিল, “আমার আর কিছু চাই না, আমার ভালবাসা চাই। আমি ঐ বাতায়নে বসিয়া তোমার বুকে মুখ রাখিয়া তোমার সোহাগ পাইতে চাই! কেন গা, মরমার চেয়ে কি এ মুখ কালো? যদি কালোই হইয়া থাকে ত সে তোমার জন্যই পথে পথে ভ্রমণ করিয়া! আগেত কালো ছিল না।”

এই বলিয়া রুস্তিগী উদয়াদিত্যের শয্যার উপর বসিতে গেল। উদয়াদিত্য আর থাকিতে পারিলেন না, কাভর হইয়া বলিয়া উঠিলেন “ও বিছানায় বসিও না, বসিও না।”

রুস্তিগী আহত কণিনীর মত মাথা তুলিয়া বলিল “কেন বসিব না?”

উদয়াদিত্য তাহার পথরোধ করিয়া কহিলেন—“না—ও বিছানার কাছে তুমি যাইও না! তুমি কি চাও, আমি এখনি দিতেছি!”

রুস্তিগী কহিল—“আচ্ছা, তোমার আঙ্গুলের ঐ আংটিট দাও!”

উদয়াদিত্য তৎক্ষণাৎ তাহার হাত হইতে আংটি খুলিয়া ফেলিয়া দিলেন। রুস্তিগী কুড়াইয়া লইয়া বাহির হইয়া গেল। মনে ভাবিল, ডাকিনীর মস্তমোহ এখনো দূর হয় নি। আরো কিছু দিন যাক্, তাহার পর আমাব মস্ত খাটিবে।

রুস্তিগী চলিয়া গেলে উদয়াদিত্য শয্যার উপরে আসিয়া পড়িলেন। দুই বাহুতে মুখ ঢাকিয়া কাঁদিয়া কহিলেন “কোথায় সুরমা কোথায়! আজ আমার এ দগ্ধ বজ্রাহত হৃদয়ে শান্তি দিবে কে?”

চতুর্বিংশ পরিচ্ছেদ ।

ভাগবতের অবস্থা বড় ভাল নহে। সে চূপচাপ বসিয়া কয়দিন ধরিয়া অনবরত তামাক ফুঁকিতেছে। ভাগবত যখন মনোযোগের সহিত তামাক ফুঁকিতে থাকে, তখন প্রতিবেদীদিগের আশঙ্কার কাবণ উপস্থিত হয়। কারণ, তাহার মুখ দিয়া কালো কালো ধোঁয়া পাকাইয়া পাকাইয়া উঠিতে থাকে, তাহার মনের মধ্যেও তেমনি একটা কৃষ্ণবর্ণ পাকচক্রের কারখানা চলিতে থাকে। কিন্তু ভাগবত লোকটা যড় ধর্মনিষ্ঠ। সে কাহারো সঙ্গে মেশে না এই যা' তাহার দোষ, হরিনামের মালা লইয়া থাকে, অধিক কথা কয় না, পরচর্চায় থাকে না। কিন্তু কেহ যখন ঘোরতর বিপদে পড়ে, তখন ভাগবতের মত পাকা পরামর্শ দিতে আর কেহ পারে না। ভাগবত কখন ইচ্ছা করিয়া পরের অনিষ্ট করে না, কিন্তু আর কেহ যদি তাহার অনিষ্ট করে, তবে ভাগবত ইহজন্মে তাহা কখন ভোলে না, তাহার শোধ তুলিয়া তবে সে হুঁকা নামাইয়া রাখে। এক কথায়—সংসারে যাহাকে ভাল লোক বলে, ভাগবত তাহাই। পাড়ার লোকেরাও তাহাকে মান্য করে। দ্রবস্থায় পড়িয়া ভাগবত ধার করিয়াছিল, কিন্তু ঘটি-বাটি বেচিয়া তাহা শোধ করিয়াছে।

এক দিন সকালে সীতারাম আসিয়া ভাগবতকে জিজ্ঞাসা করিল, “দাদা, কেমন আছ হে?”

ভাগবত কহিল, “ভাল না।”

সীতারাম কহিল, “কেন বল দেখি।”

ভাগবত কিস্তক্ষণ, ভামাক টানিয়া সীতারামের হাতে হঁকা দিয়া কহিল “বড় টানাটানি পড়িয়াছে।”

সীতারাম কহিল, “বটে ? তা কেমন করিয়া হইল ?”

ভাগবত মনে মনে কিস্তি কষ্ট হইয়া কহিল, “কেমন করিয়া হইল ? তোমাকেও তাহা বলিতে হইবে না কি ? আমি ত জানিতাম, আমারো যে দশা তোমারো সেই দশা !”

সীতারাম কিছু অপ্রস্তুত হইয়া কহিল, “না, হে, আমি সে কথা কহিতেছি না, আমি বলিতেছি তুমি ধার করনা কেন ?”

ভাগবত কহিল, “ধার করিলে ত শুধিতে হইবে! শুধিব কি দিয়া ? বিক্রয় করিবার ও বাঁধা দিবার জিনিষও বড় অধিক নাই।”

সীতারাম সগর্বে কহিল, “তোমার কত টাকা ধার চাই, আমি দিব।”

ভাগবত কহিল, “বটে ? তা’ এতই যদি তোমার টাকা হইয়া থাকে যে, এক মুঠা জলে ফেলিয়া দিলেও কিছু না আসে যায়, তা হইলে আমাকে গোটা দশেক দিয়া ফেল। কিন্তু আগে হইতে বলিয়া রাখিতেছি, আমার শুধিবার শক্তি নাই।”

সীতারাম কহিল, “সে জন্যে, দাদা, তোমাকে ভাবিতে হইবে না।”

সীতারামের কাছে এইরূপ সাহায্যপ্রাপ্তির আশা পাইয়া ভাগবত বন্ধুতার উচ্ছ্বাসে যে নিভাস্ত উচ্ছ্বসিত হইয়া উঠিয়াছিল, তাহা নহে। আর এক ছিলিম তামাক সাজিয়া চুপ করিয়া বসিয়া টানিতে লাগিল।

সীতারাম আন্তে আন্তে কথা পাড়িল—“দাদা, রাজার অন্যায় বিচারে আমাদের ত অন্ন মারা গেল।”

ভাগবত কহিল—“কই, তোমার ভাবে ত তাহা বোধ হইল না।” সীতারামের বদান্ততা ভাগবতের বড় সহ হয় নাই, মনে মনে কিছু চটিয়াছিল।

সীতারাম কহিল, “না, ভাই কথার কথা বলিতেছি। আজ না যায় ত দশদিন পরে ত যাইবে।”

ভাগবত কহিল—“তা, রাজা যদি অন্তায় বিচার করেন ত আমরা কি করিতে পারি।”

সীতারাম কহিল, “আহা যুবরাজ যখন রাজা হইবেন, তখন যশোরে রামরাজ্য হইবে। ততদিন যেন আমরা বাঁচিয়া থাকি।”

ভাগবত চটিয়া গিয়া কহিল, “ওসব কথার আমাদের কাজ কি ভাই? তুমি বড়মানুষ লোক, তুমি নিজের ঘরে বসিয়া রাজা উজীর মার, সে শোভা পায়—আমি গরীব মানুষ, আমার অতটা ভরসা হয় না।”

সীতারাম কহিল, “রাগ কর কেন দাদা? কথাটা মন দিয়া শোনই না কেন?” বলিয়া চুপি চুপি কি বলিতে লাগিল।

ভাগবত মহাক্লদ্ব হইয়া বলিল, “দেখ সীতারাম, আমি তোমাকে স্পষ্ট করিয়া বলিতেছি আমার কাছে অমন কথা ভূমি যুখে উচ্চারণ করিও না।”

সীতারাম সে দিন ত চলিয়া গেল। ভাগবত ভারি মনোযোগ দিয়া সমস্ত দিন কি একটা ভাবিতে লাগিল তাহার পবদিন সকালবেলায় সে নিজে সীতারামের কাছে গেল। সীতারামকে কহিল “কাল যে কথাটা বলিয়াছিলে, বড় পাকা কথা বলিয়াছিলে!”

সীতারাম গর্বিত হইয়া উঠিয়া কহিল, “কেহন দাদা বলি নাই?”

ভাগবত কহিল “আজ সেই বিষয়ে তোমার সঙ্গে পরামর্শ করিতে আসিয়াছি।”

সীতারাম আরো গর্বিত হইয়া উঠিল। কয়দিন ধরিয়া ক্রমিক পরামর্শ চলিতে লাগিল।

পরামর্শ ক'বয়া যাহা স্থির হইল, তাহা এই,—একটা জাল দরখাস্ত লিখিতে হইবে, যেন যুবরাজ প্রতাপাদিত্যের নামে সম্রাট-বিরোধিতার অভিযোগ করিয়া নিজে রাজ্য পাইবার জন্ত দরখাস্ত করিতেছেন। তাহাতে যুবরাজের শীল-মোহর মুদ্রিত থাকিবে। কল্পিণী যে আংটিটা লইয়া

জানিয়াছে, তাহাতে যুবরাজের নাম-মুদ্রাক্রিত শীল আছে, অতএব কাজ অনেকটা অগ্রসর হইয়া আছে।

পরামর্শমত কাজ হইল। একথানা জাল দরখাস্ত লেখা হইল, তাহাতে যুবরাজের নাম মুদ্রিত রহিল। নির্দোষ নীতারামের উপর নির্ভর করা যায় না, অতএব স্থির হইল, ভাগবত নিজে দরখাস্ত লইয়া দিল্লীখবরের হস্তে সমর্পণ করিবে।

ভাগবত সেই দরখাস্তখানি লইয়া দিল্লীর দিকে না গিয়া প্রতাপাদিত্যের কাছে গেল। মহারাজকে কহিল, উদয়াদিত্যের এক ভৃত্য এই দরখাস্তটি লইয়া দিল্লীর দিকে যাইতেছিল, আমি কোন সূত্রে জানিতে পারি। ভৃত্যটা দেশ ছাড়িয়া পলাইয়া গেছে, দরখাস্তটি লইয়া আমি মহাবাজার নিকট আসিতেছি। ভাগবত নীতারামের নাম বলে নাই। দরখাস্ত পাঠ করিয়া প্রতাপাদিত্যের কি অবস্থা হইল, তাহা আর বলিবাব আবশ্যক করে না। ভাগবতের পুনর্বার রাজবাড়িতে চাকরী হইল।

পঞ্চবিংশ পরিচ্ছেদ ।

বিভার প্রাণের মধ্যে অঁধার করিয়া আসিয়াছে। ভবিষ্যতে কি যেন একটা মর্শ্মভেদী ছুঁখ। একটা মরুময়ী নিরাশা জীবনের সমস্ত সুখের ভাঙ্গলি, তাহাও জন্ত অপেক্ষা করিয়া আছে, প্রতি মুহূর্তে তাহার কাছে কাছে সরিয়া আসিতেছে সেই যে জীবনশূন্যকারী, চবাচবগ্রাসী, শুষ্ক, সীমাহীন ভবিষ্যৎ অদৃশের আশঙ্কা, তাহারি একটা ছায়া আসিয়া যেন বিভার প্রাণের মধ্যে পড়িয়াছে। বিভার মনের ভিতরে কেমন কবিতা আছে! বিভা বিছানায় একেলা পড়িয়া আছে এ সময়ে বিভার কাছে কেহ নাই। বিভা নিশ্বাস ফেলিয়া বিভা কাঁদিয়া বিভা আকুল হইয়া কহিল, “আমাকে কি তুমি পরিত্যাগ করিলে? আমি তোমার কি অপবাধ কবিয়াছি?” কাঁদিয়া কাঁদিয়া কহিতে লাগিল, “আমি কি অপরাধ কবিয়াছি? ছুটি হাতে মুখ ঢাকিয়া বালিশ বুকে লইয়া, কাঁদিয়া কাঁদিয়া বার বার কবিয়া কহিল “আমি কি কবিয়াছি?” “একখানি পত্র না, একটি লোকও আসিল না কাহারো মুখে সংবাদ শুনিতে পাই না! আমি কি করিব? বুকাটিয়া ছুটু ফুটু করিয়া সমস্ত দিন ঘরে ঘরে ঘুরিয়া বেড়াইতেছি, কেহ তোমার সংবাদ বলে না, কাহারো মুখে তোমার নাম শুনিতে পাই না! মা গো মা, দিন কি করিয়া কাটিলে এমন কত দিন গেল। এমন কত মধ্যাহ্নে কত অপরাহ্নে

কত রাত্রে সঙ্গী-হীন বিভা রাজবাড়ির শূন্য ঘরে ঘরে এক
খানি শীর্ণ ছায়ার মত ঘুরিয়া বেড়ায় !

এমন সময়ে এক দিন প্রাতঃকালে রামমোহন আসিয়া “মা
গো, জয় হোক্’ বলিয়া প্রণাম করিল। বিভা এমনি চম-
কিয়া উঠিল, যেন তাহার মাথায় একটা স্নেহের বজ্র ভাঙ্গিয়া
পড়িল। তাহার চোখ দিয়া জল বাহির হইল। সে সচকিত
হইয়া কহিল “মোহন, তুই এলি।”

“হাঁ মা, দেপিলাম, মা আমাদের ভুলিয়া গেছেন, তাঁহাকে
একবার স্মরণ করাষ্টবা আদি।”

বিভা কত কি জিজ্ঞাসা করিবে মনে করিল, কিন্তু লজ্জায়
পারিল না—বলে বলে করিয়া হইয়া উঠিল না—অথচ শুনি-
বার জন্য প্রাণটা ব্যাকুল হইয়া রহিল !

রামমোহন বিভার মুখের দিকে চাহিয়া কহিল, “কেন
মা, তোমার মুখখানি এমন মলিন কেন ? তোমার চোখে
কালি পড়িয়াছে। মুখে হাসি নাই। চুল রুক্ষ। এস মা,
আমাদের ঘবে এস। এখানে বুঝি তোমাকে যত্ন করিবার
কেহ নাই।”

বিভা স্নান হাসি হাসিল ; কিছু কহিল না ! হাসিতে
হাসিতে হাসি আর রহিল না। হুই চক্ষু দিয়া জল পড়িতে
লাগিল—শীর্ণ বিবর্ণ দুটি কপোল প্রাবিত করিয়া জল পড়িতে
লাগিল—অশ্রু আর থামে না ! বহু দিন অনাদরের পর
একটু আদর পাইলে যে অভিমান উথলিয়া উঠে, বিভা

সেই অতি কোমল, মৃদু, অনন্তপ্রীতিশূর্ণ অভিমাণে কাঁদিয়া ফেলিল। মনে মনে কহিল, “এত দিন পরে কি আমাকে মনে পড়িল ?”

রামমোহন আর থাকিতে পারিল না, তাহার চোখে জল আসিল, কহিল—“একি অলক্ষণ ! মালক্ষী, তুমি হাসি মুখে আমাদের ঘরে এস। আজ শুভ দিনে চোখেব জল মোছ !”

মহিষীর মনে মনে ভয় ছিল, পাছে জামাই তাঁর মেয়েকে গ্রহণ না করে। রামমোহন বিভাকে লইতে আসিয়াছে শুনিয়া তাঁহার অত্যন্ত আনন্দ হইল। তিনি রামমোহনকে ডাকাইয়া জামাই বাড়ির কুশল জিজ্ঞাসা করিলেন, বিশেষ যত্নে রামমোহনকে আহ্বাব করাইলেন, রামমোহনের গল্প শুনিলেন, আনন্দে দিন কাটিল। কাল যাত্রাব দিন ভাল, কাল প্রভাতেই বিভাকে পাঠাইবেন স্থির হইল। প্রতাপাদিত্য এ বিষয়ে আর কিছু আপত্তি করিলেন না।

যাত্রার যখন সমস্তই স্থিৰ হইয়া গেছে, তখন বিভা একবার উদয়াদিত্যের কাছে গেল। উদয়াদিত্য একাকী বসিয়া কি একটা ভাবিতেছিলেন। বিভাকে দেখিয়া সহসা ঈষৎ চমকিত হইয়া কহিলেন, “বিভা, তবে তুই চলিলি ? তা’ ভালই হইল ! তুই সুখে থাকিতে পারিবি। আশীর্বাদ করি—লক্ষ্মীস্বরূপা হইয়া স্বামীর ঘর উজ্জল করিয়া থাক !”

বিভা উদয়াদিত্যের পায়েব কাছে পড়িয়া কান্দিতে লাগিল ! উদয়াদিত্যের চোখ দিয়া জল পড়িতে লাগিল ;— বিভাব মাথায় হাত দিয়া তিনি কহিলেন,—“কেন কান্দিতে-ছিস্ ? এখানে তোর কি সুখ ছিল বিভা ? চারিদিকে কেবল দুঃখ কষ্ট শোক । এ কারাগার হইতে পালাইলি—তুই বাঁচিলি ।”

বিভা যখন উঠিল, তখন উদয়াদিত্য কহিলেন, “যাইতে-ছিস্ ? তবে আষ । স্বামীগৃহে গিয়া আমাদের একেবারে যেন ভুলিয়া যাস্নে । এক এক বার মনে করিস্, মাঝে মাঝে যেন সংবাদ পাই ।”

বিভা বামমোহনের কাছে গিয়া কহিল “এখন আমি যাইতে পারিব না ।”

রামমোহন বিস্মিত হইয়া কহিল “সে কি কথা মা ?”

বিভা কহিল “না, আমি যাইতে পারিব না । দাদাকে আমি এখন একলা ফেলিয়া যাইতে পারিব না । আমা হইতেই তাঁহার এত কষ্ট—এত দুঃখ, আর আমি আজ তাঁহাকে এখানে ফেলিয়া রাখিয়া সুখ ভোগ করিতে যাইব ? যত দিন তাঁহার মনে তিল মাত্র কষ্ট থাকিবে, তত দিন আমিও তাঁহার সঙ্গে সঙ্গে থাকিব । এখানে আমার মত তাঁহাকে কে যত্ন করিবে ?” বলিয়া বিভা কান্দিয়া চলিয়া গেল ।

অন্তঃপুরে একটা গোলযোগ বাধিয়া উঠিল । মহিষী আসিয়া বিভাকে তিরস্কার করিতে লাগিলেন ; তাহাকে

অনেক ভয় দেখাইলেন, অনেক পরামর্শ দিলেন ; বিভা কেবল কহিল—“না মা, আমি পারিব না !”

মহিষী রোষে বিরক্তিতে কাঁদিয়া কহিলেন “এমন মেয়েও ত কোথাও দেখি নাই।” তিনি মহারাজের কাছে গিয়া সমস্ত কহিলেন। মহারাজ প্রশান্ত ভাবে কহিলেন, “তা, বেশ ত, বিভার যদি ইচ্ছা না হয় ত কেন যাইবে ?”

মহিষী অবাক হইয়া, হাত উঠাইয়া, হাল ছাড়িয়া দিয়া কহিলেন,—“তোমাদের যাহা ইচ্ছা তাই কর, আমি আব কিছতে থাকিব না।”

উদয়াদিত্য সমস্ত শুনিয়া বিস্মিত হইলেন। তিনি বিভাকে আসিয়া অনেক করিয়া বুঝাইলেন ; বিভা চুপ করিয়া কাঁদিতে লাগিল, ভাল বুঝিল না !

হতাস্থাস রামমোহন আসিয়া স্নানমুখে কহিল, “মা, তবে চলিলাম। মহারাজকে গিয়া কি বলিব ?”

বিভা কিছু বলিতে পারিল না, অনেক ক্ষণ নীরতর হইয়া রহিল।

রামমোহন কহিল, “তবে বিদায় হই মা !” বলিয়া প্রণাম করিয়া উঠিয়া গেল। বিভা একেবারে আকুল হইয়া কাঁদিয়া উঠিল, কাতর স্বরে ডাকিল “মোহন !”

মোহন ফিরিয়া আসিয়া কহিল, “কি মা !”

বিভা কহিল “মহারাজকে বলিও, আমাকে যেন মার্জনী

করেন । তিনি স্বয়ং ডাকিতেছেন, তবু আমি যাইতে পারি-
লাম না, সে কেবল নিতান্তই আমার হ্রদৃষ্ট ।”

রামমোহন শুদ্ধভাবে কহিল “যে আজ্ঞা !”

রামমোহন আবার প্রণাম করিয়া বিদায় হইয়া গেল ।
বিভা দেখিল, রামমোহন বিভার ভাব কিছুই বুঝিতে পারে
নাই, তাহার ভারি গোলমাল ঠেকিয়াছে । একেত বিভার
প্রাণ যেখানে যাইতে চায়, বিভা সেখানে যাইতে পারিল
না ;—তাহার উপর রামমোহন, যাহাকে সে যথার্থ স্নেহ
করে, সে আজ রাগ করিয়া চলিয়া গেল । বিভার প্রাণে
যাহা হইল তাহা বিভাই জানে !

ষড়বিংশ পরিচ্ছেদ ।

বিভা রহিল । চোখের জল মুছিয়া প্রাণের মধ্যে
পাষণ্ড ভার বহিয়া সে তাহার দাদার কাছে পড়িয়া রহিল ।
মান, শীর্ণ একখানি ছায়ার মত সে নীরবে সমস্ত ঘরের
কাজ করে । উদয়াদিত্য স্নেহ করিয়া, আদর করিয়া কোন
কথা কহিলে চোখ নীচু করিয়া একটু খানি হাসে । সন্ধ্যা-
বেলায় উদয়াদিত্যের পায়ের কাছে বসিয়া একটু কথা
কহিতে চেষ্টা করে । যখন মহিষী তিরস্কার করিয়া কিছু

বলেন, চুপ করিয়া দাঁড়াইয়া শোনে, ও অবশেষে এক খণ্ড মলিন মেঘের মত ভাসিয়া চলিয়া যায়। যখন কেহ বিভাব চিবুক ধরিয়া বলে “বিভা তুই এত রোগা হইতেছিস্ কেন” বিভা কিছু বলে না, কেবল একটু হাসে।

এই সময়ে ভাগবত পূর্বোক্ত জাল দরখাস্তটি লইয়া প্রতাপাদিত্যকে দেখায়, প্রতাপাদিত্য আগুন হইয়া উঠিলেন—পরে অনেক বিবেচনা করিয়া উদয়াদিত্যকে কারা-রুদ্ধ করিবার আদেশ দিলেন। মন্ত্রী কহিলেন “মহারাজ, যুবরাজ যে একাজ করিয়াছেন, ইহা কোন মতেই বিশ্বাস হয় না।” যে, শোনে সেই দ্বিভ কাটিয়া বলে, “ওকথা কানে আনিতে নাই। যুবরাজ একাজ কবিবেন ইহা বিশ্বাস-যোগ্য নহে।” প্রতাপাদিত্য কহিলেন, “আমাবো ত বড় একটা বিশ্বাস হয় না। কিন্তু তাই বলিয়া কারাগারে থাকিতে দোষ কি? দেখানে কোন প্রকার কষ্ট না দিলেই হইল। কেবল গোপনে কিছু না করিতে পারে তাহার জন্য পাহারা নিযুক্ত থাকিবে।”

উদয়াদিত্য যখন কারাবাসের আদেশ শুনিতে পাইলেন, তখন কিছু বলিলেন না। তাহার পরে বিভাকে কহে, আসিতে দেখিয়া একেবারে বলিয়া উঠিলেন, “বিভা, আমি কি করিয়াছি? কেন আমার উপরে এ অত্যাচার। আমিও আর কিছুতে লিপ্ত থাকি না, আমি আপনার মনে গাফিলতবে আর কেন এ দুঃখের উপরে দুঃখ, অশান্তির উপর

অশান্তি ! কবে আমি বিশ্রাম পাইব ?” বলিয়া শাশ্রুনেত্রে
গাহিতে লাগিলেন,

“মা আমি তোর কি করেছি ?

শুধু তোরে জন্ম-ভোরে মা বলে রে ডেকেছি !

চির জীবন পাষাণীরে, ভাসালি অঁখিনীরে,

চির জীবন দুঃখানলে দহেছি ।

অঁধার দেখে তরাসেতে, চাহিলাম তোর কোলে যেতে,

সন্তানের কোলে তুলে নিলিনে,

মা-হারা সন্তানের মত কেঁদে বেড়াই অবিরত

এ চোখের জল মুছায়েত দিলিনে !

ছেলের প্রাণে ব্যথা দিয়ে, যদি মা তোর জুড়ায় হিয়ে,

ভল ভাল তাই তবে হোক—অনেক দুঃখ সয়েছি ।”

গাহিতে গাহিতে উদয়াদিত্যের দুই চক্ষু দিয়া জল
পড়িতে লাগিল । উদয়াদিত্য কেবলি গাহিতে লাগিলেন,
দুই ভাইবোনে একত্র বসিয়া একত্র মিলিয়া কাঁদিতে
লাগিলেন ।

কাবাগারে ষাইতে হইবে বলিয়া যে উদয়াদিত্যের দুঃখ,
তাহা নহে, তাঁহার গৃহে আর কাবাগারে প্রভেদ কি ? তিনি
দেখিতেছেন, কোথাও তাঁহার একটা স্থিতি নাই, শাস্তি
নাই । তিনি কিছুই করেন নাই, তিনি কিছুতেই লিপ্ত
থাকেন নাই, তিনি আপনাকে জগৎ সংসারের পরিত্যক্ত
মনে করিয়া সংসার হইতে দূরে আছেন, তবু কেন তিনি

ক্রমাগতই হুঁচটনার আবর্তের মধ্যে গিয়া পড়িতেছেন ? যে মাটির উপরে তিনি দাঁড়াইয়া আছেন তাহারি উপর হইতে তাঁহার বিশ্বাস চলিয়া গিয়াছে, তিনি দেখিতেছেন তাহা চোরা বালি, তাহার উপরে একটা চিরস্থায়ী কুটীর বাঁধিবার কোন সম্ভাবনা নাই। হুঃখের কোলেও আরাম পাওয়া যায়, যদি জানি সেই খানেই আমার স্থিতি, তাহাই আমার চরম, তাহাই আমার পরিণাম। আর কিছু নহে, উদয়াদিত্য কোথাও একটা ঠিকানা পাইতেছেন না। খৃষ্টান নবকের অনন্ত অগ্নিদাহ, নরক রাজ্যে চিরস্থায়ী বন্দোবস্ত, সেও বোধ করি ভাল, কিন্তু হিন্দু পাপীদিগের কোটি কোটি পশু-জন্ম পরিভ্রমণের সুদীর্ঘ অশান্তি, সে বোধ করি, আরো নিদারুণ।

সপ্তবিংশ পরিচ্ছেদ।

যখন রামমোহন চন্দ্রদ্বীপে ফিরিয় গিয়া একাকী ঘোড়-হস্তে অপরাধীর মত রাজার সম্মুখে গিয়া দাঁড়াইল, তখন রামচন্দ্র রায়ের সর্বাস্ত্র জলিয়া উঠিল। তিনি স্থির করিয়া ছিলেন, বিভা আসিলে পর তাহাকে প্রতাপাদিত্য ও তাহার বংশ সম্বন্ধে খুব তুচারিটা খরধার কথা শুনাইয়া তাঁহার শঙ্করের উপর শোধ তুলিবেন। কি কি কথা বলিবেন, কেমন

করিয়া বলিবেন, কখন বলিবেন, সমস্ত তিনি মনে মনে স্থির করিয়া রাখিয়াছিলেন। রামচন্দ্র রায় গোঁয়ার নহেন, বিভাকে যে কোন প্রকারে পীড়ন করিবেন, ইহা তাঁহার অভিপ্রায় ছিল না। কেবল, বিভাকে তাহার পিতার সম্বন্ধে মাঝে মাঝে খুব লজ্জা দিবেন এই আনন্দেই তিনি অধীর ছিলেন। এমন কি, এই আনন্দের প্রভাবে তাঁহার মনেই হয় নাই যে, বিভার আসিবার পক্ষে কোন বাধা থাকিতে পারে। এমন সময়ে রামমোহনকে একাকী আসিতে দেখিয়া রামচন্দ্র রায় নিতান্ত বিস্মিত হইয়া বলিয়া উঠিলেন “কি হইল, রামমোহন ?”

রামমোহন কহিল, “সকলি নিষ্ফল হইয়াছে !”

রাজা চমকিয়া উঠিয়া কহিলেন, “আনিতে পারিলি নে !”

রামমোহন—“আজ্ঞা,—না মহারাজ ! কুলগ্নে যাত্রা করি-
রাছিলাম !”

রাজা অত্যন্ত ক্রুদ্ধ হইয়া বলিয়া উঠিলেন “বেটা, তোকে যাত্রা করিতে কে বলিয়াছিল ! তখন তোকে বার বার করিয়া বারণ করিলাম, তখন যে তুই বুক ফুলাইয়া গেলি, আর, আজ—”

রামমোহন কপালে হাত দিয়া ন্লান মুখে কহিল, “মহা-
রাজ, আমারি অদৃষ্টের দোষ !”

, রামচন্দ্র রায় আরো ক্রুদ্ধ হইয়া বলিলেন, “রামচন্দ্র

রায়ের অপমান! ভুই বেটা আমার নাম করিয়া ভিক্ষা চাহিতে গেলি, আর প্রতাপাদিত্য দিল না! এত বড় অপমান আমাদের বংশে আর কখন হয় নাই।”

তখন রামমোহন নভশির তুলিয়া ঈষৎ গর্কিতভাবে কহিল “ও কথা বলিবেন না! প্রতাপাদিত্য যদি না দিত, আমি কাড়িয়া আনিতাম! আপনার কাছে তাহাত বলিয়াই গিয়াছিলাম। মহারাজ, যখন আপনার আদেশ পালন করিতে যাই, তখন কি আর প্রতাপাদিত্যকে ভয় করি? প্রতাপাদিত্য রাজা বটে, কিন্তু আমার রাজা ত সে নয়!”

রাজা কহিলেন, “তবে হইল না কেন?”

রামমোহন অনেক ক্ষণ চুপ করিয়া রহিল, তাহার চোখে জলের রেখা দিল।

রাজা অধীর হইয়া কহিলেন, “রামমোহন, শীঘ্র বল!”

রামমোহন ষোড় হাতে কহিল—“মহারাজ”—

রাজা কহিলেন—“কি, বল!”

রামমোহন—“মহারাজ, মাঠাকরুণ আসিতে চাহিলেন না!” বলিয়া রামমোহনের চোখ দিয়া জল পড়িতে লাগিল। বুঝি এ সন্তানের অভিমানের অশ্রু! বোধ করি এ অশ্রুজলের অর্থ—“মায়ের প্রতি আমার এত বিশ্বাস ছিল যে, সেই বিশ্বাসের জোরে আমি বুক ফুলাইয়া, আনন্দ করিয়া মাঝে আনিতে গেলাম, আর মা আসিলেন না,

মা আমার সম্মান রাখিলেন না।” কি জানি কি মনে করিয়া বুদ্ধ রামমোহন চোখের জল সামলাইতে পারিল না।

রাজা কথাটা শুনিয়াই একেবারে দাঁড়াইয়া উঠিয়া চোক পাকাইয়া বলিয়া উঠিলেন, “বটে—!” অনেক ক্ষণ পর্য্যন্ত তাঁহার আর বাক্যস্ফূর্ত্তি হইল না।

“আসিতে চাহিলেন না বটে। বটে, তুই বেরো, বেরো আমার সুমুখ হইতে এখনি বেরো !”

রামমোহন একটি কথা না কহিয়া বাহির হইয়া গেল। সে জানিত তাহারি সমস্ত দোষ, অভাব সমুচিত দণ্ড পাওয়া কিছু অস্বাভাবিক নহে।

রাজ্যাকি করিয়া যে ইহার শোধ তুলিবেন কিছুতেই ভাবিয়া পাইলেন না। প্রতাপাদিত্যের কিছু করিতে পারিবেন না, বিভাকরেও হাতের কাছে পাইতেছেন না। রামচন্দ্র রায় অধীর হইয়া বেড়াইতে লাগিলেন।

দিন দুয়ের মধ্যে সংবাদটা নানা আকারে নানা দিকে রাষ্ট্র হইয়া পড়িল। এমন অবস্থা হইয়া দাঁড়াইল যে, প্রতিশোধ না হইলে আর মুখরক্ষা হয় না। এমন কি, প্রজারা পর্য্যন্ত প্রতিশোধ লইবার জন্য ব্যস্ত হইল। তাহারা কহিল “আমাদের মহারাজার অপমান !” অপমানটা যেন সকলেরই গায়ে লাগিয়াছে। একেত প্রতিহিংসা-প্রবৃত্তি রামচন্দ্র রায়ের মনে স্বভাবতই বলবান আছে, তাহার উপরে তাঁহার মনে হইতে লাগিল, প্রতিহিংসা না লইলে

প্রজারা কি মনে করিবে। ভৃত্যেরা কি মনে করিবে! রমাই ভাঁড় কি মনে করিবে। তিনি যখন কল্পনার মনে করেন, এই কথা লইয়া রমাই আর এক জন ব্যক্তির কাছে হাসি টিটকারী করিতেছে, তখন তিনি অত্যন্ত অস্থির হইয়া পড়েন।

একদিন সভায় মন্ত্রী প্রস্তাব করিলেন, “মহারাজ, আপনি আর একটি বিবাহ করুন।”

রমাই ভাঁড় কহিল, “আর প্রতাপাদিত্যের মেয়ে তাহার ভাইকে লইয়া থাকুক।”

রাজা রমাইয়ের দিকে চাহিয়া হাসিয়া কহিলেন “ঠিক বলিয়াছ রমাই।”

রাজাকে হাসিতে দেখিয়া সকল সভাসদই হাসিতে লাগিল। কেবল ফণাণ্ডিজ বিরক্ত হইল, সে হাসিল না। রামচন্দ্র রায়ের মত লোকেরা সঙ্কম রক্ষার জন্য সততই ব্যস্ত, কিন্তু সঙ্কম কাহাকে বলে ও কি করিয়া সঙ্কম রাখিতে হয় সে জ্ঞান তাহাদের নাই।

দেওয়ানজি কহিলেন, “মন্ত্রী মহাশয় ঠিক বলিয়াছেন। তাহা হইলে প্রতাপাদিত্যকে ও তাঁহার কন্যাকে বিলক্ষণ শিক্ষা দেওয়া হইবে।”

রমাই ভাঁড় কহিল—“এ শুভকার্য্যে আপনার বর্তমান শ্বশুর মহাশয়কে একখানা নিমন্ত্রণ পত্র পাঠাইতে ভুলিবেন না, নহিলে কি জানি তিনি মনে হুঃখ করিতে

পারেন !” বলিয়া রমাই চোক টিপিল । সভাস্থ সকলে হাসিতে লাগিল ; যাহারা বুঝে বসিয়া ছিল, কথাটা শুনিতে পায় নাই, তাহারও না হাসিয়া কিছুতেই থাকিতে পারিল না ।

রমাই কহিল, “বরণ করিবার নিমিত্ত এয়োস্ত্রীদের মধ্যে যশোরে আপনার স্বাণ্ডিষ্ঠাকরণকে ডাকিয়া পাঠাইবেন । আর মিষ্টান্নমিতরে জনাঃ, প্রতাপাদিত্যের মেয়েকে যখন একথাল মিষ্টান্ন পাঠাইবেন, তখন তাহার সঙ্গে ছোটো কাঁচা রজা পাঠাইয়া দিবেন !”

রাজা হাসিয়া অস্থির হইলেন । সভাসদেরা মুখে চান্দর দিয়া মুখ বাঁকাইয়া হাসিতে লাগিল । কর্ণাণ্ডিজ্ অনক্ষিত ভাবে উঠিয়া চলিয়া গেল ।

দেওয়ানজি একবার রসিকতা করিবার চেষ্টা করিলেন, কহিলেন, “মিষ্টান্নমিতরে জনাঃ, যদি ইতর লোকের ভাগ্যেই মিষ্টান্ন থাকে, তাহা হইলে ত যশোহরেই সমস্ত মিষ্টান্ন খরচ হইয়া যায়, চন্দ্রদ্বীপে আর মিষ্টান্ন খাইবার উপযুক্ত লোক থাকে না !”

কথাটা শুনিয়া কাহারো হাসি পাইল না । রাজা চুপ করিয়া গুড়গুড়ি টানিতে লাগিলেন, সভাসদেরা গভীর হইয়া রহিল, রমাই দেওয়ানের দিকে একবার অবাক হইয়া চাহিল, এমন কি, একজন অমাত্য বিষণ্ণভাবে দৃষ্টিসা করিল—“সে কি কথা দেওয়ানজি মশায় ? রাজার

বিবাহে মিষ্টানের বন্দোবস্ত কি এত কম হইবে ? ” দেও-
য়ানজি মহাশয় মাথা চুলকাইতে লাগিলেন ।

বিবাহের কথা সমস্ত স্থির হইয়া গেল ।

অষ্টাবিংশ পরিচ্ছেদ ।

উদয়াদিত্যকে যেখানে বন্ধ করা হইয়াছে, তাহা প্রকৃত
কারাগার নহে। তাহা প্রাসাদ-সংলগ্ন একটি ক্ষুদ্র অট্টা-
লিকা। বাটির ঠিক ডানপাশেই এক রাজপথ, ও তাহার
পূর্বদিকে প্রশস্ত এক প্রাচীর আছে। তাহার উপর গ্রহরীরা
পায়চারি করিয়া পাহারা দিতেছে। ঘরেতে একটি অতি
ক্ষুদ্র জানলা কাটা। তাহার মধ্যদিয়া খানিকটা আকাশ,
একটা বাঁশঝাড়, ও একটি শিবমন্দির দেখা যায়। উদয়া-
দিত্য প্রথম যখন কারাগারে প্রবেশ করিলেন, তখন সন্ধ্যা
উত্তীর্ণ হইয়া গিয়াছে। জানালার কাছে মুখ রাখিয়া ভূমিতে
গিয়া বসিলেন। বর্ষাকাল। আকাশে মেঘ জমিয়া আছে।
রাস্তায় জল দাঁড়াইয়াছে। নিস্তন্ধ রাত্রে দৈবাৎ তুই এক
জন পথিক চলিতেছে, ছপ্ ছপ্ করিয়া তাহাদের পায়ের
শব্দ হইতেছে। পূর্বদিক হইতে, কারাগারের স্বৎস্পন্দন
ধ্বনির মত গ্রহরীদের পদশব্দ অনবরত কানে আসিতেছে।
এক এক গ্রহর অতীত হইতে লাগিল, দূর হইতে এক একটা

ঈক শুনাইতেছে । আকাশে একটি মাত্র তারা নাই, যে বাঁশঝাড়ের দিকে উদয়াদিত্য চাহিয়া আছেন, তাহা জোনাকীতে একেবারে ছাইয়া ফেলিয়াছে । সে রাত্রে উদয়াদিত্য আর শয়ন করিলেন না, জানলার কাছে বসিয়া গ্রহরীদের অবিরাম পদশব্দ শুনিতে লাগিলেন ।

বিভা আজ সন্ধ্যাবেলায় একবার অন্তঃপুরের বাগানে গিয়াছে । প্রাসাদে, বোধ করি, অনেক লোক ; চারিদিকে দাস দাসী, চারিদিকেই পিসি মাসী, কথায় কথায় “কি হইয়াছে, কি বৃত্তান্ত” জিজ্ঞাসা করে, প্রতি অশ্রুবিন্দুর হিসাব দিতে হয়, প্রতি দীর্ঘ নিঃশ্বাসের বিস্তৃত ভাষ্য ও সমালোচনা বাহির হইতে থাকে । বিভা বুঝি আর পারে নাই, ছুটিয়া বাগানে আসিয়াছে । হৃদয় আজ মেঘের মধ্যেই উঠিয়াছে, মেঘের মধ্যেই অন্ত গেল । কখন যে দিনের অবসান হইল, ও সন্ধ্যার আরম্ভ হইল বুঝা গেল না । বিকালের দিকে পশ্চিমের মুখে একটুখানি সোণার রেখা ফুটিয়াছিল, কিন্তু দিন শেষ হইতে না হইতেই মিলাইয়া গেল । অঁধারের উপর অঁধার ঘনাইতে লাগিল । দিগন্ত হইতে দিগন্ত আচ্ছন্ন হইয়া গেল । ঘন-শ্রেণী ঝাউ-গাছ গুলির মাথার উপর অন্ধকার এমনি করিয়া জমিয়া আসিল যে, তাহাদের পরস্পরের মধ্যে একটা ব্যবধান আর দেখা গেল না, ঠিক মনে হইতে লাগিল যেন সহস্র দীর্ঘ পায়ের উপর ভর দিয়া একটা প্রকাণ্ড বিস্তৃত নিস্তব্ধ

অন্ধকার দাঁড়াইয়া আছে। রাত হইতে লাগিল, রাজ-বাড়ির প্রদীপ একে একে নিবিয়া গেল। বিভা ঝাউ-গাছের তলায় বসিয়া আছে। বিভা স্বভাবতই ভীক, কিন্তু আজ তাহার ভয় নাই। কেবল, যতই আঁধার বাড়িতেছে, ততই তাহার মনে হইতেছে যেন পৃথিবীকে কে তাহার কাছ হইতে কাড়িয়া লইতেছে; যেন স্থল হইতে, শাস্তি হইতে, জগৎসংসারের উপকূল হইতে কে তাহাকে ঠেলিয়া ফেলিয়াছে, অতলস্পর্শ অন্ধকারের সমুদ্রের মধ্যে সে পড়িয়া গিয়াছে; ক্রমেই ডুবিতেছে, ক্রমেই নামিতেছে, মাথার উপরে অন্ধকার ক্রমেই বাড়িতেছে, পদতলে ভূমি নাই, চারিদিকে কিছুই নাই, আশ্রয়, উপকূল, জগৎসংসার ক্রমেই দূর হইতে দূরে চলিয়া যাইতেছে। তাহার মনে হইতে লাগিল, যেন, একটু একটু করিয়া তাহার সম্মুখে একটা প্রকাণ্ড ব্যবধান আকাশের দিকে উঠিতেছে। তাহার ওপারে কত কি পড়িয়া রহিল। প্রাণ যেন আকুল হইয়া উঠিল। যেন ওপারের সকলি দেখা যাইতেছে, সেখানকার সূর্যালোক, খেলাধুলা, উৎসব সকলি দেখা যাইতেছে; কে যেন নিষ্ঠুর ভাবে, কঠোর হস্তে তাহাকে ধরিয়া রাখিয়াছে, তাহার কাছে বৃকের শিরা টানিয়া ছিঁড়িয়া ফেলিলেও সে যেন সেদিকে যাইতে দিবে না। বিভা যেন আজ দিব্য চক্ষু পাইয়াছে; এই চরাচরব্যাপী ঘন ঘোর অন্ধকারের উপর বিধাতা

যেন বিভার ভবিষ্যৎ অদৃষ্ট লিখিয়া দিয়াছেন, অনন্ত
 ব্রহ্মসংসারে একাকী বসিয়া বিভা যেন তাহাই পাঠ করি-
 তেছে; তাই তাহার চক্ষে জল নাই, দেহ নিষ্পন্দ, নেত্র
 নির্নিমেষ। রাত্রি দুই প্রহরের পর একটা বাতাস উঠিল;
 অন্ধকারে গাছপালা গুলা হা হা করিয়া উঠিল। বাতাস
 অভিদূরে হু—হু করিয়া শিশুর কণ্ঠে কাঁদিতে লাগিল।
 বিভার মনে হইতে লাগিল যেন দূর—দূর—দূরান্তরে সমু-
 দ্রের তীরে বসিয়া বিভার সাধের, স্নেহের, প্রেমের শিশু-
 গুলি দুই হাত বাড়াইয়া কাঁদিতেছে, আকুল হইয়া তাহারা
 বিভাকে ডাকিতেছে, তাহারা কোলে আসিতে চায়,
 সম্মুখে তাহারা পথ দেখিতে পাইতেছে না; যেন তাহা-
 দের ক্রন্দন এই শত যোজন, লক্ষ যোজন গাঢ় স্তব্ধ অন্ধ-
 কার ভেদ করিয়া বিভার কানে আসিয়া পৌঁছিল। বিভার
 প্রাণ যেন কাতর হইয়া কহিল, “কেরে, তোরা কে, তোরা
 কে কাঁদিতেছিস্, তোরা কোথায়!” বিভা মনে মনে
 যেন এই লক্ষ যোজন অন্ধকারের পথে একাকিনী যাত্রা
 করিল। সহস্র বৎসর ধরিয়া যেন অবিশ্রান্ত ভ্রমণ করিল,
 পথ শেষ হইল না, কাহাকেও দেখিতে পাইল না; কেবল
 সেই বায়ুহীন, শব্দহীন দিনরাত্রিহীন, জনশূন্য তারা-
 শূন্য দিক্‌দিগন্তশূন্য মহাঅন্ধকারের মধ্যে দাঁড়াইয়া মাঝে
 মাঝে চারিদিক হইতে ক্রন্দন শুনিতে পাইল; কেবল
 বাতাস দূর হইতে করিতে লাগিল হু—হু!

সমস্ত রাত্রি অনিদ্রায় কাটিয়া গেল। পর দিন বিত্ত
 কারাগারে উদয়াদিত্যের নিকট যাইবার নিমিত্ত অনেক
 চেষ্টা করিল সেখানে তাহার যাওয়া নিষেধ। সমস্ত দি-
 য়িয়া অনেক কাঁদাকাটি করিল। এমন কি, স্বয়ং প্রতাপ
 দিত্যের কাছে গেল। বিভা তাঁহার পা জড়াইয়া ধরিল
 অনেক কষ্টে সম্মতি পাইল। পর দিন প্রভাত হইতে না
 হইতেই বিভা শয্যা হইতে উঠিয়া কারাগৃহে প্রবেশ করিল
 গিয়া দেখিল, উদয়াদিত্য বিছানায় শোন নাই। ভূমি
 তলে বসিয়া, বাতায়নের উপরে মাথা দিয়া ঘুমাইয়া পড়ি-
 য়াছেন। দেখিয়া বিভার প্রাণ যেন বুক ফাটিয়া কাঁদিয়া
 উঠিতে চাহিল। অনেক কষ্টে রোদন সম্বরণ করিল
 অতি ধীরে নিঃশব্দে উদয়াদিত্যের কাছে গিয়া বসিল
 ক্রমে প্রভাত পরিষ্কার হইয়া আসিল। নিকটের ব-
 হইতে পাখীর গাহিয়া উঠিল। পাশের রাজপথ হইতে
 পাহুরা গান গাহিয়া উঠিল। দুই একটি রাত্রি-জাগরণে
 ক্লান্ত প্রহরী আলো দেখিয়া মুহূর্ত্তেরে গান গাহিতে লাগিল।
 নিকটস্থ মন্দির হইতে শাক ঘণ্টার শব্দ উঠিল। উদয়-
 দিত্য সহসা চমকিয়া জাগিয়া উঠিলেন। বিভাকে দেখি-
 য়াই বলিয়া উঠিলেন “এ কি বিভা, এত সকালে যে?”
 ঘরের চারিদিকে চাহিয়া দেখিয়া বলিলেন—“এ কি—আমি,
 কোথায়?” মুহূর্ত্তের মধ্যে মনে পড়িল, তিনি কোথায়।
 বিভার দিকে চাহিয়া নিখাস ফেলিয়া কহিলেন “আ—

বিভা, তুই আসিয়াছিস্? কাল তোকে সমস্ত দিন দেখিনাই, মনে হইয়াছিল, বুঝি তোদের আর দেখিতে পাইব না।”

বিভা উদয়াদিত্যের কাছে আসিয়া চোখ মুছিয়া কহিল, “দাদা, মাটিতে বসিয়া কেন? খাটে বিছানা পাতা রহিয়াছে। দেখিয়া বোধ হইতেছে, একবারো ভূমি খাটে বস' নাই। এ ছুদিন কি তবে ভূমিতেই আসন করিয়াছ?” বলিয়া বিভা কাঁদিতে লাগিল।

উন্মাদিত্য ধীরে ধীরে কহিলেন, “খাটে বসিলে আমি যে, আকাশ দেখিতে পাই না বিভা। জানলার ভিতর দিয়া আকাশের দিকে চাহিয়া যখন পাখীদের উড়িতে দেখি, তখন মনে হয়, আমরা একদিন খাঁচা ভাঙ্গিবে, আমিও একদিন ঐ পাখীদের মত ঐ অনন্ত আকাশে প্রাণের সাথে সঁতার দিয়া বেড়াইব। এ জানলা হইতে যখন সরিয়া যাই, যখন চাবিদিকে অন্ধকার দেখি, তখন ভুলিয়া যাই যে, আমার একদিন মুক্তি হইবে, একদিন নিষ্কৃতি হইবে, মনে হয় না যে জীবনের বেড়ী একদিন ভাঙ্গিয়া যাইবে, এ কারাগার হইতে একদিন খালাস পাইব। বিভা এ কারাগারের মধ্যে এই দুই হাত জমি আছে, যেখানে আসিলেই আমি জানিতে পারি যে, আমি স্বভাবতই স্বাধীন, কোন রাজা মহারাজা আমাকে বন্দী করিতে পারে না। আর ঐ ধানে ঐ ঘরের মধ্যে ঐ কোমল দুগ্ধ ফেন-নিভ শয্যা, ঐ “খানেই আমার কারাগার।”

আজ বিভাকে সহসা দেখিয়া উদয়াদিত্যের মনে অত্যন্ত আনন্দ হইল। কাল সমস্ত দিন বিভাকে দেখিতে পান নাই, মনে করিয়াছিলেন, যে এক বিন্দু স্মৃতি সংসারে অবশিষ্ট ছিল, যে এক বিন্দু আলো মাঝে মাঝে চোখে পড়িত তাহাও বৃষ্টি কারাগারের বাহিরে ফেলিয়া আসিলেন। উদয়াদিত্যের হৃদয় অনন্ত প্রীতিপূর্ণ, তিনি ভালবাসিতে চান, ভালবাসা চান, তাঁহার হৃদয় পরের হৃদয়ের জন্য সৃষ্ট হইয়াছিল; তিনি হৃদয় হীন জীবিত মৃৎপিণ্ডের মত কেবল মাত্র ক্ষুদ্র আপনাকে লইয়াই বাঁচিতে পারেন না; ভাল বাসিবাব নিমিত্ত, ভালবাসা পাইবার নিমিত্ত আর কেহ যদি না থাকে তবে তাঁহার জীবনের উদ্দেশ্য চলিয়া যায়, তাঁহার মহৎ হৃদয়ের একটা কোন অর্থ থাকে না। তিনি আলোক হারাইতে পারেন, স্বাধীনতা হারাইতে পারেন, কিন্তু যেরূপ হারাইয়া প্রীতি হারাইয়া বাঁচিতে পাবেন না। বিভা যখন তাঁহার চক্ষে পড়িল, তখন তাঁহার কারাগারের সমুদায় দার যেন মুক্ত হইয়া গেল। সে দিন তিনি বিভাকে কাছে বসাইয়া আনন্দে এত কথা বলিয়াছিলেন, যে, কারাগার প্রবেশের পূর্বে বোধ করি এত কথা কখন বলেন নাই। বিভা উদয়াদিত্যের সে আনন্দ মনে মনে বুঝিতে পারিয়াছিল। জানি না, এক প্রাণ হইতে আর এক প্রাণে কি করিয়া বার্তা যায়, এক প্রাণে তরঙ্গ উঠিলে আর এক প্রাণে কি নিয়মে তরঙ্গ উঠে। বিভার হৃদয় পুলকে পুরিয়া উঠিল।

তাহার অনেক দিনের উদ্দেশ্য আজ সফল হইল । বিভা, সামান্য বালিকা, উদয়াদিত্যকে সে যে আনন্দ দিতে পারে অনেক দিনের পর ইহা সে সহসা আজ বুঝিতে পারিল । হৃদয়ে সে বল পাইল । এত দিন সে চারিদিকে অন্ধকার দেখিতেছিল, কোথাও কিনারা পাইতেছিল না, নিরাশার গুরুভারে একেবারে নত হইয়া পড়িয়াছিল । নিজের উপর তাহার বিশ্বাস ছিল না ; অনবরত সে উদয়াদিত্যের কাজ করিত, কিন্তু বিশ্বাস করিতে পারিত না যে, তাঁহাকে সুখী করিতে পারিব । আজ সে সহসা একটা পথ দেখিতে পাইয়াছে, এতদিনকার সমস্ত শ্রান্তি একেবারে ভুলিয়া গেল । আজ তাহার চোখে প্রভাতের শিশিরের মত অশ্রুজল দেখা দিল, আজ তাহার অধরে অক্লণ ক্রিরণের নিম্নল হাসি ফুটিয়া উঠিল ।

বিভাও প্রায় কারাবাসিনী হইয়া উঠিল । গৃহের বাতায়নের মধ্য দিয়া যখন প্রভাত প্রবেশ করিত, কারাবার খুলিয়া গিয়া তখনি বিভার বিমল মূর্ত্তি দেখা দিত । বিভা বেতনভোগী ভৃত্যদের কিছুই করিতে দিত না, নিজের হাতে সমুদয় কাজ করিত, নিজে আহার আনিয়া দিত, নিজে শয্যা রচনা করিয়া দিত । একটি টিয়াপাখী আনিয়া ঘরে টাঙ্গাইয় দিল ও প্রতিদিন সকালে অন্তঃপুরের বাগান হইতে ফুল ভুলিয়া আনিয়া দিত । ঘরে একটি মহাভারত ছিল, উদয়াদিত্য বিভাকে কাছে বসাইয়া তাহাই পড়িয়া শুনাইতেন ।

কিন্তু উদয়াদিত্যের মনের ভিত্তরে একটি কষ্ট জাগিয়া আছে। প্রতিদিন, বিভার প্রতি যতই তাঁহার নির্ভরের ভাব বাড়িতেছে, তাঁহার মনের মধ্যে ততই একটা আশঙ্কা জাগিয়া উঠিতেছে। তিনি জানেন, তাঁহার সঙ্গে যাহারই কোন সম্বন্ধ হয়, তাহারই যেন একটা অমঙ্গল ঘটে। এই জন্য বিভাকে ভাল করিয়া ভাল বাসিতেও তাঁহার যেন ভয় করে। যেমন সংক্রামক রোগগ্রস্ত ব্যক্তি স্নেহের মুখ না দেখিয়া সূক্ষ্মা না পাইয়া, একাকী পড়িয়া বরঞ্চ মরিয়া যাইতেও পারে, তবু প্রিয়জনদিগকে কাছে বসিতে বলিতে পারে না—তেমনি উদয়াদিত্য যদিও বিভাকে কাছে না পাইলে থাকিতে পারেন না, তবুও কাছে রাখিবেন কি বলিয়া? তিনি জানেন, বিভা স্বস্তুরালয়ে না গেলে সুখী হইতে পারিবে না, তবু তাহাকে কোন্ প্রাণে তিনি এই কাণ্ড-গারের অঙ্ককারে শোক দুঃখের মধ্যে আবদ্ধ করিয়া রাখিবেন? তিনি ত ডুবিতেই বসিয়াছেন, তবে কেন এমন সময়ে এই অসম্পূর্ণ-সুখ, অতৃপ্ত-আশা স্কুমার বিভাকে আশ্রয় স্বরূপে আলিঙ্গন করিয়া, তাহাকে পর্যন্ত ডুবাই-তেছেন? প্রতিদিন মনে করেন, বিভাকে বলিবেন “তুই যা বিভা;” কিন্তু বিভা যখন উবার বাতাস লইয়া, উবার আলোক লইয়া, তরুণী উবার হাত ধরিয়া কারার মধ্যে প্রবেশ করে, যখন সেই স্নেহের ধন স্কুমার মুখখানি লইয়া কাছে আসিয়া বসে, কত যত্ন কত আদরের দৃষ্টিতে তাঁহার মুখের দিকে...

একবার চাহিয়া দেখে, কত মিষ্ট স্বরে কত কথা জিজ্ঞাসা করে, তখন তিনি আর কোন মতেই প্রাণ ধরিয়া বলিতে পারেন না, “বিভা, তুই যা, তুই আর আসিস্ না, তোকে আর দেখিব না।” প্রত্যহ মনে করেন, কাল বলিব। কিন্তু সে কাল আর কিছুতেই আসিতে চায় না! অবশেষে একদিন দৃঢ় প্রতিজ্ঞা করিলেন। বিভা আসিল, বিভাকে বলিলেন, “বিভা, তুই আর এখানে থাকিস্নে। তুই না গেলে আমি কিছুতেই শান্তি পাইতেছি না। প্রতিদিন সন্ধ্যাবেলায় এই কারাগৃহের অন্ধকারে কে আসিয়া আমাকে যেন বলে, বিভার বিপদ কাছে আসিতেছে। বিভা, আমার কাছ হইতে তোরা শীঘ্র পালাইয়া যা। আমি শনিগ্রহ, আমার দেখা পাইলেই চারিদিক হইতে দেশের বিপদ ছুটিয়া আসে। তুই স্বপ্নের বাড়ি যা’। মাঝে মাঝে যদি সংবাদ পাই, তাহা হইলেই আমি সুখে থাকিব।”

বিভা কিছুক্ষণ চূপ করিয়া রহিল, অবশেষে মুখ তুলিয়া বলিল, “দাদা, তুমি কি মনে কর, তোমাকে এই কারাগারের মধ্যে ফেলিয়া রাখিয়া আমি স্বর্গে গিয়াও সুখী হইব? তুমি আমার জন্য কি না কষ্টিয়াছ, কত না সহিয়াছ, প্রাণ দিয়াও তোমার সেই অসীম স্নেহের ঋণ শুধিতে পারিব না। দাদা, আমাকে ও কথা আর বলিও না, আমি আর সুখভোগ করিতে পারিবও না, আমার আর সুখভোগ করিবার ইচ্ছাও নাই।” বলিতে বলিতে বিভা রুদ্ধকণ্ঠ হইয়া আসিল।

উদয়াদিত্য মুখ নত করিয়া বিভার সেই মুখখানি অনেকক্ষণ ধরিয়া দেখিতে লাগিলেন। তাঁহার ছুই চক্ষু দিয়া বরবর করিয়া অশ্রু পড়িতে লাগিল। উদয়াদিত্য বুঝিলেন, “আমি কারাগার হইতে না মুক্ত হইলে বিভা কিছুতেই আমাকে ছাড়িয়া যাইবে না। কি করিয়া মুক্ত হইতে পারিব!”



উনত্রিংশ পরিচ্ছেদ ।

রামচন্দ্র রায় ভাবিলেন, বিভা যে চন্দ্রবীপে আসিল না, সে কেবল প্রতাপাদিত্যের শাসনে ও উদয়াদিত্যের মন্ত্রণায়। বিভা যে নিজের ইচ্ছায় আসিল না, তাহা মনে করিলে তাঁহার আত্ম-গৌরবে অত্যন্ত আঘাত লাগে। তিনি ভাবিলেন, প্রতাপাদিত্য আমাকে অপমান করিতে চাহে, অতএব সে কখন বিভাকে আমার কাছে পাঠাইবে না—কিন্তু এ অপমান আমিই তাহাকে ফিরাইয়া দিই না কেন? আমিই তাহাকে এক পত্র লিখি না কেন যে, তোমার মেয়েকে আমি পাবি ত্যাগ করিলাম, তাহাকে যেন আর চন্দ্রবীপে পাঠান না হয়! এই রূপ সাতপাঁচ ভাবিয়া পাঁচ জনের সহিত মন্ত্রণা

করিয়া প্রতাপাদিত্যকে ওই মর্মে এক পত্র লেখা হইল । প্রতাপাদিত্যকে এরূপ চিঠি লেখা বড় সাধারণ সাহসের কার্য নহে । রামচন্দ্র রায়ের মনে মনে বিলক্ষণ ভয় হই-
তেছিল । কিন্তু ঢালু পর্বতে বেগে নাবিতে নাবিতে
হাজার ভয় হইলেও যেমন মাঝে থামা যায় না, রামচন্দ্র
রায়ের মনেও সেইরূপ একটা ভাবের উদয় হইয়াছিল ।
সহসা একটা ছঃসাহসিকতায় প্রবৃত্ত হইয়াছেন, শেষ পর্যন্ত
না পৌছিয়া যেন দাঁড়াইতে পারিতেছেন না । রামমোহ-
নকে ডাকিয়া কহিলেন—“এই পত্র যশোহরে লইয়া যা ।”
রামমোহন গোড়হস্তে কহিল, “অজ্ঞা, না মহারাজ, আমি
পারিব না । আমি স্থির করিয়াছি, আর যশোহরে যাইব
না । এক যদি পুনরায় মাঠাকুরাণীকে আনিতে যাইতে
বলেন ত আর একবার যাইতে পারি নতুবা, এ চিঠি লইয়া
যাইতে পারিব না ।” রামমোহনকে আর কিছু না বলিয়া
বুদ্ধ নয়ানচাঁদের হাতে রাজা সেই পত্রখানি দিলেন । সে
সেই পত্র লইয়া যশোহরে যাত্রা করিল ।

পত্র লইয়া গেল বটে, কিন্তু নয়ান চাঁদের মনে বড় ভয়
হইল । প্রতাপাদিত্যের হাতে এ পত্র পড়িলে না জানি
তিনি কি করিয়া বসেন । অনেক ভাবিয়া চিন্তিয়া মহি-
ষীর হাতে সে এই পত্র দিতে সংকল্প করিল । মহিষীর
মনের অবস্থা বড় ভাল নয় । একদিকে বিভার জন্ত
তাঁহার ভাবনা, আর এক দিকে উদয়াদিত্যের জন্ত তাঁহার

কষ্ট। সংসারের গোলেমালে তিনি যেন একবারে কালা-ফালা হইয়া গিয়াছেন। মাঝে মাঝে প্রায় তাঁহাকে কাঁদিতে দেখা যায়। তাঁহার যেন আর ঘরকন্নার মন লাগে না। এইরূপ অবস্থায় তিনি এই পত্রখানি পাইলেন—কি যে করিবেন কিছু ভাবিয়া পাইলেন না। বিভাকে কিছু বলিতে পারেন না; তাহা হইলে স্নকুমার বিভা আর বাঁচিবে না। মহারাজের কানে এ চিঠির কথা উঠিলে কি যে অনর্থপাত হইবে তাহার ঠিকানা নাই। অথচ এমন সংকটের অবস্থায় কাহাকে কিছু না বলিয়া, কাহারো নিকট কোন পরামর্শ না লইয়া মহিষী বাঁচিতে পারেন না। চারিদিক অক্ল পাথার দেখিয়া মহিষী কাঁদিতে কাঁদিতে একবার প্রতাপাদিত্যের কাছে গেলেন। কহিলেন—“মহারাজ, দিভার ত যাহা হয় একটা কিছু করিতে হইবে!”

প্রতাপাদিত্য কহিলেন, “কেন বল দেখি?”

মহিষী কহিলেন, “নাঃ, কিছু যে হইয়াছে তাহা নহে—তবে বিভাকে ত এক সময়ে না এক সময়ে খুন্সরবাড়ি পাঠাইতেই হইবে।”

প্রতাপাদিত্য—“সে ত বুঝিলাম, তবে এত দিন পবে আজ যে সহসা তাহা মনে পড়িল?”

মহিষী ভীত হইয়া কহিলেন—“ঐ তোমার এক কথা—আমি কি বলিতেছি যে কিছু হইয়াছে? যদি কিছু হয়—”

প্রতাপাদিত্য বিরক্ত হইয়া কহিলেন—“হইবে আর কি ?”

মহিষী—“এই মনে কর, যদি জামাই বিভাকে একে-বারে ত্যাগ করে।” বলিয়া মহিষী রুদ্ধকণ্ঠ হইয়া কাঁদিতে লাগিলেন ।

প্রতাপাদিত্য অত্যন্ত ক্রুদ্ধ হইয়া উঠিলেন । তাঁহার চোখ দিয়া অগ্নিকণা বাহির হইল ।

মহারাজের সেই মূর্তি দেখিয়া মহিষী জল মুছিয়া ভাড়াভাড়া কহিলেন “তাই বলিয়া জামাই কি আর সত্য সত্যই লিখিয়াছে যে, ওগো তোমাদের বিভাকে আমি ত্যাগ করিলাম, তাকে আর চন্দ্রদ্বীপে পাঠাইও না, তাহা ত নহে—তবে কথা এই, যদি কোন দিন তাই লিখিয়া বসে !”

প্রতাপাদিত্য কহিল—“তখন তাহার বিহিত বিধান করিব, এখন তাহার জন্ত ভাবিবার অবসর নাই।”

মহিষী কাঁদিয়া কহিলেন,—“মহারাজ, তোমার পায়ে পড়ি, আমার একটি কথা রাখ’ । একবার ভাবিয়া দেখ বিভার কি হইবে ! আমার পাবাণ প্রাণ বলিয়া আজও রহিয়াছে, নহিলে আমাকে যতদূর যন্ত্রণা দিবার তা’ দিয়াছ—উদয়কে—আমার বাছাকে—রাজার ছেলেকে—সামান্য অপরাধীর মত রুদ্ধ করিয়াছ—সে-আমার কাহারো কোন অপকার করে না, কিছুতেই লিপ্ত থাকে না, দোষের মধ্যে

সে কিছু বোঝে সোঝে না, রাজকার্য্য শেখে নাই, প্রজা শাসন করিতে জানে না, তাহার বুদ্ধি নাই, তা' ভগবান তাহাকে যা করিয়াছেন, তাহার দোষ কি।”—বলিয়া মহিষী দ্বিগুণ কাঁদিতে লাগিলেন।

প্রতাপাদিত্য ঈষৎ বিরক্ত হইয়া কহিলেন “ও কথাত অনেকবার হইয়া গিয়াছে। যে কথা হইতেছিল তাহাই বল না।”

মহিষী কপালে করাঘাত করিয়া কহিলেন “আমারি পোড়া কপাল! বলিব আর কি? বলিলে কি তুমি কিছু শোন? এক বার বিভার মুখপানে চাও মহারাজ! সে যে কাহাকেও কিছু বলে না—সে কেবল দিনে দিনে শুকাইয়া যায়, ছায়ার মত হইয়া আসে, কিন্তু সে কথা কহিতে জানে না! তাহার একটা উপায় কর।”

প্রতাপাদিত্য বিরক্ত হইয়া উঠিলেন—মহিষী আর কিছু না বলিয়া ফিরিয়া আসিলেন।

ত্রিংশ পরিচ্ছেদ।

ইতিমধ্যে এক ঘটনা ঘটয়াছে যখন নীতারাম দেখিল, উদয়াদিতাকে কারারুদ্ধ করা হইয়াছে, তখন সে আর হাত পা আছড়াইয়া বাঁচে না। প্রথমেই ত সে রুজ্বিনীর বাড়ি গেল। তাহাকে বাহা মুখে আনিল তাহাই বলিল। তাহাকে মারিতে যায় আর কি! কহিল, “সর্ব-নাশী, তোব ঘরে আগুন জ্বালাইয়া দিব, তোর ভিটায় ঘুষু চরাইব, আর সুবরাজকে খালাস করিব, তবে আমার নাম নীতারাম! আজই আমি রায়গড়ে চলিলাম, রায়গড় হইতে আসি, তার পরে তোর ওই কালামুখ লইয়া এই শানের উপরে ঘষিব, তোর মুখে চূণ কালী মাখাইয়া সহর হইতে বাহির করিয়া দিব, তবে জলগ্রহণ করিব!”

রুজ্বিনী কিয়ৎক্ষণ অনিমেষ নেত্রে নীতারামের মুখের দিকে চাহিয়া শুঁনল, ক্রমে তাহার দাঁতে দাঁতে লাগিল, ঠোটে ঠোট চাপিল। তাহার হাতের মুষ্টি দৃঢ়বদ্ধ হইল, তাহার ঘন-কৃষ্ণ ক্র্যুগলের উপর মেঘ ঘনাইয়া আসিল, তাহার ঘন কৃষ্ণ চক্ষু-তারকার বিদ্যুৎ সঞ্চিত হইতে লাগিল, তাহার সমস্ত শরীর নিস্পন্দ হইয়া গেল; ক্রমে তাহার স্থূল অধরৌষ্ঠ কাঁপিতে লাগিল, ঘন ক্র তরঙ্গিত হইল, অন্ধকার চক্ষে বিদ্যুৎ খেলাইতে লাগিল, কেশরাশি ফুলিয়া উঠিল, হাত পা খড় খড় করিয়া কাঁপিতে আরম্ভ করিল।

একটা পৈশাচিক অভিশাপ, একটা সর্বদ্রব্যক্ষীত কম্পমান হিংসা নীতারামের মাথার উপরে যেন পড়ে পড়ে। সেই মুহূর্তে নীতারাম কুটীর হইতে বাহির হইয়া গেল। ক্রমে যখন রুজ্বিলীর মুষ্টি শিথিল হইয়া আসিল, দাঁত খুলিয়া গেল, অধরোষ্ঠ পৃথক্ হইল, কৃষ্ণিত জ্র প্রসারিত হইল, তখন সে বসিয়া পড়িল, কহিল, “বটে! যুবরাজ তোমারই বটে। যুবরাজের বিপদ হইয়াছে বলিয়া তোমার গায়ে বড় লাগিয়াছে—যেন যুবরাজ আমার কেহ নয়। পোড়ারমুখো, এটা জানিস্ না। সে যে আমারই যুবরাজ, আমিই তাহাব ভাল করিতে পারি, আর আমিই তাহার মন্দ করিতে পারি। আমার যুবরাজকে তুই কাণামুক্ত কবিতো চাহিস্। দেখিব কেমন তাহা পারিস্।”

নীতারাম সেই দিনই রায়গড়ে চলিয়া গেল।

বিকালবেলা বসন্তরায় রায়গড়েব প্রাসাদের বারান্দায় বসিয়া রহিয়াছেন। সম্মুখে এক প্রশস্ত মাঠ দেখা যাইতেছে। মাঠের প্রান্তে খালের পরপারে একটি আশ্রবনের মধ্যে সূর্য্য অস্ত যাইতেছেন। বসন্তরায়ের হাতে তাঁহার চির-সহচর সে সেতারটি আর নাই। বুদ্ধ সেই অন্তম্যান সূর্য্যের দিকে চাহিয়া আপনার মনে গুন্ গুন্ করিয়া গান গাহিতেছেন—

“আমিই শুধু রইছ বাকী।

যা ছিল তা গেল চলে, রইল যা’ তা’ কেবল ফাঁকি।

আমার ব'লে ছিল যারা,
 আর ত তারা দেয় না সাড়া,
 কোথায় তা'রা, কোথায় তা'রা ? কেঁদে কেঁদে কারে ডাকি' ।
 বল্ দেখি মা, শুধাই তোরে,
 “আমার” কিছু রাখলি নে রে ?

আমি কেবল আমার নিয়ে কোন্ প্রাণেতে বেঁচে থাকি ।
 কে জানে কি ভাবিয়া বুদ্ধ এই গান গাহিতে ছিলেন ।
 বুঝি তাঁহার মনে হইতেছিল, গান গাহিতেছি, কিন্তু যাহাদের
 গান শুনাইতাম, তাহারা যে নাই । গান আপুনি আসে,
 কিন্তু গান গাহিয়া যে আর স্মৃথ নাই । এখনো আনন্দ
 ভুলি নাই, কিন্তু যখন আনন্দ জন্মিত, তখন যাহাদের
 আনন্দন করিতে সাধ যাইত, তাহারা কোথায় ? যে দিন
 প্রভাতে রায়গড়ের ঐ তাল গাছটার উপরে মেঘ করিত,
 মনটা আনন্দে নাচিয়া উঠিত, সেই দিনই আমি যাহাদের
 দেখিতে যশোরে যাত্রা করিতাম, তাহাদের কি আর দেখিতে
 পাইব না ? এখনো এক একবার মনটা তেমনি আনন্দে
 নাচিয়া উঠে কিন্তু হা—এই সব বুঝি ভাবিয়া আজ বিকাল
 বেলায় অন্তর্যামন সূর্যের দিকে চাহিয়া বুদ্ধ বসন্তরায়ের মুখে
 আপনা-আপনি গান উঠিয়াছে—“আমিই শুধু রৈলু বাকী ।

এমন সময়ে খাঁ সাহেব আসিয়া এক মন্ত সেলাম করিল ।
 খাঁ সাহেবকে দেখিয়া বসন্তরায় উৎফুল্ল হইয়া কহিলেন—“খাঁ
 সাহেব, আইস, আইস !” অধিকতর নিকটে গিয়া ব্যস্তমন্ত

হইয়া কহিলেন “সাহেব তোমার মুখ অমন মলিন দেখিতেছি কেন ? মেজাজ ভাল আছে ত ?”

খাঁ সাহেব—“মেজাজের কথা আর জিজ্ঞাসা করিবেন না, মহারাজ। আপনাকে মলিন দেখিয়া আমাদের মনে আব স্নুখ নাই। একটি বয়েদ আছে—রাত্রি বলে আমি কেহই নই, আমি বাহাকে মাথায় করিয়া রাখিয়াছি সেই চাঁদ, তাহারি সহিত আমি একত্রে হাসি, একত্রে স্নান হইয়া যাই!—মহারাজ, আমরাই বা কে, আপনি না হাসিলে আমাদের হাসিবার ক্ষমতা কি ? আমাদের আর স্নুখ নাই, জনাব !”

বসন্তরায় ব্যগ্র হইয়া কহিলেন, “সে কি কথা সাহেব ? আমার ত অস্নুখ কিছুই নাই,—আমি নিজে কে দেখিয়া নিজে হাসি—নিজের আনন্দে নিজে থাকি—আমার অস্নুখ কি খাঁ সাহেব ?”

খাঁ—“মহারাজ এখন আপনার আর তেমন গান বাণী শুনা যায় না।”

বসন্তরায় সহসা ঈষৎ গভীর হইয়া কহিলেন, “আমার গান শুনিবে সাহেব ?

“আমিই শুধু রইলু বাকী,

যাছিল তা’ গেল চলে, রইল যা’ তা’ কেবল ফাঁকী।”

খাঁ—“আপনি আর সে সেতার বাজান্ কই ? আপনার সে সেতার কোথায় ?”

বসন্তরায় ঈষৎ হাসিয়া কহিলেন—“সে সেতার কি নাই,

তাহা নয় । সেতার আছে, শুধু তাহার তার ছিঁড়িয়া গেছে, তাহাতে আর সুর মেলে না ।” বলিয়া আশ্রবনের দিকে চাহিয়া মাথায় হাত বুলাইতে লাগিলেন ।

কিয়ৎক্ষণ পরে বসন্তরায় বলিয়া উঠিলেন, “খাঁ সাহেব একটা গান গাও না—একটা গান গাও, গাও “তাজবে তাজ নও বে নও ।”

খাঁ সাহেব গান ধরিলেন “তাজবে তাজ নওবে নও ।” দেখিতে দেখিতে বসন্তরায় মাতিয়া উঠিলেন—আর বসিয়া থাকিতে পারিলেন না ; উঠিয়া দাঁড়াইলেন, একজ্রে গাহিতে লাগিলেন “তাজবে তাজ, নওবে নও ।” ঘন ঘন তাল দিতে লাগিলেন, এবং বার বার করিয়া গাইতে লাগিলেন । গাহিতে গাহিতে সূর্য্য অন্ত গেল, অন্ধকার হইয়া আসিল, রাখালেরা বাড়ি মুখে আসিতে আসিতে গান ধরিল । এমন সময়ে আসিয়া সীতারাম “মহারাজের জয় হোক” বলিয়া ধ্যাম করিল । বসন্তরায় একেবারে চমকিত হইয়া, তৎক্ষণাৎ গান বন্ধ করিয়া, তাড়াতাড়ি তাহার কাছে আসিয়া তাহার গায়ে হাত দিয়া কহিলেন “আরে সীতারাম যে ! তাল আছিল ত ? দাদা কেমন আছে ? দিদি কোথায় ? খবর ভাল ত ?”

খাঁ সাহেব চলিয়া গেল । সীতারাম কহিল “একে একে নিবেদন করিতেছি মহারাজ ।” বলিয়া একে একে সুবাজারে কারারোধের কথা কহিল । সীতারাম আশ্বাশোড়া

সত্য কথা বলে নাই। যে কারণে উদয়াদিত্যের কারারোধ ঘটিয়াছিল, সে কারণটা তেমন স্পষ্ট করিয়া বলে নাই।

বসন্তরায়ের মাথায় আকাশ ভাঙ্গিয়া পড়িল, তিনি সীতারামের হাত দৃঢ় করিয়া ধরিলেন। তাঁহার ক্র উদ্বেগে উঠিল, তাঁহার চক্ষু প্রসারিত হইয়া গেল, তাঁহার অধরোষ্ঠ বিভিন্ন হইয়া গেল—নির্নিমেষ নেত্রে সীতারামের মুখের দিকে চাহিয়া কহিলেন, “অ্যা?”

সীতারাম কহিল, “আজ্ঞা হাঁ মহারাজ।” কিয়ৎক্ষণ চুপ করিয়া বসন্তরায় কহিলেন “সীতারাম।”

সীতারাম—“মহারাজ।”

বসন্তরায় “তাহা হইলে দাদা এখন কোথায়?”

সীতারাম “আজ্ঞা তিনি কারাগারে।”

বসন্তরায় মাথায় হাত বুলাইতে লাগিলেন। উদয়াদিত্য কারাগারে, এ কথাটা বুঝি তাঁহার মাথায় ভাল করিয়া বসিতেছে না, কিছুতেই কল্পনা করিয়া উঠিতে পারিতেছেন না। আবার কিছুক্ষণ বাদে সীতারামের হাত ধরিয়া কহিলেন—“সীতারাম।”

সীতারাম—“আজ্ঞা মহারাজ।

বসন্তরায়—“তাহা হইলে দাদা এখন কি করিতেছে?”

সীতারাম “কি আর করিবেন! তিনি কারাগারেই আছেন।”

বসন্তরায় “তাহাকে কি সকলে বদ্ধ করিয়া রাখিয়াছে?”

সীতারাম “আজ্ঞা হাঁ মহারাজ ।”

বসন্তরায় “তাহাকে কি কেহ একবার বাহির হইতে দেয় না ?”

সীতারাম “আজ্ঞা না ।”

বসন্তরায় “সে একলা কারাগারে বসিয়া আছে ? কেহ তাহাকে স্নেহ করে না ? সন্ধ্যা হইলে সে কি করে ? সে একলা বসিয়া থাকে ?”

বসন্তরায় এ কথাগুলি বিশেষ কোন ব্যক্তিকে জিজ্ঞাসা করেন নাই—আপনা-আপনি বলিতেছিলেন । সীতারাম তাহা বুঝিতে পারে নাই—সে উত্তর করিল—“হাঁ মহারাজ ।”

বসন্তরায় বলিয়া উঠিলেন—“দাদা, তুই আমার কাছে আয়রে । আমি তোকে যত্ন করিব, তোকে কেহ ভাল বাসে না । তোকে কেহ চিনিল না ।”

একত্রিংশ পরিচ্ছেদ ।

বসন্তরায় তাহার পর দিনই যশোহরে যাত্রা করিলেন, কাহারো নিষেধ মানিলেন না । যশোহর পৌছিয়াই একে-বারে রাজবাটির অন্তঃপুরে গেলেন । বিভা সহসা তাহার দাদা মহাশয়কে দেখিয়া যেন কি হইয়া গেল ! কিছুক্ষণ, কি যে করিবে কিছু যেন ভাবিয়া পাইল না । কেবল চোখে বিষ্ময়, অধরে আনন্দ, মুখে কথা নাই, শরীর নিষ্পন্দ—খানিকটা দাঁড়াইয়া রহিল—তাহার পর তাঁহার পায়ের কাছে পড়িয়া প্রণাম করিল—পায়ের ধূলি মাথায় লইল । বিভা উঠিয়া দাঁড়াইলে পর, বসন্তরায় একবার নিতান্ত একাগ্র দৃষ্টে বিভার মুখের দিকে চাহিয়া জিজ্ঞাসা করিলেন “বিভা ?” আর কিছু বলিলেন না কেবল জিজ্ঞাসা করিলেন “বিভা ?” যেন তাঁহার মনে একটি অতিক্রীণ আশা জাগিয়া ছিল যে, সীতারাম যাহা বলিয়াছিল, তাহা সত্য না হইতেও পারে । সমস্তটা স্পষ্ট জিজ্ঞাসা করিতে ভয় হইতেছে পাছে বিভা তাহার উত্তর দিয়া ফেলে ! তাঁহার ইচ্ছা নয় যে বিভা তৎক্ষণাৎ তাঁহার এ প্রশ্নের উত্তর দেয় । তাই তিনি অতি ভয়ে ভয়ে বিভার মুখখানিকে জিজ্ঞাসা করিলেন—“বিভা ?” তাই তিনি অতি একাগ্র দৃষ্টে তাহার মুখের দিকে একবার চাহিলেন । বিভা বুঝিল এবং বিভা উত্তর দিতেও পারিল না । তাহার প্রথম আনন্দ-উচ্ছ্বাস ফুরাইয়া গেছে । আগে

যখন দাদা মহাশয় আসিতেল, সেই সব দিন তাহার মনে গড়িয়াছে ! সে এক কি উৎসবের দিনই গিয়াছে ! তিনি আসিলে কি একটা আনন্দই পড়িত ! সুরমা হাসিয়া তামাসা করিত, বিভা হাসিত কিন্তু তামাসা করিতে পারিত না, দাদা প্রশান্ত আনন্দ মূর্তিতে দাদা মহাশয়ের গান শুনিতেন; আজ দাদা মহাশয় আসিলেন, কিন্তু আর কেহ তাঁহার কাছে আসিল না, কেবল এই অঁধার সংসারে একলা বিস্তা—
স্বথের সংসারের একমাত্র ভগ্নাবশেষের মত একলা—দাদা মহাশয়ের কাছে দাঁড়াইয়া আছে । দাদা মহাশয় আসিলে যে ঘরে আনন্দ-ধ্বনি উঠিত—সেই সুরমার ঘর আজ এমন কেন ? সে আজ স্তব্ধ, অন্ধকার, শূন্যময়—দাদা মহাশয়কে দেখিলেই সে ঘরটা যেন এখনি কাঁদিয়া উঠিবে ! বসন্তরায় একবার কি যেন কিসের আশ্বাসে সেই ঘরের সম্মুখে গিয়া দাঁড়াইলেন—দরজার কাছে দাঁড়াইয়া ঘরের মধ্যে মাথা লইয়া একবার চারিদিক দেখিলেন, তৎক্ষণাৎ মুখ ফিরাইয়া বুকফাটা কণ্ঠে জিজ্ঞাসা করিলেন—“দিদি, ঘরে কি কেহই নাই ?”

বিভা কাঁদিয়া উঠিয়া কহিল, “না, দাদা মহাশয়, কেহই না ।”

স্তব্ধ ঘরটা যেন হা-হা করিয়া বলিয়া উঠিল—“আপ্নে বাহারা ছিল তাহারা কেহই নাই !”

বসন্তরায় অনেক ক্ষণ পর্যন্ত চুপ করিয়া দাঁড়াইয়া রহি-

লেন ; অবশেষে বিভার হাত ধরিয়া আন্তে আন্তে গাহিয়া উঠিলেন—

“আমিই শুধু রৈলুম বাকি !”

বসন্তরায় প্রতাপাদিত্যের কাছে গিয়া নিতান্ত মিনতি করিয়া কহিলেন—“বাবা প্রতাপ, উদয়কে আর কেন কষ্ট দাও—সে তোমাদের কি করিয়াছে ? তাহাকে যদি তোমরা ভাল না বাস, পদে পদেই যদি সে তোমাদের কাছে অপরাধ করে—তবে তাহাকে এই বুড়ার কাছে দাও না। আমি তাহাকে লইয়া যাই—আমি তাহাকে রাখিয়া দিই—তাহাকে আর তোমাদের দেখিতে হইবে না—সে আমার কাছে থাকিবে !”

প্রতাপাদিত্য অনেকক্ষণ পর্যন্ত ধৈর্য্য ধরিয়া চুপ করিয়া বসন্তরায়ের কথা শুনিলেন—অবশেষে বলিলেন—“খুড়া মহাশয়, আমি যাহা করিয়াছি তাহা অনেক বিবেচনা করিয়াই করিয়াছি—এ বিষয়ে আপনি অবশ্যই আমার অপেক্ষা অনেক অল্প জানেন—অথচ আপনি পরামর্শ দিতে আসিয়াছেন, আপনার এ সকল কথা আমি গ্রাহ্য করিতে পারি না।”

তখন বসন্তরায় উঠিয়া প্রতাপাদিত্যের কাছে আসিয়া প্রতাপাদিত্যের হাত ধরিয়া কহিলেন—“বাবা প্রতাপ, মনে কি নাই ? তোকে যে আমি ছেলেবেলায় কোলে-পিঠে করিয়া মানুষ করিলাম, সে কি আর মনে পড়ে না ? স্বর্গীয় দাদা যে দিন তোকে আমার হাতে সমর্পণ করিয়া

গিয়াছেন, সে দিন হইতে আমি কি এক মুহূর্তের জন্য
তাকে কষ্ট দিয়াছি ? অসহায় অবস্থায় যখন তুই আমার
হাতে ছিলি, এক দিনও কি তুই আপনাকে পিতৃহীন বলিয়া
মনে করিতে পারিয়াছিলি ? প্রত্যপ, বল্ দেখি, আমি
তোমার কি অপরাধ করিয়াছিলাম যাহাতে আমার এই বৃদ্ধ
বয়সে তুই আমাকে এত কষ্ট দিতে পারিলি ? এমন কথা
আমি বলি না যে, তোকে পালন করিয়াছিলাম বলিয়া তুই
আমার কাছে ঋণী—তোদের মাহুষ করিয়া আমিই আমার
দাদার মেহ-ঋণ শোধ করিতে চেষ্টা করিয়াছিলাম । অতএব
প্রত্যপ, আমি প্রাপ্য বলিয়া তোমার কাছে কিছুই চাহি না,
কখনো চাহিও নাই, আমি কেবল তোমার কাছে ভিক্ষা চাহি-
তেছি—তাও দিবি না ?”

বসন্তরায়ের চোখে জল পড়িতে লাগিল, প্রতাপাদিত্য
পাষণ মূর্তির ভায় বসিয়া রহিলেন ।

বসন্তরায় আবার কহিলেন—“তবে আমার কথা শুনিবি
না,—আমার ভিক্ষা রাখিবি না ?—কথার উত্তর দিবিনে
প্রত্যপ ?”—দীর্ঘ নিঃশ্বাস ফেলিয়া কহিলেন—“ভাল—আমার
আর একটি ক্ষুদ্র প্রার্থনা আছে, একবার আমি উদয়কে
দেখিতে চাই—আমাকে তাহার সেই কারাগৃহে প্রবেশ
করিতে কেহ যেন নিষেধ না করে—এই অনুমতি দাও !”

প্রতাপাদিত্য তাহাও দিলেন না । তাঁহার বিরুদ্ধে
উদয়াদিত্যের প্রতি এতখানি মেহ প্রকাশ করাতে প্রতাপা-

দিত্য মনে মনে অত্যন্ত বিরক্ত হইয়া উঠিয়াছিলেন। তাঁহার যতই মনে হয় লোকে তাঁহাকেই অপরাধী করিয়া তুলিতেছে, ততই তিনি আরো বাকিয়া দাঁড়ান।

বসন্তরায় নিতান্ত শ্রান মুখে অন্তঃপুরে ফিরিয়া গেলেন—
 তাঁহার মুখ দেখিয়া বিভার অত্যন্ত কষ্ট হইল। বিভা দাদা মহাশয়ের হাত ধরিয়া কহিল—“দাদা মহাশয় আমার ঘরে এস।” বসন্তরায় নীরবে বিভার সঙ্গে সঙ্গে বিভার ঘরে প্রবেশ করিলেন। তিনি ঘরে বসিলে পর বিভা তাহার কোমল অঙ্গুলি দিয়া তাঁহার পাকা চুলগুলি নাড়িয়া দিয়া কহিল—“দাদা মহাশয়, এস,তোমার পাকাচুল তুলিয়া দিই।” বসন্তরায় কহিলেন, “দিদি, সে পাকাচুল কি আর আছে ? যখন বয়স হয় নাই তখন সে সব ছিল, তখন তোদের পাকা-চুল তুলিতে বলিতাম—আজ আমি বুড়া হইয়া গিয়াছি—আজ আর আমার পাকাচুল নাই।”

বসন্তরায় দেখিলেন বিভার মুখখানি মলিন হইয়া আসিল, তাহার চোখ ছলছল করিয়া আসিল। অমনি তাড়াতাড়ি কহিলেন—“আয় বিভা, আয়। গোটাকতক চুল তুলিয়া দে। তোদের পাকাচুল সববরাহ করিয়া উঠিতে আর ত আমি পারি না ভাই। বয়স হইতে চলিল, ক্রমেই মাথায় টাক পড়িতে চলিল—এখন আর একটা মাথার অল্পসন্ধান কর—আমি জবাব দিলাম।” বলিয়া বসন্তরায় হাসিতে লাগিলেন।

একজন দাসী আসিয়া বসন্তরায়কে কহিল “রাণী মা আপনাকে একবার প্রণাম করিতে চান।”

বসন্তরায় মহিষীর ঘরে গেলেন, বিভা কারাগারে গেল।

মহিষী বসন্তরায়কে প্রণাম করিলেন। বসন্তরায় আশীর্বাদ করিলেন “মা, আশুদ্ব্যতী হও।”

মহিষী কহিলেন “কাকা মহাশয়ও আশীর্বাদ আর করিবেন না! এখন আমার মরণ হইলেই আমি বাঁচি।”

বসন্তরায় ব্যস্ত হইয়া কহিলেন “রাম, রাম! ও কথা মুখে আনিতে নাই।”

মহিষী কহিলেন “আর কি বলিব কাকা মহাশয়, আমার ঘরকন্না যেন শনির দৃষ্টি পড়িয়াছে।”

বসন্তরায় অধিকতর ব্যস্ত হইয়া পড়িলেন।

মহিষী কহিলেন, “বিভার মুখ খানি দেখিয়া আমার মুখে আর অন্ন জল রুচে না। তাকে জিজ্ঞাসা করিলে সে কিছু বলে না, কেবল দিনে দিনে তাহার শরীর ক্ষয় হইয়া যাইতেছে! তাকে লইয়া যে আমি কি করিব কিছু ভাবিয়া পাই না!”

বসন্তরায় অত্যন্ত বাকুল হইয়া পড়িলেন।

“এই দেখুন কাকা মহাশয়, এক সর্ব্বনেশে চিঠি আসিয়াছে।” বলিয়া এক চিঠি বসন্তরায়ের হাতে দিলেন।

বসন্তরায় সে চিঠি পড়িতে না পড়িতে মহিষী কাদিয়া বলিতে লাগিলেন—“আমার আর কিসের সুখ আছে!

উদয়—বাছা আমার কিছু জানে না তাহাকে ত মহারাজ—
সে যেন রাজার মতই হয় নাই, কিন্তু তাহাকে ত আমি
গর্ভে ধারণ করিয়াছিলাম, সে ত আমার আপনার সন্তান
বটে। জানি না, বাছা সেখানে কি করিয়া থাকে, একবার
আমাকে দেখিতেও দেয় না !” মহিষী আজ কাল যে কথাই
পাড়েন, উদয়াদিত্যের কথা তাহার মধ্যে একস্থলে আসিয়
পড়ে। ঐ কণ্ঠটাই তাঁহার প্রাণের মধ্যে যেন দিনব্যাপ
জাগিয়া আছে !

চিঠি পড়িয়া বসন্তরায় একেবারে অবাক হইয়া গেলেন—
চূপ করিয়া বসিয়া মাথার হাত বুলাইতে লাগিলেন। কিয়ৎ
ক্ষণ পরে বসন্তরায় মহিষীকে জিজ্ঞাসা করিলেন “এ চিঠি
কাহাকেও দেখাও নি মা ?”

মহিষী কহিলেন “মহারাজ এ চিঠির কথা শুনিলে কি
আর রক্ষা রাখিতেন, বিভাও কি তাহা হইলে আর
বাঁচিত !”

বসন্তরায় কহিলেন “ভাল করিয়াছ। এ চিঠি আর
কাহাকেও দেখাইও না বউ মা। তুমি বিভাকে শীঘ্র
তাহার খবর বাড়ি পাঠাইয়া দাও। মান অপমানের কথা
ভাবিও না !”

মহিষী কহিলেন—“আমিও তাহাই মনে করিয়াছি। মা
লইয়া আমার কাজ নাই, আমার বিভা সুখী হইলেই হইল।
কেবল ভয় হয় পাছে বিভাকে তাহার অযত্ন করে।”

বসন্তরায় কহিলেন—“বিভাকে অবহুঃ করিবে! বিভা কি অবহুঃের ঘন! বিভা যেখানে যাইবে সেই খানেই আদর পাইবে। অমন লক্ষ্মী অমন সোণার প্রতিমা আর কোথাও আছে! রামচন্দ্র কেবল তোমাদের উপর রাগ করিয়াই এই চিঠি লিখিয়াছে, আবার পাঠাইয়া দিলেই তাহার রাগ পড়িয়া যাইবে!” বসন্তরায় তাঁহার সরল হৃদয়ে সরল বুদ্ধিতে এই বুঝিলেন। মহিষীও তাহাই বুঝিলেন।

বসন্তরায় কহিলেন “বাড়িতে রাষ্ট্র করিয়া দাও যে বিভাকে চন্দ্রদীপে পাঠাইতে অনুরোধ করিয়া রামচন্দ্র এক চিঠি লিখিয়াছে। তাহা হইলে বিভা নিশ্চয়ই সেখানে যাইতে আর অমত্ত করিবে না।”

দ্বাত্রিংশ পরিচ্ছেদ ।

সন্ধ্যার পর বসন্তরায় একাকী বহির্কোণে বসিয়া আছেন। এমন সময়ে সীতারাম তাঁহাকে আসিয়া প্রণাম করিল।

বসন্তরায় তাহাকে জিজ্ঞাসা করিলেন—“কি সীতারাম, কি খবর?”

সীতারাম কহিলেন “সে পরে বলিব, আপনাকে আমার সঙ্গে আসিতে হইবে।”

বসন্তরায় কহিলেন “কেন, কোথায় সীতারাম ?”

সীতারাম তখন কাছে আসিয়া বসিল। চুপি চুপি ফিস্ ফিস্ করিয়া কি বলিল। বসন্তরায় চক্ষু বিস্ফারিত করিয়া কহিলেন “সত্য না কি ?”

সীতারাম কহিল “আজ্ঞা হাঁ মহারাজ।”

বসন্তরায় মনে মনে অনেক ইতস্ততঃ করিতে লাগিলেন। কহিলেন—“এখনি যাইতে হইবে না কি !”

সীতারাম “আজ্ঞা, হাঁ !”

বসন্তরায়—“একবার বিভার সঙ্গে দেখা করিয়া আসিব না ?”

সীতারাম—“আজ্ঞা—না—আর সময় নাই !”

বসন্তরায়—“কোথায় যাইতে হইবে ?”

সীতারাম—“আমার সঙ্গে আসুন, আমি লইয়া যাই-তেছি।”

বসন্তরায় উঠিয়া দাঁড়াইয়া কহিলেন—

“একবার বিভার সঙ্গে দেখা করিয়া আসি না কেন ?”

সীতারাম—“আজ্ঞা না, মহারাজ ! দেৱী হইলে সমস্ত নষ্ট হইয়া যাইবে !”

বসন্তরায় তাড়াতাড়ি কহিলেন “তবে কাজ নাই—কাজ নাই !” উভয়ে চলিলেন।

আবার কিছু দূর গিয়া কহিলেন “একটু বিলম্ব করিলে কি চলে না ?”

সীতারাম—”না মহারাজ তাহা হইলে বিপদ হইবে।”

“ছুর্গা বল” বলিয়া বসন্তরায় প্রাসাদের বাহির হইয়া গেলেন ।

বসন্তরায় যে আসিয়াছেন, তাহা উদয়াদিত্য জানেন না । বিভা তাঁহাকে বলে নাই । কেন না যখন উভয়ের দেখা হইবার কোন সম্ভাবনা ছিল না, তখন এ সংবাদ তাঁহার কণ্ঠের কারণ হইত । সন্ধ্যার পর বিদায় লইয়া বিভা কাঁরাগার হইতে চলিয়া গিয়াছে । উদয়াদিত্য একটি প্রদীপ লইয়া একখানি সংস্কৃত গ্রন্থ পড়িতেছেন । জানালার ভিতর দিয়া বাতাস আসিতেছে, দীপের ক্ষীণ শিখা কাঁপিতেছে, অক্ষর ভাল দেখা যাইতেছে না । কীট পতঙ্গ আসিয়া দীপের উপর পড়িতেছে । এক একবার দীপ নিভ'নিভ' হইতেছে । একবার বাতাস বেগে আসিল—দীপ নিভিয়া গেল । উদয়াদিত্য পুঁথি বাঁপিয়া তাঁহার খাটে গিয়া বসিলেন । একে একে কত কি ভাবনা আসিয়া পড়িল । বিভার কথা মনে আসিল । আজ বিভা কিছু দেৱী করিয়া আসিয়াছিল, কিছু সকাল সকাল চলিয়া গিয়াছিল । আজ বিভাকে কিছু বিশেষ স্নান দেখিয়াছিলেন ;—তাহাই লইয়া মনে মনে আলোচনা করিতেছিলেন । পৃথিবীতে যেন তাঁহার আর কেহ নাই—সমস্ত দিন বিভাকে ছাড়া আর কাহাকেও দেখিতে পান না—বিভাই তাঁহার একমাত্র আলোচ্য । বিভার প্রত্যেক হাসিটি প্রত্যেক

কথাটি তাঁহার মনে সঞ্চিত হইতে থাকে—ভূষিত ব্যক্তি তাহার পানীয়ের প্রত্যেক বিন্দুটি পর্য্যন্ত যেমন উপভোগ করে, তেমনি বিভার প্রীতির অতি সামান্য চিহ্নটুকু পর্য্যন্ত তিনি প্রাণ-মনে উপভোগ করেন। আজ তাই এই বিজন ক্ষুদ্র অন্ধকার ঘরের মধ্যে একলা শুইয়া স্নেহের প্রীতিমা বিভার স্নান মুখখানি ভাবিতে ছিলেন। সেই অন্ধকারে বসিয়া তাঁহার একবার মনে হইল—“বিভার কি ক্রমেই বিরক্ত ধরিতেছে? এই নিরানন্দ কারাগারের মধ্যে এক বিষন্ন অন্ধকার মূর্তির সেবা করিতে আর কি তাহার ভাল লাগিতেছে না? আমাকে কি ক্রমেই সে তাহার স্নেহের বাধা—তাহার সংসার পথের কণ্টক বলিয়া দেখিবে? আজ দেৱী করিয়া আসিয়াছে—কাল হয়ত আবে দেৱী কবিয়া আসিবে—তাহার পরে এক দিন হয়ত সমস্ত দিন বসিয়া আছি কখন বিভা আসিবে—বিকাল হইল—সন্ধ্যা হইল—রাত্রি হইল, বিভা আর আসিল না!—তাহার পর হইতে আর হয়ত বিভা আসিবে না।” উদয়াদিত্যের মনে যতই এই কথা উদয় হইতে লাগিল, ততই তাঁহার মনটা হা-হা করিতে লাগিল—তাঁহার কল্পনা-রাজ্যের চারিদিক কি ভয়ানক শূন্যময় দেখিতে লাগিলেন। এক দিন যে আসিবে যে দিন বিভা তাঁহাকে স্নেহশূন্য নয়নে তাহার স্নেহের কণ্টক বলিয়া দেখিবে—সেই অতি দূর কল্পনার আভাস মাত্র লাগিয়া তাঁহার হৃদয় একেবারে ব্যাকুল হইয়া উঠিল।

ত্রয়োত্রিংশ পরিচ্ছেদ ।

সীতারাম যুবরাজকে সঙ্গে করিয়া খালের ধারে লইয়া গেল; সেখানে একখানা বড় নৌকা বাঁধা ছিল, সেই নৌকার সম্মুখে উভয়ে গিয়া দাঁড়াইলেন। তাঁহাদের দেখিয়া নৌকা হইতে এক ব্যক্তি তাড়াতাড়ি বাহির হইয়া আসিয়া কহিল “দাদা, আসিয়াছিস্ ?” উদয়াদিত্য একেবারে চমকিয়া উঠিলেন—সেই চির-পরিচিত স্বর, যে স্বর বালের স্বতির সহিত, যৌবনের স্নেহ হৃৎকের সহিত জড়িত—পৃথিবীতে যতটুকু স্নেহ আছে, যতটুকু আনন্দ আছে যে স্বর তাহারি সহিত অবিচ্ছিন্ন—এক এক দিন কাগাগারে গভীর রাত্রে বিনিস্র নয়নে বসিয়া সহসা স্বপ্নে বংশীধ্বনির শ্রায় যে স্বর শুনিয়া চমকিয়া উঠিতেন—সেই স্বর—বিস্ময় ভাঙ্গিতে না ভাঙ্গিতে বসন্তরায় আসিয়া তাঁহাকে আলিঙ্গন করিয়া ধরিলেন। উভয়ের দুই চক্ষু বাষ্পে পূরিয়া গেল। উভয়ে সেই খানে ভূগের উপরে বসিয়া পড়িলেন। অনেক ক্ষণের পর উদয়াদিত্য কহিলেন “দাদা মহাশয় !” বসন্তরায় কহিলেন “কি দাদা।” আর কিছু কথা হইল না। আবার অনেক ক্ষণের পর উদয়াদিত্য চারিদিকে চাহিয়া, আকাশের দিকে চাহিয়া বসন্তরায়ের মুখের দিকে চাহিয়া আকুল কণ্ঠে কহিলেন—“দাদা মহাশয় আজ আমি স্বাধীনতা পাইয়াছি,—তোমাকে পাইয়াছি, আমার আর স্নেহের কি

অবশিষ্ট আছে ? এ মুহূর্ত আর কতক্ষণ থাকিবে ?” কিয়ৎক্ষণ পরে সীতারাম ঘোড়হাত করিয়া কহিল—“যুবরাজ, নৌকায় উঠুন।”

যুবরাজ চমক ভাঙ্গিয়া কহিলেন—“কেন, নৌকায় কেন ?”

সীতারাম কহিল—“নহিলে এখনি আবার প্রহরীরা আসিবে।”

উদয়াদিত্য বিস্মিত হইয়া বসন্তরায়কে জিজ্ঞাসা করিলেন “দাদা মহাশয়, আমরা কি পলাইয়া যাইতেছি ?

বসন্তরায় উদয়াদিত্যের হাত ধরিয়া কহিলেন, “হাঁ ভাই, আমি তোকে চুরি করিয়া লইয়া যাইতেছি ! এ যে পাষণ্ড-হৃদয়ের দেশ—এরা যে তোকে ভাল বাসে না ! তুই হরিণ শিশু এ ব্যাধের রাজ্যে বাস করিস—আমি তোকে প্রাণের মধ্যে লুকাইয়া রাখিব, সেখানে নিরাপদে থাকিবি !” বলিয়া উদয়াদিত্যকে বুকের কাছে টানিয়া আনিলেন—যেন তাঁহাকে কঠোর সংসার হইতে কাড়িয়া আনিয়া স্নেহের রাজ্যে আবদ্ধ করিয়া রাখিতে চান।

উদয়াদিত্য অনেক ক্ষণ ভাবিয়া কহিলেন “না দাদা মহাশয়, আমি পলাইতে পারিব না।”

বসন্তরায় কহিলেন “কেন দাদা, এ বুড়াকে কি ভুলিয়া গেছিল !”

উদয়াদিত্য কহিলেন “আমি যাই—একবার পিতার

পা ধরিয়া কাঁদিয়া ভিক্ষা চাই গে, তিনি হরত রায়গড়ে যাইতে সম্মতি দিবেন ।”

বসন্তরায় অস্থির হইয়া উঠিয়া কহিলেন “দাদা, আমার কথা শোন, সেখানে যাস্নে, সে চেষ্টা করা নিষ্ফল ।”

উদয়াদিত্য নিখাস ফেলিয়া কহিলেন—“তবে যাই—আমি কারাগারে ফিরিয়া যাই ।”

বসন্তরায় তাঁহার হাত চাপিয়া ধরিয়া কহিলেন “কেমন যাইবি যা দেখি । আমি যাইতে দিব না ।”

উদয়াদিত্য কহিলেন “দাদা মহাশয়, এ হতভাগ্যকে নইয়া কেন বিপদকে ডাকিতেছ ! আমি যেখানে থাকি সেখানে কি তিলেক শান্তির সম্ভাবনা আছে ?”

বসন্তরায় কহিলেন—“দাদা, তোর জন্য যে বিভাগ কারাবানিনী হইয়া উঠিল । এই তাহার নবীন বয়সে সে কি তাহার সমস্ত জীবনের সুখ জলাঞ্জলি দিবে ?” বসন্তরায়ের চোখ দিয়া জল পড়িতে লাগিল ।

তখন উদয়াদিত্য ভাড়াতাড়ি কহিলেন “তবে চল চল দাদা মহাশয় ।” সীতারামের দিকে চাহিয়া কহিলেন “সীতারাম, প্রাসাদে তিন খানি পত্র পাঠাইতে চাই !”

সীতারাম কহিল—“নৌকাতেই কাগজ-কলম আছে, আনিয়া দিতেছি । শীঘ্র করিয়া লিখিবেন অধিক সময় নাই ।” লেখ্য আনিয়া দিল ।

উদয়াদিত্য পিতার কাছে মার্জনা ভিক্ষা করিলেন ।

মাতাকে লিখিলেন—“মা, আমাকে গার্ভে ধরিয়া তুমি কখনো স্মৃথী হইতে পার নাই। এইবার নিশ্চিত হও মা—আমি দাদা মহাশয়ের কাছে যাইতেছি, সেখানে আমি স্মৃথে থাকিব, স্নেহে থাকিব, তোমার কোন ভাবনার কাবণ থাকিবে না” বিভাকে লিখিলেন “চিরায়ুতীক্ষ্ম তোমাকে আর কি লিখিব—তুমি জন্ম জন্ম স্মৃথে থাক—স্বামিগৃহে গিয়া স্মৃথের সংসার পাতিয়া সমস্ত দুঃখ কষ্ট ভুলিয়া যাও!” লিখিতে লিখিতে উদয়াদিত্যের চোখ জলে পূরিয়া আসিল। সীতারাম সেই চিঠি তিন খানি একজন ঝাড়ির হাত দিয়া প্রাসাদে পাঠাইয়া দিল। সকলে নৌকাতে উঠিতেছেন— এমন সময়ে দেখিলেন কে এক জন ছুটিয়া তাঁহাদের দিকে আসিতেছে। সীতারাম চমকিয়া বলিয়া উঠিল “ঐবে—সেই ডাকিনী আসিতেছে!” দেখিতে দেখিতে কুস্কর্ণী কাছে আসিয়া পৌছিল। তাহার চুল গলোথেলো— তাহার অঞ্চল খসিয়া পড়িয়াছে, তাহার জলন্ত অঙ্গারের মত চোক দুটা অগ্নি উদ্গার করিতেছে—তাহার বারবার প্রতিহত বাসনা, অপরিচৃপ্ত প্রতিহিংসা-প্রবৃত্তির যন্ত্রণায় অধীর হইয়া সে যেন বাহাকে সম্মুখে পায়, তাহাকেই থণ্ড থণ্ড করিয়া ছিড়িয়া ফেলিয়া রোষ মিটাইতে চায়। যেখানে প্রহরীরা আঞ্চল নিবাইতেছিল সেখানে বারবার থাকা থাইয়া ক্রোধে অধীর হইয়া পাগলের মতন প্রাসাদে মধ্য প্রবেশ করে—একেবারে প্রতাপাদিত্যের ঘরের

মধ্যে প্রবেশ করিবার জন্য বারবার নিষ্ফল চেষ্টা করে, প্রহরীরা তাকে পাগল মনে করিয়া মারিয়া ধরিয়া তাড়াইয়া দেয়। যজ্ঞশালায় অস্থির হইয়া সে প্রাসাদ হইতে ছুটিয়া আসিতেছে। বাঘিনীর মত সে উদয়াদিত্যের উপর লাফাইয়া পড়িবার চেষ্টা করিল। সীতারাম মাঝে আসিয়া পড়িল—চিৎকার করিয়া সে সীতারামের উপর ঝাপাইয়া পড়িল, প্রাণপণে তাকে দুই হাতে জড়াইয়া ধরিল—মহলা সীতারাম চিৎকার কবিতা উঠিল, দাঁড়ি মাঝিয়া তাড়াতাড়ি আসিয়া বলপূর্বক কুস্তিগীকে ছাড়াইয়া লইল। আত্মঘাতী বৃশ্চিক যেমন নিজের সর্বাঙ্গে হল ফুটাইতে থাকে তেমনি সে অধীর হইয়া নিজের বক্ষ নখে আঁচড়াইয়া, চুল ছিড়িয়া চিৎকার করিয়া কহিল “কিছুই হইল না কিছুই হইল না,—এই আমি মরিলাম এ স্ত্রীহত্যার পাপ তোদের হইবে।” সেই অন্ধকার রাত্রে এই অভিশাপ দিকে দিকে ধ্বনিত হইয়া উঠিল। মুহূর্তের মধ্যে বিদ্যুৎবেগে কুস্তিগী জলে ঝাঁপাইয়া পড়িল। বর্ষায় থালের জল অত্যন্ত বাড়িয়াছিল—কোথায় সে তলাইয়া গেল ঠিকানা রহিল না। সীতারামের কাঁধ হইতে রক্ত পড়িতেছিল, চাদর জলে ভিজাইয়া কাঁধে বাঁধিল। নিকটে গিয়া দেখিল, উদয়াদিত্যের কপালে ঘর্ষবিন্দু দেখা দিয়াছে, তাঁহার হাত পা শীতল হইয়া গিয়াছে, তিনি প্রায় অজ্ঞান হইয়া গিয়াছেন—বসন্তরায়ও যেন দিশাহারা হইয়া অবাক

হইয়া গিয়াছেন ; দাঁড়িগণ উভয়কে ধরিয়া নৌকায় তুলিয়া তৎক্ষণাৎ নৌকা ছাড়িয়া দিল। সীতারাম ভীত হইয়া কহিল “যাত্রার সময় কি অমঙ্গল !”

চতুস্ত্রিংশ পরিচ্ছেদ।

উদয়াদিত্যের নৌকা যখন খাল অতিক্রম করিয়া নদীতে গিয়া পৌঁছিল, তখন সীতারাম নৌকা হইতে নামিয়া সহরে ফিরিয়া আসিল। আদিবার সময় যুবরাজের নিকট হইতে তাঁহার তলোয়ারটি চাহিয়া লইল।

উদয়াদিত্যের তিনখানি পত্র একটি লোকের হাত দিয়া সীতারাম প্রাসাদে প্রেরণ করিয়াছিল বটে, কিন্তু সে চিঠি কয়খানি কাহারো হাতে দিতে তাহাকে গোপনে বিশেষ-রূপে নিষেধ করিয়াছিল। নৌকা হইতে প্রাসাদে ফিরিয়া আসিয়া সীতারাম সেই চিঠি কয়খানি ফিরাইয়া লইল। কেবল মহিনী ও বিভার চিঠিখানি রাখিয়া বাকী পত্রখানি নষ্ট করিয়া ফেলিল।

তখন আশুন আরো ব্যাপ্ত হইয়া পড়িয়াছে। রাজ্যে শয্যা হইতে উঠিয়া কৌতুক দেখিবার জন্ত অনেক লোক জড় হইয়াছে। তাহাতে নির্ঝাঁপের ব্যাঘাত হইতেছে বড় সুবিধা হইতেছে না।

এই অগ্নিকাণ্ডে যে সীতারামের হাত ছিল, তাহা বলাই বাহুল্য । উদয়াদিত্যের প্রতি আসক্ত কয়েক জন প্রজা ও প্রাসাদের ভূত্যের সাহায্যে সে এই কীর্ত্তি করিয়াছে । নক্ষ্যাবেলায় একেবারে পাঁচ ছয়টা ঘরে যে বিনা কারণে আগুন ধরিয়া উঠিল, ইহা কখন দৈবের কৰ্ম্ম নহে, এতক্ষণ এত চেষ্টা করিয়া আগুন নিবিয়াও যে নিবিতেছে না, তাহারো কারণ আছে । যাহারা আগুন নিবাইতে যোগ দিয়াছে, তাহাদের মধ্যেই দুই এক জন করিয়া সীতারামের লোক আছে । যেখানে আগুন নাই তাহারো সেইখানে জল ঢালে, জল আনিতে গিয়া জল আনে না, কোঁশলে কলসী ভাঙ্গিয়া ফেলে, গোলমাল করিয়া এ ওর ঘাড়ের উপর গিয়া পড়ে । আগুন আর নেবে না ।

এদিকে যখন এইরূপে গোলযোগ চলিতেছে, তখন সীতারামের দলস্থ লোকেরা উদয়াদিত্যের শূন্য কারাগারে আগুন লাগাইয়া দিল । একে একে জানালা, দরজা, কড়ি, বরগা, চৌকাঠ, কাঠের বেড়া প্রভৃতিতে আগুন ধরাইয়া দিল । সেই কারাগৃহে যে, কোন স্ত্রে আগুন ধরিতে পারে, ইহা সকলের স্বপ্নেরও অগোচর, সুতরাং সে দিকে আর কাহারো মনোযোগ পড়ে নাই । সীতারাম ফিরিয়া আসিয়া দেখিল, আগুন বেশ রীতিমত ধরিয়াছে । কতকগুলো হাড়, মড়ার মাথা, ও উদয়াদিত্যের তলোয়ারটি সীতারাম কোন প্রকারে উদয়াদিত্যের সেই ঘরের মধ্যে ফেলিয়া দিল ।

এদিকে যাহারা প্রহরী-শালার আগুন নিভাইতে ছিল, কারাগারের দিক হইতে সহসা তাহারা এক চীৎকার শুনিতে পাইল। সকলে চমকিয়া একবাক্যে বলিয়া উঠিল—“ও কি রে!” একজন ছুটিয়া আসিয়া কহিল—“ওরে, যুবরাজের ঘরে আগুন ধরিয়াছে।” প্রহরীদের রক্ত জল হইয়া গেল, দয়াল সিংহের মাথা ঘুরিয়া গেল। কলসী হাত হইতে পড়িয়া গেল, জিনিষপত্র ভূমিতে ফেলিয়া দিল। এমন সময়ে আর এক জন সেই দিক হইতে ছুটিয়া আসিয়া কহিল;—“কারাগৃহের মধ্য হইতে যুবরাজ চীৎকার করিতেছেন, শুনা গেল!”—তাহার কথা শেষ না হইতে হইতেই সীতারাম ছুটিয়া আসিয়া কহিল—“ওবে তোবা শীঘ্র আয়! যুবরাজের ঘরের ছাদ ভাঙ্গিয়া পড়িয়াছে, আরত তাঁহার সাড়া পাওয়া যাইতেছে না।” যুবরাজের কারাগৃহের দিকে সকলে ছুটিল। গিয়া দেখিল গৃহ ভাঙ্গিয়া পড়িয়াছে—চারিদিকে আগুন—ঘরে প্রবেশ করিবার উপায় নাই। তখন সেই খানে দাঁড়াইয়া পরস্পর পরস্পরের প্রতি দোষারোপ করিতে লাগিল। কাহার অসাবধানতায় এই ঘটনাটি ঘটিল, সকলেই তাহা স্থির করিতে প্রবৃত্ত হইল। ঘোরতর বিবাদ বাধিয়া উঠিল, পরস্পর পরস্পরকে গালাগালি দিতে লাগিল, এমন কি, মারামারী হইবার উপক্রম হইল।

সীতারাম ভাবিল, গৃহদাহে যুবরাজের মৃত্যু হইয়াছে। এই সংবাদ রাষ্ট্র করিয়া আপাততঃ কিছু দিন নিশ্চিন্ত

থাকিতে পারিবে। যখন সে দেখিল, ঘরে বেশ করিয়া আগুন লাগিয়াছে, অভিপ্রেত জনরব বিশেষ রূপ রাষ্ট্র হইয়াছে, তখন সে মাথায় চাদর বাঁধিয়া আনন্দ মনে তাহার কুটীরাভিমুখে চলিল। প্রাসাদ হইতে অনেক দূরে আসিল। তখন রাত্রি অনেক, পথে লোক নাই, চারিদিক স্তব্ধ—বাঁশগাচের পাতা ঝর্ ঝর্ করিয়া মাঝে মাঝে দক্ষিণা বাতাস বহিতেছে ;—সীতারামের শৌখীন প্রাণ উল্লসিত হইয়া উঠিয়াছে, সে একটি রস-গর্ভ গান ধরিয়াছে। সেই জনশ্রুত স্তব্ধ পথ দিয়া একাকী পাছু মনের উজ্জ্বল গান গাহিতে গাহিতে চলিল। কিছু দূর গিয়া তাহার মনের মধ্যে এক ভাবনা উপস্থিত হইল। সে ভাবিল, যশোহর হইতে ত সপরিবার পালাইতেই হইবে, অমনি বিনা মেহনতে কিঞ্চিৎ টাকার সংস্থান করিয়া লওয়া যাক্ না। মঙ্গলা পোড়ারমুখী ত মরিয়াছে—বালাই গিয়াছে—একবার তাহার বাড়ি হইয়া যাওয়া যাক্—বেটীর টাকা আছে চের—তাহার ত্রিসংসারে কেহ নাই—সে টাকা আমি না লই ত আর এক জন লইবে,—তায় কাজকি, একবার চেষ্টা করিয়া দেখা যাক্! এইরূপ সাত পাঁচ ভাবিয়া সীতারাম কুন্নিগীর বাড়ির মুখে চলিল—প্রফুল্ল মনে আবার গান ধরিল। যাইতে যাইতে পথে একজন অভিসারিণীকে দেখিতে পাইল। সীতারামের নজরে এ সকল কিছুই এড়াইতে পার্য না। ছুটা রসিকতা করিবার জন্ত তাহার মনে

অনিবার্য আবেগ উপস্থিত হইল—কিন্তু সময় নাই দেখিয়া সে আবেগ দমন করিয়া হনহন করিয়া চলিল ।

সীতারাম রুক্মিণীর কুটারের নিকটে গিয়া দেখিল, ঘর খোলাই আছে । হঠাৎকিন্তু কুটারের মধ্যে প্রবেশ করিয়া একবার চারিদিকে নিরীক্ষণ করিল । ঘোরতর অন্ধকার, কিছুই দেখা যাইতেছে না । একবার চারিদিক হাতড়াইয়া দেখিল । একটা সিঁড়কের উপর ছ'চট খাইয়া পড়িয়া গেল, দুই একবার দেয়ালে মাথা ঠুকিয়া গেল । সীতারামের গা ছম্ছম্ করিতে লাগিল । মনে হইল, কে যেন ঘরে আছে ! কান্নার যেন নিঃশ্বাস প্রশ্বাস শুনা যাইতেছে । আঁস্তে আঁস্তে পাশের ঘরে গেল । গিয়া দেখিল, রুক্মিণীর শয়ন-গৃহ হইতে আলো আসিতেছে । প্রদীপটা এখনো জলিতেছে মনে করিয়া সীতারামের অত্যন্ত আনন্দ হইল । তাড়াতাড়ি সেই ঘরের দিকে গেল । ও কে ও ! ঘবে বসিয়া কে ! বিনিত্র নয়নে চূপ করিয়া বসিয়া কেও রমণী থরথর করিয়া কাঁপিতেছে ! অর্দ্ধাবৃত দেহে ভিজা কাপড় জড়ানো, এলোচুল দিয়া কোঁটা কোঁটা করিয়া জল পড়িতেছে । কাঁপিতে কাঁপিতে তাহার দাঁত ঠক্ ঠক্ করিতেছে ! ঘরে একটি মাত্র প্রদীপ জলিতেছে । সেই প্রদীপের ক্ষীণ আলো তাহার পাংশু বর্ণ মুখের উপর পড়িয়াছে—পশ্চাতে সেই রমণীর অতি বৃহৎ এক ছায়া দেয়ালের উপর পড়িয়াছে । ঘরে আর কিছু নাই—কেবল সেই পাংশু, মুখশ্রী

দেই দীর্ঘ ছায়া, আর এক ভীষণ নিস্তব্ধতা ! ঘরে প্রবেশ করিয়াই সীতারামের শরীর হিম হইয়া গেল । দেখিল ক্লীণ আলোকে, এলোচুলে, ভিজা কাপড়ে সেই মঙ্গলা বসিয়া আছে ! সহসা দেখিয়া, তাহাকে প্রেতনী বলিয়া মনে হইল । অগ্রসর হইতেও সীতারামের সাহস হইল না—ভরসা বাঁধিয়া পিছন ফিরিতেও পারিল না ! সীতারাম নিতান্ত ভীক ছিল না ; অল্পকণ স্তব্ধভাবে দাঁড়াইয়া অবশেষে একপ্রকার বাহ্যিক সাহস ও মৌখিক উপহাসের স্বরে কহিল—“তুই কোথা হইতে ! মাগী, তোর মরণ নাই না কি !” ক্লিষ্ট কটমট করিয়া খানিক ক্ষণ সীতারামের মুখের দিকে চাহিয়া রহিল—তখন সীতারামের প্রাণটা তাহার কণ্ঠের কাছে আসিয়া ধুকধুক করিতে লাগিল । অবশেষে ক্লিষ্ট সহসা বলিয়া উঠিল “বটে ! তোদের এখনো সর্বনাশ হইল না, আর আমি মরিব।” উঠিয়া দাঁড়াইয়া হাত নাড়িয়া কহিল, “যমের দ্বার হইতে ফিরিয়া আসিলাম ! আগে, তোকে, আর তোর যুবরাজকে চুলায় গুয়াইব, তোদের চুলা হইতে দু'মুটা ছাই লইয়া গায়ে মাখিয়া দেহ সার্থক করিব—তার পরে যমের সাথ মিটাইব—তাহার আগে যমালয়ে আমার ঠাই নাই !”

ক্লিষ্ট গলা শুনিয়া সীতারামের অত্যন্ত সাহস হইল । সে সহসা অত্যন্ত অসুস্থ হইয়া দেখাইয়া ক্লিষ্ট সহিত ভাব করিয়া লইবার চেষ্টা করিতে লাগিল । খুব যে কাছে ঘেঁসিয়া

গেল, তাহা নহে, অপেক্ষাকৃত কাছে আসিয়া কোমল স্বরে কহিল,—“মাইরি ভাই, ঐ জন্যই ত রাগ ধরে ! তোমার কখন যে কি মতি হয়, ভাল বুঝিতে পারি না !

গড় করি তোর ভালবাসায় কতই খেলা খেলালে !

এই ভুলে দিস্ স্বর্গে, আবার এই ফেলে দিস্ পাতালে !

বলত মঙ্গলা, আমি তোর কি করেছি ! অধীনের প্রতি এত অগ্রসন্ন কেন ? মান করেছিস্ বুঝি ভাই ? সেই গানটা গাব ?

“মরুটি সেখে সেখে,

(আজ) মরুবোলো তোর চরণ তলে, গলায় চাদর বেঁধে !”

সীতারাম যতই অল্পরাগের ভান করিতে লাগিল কুঞ্জিণী ততই ফুলিয়া ফুলিয়া উঠিতে লাগিল—তাহার আপাদমস্তক রাগে জ্বলিতে লাগিল—সীতারাম যদি তাহার নিজের মাথার চুল হইত, তবে তাহা দুই হাতে পটপট করিয়া ছিঁড়িয়া ফেলিতে পারিত। সীতারাম যদি তাহার নিজের চোখ হইত, তবে তৎক্ষণাৎ তাহা নখ দিয়া উপড়াইয়া পা দিয়া দলিয়া ফেলিতে পারিত। চারিদিকে চাহিয়া দেখিল, কিছুই হাতের কাছে পাইল না ! দাঁতে দাঁতে লাগাইয়া কহিল, “একটু রোস ; তোমার মুণ্ডপাত করিতেছি” বলিয়া থর্ থর্ করিয়া কাঁপিতে কাঁপিতে একটা বাঁটির অশ্বেষণে পাশের ঘরে চলিয়া গেল। এই কিছুক্ষণ হইল—সীতারাম গলায় চাদর

ধাৰিয়া রূপক অলঙ্কারে মরিবার প্রস্তাব উত্থাপিত করিয়াছিল, কিন্তু রুক্মিণীর চেহারা দেখিয়া তাহার রূপক ঘুরিয়া গেল, এবং চৈতন্য হইল যে, সত্যকার ঝাঁটির আঘাতে মরিতে এখনো সে প্রস্তুত হইতে পারে নাই—এই নিমিত্ত অবসর বুঝিয়া তৎক্ষণাৎ কুটীরের বাহিরে সরিয়া পড়িল । রুক্মিণী ঝাঁট হস্তে শূন্য গৃহে আসিয়া ঘরের মেঝেতে নীতারামের উদ্দেশে বারবার করিয়া আঘাত করিল ।

রুক্মিণী এখন “মরিয়া” হইয়াছে । যুবরাজের আচরণে তাহার দুরাশা একেবারে ভাঙ্গিয়া গিয়াছে—তাহার সমস্ত উপায় সমস্ত উদ্দেশ্য একেবারে ভূমিনাৎ হইয়াছে । এখন রুক্মিণীর আর সেই তীক্ষ্ণ শানিত হাস্য নাই, বিদ্যুৎবর্ষী কটাক্ষ নাই, তাহার সেই ভাদ্র মাসের জাহ্নবীর ঢলঢল তরঙ্গ-উচ্ছ্বাস নাই—বাজবাটীর যে সকল ভৃত্যেরা তাহার কাছে আসিত, তাহাদের সহিত বগড়া করিয়া, তাহাদিগকে গালাগালি দিয়া ভাগাইয়া দিয়াছে । দেওয়ানজির জ্যেষ্ঠ পুত্রটি সে দিন পান চিবাইতে চিবাইতে তাহার সহিত বসিকতা করিতে আসিয়াছিল, রুক্মিণী তাহাকে ঝাঁটাইয়া তাড়াইয়াছে । এখন আর কেহ তাহার কাছে ঘেঁসিতে পারে না । পাড়ার সকলেই তাহাকে ভয় করে ।

নীতারাম কুটীর হইতে বাহির হইয়া আসিয়া ভাবিল—মঙ্গলা যুবরাজের পলায়নবৃত্তান্ত সমস্তই অংগত হইয়াছে ; অতএব ইহার দ্বারাই সব জাঁস হইবে—নরকনাশীকে

গলা টিপিয়া মারিয়া আসিলাম না কেন! যাহা হউক—
আমার আর যশোহরে এক মুহূর্ত্ত থাকা শ্রেয় নয়। আমি
এখনই পালাই। সেই রাত্রেই নীতারাম সপবিবারে যশো-
হর ছাড়িয়া রায়গড়ে পলাইল।

শেষ রাত্রে মেঘ করিয়া মুষলধারে বৃষ্টি আরম্ভ হইল—
আগুনও ক্রমে নিবিয়া গেল। যুবরাজের মৃত্যুর জনরব
প্রতাপাদিত্যের কানে গেল। শুনিয়া তৎক্ষণাৎ প্রতাপা-
দিত্য বহির্দেশে তাঁহার সভাবনে আসিয়া বসিলেন।
গ্রহরীদের ডাকাইয়া আনিলেন, মন্ত্রী আসিল, আর দুই এক
জন সভাসদ আসিল। একজন সাক্ষ্য দিল, যখন আগুন
ধূধু করিয়া জলিতেছিল, তখন সে যুবরাজকে জানালার মধ্য
হইতে দেখিয়াছে। আর কয়েক জন কহিল, তাহারা যুব-
রাজের চীৎকার শুনিতে পাইয়াছিল। আর একজন, যুব-
রাজের গৃহ হইতে তাঁহার গলিত দগ্ধ তলোয়ারের অবশি-
ষ্টাংশ আনিয়া উপস্থিত করিল। প্রতাপাদিত্য জিজ্ঞাসা
করিলেন—“খুড়া কোথায়?” রাজবাটি অহুসন্ধান করিয়া
তাঁহাকে খুঁজিয়া পাইল না। কেহ কহিল—যখন আগুন
লাগিয়াছিল, তখন তিনিও কারাগারে ছিলেন—কেহ
কহিল—না, রাত্রেই তিনি সংবাদ পাইয়াছিলেন যে, গৃহদাহে
যুবরাজের মৃত্যু হইয়াছে ও তাহা শুনিয়াই তিনি তৎক্ষণাৎ
যশোর ত্যাগ করিয়া চলিয়া গিয়াছেন। প্রতাপাদিত্য এই-
রূপে যখন সভায় বসিয়া সকলের সাক্ষ্য শুনিতেছেন, এমন

সময়ে, গৃহদ্বারে এক কণরব উঠিল । এক জন স্ত্রীলোক ঘরে প্রবেশ করিতে চায়, কিন্তু প্রহরীরা তাহাকে নিষেধ করিতেছে । শুনিয়া প্রতাপাদিত্য তাহাকে ঘরে লইয়া আসিতে আদেশ করিলেন । একজন প্রহরী রুক্মিণীকে সঙ্গে করিয়া অনিল । রাজা তাহাকে জিজ্ঞাসা করিলেন—“তুমি কি চাও ।” সে হাত নড়িয়া উচ্চৈঃস্ববে বলিল “আমি আর কিছু চাই না—তোমার ঐ প্রহরীদিগকে, সকলকে একে একে ছয় মাস গারদে পচাইয়া ভালকৃত্তা দিয়া খাওয়াও এই আমি দেখিতে চাই । ওরা কি তোমাকে মানেন, না তোমাকে ভয় করে !” এই কথা শুনিয়া প্রহরীরা চারিদিক হইতে গোল করিয়া উঠিল । রুক্মিণী পিছান ফিরিয়া চোখ পাকাইয়া তীব্র এক ধমক দিয়া কহিল “চূপ কর্ মিসেরা । কাল যখন তোদের হাতে পায়ে ধরিয়া, পই পই কবিয়া বলিলাম—ওগো তোমাদের যুবরাজ তোমাদের রায়গড়ের বড় রাজার সঙ্গে পালায়—তখন যে তোরা পোড়াব মুখোবা আমার কথায় কান দিলি নে ? রাজার বাড়ি চাকুরি কর, তোমাদের বড় অহঙ্কার হইয়াছে তোমরা সাপের পাচ পা দেখিয়াছ ! পিপড়ের পাখা ওঠে মরিবার তরে ।”

প্রতাপাদিত্য কহিলেন, “যাহা যাহা ঘটয়াছে, সমস্ত বল ।”

রুক্মিণী কহিল “বলিব আর কি ! তোমাদের যুবরাজ কাল রাত্রে বড় রাজার সঙ্গে পালাইয়াছে ।”

প্রতাপাদিত্য জিজ্ঞাসা করিলেন “ঘরে কে আগুন দিয়াছে জান ?”

রুক্মিণী কহিল—“আমি আর জানি না ! সেই যে তোমাদের সীতারাম । তোমাদের যুবরাজের সঙ্গে যে তার বড় পীরিত—আর-কেউ যেন তাঁর কেউ নয় সীতারামই যেন তাঁর সব । এ সমস্ত সেই সীতারামের কাজ । বুড়া রাজা, সীতারাম, আর তোমাদের যুবরাজ, এই তিন জনে মিলিয়া পরামর্শ করিয়া ইহা করিয়াছে—এই তোমাকে স্পষ্ট বলিলাম !”

প্রতাপাদিত্য অনেক ক্ষণ ধরিয়া স্তব্ধ হইয়া রহিলেন । জিজ্ঞাসা করিলেন, “তুমি এসব কি করিয়া জানিতে পারিলে ?” রুক্মিণী কহিল,—“সে কথায় কাজ কি গা ! আমার সঙ্গে লোক দাও, আমি স্বয়ং গিয়া তাহাদের খুঁজিয়া বাহির করিয়া দিব । তোমার রাজবাড়ির চাকবব সব ভেড়া—উহারা একাজ পারিবে না ।”

প্রতাপাদিত্য রুক্মিণীর সহিত লোক দিতে আদেশ করিলেন ও প্রহরীদিগের প্রতি যথাবিত্ত শাস্তির বিধান করিলেন । একে একে সভাগৃহ শূন্য হইয়া গেল । কেবল মন্ত্রী ও মহারাজ অবশিষ্ট রহিলেন । মন্ত্রী মনে করিলেন, মহারাজ অবশ্য তাঁহাকে কিছু বলিবেন । কিন্তু প্রতাপাদিত্য কিছুই বলিলেন না, স্তব্ধ হইয়া বসিয়া রহিলেন । মন্ত্রী একবার কি বলিবার অভিপ্রায়ে অতি ধীরস্বরে

কহিলেন “মহারাজ !” মহারাজ তাহার কোন উত্তর করিলেন না । মন্ত্রী ধীরে ধীরে উঠিয়া গেলেন ।

সেই দিনেই সন্ধ্যার পূর্বে প্রতাপাদিত্য একজন জেলের মুখে উদয়াদিত্যের পলায়ন সংবাদ পাইলেন । নৌকা করিয়া নলী বাহিয়া উদয়াদিত্য চলিয়া গেলেন সে তাঁহাকে দেখিয়াছিল । ক্রমে ক্রমে অত্যাশ্চর্য্য নানা লোকেব মুখ হইতে সংবাদ পাইতে লাগিলেন । রুক্মিণীর সহিত যে লোকেয়া গিয়াছিল, তাহারা এক সপ্তাহ পরে ফিরিয়া আসিয়া কহিল— যুবরাজকে রায়গড়ে দেখিয়া আনিলাম । রাজা জিজ্ঞাসা করিলেন “সেই স্বীলোকটী কোথায় ?” তাহারা কহিল, “সে আর ফিরিয়া আসিল না, সে সেই খানেই রহিল ।”

তখন প্রতাপাদিত্য মুক্তিয়ার খাঁ নামক তাঁহার এক পাঠান সেনাপতিকে ডাকিয়া তাহার প্রতি গোপনে কি একটা আদেশ করিলেন । সে সেলাম কবিয়া চলিয়া গেল ।

পঞ্চত্রিংশ পরিচ্ছেদ ।

প্রতাপাদিত্যের পূর্বেই মহিষী ও বিভা উদয়াদিত্যের পলায়ন-সংবাদ অবগত হইয়াছিলেন । উভয়েই ভয়ে অভি-
ভূত হইয়া ভাবিতেছিলেন, যে, মহারাজ যখন জানিতে পারি-
বেন, তখন না জানি কি করিবেন ? প্রতিদিন মহারাজ

যখন এক একটি করিয়া সংবাদ পাইতেছিলেন, আশঙ্কায় উভয়ের প্রাণ ততই আকুল হইয়া উঠিতেছিল। এইরূপে সপ্তাহ গেল, অবশেষে মহারাজ বিশ্বাসযোগ্য যথার্থ সংবাদ পাইলেন। কিন্তু তিনি কিছুই করিলেন না। ক্রোধের আভাস মাত্র প্রকাশ করিলেন না। মহিষী আর সংশয়ে থাকিতে না পারিয়া একবার প্রতাপাদিত্যের কাছে গেলেন। কিন্তু অনেক ক্ষণ উদয়াদিত্য নব্বন্ধে কোন কথা জিজ্ঞাসা করিতে সাহস করিলেন না। মহারাজও সে বিষয়ে কোন কথা উত্থাপিত করিলেন না। অবশেষে আর থাকিতে না পারিয়া মহিষী বলিয়া উঠিলেন—“মহারাজ আমার এক ভিক্ষা রাখ, এবাব উদয়কে মাগ কর! বাছাকে আরো যদি কষ্ট দাও তবে আমি বিষ খাইয়া মরিব।”

প্রতাপাদিত্য ঈষৎ বিরক্তিভাবে কহিলেন—“আগে হইতে যে তুমি কাঁদিতে বলিলে! আমিও কিছুই করি নাই।”

পাছে প্রতাপাদিত্য আমার সহসা বাঁকিয়া দাঁড়ান, এই নিমিত্ত মহিষী ও-কথা আর দ্বিতীয় বার উত্থাপিত করিতে সাহস করিলেন না। ভীত মনে ধীরে ধীরে চলিয়া আইলেন। এক দিন, দুই দিন, তিন দিন গেল, মহারাজের কোন প্রকার ভাবান্তর লক্ষিত হইল না। তাহাই দেখিয়া মহিষী ও বিভা আশ্বস্ত হইলেন। মনে করিলেন, উদয়াদিত্য স্থানান্তরে যাওয়ায় মহারাজ মনে মনে বৃষ্টি সঙ্কট হইয়াছেন।

এখন কিছু দিনের জন্য মহিষী এক প্রকার নিশ্চিন্ত হইতে পারিলেন ।

ইতিপূর্বেই মহিষী বিভাকে বলিয়াছেন ও যাড়িতে রাষ্ট্র করিয়া দিয়াছেন যে বিজ্ঞাকে ঋগুরবাড়ি পাঠাইতে অহুরোধ করিয়া রামচন্দ্র রায় এক পত্র লিখিয়াছেন । বিভার মনে আর আশ্লাদ ধরে না । রামমোহনকে বিদায় করিয়া অবধি বিভাব মনে আর এক মুহূর্তের জন্য শান্তি ছিল না । যখন সে অবসর পাইত, তখনি ভাবিত তিনি কি মনে করিতেছেন ? তিনি কি আমার অবস্থা ঠিক বুঝিতে পারিয়াছেন ? হয় ত তিনি রাগ করিয়াছেন ! তাঁহাকে বুঝাইয়া বলিলে তিনি আমাকে কি মাপ করিবেন না ? হা জগদীশ্বর, বুঝাইয়া বলিব কবে ? কবে আবার দেখা হইবে ?” উলটিয়া পালটিয়া বিভা ক্রমিক এই কথাই ভাবিত । বিবানিশি তাহার মনের মধ্যে একটা আশঙ্কা চাপিয়া ছিল । মহিষীর কথা শুনিয়া বিভার কি অপরিণীম আনন্দ হইল, তাহার মন হইতে কি ভয়ানক একটা গুরুভার তৎক্ষণাৎ দূর হইয়া গেল ! লজ্জাসরম দূর করিয়া হাসিয়া কাঁদিয়া সে তাহার মায়ের বুকে মুখ লুকাইয়া কতক্ষণ চুপ করিয়া রহিল । তাহার মা কাঁদিতে লাগিলেন । বিভা যখন মনে কবিল তাহার স্বামী তাহাকে ভুল বুঝেন নাই, তাহার মনের কথা ঠিক বুঝিয়াছেন—তখন তাহার চক্ষে সমস্ত জগৎ নন্দন কানন হইয়া উঠিল । তাহার

স্বামীর হৃদয়কে কি প্রশস্ত বলিয়াই মনে হইল। তাহার স্বামীর ভালবাসার উপর কত খানি বিশ্বাস, কতখানি আস্থা জন্মিল! সে মনে করিল, তাহার স্বামীর ভালবাসা এজগতে তাহার অটল আশ্রয়! সে যে এক বলিষ্ঠ মহাপুরুষের বিশাল শরীরে তাহার ক্ষুদ্র স্নকুমার লতাটির মত বাছ জড়াইয়া নির্ভয়ে অনীম বিশ্বাসে নির্ভর করিয়া রহিয়াছে, সে নির্ভর হইতে কিছুতেই সে বিচ্ছিন্ন হইবে না। বিভা প্রফুল্ল হইয়া উঠিল। তাহার প্রাণ মেঘমুক্ত শরতের আকাশের মত প্রসারিত, নির্মল হইয়া গেল। সে এখন তাহার ভাই সমরাদিত্যের সঙ্গে ছেলেমানুষের মত কত কি খেলা করে। ছোট স্নেহের মেয়েটির মত তাহার মায়ের কাছে কত কি আবদার করে, তাহার মায়ের গৃহকার্য্যে সাহায্য করে। আগে যে তাহাব একটি বাক্যহীন, নিস্তব্ধ, বিষম ছায়ার মত ভাব ছিল, তাহা যুটীয়া গেছে—এখন তাহার প্রফুল্ল হৃদয় খানি পরিস্ফুট প্রভাতের স্থায় তাহার সর্ব্বাঙ্গে বিকশিত হইয়া উঠিয়াছে। আগেকার মত সে সঙ্কোচ, সে লজ্জা, সে বিধান, সে অভিমান, সেই নীরব ভাব আর নাই। সে এখন আনন্দ ভরে, বিশ্বস্ত ভাবে মায়ের সহিত এত কথা বলে যে আগে হইলে বলিতে লজ্জা করিত, ইচ্ছাই হইত না। মায়ের এই আনন্দ দেখিয়া মায়ের অনীম স্নেহ উথলিয়া উঠিল। মনের ভিতরে ভিতরে একটা ভাবনা জাগিতেছে বটে—কিন্তু বিভার নিকট

আভাসেও সে ভাবনা কখন প্রকাশ করেন নাই। মা হইয়া আবার কোন্ প্রাণে বিভার সেই বিমল প্রশান্ত হাসিটুকু একভিল মলিন করিবেন! এই জন্ত মেয়েটি প্রতি দিন চোখের সামনে হাসিয়া খেলিয়া বেড়ায়, মা হাস্য মুখে, অপরিভৃপ্ত নয়নে তাহাই দেখেন!

মহিষীর মনের ভিতর নাকি একটা ভয় একটা স্নেহ বর্তমান ছিল, তারই জন্ত আত্ম কাল করিয়া এ পর্যন্ত বিভাকে আর প্রাণ ধরিয়া স্বশ্রমলয়ে পাঠাইতে পারিতেছেন না। তুই এক সপ্তাহ চলিয়া গেল, উদয়াদিত্যের বিষয়ে সকলেই এক প্রকার নিশ্চিত হইয়াছেন। কেবল বিভার যে কি করিবেন, মহিষী এখনো তাহার একটা স্থির করিতে পারিতেছেন না। এমন আরো কিছু দিন গেল। যতই বিলম্ব হইতেছে, ততই বিভার অধীরতা বাড়িতেছে। বিভা মনে করিতেছে—যতই বিলম্ব হইতেছে, ততই সে যেন তাহার স্বামীর নিকট অপরাধী হইতেছে। তিনি যখন ডাকিয়া পাঠাইয়াছেন—তখন আর কিসের জন্য বিলম্ব করা! একবার তিনি মার্জনা করিয়াছেন, আবার—। কয়েক দিন বিভা আর কিছু বলিল না—অবশেষে একদিন আর থাকিতে পারিল না; মায়ের কাছে গিয়া মায়ের গলা ধরিয়া, মায়ের মুখের নিকে চাহিয়া বিভা কহিল, “মা!” ঐ কথাতাই তাহার মা সমস্ত বুঝিতে পারিলেন, বিভাকে বুকে টানিয়া লইয়া কহিলেন, “কি বাছা!” বিভা কিয়ৎ-

ক্ষণ চূপ করিয়া থাকিয়া অবশেষে বলিল, “মা, তুই আমাকে কবে পাঠাইবি মা!” বলিতে বলিতে বিভার মুখ কান লাল হইয়া উঠিল। মা দ্বিবৎ হাসিয়া জিজ্ঞাসা করিলেন— “কোথায় পাঠাইব বিভু!” বিভা মিনতির স্বরে কহিল— “বল না মা।” মহিষী কহিলেন, “আর কিছু দিন সবুর কর বাছা। শীঘ্রই পাঠাইব।” বলিতে বলিতে তাঁহার চখে জল অসিল।



ষট্‌ত্রিংশ পরিচ্ছেদ।

বহুদিনের পর উদয়াদিত্য রায়গড়ে আসিলেন কিন্তু আগেকার মত তেমন আনন্দ আর পাইলেন না। মনের মধ্যে একটা ভাবনা চাপিয়া ছিল, তাই কিছুই তেমন ভাল লাগিল না। তিনি ভাবিতেছিলেন, দাদা মহাশয় যে কাজ করিয়াছেন, তাঁহার যে কি হইবে তাহার ঠিকানা নাই, পিতা যে সহজে নিষ্কৃতি দিবেন এমন ত বোধ হয় না। আমার কি কক্ষণেই জন্ম হইয়াছিল! তিনি বসন্তরায়ের কাছে গিয়া কহিলেন, “দাদামহাশয়, আমি যাই, যশোহরে ফিরিয়া যাই।” প্রথম প্রথম বসন্তরায় গান গাহিয়া হাসিয়া এ কথা উড়াইয়া দিলেন; তিনি গাহিলেন—

আর কি আমি ছাড়ব তোরে !
 মন দিয়ে মন নাইবা পেলেম
 জোর কোরে রাখিব ধরে ।
 শূন্য ক'রে হৃদয় পুরী প্রাণ যদি করিলে চুরী
 তুমিই তবে থাক সেথায়
 শূন্য হৃদয় পূর্ণ কোরে !

অবশেষে উদয়াদিত্য বারবার কহিলে পর বসন্তরায়ের মনে আঘাত লাগিল, তিনি গান বন্ধ করিয়া বিষম মুখে কহিলেন, “কেন দাদা, আমি কাছে থাকিলে তোর কিসের অসুখ ?” উদয়াদিত্য আর কিছু বলিতে পারিলেন না ।

উদয়াদিত্যকে উন্মনা দেখিয়া বসন্তরায় তাঁহাকে সুখী করিবার জন্ত দিনরাত প্রাণপণে চেষ্টা করিতেন । নেতার বাজাইতেন, গান গাহিতেন, সঙ্গে করিয়া লইয়া ঘুরিয়া বেড়াইতেন—উদয়াদিত্যের জন্য প্রায় তাঁহার রাজকার্য্য বন্ধ হইল । বসন্তরায়ের ভয়, পাছে উদয়াদিত্যকে না রাখিতে পারেন, পাছে উদয়াদিত্য আবার যশোহরে চলিয়া যান । দিন রাত তাঁহাকে চোখে চোখে রাখেন, তাঁহাকে বলেন, “দাদা, তোকে আর সে পাষণ্ড-হৃদয়ের দেশে যাইতে দিব না ।”

দিন-কতক থাকিতে থাকিতে উদয়াদিত্যের মনের ভাবনা অনেকটা শিথিল হইয়া আসিল । অনেক দিনের পর স্বাধীনতা লাভ করিয়া, সঙ্কীর্ণ-প্রসর পাষণ্ডময় চারিটি

কারাভিত্তি হইতে মুক্ত হইয়া বসন্তরায়ের কোমল হৃদয়ের মধ্যে, তাঁহার অদীম স্নেহের মধ্যে বাস করিতেছেন। অনেক দিনের পর চারি দিকে গাছ পাল দেখিতেছেন, আকাশ দেখিতেছেন, দিগ্দিগন্তে পরিব্যাপ্ত উন্মুক্ত উষার আলো দেখিতেছেন, পাখীর গান শুনিতেছেন, দূর দিগন্ত হইতে হু হু করিয়া সর্ব্বাঙ্গে বাতাস লাগিতেছে, রাত্রি হইলে সমস্ত আকাশময় তারা দেখিতে পান, ঘোংস্রার প্রবাহের মধ্যে ডুবিয়া যান, ঘুমন্ত স্তব্ধতার প্রাণের মধ্যে বিরাজ করিতে থাকেন। যেখানে ইচ্ছা যাইতে পাবেন, যাহা ইচ্ছা করিতে পারেন, কিছুতেই আর বাধা নাই। ছেলেবেলা যে সকল প্রজারা উদয়াদিতাকে চিনিত তাহারা দূর দূরান্তর হইতে উদয়াদিতাকে দেখিবার জন্য আসিল। গঙ্গাধর আসিল, ফটিক আসিল, হবিচাচা ও করিম উল্লা আসিল, মথুর তাহার তিনটি ছেলে সঙ্গে করিয়া আসিল, পরাণ ও হর দুই ভাই আসিল, শীতল সন্দার গেণা দেখাইবার জন্ত পাঁচ জন লাঠিয়াল সঙ্গে লইয়া আসিল। প্রভাত যুবরাজের কাছে প্রজারা আশিতে লাগিল। যুবরাজ তাহাদের কত কি কথা ভিজ্ঞাসা করিলেন। এখনো যে উদয়াদিত্য তাহাদিগকে ভোলেন নাই। তাহা দেখিয়া প্রজারা অত্যন্ত আনন্দিত ও বিস্মিত হইল। মথুর কহিল, *মহারাজ, আপনি যে মাসে রায়গড়ে আসিয়াছিলেন সেই মাসে আমার এই ছেলেটি জন্মায়, আপনি দেখিয়া গিয়া-

ছিলেন, তার পরে আপনাব আশীর্বাদে আমার আরো দুইটি সন্তান জন্মিয়াছে।” বলিয়া সে তাহার তিন ছেলেকে যুবরাজের কাছে আনিয়া কহিল, “প্রণাম কর।” তাহার। ভূমিষ্ঠ হইয়া প্রণাম করিল। পরাণ আসিয়া কহিল, “এখান হইতে যশোরে যাইবার সময় হজুর যে নৌকায় গিয়াছিলেন, আমি সেই নৌকায় মাঝি ছিলাম, মহারাজ।” শীতল সর্দার আসিয়া কহিল, “মহারাজ আপনি যখন রায়গড়ে ছিলেন, তখন আমার লাঠি খেলা দেখিয়া বক্‌ষিস্ দিয়া-ছিলেন, আজ, ইচ্ছা আছে, একবার আমার ছেলেদের খেলা মহারাজকে দেখাইব। এস ত বাপধন, তোমরা এগোওত।” বলিয়া ছেলেদের ডাকিল। এইরূপ প্রত্যহ সকাল হইলে উদয়াদিত্যের কাছে দলে দলে প্রজারা আসিত ও সকলে একত্রে মিলিয়া কণা কণিত। মাঝে মাঝে থাকিয়া থাকিয়া বনভরায় আসিয়া গান গাহিতেছেন,

“ভাজ ভানাব আনন্দ দেখে কে !

কে জানে বিদেশ হতে কে এসেছে !

ঘরে ভানার, কে এসেছে !

আকাশে উঠেছে চাঁদা,

সাগর কি থাকে বাঁধা,

বসন্তরাখের প্রাণে চেউ উঠেছে !”

“দাদা, এ গান আমি নিজের বাঁকিছি !” বসন্তরায়
বাঁ নাহেবকে ডাকিয়া এই গান তাহাকে শুনাইলেন ও কহি-

সেন “খাঁ সাহেব, এ গান আমি নিজে বাঁধিয়াছি!” খাঁ সাহেব গান বাঁধাব অনেক তারিক করিলেন, বসন্তরায় অত্যন্ত আনন্দিত হইলেন।

এইরূপ চেহেব মধ্যে, গাছপালার মধ্যে, আনন্দের মধ্যে, পীতাম্বুসেব মধ্যে থাণ্ডিয়া স্বভাবতই উদয়াদিত্যের মন হইতে ভাবনা অনেকটা শিথিল হইয়া আসিল। তিনি চোক বুজিয়া ম'ন করিলেন, পিতা হয়ত রাগ করেন নাই, তিনি হয়ত সন্তুষ্ট হইয়াছেন, নহিলে এত দিন আর কি কিছু করিতেন না!

কিন্তু এইরূপ চোক-বাঁধা বিধানে বেশী দিন মনকে ছুলাইয়া রাখিতে পারিলেন না। তাঁহার দাদামহাশয়ের অন্য মনের মধ্যে কেমন একটা ভয় হইতে লাগিল। যশোহরে ফিরিয়া যাইবার কথা দাদামহাশয়কে বলা বৃথা; তিনি দ্বির করিলেন একদিন লুকাইয়া যশোহবে পালাইয়া য'ইব। আবার সেই কারাগার মনে পড়িল। কোথায় এই আনন্দের স্বাধীনতা, আর কোথায় সেই সঙ্কীর্ণ ক্ষুদ্র কার'গ'বের একঘেয়ে জীবন! কারাগারের সেই প্রতি মুহূর্ত্তকে এক এক বৎসর রূপে মনে পড়িতে লাগিল। সেই নিরালে ক, নির্জন, বাহীন, বন্ধ ঘরট কল্পনায় স্পষ্ট দেখিতে পাইলেন, শরীর শিহরিয়া উঠিল। ভবুও স্থির করিলেন, এখান হইতে একদিন সেই কারাগারের অভিমুখে পালাইতে হইবে। আজই পালাইব,

এমন কথা মনে করিতে পারিলেন না—“একদিন পালা-ইব” মনে করিয়া অনেকটা নিশ্চিন্ত হইলেন ।

আজ বৃহস্পতিবার, বারবেলা, আজ যাত্রা হইতে পারে না, কাল হইবে ।

আজ দিন বড় খারাপ । সকাল হইতে ক্রমাগত টিপ্ টিপ্ করিয়া বৃষ্টি হইতেছে । সমস্ত আকাশ লেপিয়া মেঘ করিয়া আছে । আজ সন্ধ্যাবেলায় রায়গড় ছাড়িয়া যাই-তেই হইবে বলিয়া উদয়াদিত্য স্থির করিয়া রাখিয়াছেন । সকালে যখন বসন্তরায়ের সঙ্গে তাঁহার দেখা হইল, তখন বসন্তরায় উদয়াদিত্যকে জড়াইয়া ধরিয়া কহিলেন, “দাদা, কাল রাত্রে আমি একটা বড় দুঃস্বপ্ন দেখিয়াছি । স্বপ্নটা ভাল মনে পড়িতেছে না, কেবল মনে আছে, তোম্কে আমাতে যেন—যেন জন্মের মত ছাড়াছাড়ি হইতেছে !”

উদয়াদিত্য বসন্তরায়ের হাত ধরিয়া কহিলেন, “না, দাদামহাশয় ।—ছাড়াছাড়ি যদি বা হয়, ত জন্মের মত কেন হইবে ?”

বসন্তরায় অন্য দিকে চাহিয়া ভাবনার ভাবে কহিলেন, “তা’ নয়ত আর কি ! কত দিন আর বাঁচিব বল, বুড়া হইয়াছি !”

গত রাত্রের দুঃস্বপ্নের শেষ তান এখনো বসন্তরায়ের মনের গুহার মধ্যে প্রতিধ্বনিত হইতেছিল, তাই তিনি অন্যমনস্ক হইয়া কি ভাবিতেছিলেন ।

উদয়াদিত্য কিছুক্ষণ চুপ করিয়া থাকিয়া বলিলেন—
“দাদামহাশয়, আবার যদি আমাদের ছাড়াছাড়ি হয় ত কি
হইবে!”

বসন্তরায় উদয়াদিত্যের গলা ধরিয়া কহিলেন, “কেন
ভাই, কেন ছাড়াছাড়ি হইবে? তুই আমাকে ছাড়িয়া
যাসনে। এ বুড়া বয়সে তুই আমাকে ফেলিয়া পালাসনে
ভাই!”

উদয়াদিত্যের চখে জল আসিল। তিনি বিস্মিত হই-
লেন;—তাঁহার মনের অভিসন্ধি যেন বসন্তরায় কি
করিয়া টের পাইয়াছেন। নিঃশ্বাস ফেলিয়া কহিলেন,
“আমি কাছে থাকিলেই যে তোমার বিপদ ঘটবে দাদা
মহাশয়!”

বসন্তরায় হাসিয়া কহিলেন—“কিদের বিপদ ভাই!
এ বয়সে কি আর বিপদকে ভয় করি! মরণের বাড়ি ত আর
বিপদ নাই! তা, মরণ যে আমার প্রতীবেশী; সে নিত্য
আমার তত্ত্ব লইতে পাঠায়, তাহাকে আমি ভয় করি না।
যে ব্যক্তি জীবনের সমস্ত বিপদ অতিক্রম করিয়া বুড়া বয়স
পর্যন্ত বাঁচিয়া থাকিতে পারে, তীরে আসিয়া তাহার নৌকা-
ডুবি হইলই বা?”

উদয়াদিত্য আজ সমস্ত দিন বসন্তরায়ের সঙ্গে সঙ্গে
রহিলেন। সমস্ত দিন টিপ্ টিপ্ করিয়া বৃষ্টি পড়িতে
লাগিল।

বিকালবেলায় বৃষ্টি ধরিয়া গেল, উদয়াদিত্য উঠিলেন ।

বসন্তরায় কহিলেন—“দাদা, কোথায় বাস্ !”

উদয়াদিত্য কহিলেন—“একটু বেড়াইয়া আসি ।”

বসন্তরায় কহিলেন—“আজ নাই বা গেলি ।”

উদয়াদিত্য কহিলেন—“কেন, দাদা মহাশয় ?”

বসন্তরায় উদয়াদিত্যকে জড়াইয়া ধরিয়া কহিলেন
“আজ তুই বাড়ি হইতে বাহির হ’স নে, আজ তুই আমার
কাছে থাক্ ভাই !”

উদয়াদিত্য কহিলেন, “আমি অধিক দূর যাব না দাদা
মহাশয়, এখনি ফিরিয়া আনিব ।” বলিয়া বাহির হইয়া
গেলেন ।

প্রাসাদের বহির্দ্বারে যাইতেই একজন প্রহরী কহিল,
“মহারাজ, আপনার সঙ্গে যাইব ?”

যুবরাজ কহিলেন—“না, আবশ্যক নাই ।”

প্রহরী কহিল—“মহাশয়ের হস্তে অস্ত্র নাই !”

যুবরাজ কহিলেন “অস্ত্রের প্রয়োজন কি ?”

উদয়াদিত্য প্রাসাদের বাহিরে গেলেন । একটী দীর্ঘ
বিস্তৃত মাঠ আছে, সেই মাঠের মধ্যে গিয়া পড়িলেন ।
একলা বেড়াইতে লাগিলেন । ক্রমে, দিনের আলো
মিলাইয়া আসিতে লাগিল । মনে কত কি ভাবনা উঠিল ।
যুবরাজ তাঁহার এই লক্ষ্যহীন উদ্দেশ্যহীন জীবনের কথা
ভাবিতে লাগিলেন । ভাবিয়া দেখিলেন, তাঁহার কিছুই

স্থির নাই, কোথাও স্থিতি নাই—পরের মুহূর্ত্তেই কি হইবে তাহার ঠিকানা নাই। বয়স অল্প, এখনো জীবনের অনেক অবশিষ্ট আছে—কোথাও ঘর বাড়ি না বাঁধিয়া, কোথাও স্থায়ী আশ্রয় না পাইয়া এই সুদূর-বিস্তৃত ভবিষ্যৎ এমন করিয়া কল্পে কাটিবে? তাহার পর মনে পড়িল—বিভা। বিভা এখন কোথায় আছে? এত কাল আমিই তাহার স্মৃতির স্মৃতি আঁড়াল করিয়া বসিয়াছিলাম—এখন কি সে সুখী হইয়াছে? বিভাকে মনে মনে কত আশীর্বাদ করিলেন!

মাঠের মধ্যে রৌদ্রে বাখালদের বসিবার নিমিত্ত অসথ, বট, খেজুর, সুপারি প্রভৃতির এক বন আছে—যুবরাজ তাহার মধ্যে গিয়া প্রবেশ করিলেন। তখন সন্ধ্যা হইয়া আসিয়াছে। অন্ধকার করিয়াছে। যুবরাজের আঁখি পালাইবাব কথা ছিল—সেই সংকল্প লইয়া তিনি মনে মনে আন্দোলন করিতেছিলেন। বসন্তরায় যখন শুনিবেন, উদয়াদিত্য পালাইয়া গেছেন, তখন তাঁহার কিরূপ অবস্থা হইবে—তখন তিনি হৃদয়ে আঘাত পাইয়া করুণ মুখে কেমন করিয়া বলিবেন—“অ্যা! দাদা, আমার কাছ হইতে পালাইয়া গেল” সে ছবি তিনি যেন স্পষ্ট দেখিতে পাইলেন;

এমন সময়ে একজন রমণী কর্কশ কণ্ঠে বলিয়া উঠিল,—
“এই যে গা, এই খানে তোমাদের যুবরাজ এই খানে!”

হুই জন সৈন্য মশাল হাতে করিয়া যুবরাজের কাছে

আসিয়া দাঁড়াইল। দেখিতে দেখিতে আরো অনেকে আসিয়া তাঁহাকে ঘিরিয়া ফেলিল। তখন সেই রমণী তাঁহার কাছে আসিয়া কহিল, “আমাকে চিনিতে পার কি গা! একবার এই দিকে তাকাও! একবার এই দিকে তাকাও।” যুবরাজ মশালের আলোকে দেখিলেন, রুক্মিণী। সৈন্যগণ রুক্মিণীর ব্যবহার দেখিয়া তাহাকে ধমক দিয়া কহিল, “দূর হ মাগী!” সে তাহাতে কর্ণপাতও না করিয়া কহিতে লাগিল—“এ সব কে করিয়াছে? আমি করিয়াছি। এ সব কে করিয়াছে? আমি করিয়াছি। এ সব সৈন্যদের এখানে কে আনিয়াছে! আমি আনিয়াছি! আমি তোমার লাগিয়া এত করিলাম, আর তুমি—” যুবরাজ স্বর্ণায় রুক্মিণীর দিকে পশ্চাৎ ফিরিয়া দাঁড়াইলেন। সৈন্যগণ রুক্মিণীকে বলপূর্ব্বক ধরিয়া তফাৎ করিয়া দিল। তখন মুক্তিয়ার খাঁ সম্মুখে আসিয়া যুবরাজকে সেলাম কবিয়া দাঁড়াইল। যুবরাজ বিস্মিত হইয়া কহিলেন—“মুক্তিয়ার খাঁ, কি খবর!”

মুক্তিয়ার খাঁ বিনীতভাবে কহিল “জ্ঞাব, আমাদের মহারাজের নিকট হইতে আদেশ লইয়া আসিতেছি।”

যুবরাজ জিজ্ঞাসা করিলেন “কি আদেশ!”

মুক্তিয়ার খাঁ প্রতাপাদিত্যের স্বাক্ষরিত আদেশ পত্র বাহির করিয়া যুবরাজের হাতে দিল।

যুবরাজ পড়িয়া কহিলেন, “ইহার জন্য এত সৈন্যের প্রয়োজন কি? আমাকে একখানা পত্র লিখিয়া আদেশ

করিলেইত আমি যাইতাম! আমিওত আপনিই যাইতে ছিলাম, যাইব বলিয়াই স্থির করিয়াছি। তবে আর বিলম্বে প্রয়োজন কি? এখন চল। এখনি যশোহরে ফিরিয়া যাই!” মুক্তিয়ার খাঁ হাত ঘোড় করিয়া কহিল—“এখনি ফিরিতে পারিব না!”

যুবরাজ ভীত হইয়া কহিলেন—“কেন?”

মুক্তিয়ার খাঁ কহিল—“আরেকটি আদেশ আছে, তাহা পালন না করিয়া যাইতে পারিব না।”

যুবরাজ ভীত স্বরে কহিলেন—“কি আদেশ!”

মুক্তিয়ার খাঁ কহিল—“রায়গড়ের রাজার প্রতি মহারাজা প্রাণদণ্ডের আদেশ করিয়াছেন।”

যুবরাজ চমকিয়া উচ্চস্বরে কহিয়া উঠিলেন “না, করেন নাই, মিথ্যা কথা!”

মুক্তিয়ার খাঁ কহিল—“আজ্ঞা যুবরাজ, মিথ্যা নহে। আমার নিকট মহারাজেব স্বাক্ষরিত পত্র আছে।”

যুবরাজ সেনাপতির হাত ধরিয়া ব্যগ্র হইয়া কহিলেন, মুক্তিয়ার খাঁ তুমি ভুল বুঝিয়াছ। মহারাজ আদেশ করিয়াছেন যে যদি উদয়াদিত্যকে না পাও, তাহা হইলে বসন্ত-রায়ের—আমি যখন আপনি ধরা দিতেছি, তখন আর কি! আমাকে এখনি লইয়া চল, এখনি লইয়া চল—আমাকে বন্দী করিয়া লইয়া চল, আর বিলম্ব করিও না!”

মুক্তিয়ার খাঁ কহিল—“যুবরাজ, আমি ভুল বুঝি নাই।
মহারাজ স্পষ্ট আদেশ করিয়াছেন।”

যুবরাজ অধীর হইয়া কহিলেন—“তুমি নিশ্চয়ই ভুল
বুঝিয়াছ। তাঁহার অভিপ্রায় এরূপ নহে। আচ্ছা, চুল,
যশোহরে চল। আমি মহারাজার সম্মুখে তোমাদের বুঝা-
ইয়া দিব, তিনি যদি দ্বিতীয় বার আদেশ করেন, তবে
আদেশ সম্পন্ন করিও।”

মুক্তিয়ার ষোড় হস্তে কহিল, “যুবরাজ, মার্জনা করুন,
তাহা পারিব না।”

যুবরাজ অধিকতর অধীর হইয়া কহিলেন “মুক্তিয়ার,
মনে আছে, আমি এক কালে নিঃহাসন পাইব। আমার
কথা রাখ, আমাকে সন্তুষ্ট কর।”

মুক্তিয়ার নিরুত্তরে দাঁড়াইয়া রহিল।

যুবরাজের মুখ পাংশুবর্ণ হইয়া গেল, তাঁহার কপালে
ধর্মবিন্দু দেখা দিল। তিনি সেনাপতির হাত দৃঢ়ভাবে
ধরিয়া কহিলেন—“মুক্তিয়ার খাঁ, বুদ্ধ, নিরপরাধী, পুণ্যাত্মাকে
বধ করিলে নরকেও তোমার স্থান হইবে না।”

মুক্তিয়ার খাঁ কহিল—“মনিবের আদেশ পালন করিতে
পাপ নাই।”

উদয়াদিত্য উচ্চৈঃস্বরে কহিয়া উঠিলেন “মিথ্যা কথা।
যে ধর্ম শাস্ত্রে তাহা বলে, সে ধর্মশাস্ত্র মিথ্যা। নিশ্চয়
জানিও মুক্তিয়ার পাপ আদেশ পালন করিলে পাপ।”

মুক্তিয়ার নিকন্তরে দাঁড়াইয়া রহিল।

উদয়াদিত্য চারি দিকে চাহিয়া বলিয়া উঠিলেন, “তবে আমাকে ছাড়িয়া দাও। আমি গড়ে ফিরিয়া যাই। তোমার সৈন্যসামন্ত লইয়া সেখানে যাইও—আমি তোমাকে বৃদ্ধে আহ্বান করিতেছি। সেখানে রণক্ষেত্রে জয়লাভ করিয়া তার পরে তোমার আদেশ পালন করিও।”

মুক্তিয়ার নিকন্তরে দাঁড়াইয়া রহিল। সৈন্যগণ অধিকন্তর ঘেসিয়া আসিয়া যুবরাজকে ঘিরিল। যুবরাজ কোন উপায় না দেখিয়া দেই অন্ধকারে প্রাণপণে চীৎকার করিয়া উঠিলেন “দাদা মহাশয়, সাবধান!” বন কাপিয়া উঠিল—মাঠের প্রান্তে গিয়া সে সুর মিলাইয়া গেল। সৈন্যেরা আসিয়া উদয়াদিত্যকে ধরিল। উদয়াদিত্য আর এক বার চীৎকার করিয়া উঠিলেন—“দাদা মহাশয়, সাবধান!” একজন পথিক মাঠ দিয়া যাইতেছিল—শব্দ শুনিয়া কাছে আসিয়া কহিল “কে গো!” উদয়াদিত্য ভাড়াতাড়ি কহিলেন—“যাও যাও—গড়ে ছুটিয়া যাও—মহারাজকে সাবধান করিয়া দাও,” দেখিতে দেখিতে সেই পথিককে সৈন্যেরা গ্রেফতার করিল। যে কেহ সেই মাঠ দিয়া চলিয়াছিল—সৈন্যেরা অবিলম্বে তাহাকে বন্দী করিল।

কয়েক জন সৈন্য উদয়াদিত্যকে বন্দী করিয়া রহিল, মুক্তিয়ার খাঁ এবং অবশিষ্ট সৈন্যগণ সৈনিকের বেশ পরি-
ত্যাগ করিয়া অস্ত্র শস্ত লুকাইয়া লহজ বেশে গড়ের অতি-

মুখে গেল । রায়গড়ের শতাধিক ঘর ছিল, ভিন্ন ভিন্ন
ঘর দিয়া তাহারা গড়ের মধ্যে প্রবেশ করিল ।

তখন সন্ধ্যাকালে বসন্তরায় বসিয়া আত্মিক করিতে-
ছিলেন । ওদিকে রাজবাড়ির ঠাকুর ঘরে সন্ধ্যাপূজার
শাঁক ঘণ্টা বাজিতেছিল । বৃহৎ রাজবাড়িতে কোন কোলা-
হল নাই, চারিদিক নিস্তব্ধ । বসন্তরায়ের নিয়মামুসারে
অধিকাংশ ভৃত্য সন্ধ্যাবেলায় কিছু ক্ষণের জন্য ছুটি পাই-
য়াছে ।

আত্মিক করিতে করিতে বসন্তরায় সহসা দেখিলেন,
তাঁহার ঘরের মধ্যে মুক্তিরায় খাঁ প্রবেশ করিল । বাস্ত-
সমস্ত হইয়া বলিয়া উঠিলেন—“খাঁ সাহেব, এ ঘরে প্রবেশ
ক'বও না । আমি এখনি আত্মিক সারিয়া আসিতেছি ।”

মুক্তিরায় খাঁ ঘরের বাহিরে গিয়া ছুয়াবের নিকট
দাঁড়াইয়া রহিল । বসন্তরায় আত্মিক সমাপন করিয়া তাড়া-
তাড়ি বাহিরে আসিয়া মুক্তিরায় খাঁর গায়ে হাত দিয়া
জিজ্ঞাসা করিলেন “খাঁ সাহেব, ভাল আছ ত ?”

মুক্তিরায় স্বেচ্ছায় করিয়া সংক্ষেপে কহিল, “হাঁ মহা-
রাজ !”

বসন্তরায় কহিলেন—“আহারাদি হইয়াছে ?”

মুক্তিরায়—“আজ্ঞা হাঁ ।”

বসন্তরায়—“আজ তবে, তোমার এখানে থাকিবার
বন্দোবস্ত করিয়া দিই !”

মুক্তিয়ার কহিল—“আজ্ঞা না, প্রয়োজন নাই। কাজ শারিয়া এখনি যাইতে হইবে।”

বসন্তরায়—“না, তা’ হইবে না খাঁ সাহেব, আজ তোমাদের ছাড়িব না, আজ এখানে থাকিতেই হইবে।”

মুক্তিয়ার—“না, মহারাজ শীঘ্রই যাইতে হইবে।”

বসন্তরায় জিজ্ঞাসা করিলেন, “কেন বল দেখি ? বিশেষ কাজ আছে বুঝি ? প্রতাপ ভাল আছে ত ?”

মুক্তিয়ার—“মহারাজ ভাল আছেন।”

বসন্তরায়—“তবে, কি তোমার কাজ, শীঘ্র বল। বিশেষ জরুরি শুনিয়া উদ্বেগ হইতেছে। প্রতাপের ত কোন বিপদ ঘটে নাই।”

মুক্তিয়ার—“আজ্ঞা না, তাঁহার কোন বিপদ ঘটে নাই। মহারাজার একটি আদেশ পালন করিতে আসিয়াছি।”

বসন্তরায় তাড়াতাড়ি জিজ্ঞাসা করিলেন “কি আদেশ—এখনি বল !”

মুক্তিয়ার খাঁ এক আদেশ পত্র বাহির করিয়া বসন্তরায়ের হাতে দিল। বসন্তরায় আলোর কাছে লইয়া পড়িতে লাগিলেন। ইতিমধ্যে একে একে সমুদয় সৈন্ত দরজার নিকট আসিয়া ঘেরিয়া দাঁড়াইল।

পড়া শেষ করিয়া বসন্তরায় ধীরে ধীরে মুক্তিয়ার খাঁর নিকট আসিয়া জিজ্ঞাসা করিলেন—“এ কি প্রতাপের লেখা ?”

মুক্তিয়ার কহিল “হাঁ ।”

বসন্তরায় আবার জিজ্ঞাসা করিলেন, “খাঁ সাহেব, এ কি প্রতাপের স্বহস্তে লেখা ?”

মুক্তিয়ার কহিল—“হাঁ মহারাজ !”

তখন বসন্তরায় কাঁদিয়া বলিয়া উঠিলেন “খাঁ সাহেব, আমি প্রতাপকে নিজের হাতে মারুখ করিয়াছি !”

কিছুক্ষণ চুপ করিয়া রহিলেন—অবশেষে আবার কহিলেন, “প্রতাপ যখন এতটুকু ছিল, আমি তাহাকে দিন-রাত কোলে করিয়া থাকিতাম—সে আমাকে এক মুহূর্ত ছাড়িয়া থাকিতে চাহিত না ! সেই প্রতাপ, বড় হইল, তাহার বিবাহ দিয়া দিলাম, তাহাকে সিংহাসনে বসাইলাম—তাহার সম্ভানদের কোলে লইলাম—সেই প্রতাপ আজ স্বহস্তে এই লেখা লিখিয়াছে খাঁ সাহেব ?”

মুক্তিয়ার খাঁর চোখের পাতা ভিজিয়া আসিল—সে অধোবদনে চুপ করিয়া দাঁড়াইয়া রহিল ।

বসন্তরায় জিজ্ঞাসা করিলেন—“দাদা কোথায় ? উদয় কোথায় ?”

মুক্তিয়ার খাঁ কহিল “তিনি বন্দী হইয়াছেন—মহারাজের নিকট বিচারের নিমিত্ত প্রেরিত হইয়াছেন ।”

বসন্তরায় বলিয়া উঠিলেন—“উদয় বন্দী হইয়াছে ? বন্দী হইয়াছে খাঁ সাহেব ? আমি একবার তাহাকে কি দেখিতে পাইব না ?”

মুক্তিয়ার খাঁ ঘোড়হাত করিয়া কহিল—“না, স্রনাব, হকুম নাই!”

বসন্তরায় সাক্ষনেত্রে মুক্তিয়ার খাঁর হাত ধরিয়া কহিলেন—“একবার আমাকে দেখিতে দিবে না খাঁ সাহেব!”

মুক্তিয়ার কহিল—আমি আদেশ-পালক ভৃত্য মাত্র।”

বসন্তরায় গভীর নিশ্বাস ফেলিয়া কহিলেন—“এ সংসারে কাহাণে দয়ামায়া নাই, এস সাহেব—তোমার আদেশ পালন কর!”

মুক্তিয়ার তখন মাটি ছুঁইয়া সেলাম করিয়া ঘোড় হন্তে কহিল—“মহারাজ, আমাকে মার্জনা করিবেন—আমি প্রভুর আদেশ পালন করিতেছি মাত্র—আমার কোন দোষ নাই।”—

বসন্তরায় কহিলেন—“না সাহেব—তোমার দোষ কি?—তোমার কোন দোষ নাই। তোমাকে আর মার্জনা করিব কি?” বলিয়া মুক্তিয়ার খাঁর কাছে গিয়া তাহাঙ্গ সহিত কোলাকুলি করিলেন—কহিলেন “প্রতাপকে বলিও, আমি তাহাকে অশীর্বাদ করিয়া মরিলাম। আর দেখ খাঁ সাহেব, আমি মরিবার সময় তোমার উপরেই উদয়ের ভার দিয়া গেলাম সে নিরপরাধী—দেখিও অন্যায় বিচারে সে যেন আর কষ্ট না পায়।”

বলিয়া বসন্তরায় চোক বুজিয়া ইষ্ট দেবতার নিকট ভূমিষ্ঠ

হইয়া রহিলেন, দক্ষিণ হস্তে মালা জপিতে লাগিলেন—ও
কহিলেন “সাহেব, এইবার !”

মুক্তিয়ার খাঁ ডাকিল, “আবদুল !” আবদুল মুক্ত তলো-
য়ার হস্তে আসিল। মুক্তিয়ার মুখ ফিরাইয়া সরিয়া গেল।
মুহূর্তপরেই রক্তাক্ত অসি হস্তে আবদুল গৃহ হইতে বাহির
হইয়া আসিল—গৃহে রক্তস্রোত বহিতে লাগিল।



সপ্তত্রিংশ পরিচ্ছেদ ।

মুক্তিয়ার খাঁ ফিরিয়া আসিল। রায়গড়ে অধিকাংশ
সৈন্য রাখিয়া উদয়াদিতাকে লইয়া তৎক্ষণাৎ যশোহরে
যাত্রা করিল। পথে যাইতে দুই দিন উদয়াদিত্য খাদ্য দ্রব্য
স্পর্শ করিলেন না—কাহারো সহিত একটি কথাও কহিলেন
না—কেবল চুপ করিয়া ভাবিতে লাগিলেন। পাষাণ-
মূর্তির ন্যায় স্থির—তঁাহার নেত্রে নিদ্রা নাই, নিষেধ নাই,
দক্ষ নাই, দৃষ্টি নাই—কেবলি ভাবিতেছেন। নৌকায়
উঠিলেন—নৌকা হইতে মুখ বাড়াইয়া জলের দিকে চাহিয়া
রহিলেন, নৌকা চলিতে লাগিল—দাঁড়ের শব্দ শুনিতে লাগি-
লেন, জলের কল্লোল কানে প্রবেশ করিল তবুও কিছুই শুনি-
লেন না, কিছুই দেখিলেন না, কেবলি ভাবিতে লাগিলেন।
রাত্রি হইল, আকাশে তারা উঠিল—মাঝিরা নৌকা বাঁধিয়া

রাখিল, নৌকায় সকলেই যুমাইল, কেবল জলের শব্দ শুনা যাইতেছে, নৌকার উপর ছোট ছোট তরঙ্গ আসিয়া আঘাত করিতেছে—যুবরাজ এক দৃষ্টে সম্মুখে চাহিয়া—সুদূর প্রসারিত তরঙ্গ বালির চড়ার দিকে চাহিয়া কেবলি ভাবিতে লাগিলেন । ঐত্বে মাঝিরা জাগিয়া উঠিল—নৌকা খুলিয়া দিল—উষার বাতাস বহিল—পূর্বদিক রাঙা হইয়া উঠিল, যুবরাজ ভাবিতে লাগিলেন ! তৃতীয় দিবসে যুবরাজের দুই চক্ষু ভাসাইয়া হহ করিয়া অশ্রু পড়িতে লাগিল—হাতের উপর মাথা রাখিয়া জলের দিকে চাহিয়া রহিলেন—আকাশের দিকে চাহিয়া রহিলেন—নৌকা চলিতে লাগিল—তীরের গাছপালাগুলি মেঘের মত চোখের উপর দিয়া চলিয়া যাইতে লাগিল, চোখ দিয়া সহস্র ধারায় অশ্রু পড়িতে লাগিল । অনেক ক্ষণের পর অবসর বুঝিয়া মুক্তিরার খাঁ ব্যথিত হৃদয়ে যুবরাজের নিকট আসিয়া বসিল—বিনীত ভাবে জিজ্ঞাসা করিল—“যুবরাজ, কি ভাবিতেছেন !” যুবরাজ চমকিয়া উঠিলেন—অনেকক্ষণ স্তব্ধ ভাবে অবাক হইয়া মুক্তিরারের মুখের দিকে চাহিয়া রহিলেন । মুক্তিরারের মুখে মমতার ভাব দেখিয়া সহসা রুদ্ধ শ্রোণ খুলিয়া যুবরাজ বলিয়া উঠিলেন—“ভাবিতেছি, পৃথিবীতে জন্মাইয়া আমি কি করিলাম । আমার জন্য কি সর্বনাশই হইল ! হে বিধাতা, যাহারা দুর্বল এ পৃথিবীতে তাহারা কেন জন্মায় ? যাহারা নিজের বলে সংসারে দাঁড়াইতে পারে না—যাহারা পদে পদে পরকে ঝড়াইয়া ধরে—

তাহাদের দ্বারা পৃথিবীর কি উপকার হয় ? তাহারা যাহাকে ধরে তাহাকেই ডুবায়—পৃথিবীর সকল কাজেই বাধা দেয়—নিজেও দাঁড়াইতে পারে না, আর সকলকেও ভারাক্রান্ত করে।—আমি একজন দুর্বল ভীক, ঈশ্বর আমাকেই বাঁচাইলেন, আর যাহারা সংসারের আনন্দ ছিল সংসারের ভরসা ছিল—আমার জন্য তাহাদেরই বিনাশ করিলেন ? আর না, এ সংসার হইতে আমি বিদায় লইলাম।”

উদয়াদিত্য বন্দীভাবে প্রতাপাদিত্যের সম্মুখে আনীত হইলেন। প্রতাপাদিত্য তাঁহাকে অন্তঃপুরের কক্ষে লইয়া গিয়া দ্বার রুদ্ধ করিলেন। প্রতাপাদিত্যের কাছে আসিতেই উদয়াদিত্যের শরীর যেন শিহরিয়া উঠিল, অনিবার্য যুগায় তাঁহার সর্বশরীরের মাংস যেন কুণ্ঠিত হইয়া আসিল—তিনি পিতার মুখের দিকে আর চাহিতে পারিলেন না।

প্রতাপাদিত্য গম্ভীর স্ববে কহিলেন—“কোন্ শাস্তি তোমার উপযুক্ত ?”

উদয়াদিত্য অবিচলিত ভাবে কহিলেন, “আপনি যাহা আদেশ করেন।”

প্রতাপাদিত্য কহিলেন—“তুমি আমার এ রাজ্যের যোগ্য নহ।”

উদয়াদিত্য কহিলেন—“না মহারাজ, আমি যোগ্য নহি। আমি আপনার রাজ্য চাহি না—আপনার সিংহাসন হইতে আমাকে অব্যাহতি দিন এই ভিক্ষা।”

প্রতাপাদিত্যও তাহাই চান, তিনি কহিলেন—“তুমি যাঁহা বলিতেছ, তাঁহা যে সত্যই তোমার হৃদয়ের ভাব তাঁহা কি করিয়া জানিব?”

উদয়াদিত্য কহিলেন—“দুর্বলতা লইয়া জন্মগ্রহণ করিয়াছি বটে, কিন্তু আজ পর্য্যন্ত নিজের স্বার্থের জন্য কখনো মিথ্যা কথা বলি নাই। বিশ্বাস না করেন যদি, আজ আমি মা কালীর চরণ স্পর্শ করিয়া শপথ করিব—আপনার রাজ্যের এক সূচাগ্রভূমিও আমি কখনো শাসন করিব না—সমরাদিত্যই আপনার রাজ্যের উত্তরাধিকারী।”

প্রতাপাদিত্য সন্তুষ্ট হইয়া কহিলেন—“তুমি তবে কি চাও?”

উদয়াদিত্য কহিলেন—“মহারাজ, আমি আর কিছুই চাই না—কেবল আমাকে পিঞ্জর রুদ্ধ পশুর মত গারদে পুরিয়া রাখিবেন না। আমাকে পরিত্যাগ করুন, আমি এখনি কাশী চলিয়া যাই। আর একটি ভিক্ষা—আমাকে কিঞ্চিৎ অর্থ দিন—আমি সেখানে দাদামহাশয়ের নামে এক অতিথিশালা ও একটি মন্দির প্রতিষ্ঠা করিব।”

প্রতাপাদিত্য কহিলেন—“আচ্ছা, তাহাই স্বীকার করিতেছি।”

সেই দিনই উদয়াদিত্য মন্দিরে গিয়া প্রতাপাদিত্যের সম্মুখে শপথ করিয়া কহিলেন—“মা কালী, তুমি সাক্ষী থাক, তোমার পা ছুইয়া আমি শপথ করিতেছি—যত দিন

আমি বাঁচিয়া থাকিব, যশোহরের মহারাজের রাজ্যের এক তিলও আমি আমার বলিয়া গ্রহণ করিব না—যশোহরের সিংহাসনে আমি বসিব না, যশোহরের রাজ্যদণ্ড আমি স্পর্শও করিব না । যদি কখনো করি, তবে এই দাদা মহাশয়ের হত্যার পাপ সমস্ত যেন আমারই হয় !” বলিয়া শিহরিয়া উঠিলেন ।

মহারাজী যখন শুনিলেন, উদয়াদিত্য কাশী চলিয়া যাইতেছেন, তখন উদয়াদিত্যের কাছে আসিয়া কহিলেন, “বাবা উদয় আমাকেও তোর সঙ্গে লইয়া চল ।”

উদয়াদিত্য কহিলেন, “সে কি কথা মা । তোমার সমরাদিত্য আছে, তোমার সমস্ত সংসার এখানে রহিল, তুমি যদি এখান হইতে যাও, তবে যশোরে রাজলক্ষ্মী থাকিবে না ।”

মহিষী কাদিয়া কহিলেন, “বাছা, এই বয়সে তুই যদি সংসার ছাড়িয়া গেলি, আমি কোন্ প্রাণে সংসার লইয়া থাকিব ? রাজ্য সংসার পরিত্যাগ করিয়া তুই সন্যাসী হইয়া থাকিবি—তাকে সেখানে কে দেখিবে ? তোর পিতা পাষণ্ড বলিয়া আমি তোকে ছাড়িতে পারিব না ।” মহিষী তাঁহার সকল সন্তানের মধ্যে উদয়াদিত্যকে অধিক ভাল বাসিতেন, উদয়াদিত্যের জন্য তিনি বুক ফাটিয়া কাঁদিতে লাগিলেন ।

উদয়াদিত্য মায়ের হাত ধরিয়া অশ্রুনেত্রে কহিলেন

“মা, তুমি ত জানই রাজবাড়িতে থাকিলে আমার পদে পদে আশঙ্কার কারণ থাকিবে—তুমি নিশ্চিন্ত হও মা, আমি বিশ্বেশ্বরের চরণে গিয়া নিরাপদ হই!”

উদয়াদিত্য বিভার কাছে গিয়া কহিলেন—“বিভা, দিদি আমার, কাশী যাইবার আগে তোকে আমি স্মৃতি করিয়া যাইব। আমি নিজের সঙ্গে করিয়া তোকে শ্বশুর বাড়ি লইয়া যাইব, এই আমার একমাত্র সাধ আছে।”

বিভা উদয়াদিত্যকে জিজ্ঞাসা করিল, “দাদা, দাদা-মহাশয় কেমন আছেন?”

“দাদা মহাশয় ভাল আছেন।” বলিয়াই উদয়াদিত্য তাড়াতাড়ি সেখান হইতে চলিয়া গেলেন।

অষ্টত্রিংশ পরিচ্ছেদ।

উদয়াদিত্য ও বিভার যাত্রার উদ্যোগ হইতে লাগিল। বিভা মায়ের গলা ধরিয়া কাঁদিল। অন্তঃপুরে যে যেখানে ছিল, শ্বশুরালয়ে যাইবার আগে সকলেই বিভাকে নানা প্রকার সত্বপদেশ দিতে লাগিল।

মহিষী একবার উদয়াদিত্যকে ডাকিয়া পাঠাইলেন—কহিলেন, “বাবা, বিভাকে ত লইয়া যাইতেছ, যদি তাহার অযত্ন করে!”

উদয়াদিত্য চমকিয়া উঠিয়া কহিলেন, “কেন মা, তাহারা অযত্ন করিবে কেন ?”

মহিষী কহিলেন, “কি জানি, তাহারা যদি বিভার উপর রাগ করিয়া থাকে !”

উদয়াদিত্য কহিলেন—“না, মা, বিভা ছেলে মানুষ, বিভার উপর কি তাহারা কখন রাগ করিতে পারে ?”

মহিষী কাঁদিয়া কহিলেন—“বাছা, সাবধানে লইয়া যাইও, যদি তাহারা অনাদর করে, তবে আর বিভা বাঁচিবে না !”

উদয়াদিত্যের মনে একটা আশঙ্কা জাগিয়া উঠিল । বিভাকে যে স্বশ্রাণয়ে অনাদর করিতে পারে, আগে তাহা তাহার মনেই হয় নাই । উদয়াদিত্য মনে করিয়াছিলেন, তাঁহার কর্মফল সমস্তই বৃষ্টি শেষ হইয়া গিয়াছে—দেখিলেন, এখনো শেষ হয় নাই । বিভাকে তিনি আশ্রয় করিয়াছিলেন, তাহার পরিণাম স্বরূপে বিভার অদৃষ্টে কি আছে তা' কে জানে !

যাত্রার সময় উদয়াদিত্য ও বিভা মাকে আসিয়া প্রণাম করিলেন—পাছে যাত্রার বিঘ্ন হয়, মহিষী তখন কাঁদিলেন না, তাঁহারা চলিয়া যাইতেই তিনি ভূমে লুটাইয়া পড়িয়া কাঁদিতে লাগিলেন । উদয়াদিত্য ও বিভা পিতাকে প্রণাম করিয়া আসিলেন, বাড়ির অন্যান্য গুরু জনদের প্রণাম করিলেন । উদয়াদিত্য সমরাদিত্যকে কোলে তুলিয়া লইয়া

তাহাকে চুম্বন করিলেন ও আপনার মনে কহিলেন—
 “বৎস, যে সিংহাসনে তুমি বসিবে, সে সিংহাসনের অভিশাপ তোমাকে স্পর্শ যেন না করে!” রাজ বাড়ির ভৃত্যেরা উদয়াদিত্যকে বড় ভাল বাসিত, তাহারা একে একে আসিয়া তাঁহাকে প্রণাম করিল, সকলে কাঁদিতে লাগিল। অবশেষে মন্দিরে গিয়া উভয়ে দেবতাকে প্রণাম করিয়া যাত্রা করিলেন।

শোক বিপদ অত্যাচারেব রক্তভূমি পশ্চাতে পড়িয়া রহিল—জীবনের কারাগার পশ্চাতে পড়িয়া রহিল। উদয়াদিত্য মনে করিলেন, এ বাড়িতে এ জীবনে আর প্রবেশ করিব না। একবার পশ্চাৎ ফিরিয়া দেখিলেন। দেখিলেন—রক্তপিপাসু কঠোর হৃদয় রাজবাটি আকাশের মধ্যে মাথা তুলিয়া দৈত্যের ন্যায় দাঁড়াইয়া আছে। পশ্চাতে বড়বস্ত্র, যথেষ্টাচারিতা, রক্তলালসা, দুর্বলের পীড়ন, অসহায়ের অশ্রুজল পড়িয়া রহিল, সম্মুখে অনন্ত স্বাধীনতা, প্রকৃতির অকলঙ্ক সৌন্দর্য, হৃদয়ের স্বাভাবিক স্নেহ স্নমতা তাহাকে আলিঙ্গন করিবার জন্য দুই হাত বাড়াইয়া দিল। তখন নবে প্রভাত হইয়াছে। নদীর পূর্ব পারে বনাস্তুর মধ্য হইতে কিরণের ছটা উর্দ্ধশিখা হইয়া উঠিয়াছে; গাছপালার মাথার উপরে সোনার আভা পড়িয়াছে—লোক জন জাগিয়া উঠিয়াছে, মাঝীরা আনন্দে গান গাহিতে গাহিতে পাল তুলিয়া নৌকা খুলিয়া দিয়াছে। প্রকৃতির

এই বিমল, প্রশান্ত, পবিত্র প্রভাত-মুখলী দেখিয়া উদয়া-
দিতোর প্রাণ পাখীদের সহিত স্বাধীনতার গান গাহিয়া
উঠিল। মনে মনে কহিলেন “জন্ম জন্ম যেন প্রকৃতির এই
বিমল শ্যামল ভাবের মধ্যে স্বাধীন ভাবে বিচরণ করিতে
পাই আর সরল-প্রাণদের সহিত একত্রে বাস করিতে পাবি।”

নৌকা ছাড়িয়া দিল। মাঝীদের গান ও জলের কল্লোল
শুনিতে শুনিতে উভয়ে অগ্রসর হইলেন। বিভার প্রশান্ত
হৃদয়ে আনন্দের উষালোক বিরাজ করিতেছিল, তাহার
মুখ চক্ষে অরুণের দীপ্তি। সে যেন এতদিনের পর একটা
দুঃস্বপ্ন হইতে জাগিয়া উঠিয়া জগতের মুখ দেখিয়া আশ্বস্ত
হইল। বিভা যাইতেছে। কাহার কাছে যাইতেছে ?
কে তাহাকে ডাকিয়াছে ? অনন্ত অচল প্রেম তাহাকে
ডাকিয়াছে—বিভা ছোট পাখীটির মত ডানা ঢাকিয়া সেই
কোমল প্রেমের স্তরের মধ্যে আরামে বিশ্বস্ত হৃদয়ে লুকা-
ইয়া থাকিবে। জগতের চারিদিকে সে আজ স্নেহের
সমুদ্র দেখিতে পাইতেছে। উদয়াদিভা বিভাকে ফাছে
ডাকিয়া জলের কল্লোলের ন্যায় মৃদুস্বরে তাহাকে কতকি
কাহিনী শুনাইতে লাগিলেন। যাহা শুনিল বিভার তাহাই
ভাল লাগিল।

রামচন্দ্র রায়ের রাজ্যের মধ্যে নৌকা প্রবেশ করিল।
চারিদিক দেখিয়া বিভার মনে এক অভূতপূর্ব আনন্দের
উদয় হইল। কি সুন্দর শোভা ! কুটীরগুলি দেখিয়া লোক-

জনদের দেখিয়া বিভার মনে হইল সকলে কি সুখেই আছে। বিভার ইচ্ছা হইতে লাগিল, প্রজাদিগকে কাছে ডাকিয়া তাহাদের রাজার কথা একবার জিজ্ঞাসা করে। প্রজাদিগকে দেখিয়া তাহার মনে কেমন এক প্রকার অপূৰ্ণ স্নেহের উদয় হইল। যাহাকে দেখিল, সকলকেই তাহার ভাল লাগিল। মাঝে মাঝে ছুই এক জন দরিদ্র দেখিতে পাইল, বিভা মনে মনে কহিল, “আহা, ইহার এমন দশা কেন ? আমি অন্তঃপুরে গিয়া ইহাকে ডাকাইয়া পাঠাইব। যাহাতে ইহার দুঃখ মোচন হয়, তাহাই করিব।” সকলই তাহার আপনার বলিয়া মনে হইল। এ রাজ্যে যে দুঃখদারিদ্র্য আছে, ইহা তাহার প্রাণে সহিল না। বিভার ইচ্ছা করিতে লাগিল, প্রজারা তাহার কাছে আসিয়া একবার তাহাকে মা বলিয়া ডাকে, তাহার কাছে নিজের নিজের দুঃখ নিবেদন করে ও সে সেই দুঃখ দূর করিয়া দেয়।

রাজধানীর নিকটবর্তী গ্রামে উদয়াদিত্য নৌকা লাগাইলেন। তিনি স্থির করিয়াছেন, রাজবাটিতে তাঁহাদের আগমন বার্তা বলিয়া পাঠাইবেন ও তাহার অভ্যর্থনা করিয়া তাঁহাদের লইয়া যাইবে। যখন নৌকা লাগাইলেন তখন বিকাল হইয়া গিয়াছে। উদয়াদিত্য মনে করিলেন কাল প্রাতে লোক পাঠান যাইবে—বিভার মনের ইচ্ছা—আজই সংবাদ দেওয়া হয়।

উনচত্বারিংশ পরিচ্ছেদ ।

আজ লোকজনরা ভারি ব্যস্ত । চারিদিকে বাজনা বাজিতেছে । গ্রামে যেন একটা উৎসব পড়িয়াছে । একে বিভার প্রাণে অধীর আনন্দ জাগিতেছে, তাহার পরে চারিদিকে বাজনার শব্দ শুনিয়া, আনন্দ-কোলাহল শুনিয়া তাহার হৃদয় যেন উচ্ছসিত হইয়া উঠিল । পাছে উদয়াভ্যের কাছে তাহার এই অত্যধিক আনন্দ প্রকাশ হইয়া পড়ে, এই জন্য কত কষ্টে সে হাসি নিবারণ করিয়া রাখিয়াছে ! উদয়াদিত্য নদীতীরে উৎসবের ভাব দেখিয়া কি হইতেছে জানিবার জন্য গ্রামে বেড়াইতে গেলেন ।

এমন কিছুক্ষণ গেল । একজন তীর হইতে জিজ্ঞাসা করিল—“কাহাদের নৌকা গা ?” নৌকা হইতে রাজবাটির ভৃত্যেরা বলিয়া উঠিল—“কেও ? রামমোহন যে ? আরে, এস এস !” রামমোহন তাড়াতাড়ি নৌকায় প্রবেশ করিল । নৌকায় একলা বিভা বসিয়া আছে । রামমোহনকে দেখিয়াই বিভা হর্ষে উচ্ছলিত হইয়া কহিল—“মোহন ।”

রামমোহন কহিল—“মা ।”

রামমোহন বিভার সেই সরল আনন্দে পরিপূর্ণ, হাসি হাসি মুখ খানি অনেকক্ষণ দেখিয়া ম্লান মুখে কহিল—“মা, তুমি আজ আসিলে ?”

বিভা তাড়াতাড়ি কহিল—“হাঁ মোহন । মহারাজ কি

ইহারি মধ্যে সংবাদ পাইয়াছেন ? তুই কি আমাকে লইতে আসিয়াছিস ?”

রামমোহন কহিল—“না মা, অত ব্যস্ত হইও না—আজ থাক’—আর এক দিন লইয়া যাইব ।”

রামমোহনের ভাব দেখিয়া বিভা একেবারে মলিন হইয়া গিয়া কহিল—“কেন মোহন, আজ কেন যাইব না !”

রামমোহন কহিল—“আজ সন্ধ্যা হইয়া গিয়াছে—আজ থাক না ।”

বিভা নিতান্ত ভীত হইয়া কহিল “সত্য করিয়া বল মোহন, কি হইয়াছে ?”

রামমোহন আর থাকিতে পারিল না। আত্মগোপন করা তাহার অভ্যাস নাই। সেই থানেই সে বসিয়া পড়িল—কাঁদিয়া কহিল—“মা জননি, আজ তোমার রাজ্যে তোমার স্থান নাই—তোমার রাজবাটিতে তোমার গৃহ নাই। আজ মহারাজ বিবাহ করিতেছেন ।”

বিভার মুখ একেবারে পাণ্ডুবর্ণ হইয়া গেল। তাহার হাত-পা হিম হইয়া গেল।—রামমোহন কহিতে লাগিল “মা, যখন তোর এই অধম সন্তান তোকে ডাকিতে গিয়াছিল, তখন তুই কেন আসিলি না মা ? তখন তুই নিষ্ঠুর পাষাণী হইয়া আমাকে কেন ফিরাইয়া দিলি মা ? মহারাজের কাছে আমার যে আর মুখ রহিল না ! বুক ফাটিয়া গেল, তবু যে তোর হইয়া একটি কথাও কহিতে পারিলাম না !”

বিভা আর চোখে কিছু দেখিতে পাইল না,—মাথা ঘুরিয়া সেইখানে পড়িয়া গেল। রামমোহন ভাড়াভাড়া জল আনিয়া বিভার মুখে চোখে ছিটা দিল। কিছুক্ষণ পরে বিভা উঠিয়া বসিল। এক আঘাতে বিভার সমস্ত জগৎ ভাঙ্গিয়া গেছে। স্বামীর রাজ্যের মধ্যে আসিয়া রাজধানীর কাছে পৌঁছিয়া, রাজপুরীর দ্বারা আসিয়া ভূবার্ত-হৃদয় বিভার সমস্ত স্বপ্নের আশা মরোচিকার মত মিলাইয়া গেল।

বিভা আকুল ভাবে কহিল—“মোহন, তিনি যে আমাকে ডাকাইয়া পাঠাইয়াছেন—আমার আসিতে কি বড় বিলম্ব হইয়াছে?”

মোহন কহিল “বিলম্ব হইয়াছে বৈকি।”

বিভা অণীর হইয়া কহিল—“আর কি মার্জনা করিবেন না?”

মোহন কহিল—“মার্জনা আর করিলেন কই?”

বিভা কহিল—“মোহন, আমি কেবল একবার তাঁহাকে দেখিতে যাইব।” বলিয়া উদ্ধ্বাসে কাঁদিয়া উঠিল।

রামমোহন চোখ মুছিয়া কহিল—“আজ থাক না মা।”

বিভা কহিল—“না মোহন, আমি আজই একবার তাঁহাকে দেখিয়া আসিব।”

রামমোহন কহিল—“যুবরাজ আগে গ্রাম হইতে ফিরিয়া আসুন।”

বিভা কহিল—“না মোহন, আমি এখনি একবার যাই।” বিভা মনে করিয়াছিল, উদয়াদিত্য এ সংবাদ শুনিলে অপমানের ভয়ে পাছে না যাইতে দেয়।

রামমোহন কহিল—“তবে একখনি শিবিকা আনাই।”

বিভা কহিল—“শিবিকা কেন? আমি কি রাণী, যে শিবিকা চাই! আমি একজন সামান্ত প্রজার মত, একজন ভিখারিণীর মত যাইব—আমার শিবিকায় কাজ কি?”

রামমোহন কহিল—“আমার প্রাণ থাকিতে আমি তাহা দেখিতে পারিব না!”

বিভা কাতর স্বরে কহিল—“মোহন, তোর পায়ে পড়ি, আমাকে আর বাধা দিস্ নে—বিলম্ব হইয়া যাইতেছে!”

রামমোহন ব্যথিত হৃদয়ে কহিল—“আচ্ছা, মা, তাহাই হউক!”

বিভা সামান্ত রমণীর বেশে নৌকা হইতে বাহির হইল। নৌকার ভূতেরা আনিয়া কহিল—“এ কি মা, এমন করিয়া এ বেশে কোথায় যাও!”

রামমোহন কহিল—“এ ত মায়েরি রাজ্য—যেখানে ইচ্ছা, সেই খানেই যাইতে পারেন!”

ভূতেরা আপত্তি করিতে লাগিল, রামমোহন তাহাদের ভাগাইয়া দিল।

একবার মনে করিতেছেন “আমি কি ভয়ানক স্বার্থপর ! আমি বিভাকে ভালবাসি বলিয়া তাহার যে ঘোরতর শত্রুতা করিতেছি, কোন শত্রুও বোধ করি এমন পারে না।” বার বার করিয়া প্রতিজ্ঞা করিতেছেন আর বিভার উপরে নির্ভর করিবেন না—কিন্তু যখনি কল্পনা করিতেছেন তিনি বিভাকে হারাইয়াছেন, তখনি তাঁহার মনের সে বল চলিয়া যাইতেছে, তখনি তিনি একেবারে অকূল পাথারে পড়িয়া যাইতেছেন—মরণাপন্ন মজ্জমান ব্যক্তির মত বিভার কাল্পনিক মূর্তিকে আকূল ভাবে আঁকড়িয়া ধরিতেছেন।

এমন সময়ে বহির্দর্শে সহসা “আগুন আগুন” বলিয়া এক ঘোরতর কোলাহল উঠিল। উদয়াদিত্যের বুক কাঁপিয়া উঠিল। সহসা নানা কণ্ঠের নানাবিধ চিৎকার আকাশে উঠিল—বাহিরে শত শত লোকের দ্রুত পদ শব্দ শুনা গেল। উদয়াদিত্য বুঝিলেন, প্রাসাদের কাছাকাছি কোথাও আগুন লাগিয়াছে। অনেক ক্ষণ ধরিয়া গোলমাল চলিতে লাগিল—তাঁহার মন অত্যন্ত অধীর হইয়া উঠিল। সহসা দ্রুতবেগে তাঁহার কারাগারের দ্বার খুলিয়া গেল। কে একজন তাঁহার অন্ধকার গৃহে প্রবেশ করিল—তিনি চমকিয়া উঠিয়া জিজ্ঞাসা করিলেন “কে ও?”

সে উত্তর করিল “আমি দীতারাম—আপনি বাহির হইয়া আসুন।”

উদয়াদিত্য কহিলেন—“কেন?”

সীতারাম কহিল—“সুবরাজ কারাগৃহে আগুন লাগিয়াছে, শীঘ্র বাহির হইয়া আসুন।” বলিয়া তাঁহাকে ধরিয়া প্রায় তাঁহাকে বহন করিয়া কারাগারের বাহিরে লইয়া গেল।

অনেক দিনের পর উদয়াদিত্য আজ মুক্ত স্থানে আসিলেন—মাথার উপরে সহসা অনেকটা আকাশ দেখিতে পাইলেন, বাতাস যেন তাহার বিস্তৃত বক্ষ প্রসারিত করিয়া তাঁহাকে আলিঙ্গন করিতে লাগিল। চোখের বাধা চারিদিক হইতে খুলিয়া গেল। সেই অন্ধকার রাতে, আকাশের অসংখ্য তারকার দৃষ্টির নিম্নে, বিস্তৃত মাঠের মধ্যে কোমল তৃণজালের উপর দাঁড়াইয়া সহসা তাঁহার মনের মধ্যে এক অপরিণীম অনির্বচনীয় আনন্দের উদয় হইল। সেই আনন্দে কিয়ৎক্ষণ নিস্তব্ধ থাকিয়া তাহার পর সীতারামকে জিজ্ঞাসা করিলেন—“কি করিব, কোথায় যাইব?” অনেক দিন সঙ্কীর্ণ স্থানে বদ্ধ ছিলেন, চলেন ফেরেন নাই—আজ এই বিস্তৃত মাঠের মধ্যে আসিয়া অসহায় ভাবে সীতারামকে জিজ্ঞাসা করিলেন “কি করিব? কোথায় যাইব?” সীতারাম কহিল “আসুন, আমার সঙ্গে আসুন।”

এদিকে আগুন খুব জ্বলিতেছে। বৈকালে কতকগুলি প্রজা প্রধান কর্মচারীদের নিকট কি-একটা নিবেদন করিবার জন্য আসিয়াছিল। তাহারা প্রাদাদের প্রাঙ্গণে একত্র বসিয়াছিল—তাহারাই প্রথমে আগুনের গোল তোলে।

প্রহরীদের বাণের জন্য কারাগারের কাছে একটি দীর্ঘ কুটারশ্রেণী ছিল—সেই থানেই তাহাদের চারপাই, বাসন, কাপড়চোপড় জিনিষপত্র সমস্তই থাকে । অগ্নির সংবাদ পাইয়াই যত প্রহরী পারিল সকলেই ছুটিয়া গেল, যাহারা নিতান্তই পারিল না, তাহারা হাত পা আছড়াইতে লাগিল । উদয়াদিত্যের গৃহদ্বারেও দুই এক জন প্রহরী ছিল বটে, কিন্তু সেখানে কড়াকড় পাহারা দিবার কোন আবশ্যকই ছিল না । দস্তব ছিল বলিয়া তাহারা পাহারা দিত মাত্র । কারণ উদয়াদিত্য এমন শাস্ত ভাবে তাঁহার গৃহে বসিয়া থাকিতেন যে বোধ হইত না যে তিনি কখন পলাইবার চেষ্টা করিবেন বা তাঁহার পলাইবার ইচ্ছা আছে । এই জন্ত তাঁহার দ্বারের প্রহরীরা সর্বাগ্রে ছুটিয়া গিয়াছিল । রাত হইতে লাগিল আশুমান নেবে না—কেহ বা জিনিষ পত্র সরাইতে লাগিল, কেহ বা জল ঢালিতে লাগিল, কেহ বা কিছুই না করিয়া কেবল গোলমাল করিয়াই বেড়াইতে লাগিল, আশুমান নিবিলে পর তাহারাই সকলের অপেক্ষা অধিক বাহবা পাইয়াছিল । এইরূপ সকলে ব্যস্ত আছে, এমন সময়ে একজন জ্বীলোক তাহাদের মধ্যে ছুটিয়া আসিল, সে কি একটা বলিতে চায়—কিন্তু তাহার কথা শোনে কে ? কেহ তাহাকে গালাগালি দিল, কেহ তাহাকে ঠেলিয়া ফেলিয়া দিল—কেহই তাহার কথা শুনিল না । যে শুনিল সে কহিল “যুবরাজ পলাইলেন তাতে আমার

কি মাগি, তোরই বা কি ? সে দয়াল সিং জানে—আমার ঘর ফেলিয়া এখন আমি কোথাও যাইতে পারি না।” বলিয়া সে ভিড়ের মধ্যে মিশিয়া গেল। এইরূপ বারবার প্রতিহত হইয়া সেই রমণী অতি প্রচণ্ড হইয়া উঠিল। একজন বাহাকে সমুখে পাইল তাহাকেই সবলে ধরিয়া কহিল—“পোড়ারমুখা, তোমরা কি চোখের মাথা খাইয়াছ ? রাজার চাকরী কর সে জ্ঞান কি নাই ? কাল রাজাকে বলিয়া হেঁটোয় কাঁটা উপরে কাঁটা দিয়া তোমাদের মাটিতে পুঁতিব তবে ছাড়িব। যুবরাজ যে পলাইয়া গেল !”

“ভালই হইয়াছে—তোর তাহাতে কি ?” বলিয়া সে তাহাকে উত্তমরূপে প্রহার করিল—যাহারা ঘরে আগুন লাগাইয়াছিল, এ ব্যক্তি তাহাদের মধ্যে একজন। প্রহার খাইয়া সেই রমণীর মূর্তি অতি ভীষণ হইয়া উঠিল—ক্লদ্ব বাঘিনীর মত তাহার চোক ছুটা জলিতে লাগিল, তাহার চুল গুলা ফুলিয়া উঠিল, সে দাঁতে দাঁতে কিড়মিড় করিতে লাগিল, তাহার সেই মুখের উপর বহুশিখার আভা পড়িয়া তাহার মুখ পিশাচীর মত দেখিতে হইল। সমুখে একটা কাঠখণ্ড জলিতেছিল, সেইটি তুলিয়া লইল, হাত পুড়িয়া গেল, কিন্তু তাহা ফেলিল না, সেই জলন্ত কাঠ লইয়া তাহার পশ্চাৎ পশ্চাৎ ছুটিল। কিছুতে ধরিতে না পারিয়া—সেই কাঠ তাহার প্রতি ছুঁড়িয়া মারিল—তাহার কাপড়ে আগুন ধরিয়া গেল, তখন সেই পিশাচী ছুটিয়া বাহির হইয়া গেল।

চত্বারিংশ পরিচ্ছেদ ।

চারিদিকে লোক জন, চারিদিকেই ভিড়। আগে হইলে বিভা সঙ্কোচে মরিয়া যাইত, আজ কিছুই যেন তাহার চোখে পড়িতেছে না। যাহা কিছু দেখিতেছে সমস্তই যেন বিভার মিথ্যা বলিয়া মনে হইতেছে। চারিদিকে যেমন একটা কোলাহলময় স্বপ্নের ঘেঁসাঘেসি—কিছুই যেন কিছু নয়। চারিদিকে একটা ভিড় চোখে পড়িতেছে এই পর্যন্ত—চারিদিক হইতে একটা কোলাহল শোনা যাইতেছে এই পর্যন্ত—তাহার যেন একটা কোন অর্থ নাই।

ভিড়ের মধ্য দিয়া রাজপুরীর দ্বারের নিকট আসিতেই একজন দ্বারী সহসা বিভার হাত ধরিয়া বিভাকে নিবারণ করিল—তখন সহসা বিভা এক মুহূর্ত্তে বাহু জগতের মধ্যে আসিয়া পড়িল—চারিদিক দেখিতে পাইল—লজ্জান্বিত মরিয়া গেল। তাহার ঘোমটা খুলিয়া গিয়াছিল, তাড়াতাড়ি মাথায় ঘোমটা তুলিয়া দিল। রামমোহন আগে আগে যাইতেছিল; সে পশ্চাৎ ফিরিয়া দ্বারীর প্রতি চোখ পাকাইয়া দাঁড়াইল—অদূরে ফণাণ্ডি ছিল, সে আসিয়া দ্বারীকে ধরিয়া বিলক্ষণ শাসন করিল। বিভা প্রাসাদে প্রবেশ করিল। অস্ত্রাশ্রয় দাস দাসীর স্থায় বিভা প্রাসাদে প্রবেশ করিল—কেহ তাহাকে সমাদর করিল না !

ঘরে কেবল রাজা ও রমাই ভাঁড় বসিয়াছিলেন। বিভা

গৃহে প্রবেশ করিয়া রাজার মুখের দিকে চাহিয়াই রাজার পায়ের কাছে ভূমিতে পড়িয়া গেল । রাজা শশব্যস্ত হইয়া দাঁড়াইয়া জিজ্ঞাসা করিলেন—“কে তুই? ভিখারিণী ভিক্ষা চাহিতে আসিয়াছিস্?”

বিভা নত মুখ তুলিয়া অশ্রু পূর্ণ নেত্রে রাজার মুখের দিকে চাহিয়া কহিল—“না মহারাজ, আমার সর্বস্ব দান করিতে আসিয়াছি! আমি তোমাকে পরের হাতে সমর্পণ করিয়া বিদায় লইতে আসিয়াছি!”

রামমোহন থাকিতে পারিল না, কাছে আসিয়া কহিল—“মহারাজ, আপনার মহিষী, যশোহরের রাজ-কুমারী।”

সহসা রামচন্দ্র রায়ের প্রাণ যেন কেমন চমকিয়া উঠিল—কিন্তু তৎক্ষণাৎ রমাই ভাঁড় হাসিয়া রাজার দিকে কটাক্ষ করিয়া কঠোর-কণ্ঠে কহিল—“কেন এখন কি আর দাদাকে মনে ধরে না না কি?”

রামচন্দ্র রায়ের হৃদয়ে করুণার আভাস জাগিয়া উঠিয়াছিল, তথাপি রমাইয়ের কথায় তিনি নিষ্ঠুর হাস্য করিয়া উঠিলেন—তিনি ভাবিলেন—বিভাকে এখন মমতা দেখাইলে পাছে উপহাসাস্পদ হইতে হয়।

বিভার মাথায় একেবারে সহস্র বজ্রাঘাত হইল—সে লজ্জায় একেবারে মরিয়া গেল—টোক বুজিয়া মনে মনে কহিল—মা গো, বহুদুর, তুমি বিধা হও! কান্ডর হইয়া

বেয়া... আমাকে, আমার মাঠাকরুণকে
বেটা অপমান করিল—উহার হইয়াছে কি, আমি উহার
মাথা মুড়াইয়া ঘোল ঢালিয়া দহর হইতে বাহির করিয়া
দিব, তবে আমার নাম, রামমোহন ! ”

রাজা রামমোহনকে ধমক দিয়া কহিলেন—“কে আমার
মহিষী ? আমি উহাকে চিনি না ! যশোর হইতে যে
হউক—একজন ভিক্ষুক আসিয়া মহিষী বলিয়া পরিচয়
দিলই হইল ! ”

বিভার মুখ নীল হইয়া গেল, সে মুখে আঁচল চাপিয়া
ধরিল, থর থর করিয়া তাহার সর্ব্বাঙ্গ কাঁপিতে লাগিল, ও
অবশেষে কাঁপিতে কাঁপিতে বিভা মুচ্ছিত হইয়া ভূমিতে
পড়িল । তখন রামমোহন বোড় হস্তে রাজাকে কহিল—
“মহারাজ, আজ চার পুরুষে তোমার বংশে আমরা ঢাকরী
করিয়া আসিতেছি । বাল্যকাল হইতে তোমাকে পালন
করিয়াছি । আজ তুমি আমার মাঠাকরুণকে অপমান করিল,

সহে প্রবেশ করিয়া রাজার নুখে নিকে চাহিয়াই পড়িয়া
পারেন কাছে ভূমিতে পড়িয়া গেল। রাজা শশব্যস্ত হইয়া
দাঁড়াইয়া জিজ্ঞাসা করিলেন—“কি হইল? ভিতর কি ভয়
চাহিতে আসিয়াছিল?”

বিভানত মুখ তুলিয়া অশ্রু পূর্ণ নেত্রে রাজার দিকে
চাহিয়া কহিল—“ন, মহারাজ, আমার নরক
কঠিতে আসিয়াছি। আমি তোমাকে পরের হাতে
করিয়া বিক্রয় করি নাই আসিয়াছি।” রাজা শশব্যস্ত হইয়া
আনিল। দ্বারের নিকট অনেক জন লোকসংগে তাহার
মধ্যে একটিতে হতজ্ঞান অবসন্ন বিভাকে তুলিয়া নৌকায়
ফিরিয়া আসিল।